


Yus Papí: Shuarjai
Yus Yamaram Chicham
Najanamu



New Testament in Shuar (EC:jiv:Shuar)

**Yus Papi: Shuarjaj Yus Yamaram Chicham Najanamu
New Testament in Shuar (EC:jiv:Shuar)**

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

MATEU	1
MÁRKUS	52
RÚKAS	85
JUAN	141
TÚRAMU	180
RÚMANAM	233
1 KURINTIUNAM	254
2 KURINTIUNAM	275
KARASEANAM	289
IPISIUNAM	298
JIRIPIUSNUM	306
KURUSENAM	312
1 TISARÚNIKIANAM	317
2 TISARÚNIKIANAM	322
1 TIMIUTÉUN	325
2 TIMIUTÉUN	331
TITIUN	335
JIRIMIÚNKAN	338
ISRAERNUM	340
SÁNTIAK	356
1 PÍTIUR	362
2 PÍTIUR	369
1 JUAN	373
2 JUAN	379
3 JUAN	380
JÚTAS	381
APUKARÍPSIS	383

Yúsan Shiir Chichamen MATEU aarmia nu

Jesukrístu weatrí (Rúkas 3.23-38)

¹ Jesukrístu weatrí ju áiniawai. Tura ashí nan̄kaamas ti uunt weat Tawitcha Apraámsha áiniawai.

² Apraáma uchirí Isak. Tura Isaka uchirí Jakup. Jakupa uchirísha Jutá ni yachijjai.

³ Tura Jutá uchirín Páresan tura Sarancha Tamar jurermiayi. Páresa uchirísha Esrum, nuna uchirísha Aram.

⁴ Nuna uchirísha Aminiatáp. Nuna uchirísha Nasun. Nuna uchirísha Sarmun.

⁵ Sarmun̄ka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaí.

⁶ Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

⁷ Sarumún̄ka uchirí Rupuam. Nuna uchirísha Apías. Nuna uchirísha Asa.

⁸ Asa uchirísha Jusapát. Nuna uchirísha Juram. Nuna uchirí Usías.

⁹ Usíasa uchirí Jutam. Nuna uchirí Akas. Nuna uchirí Esekías.

¹⁰ Esekíasa uchirí Manasés. Nuna uchirí Amun. Nuna uchirí Jusías.

¹¹ Jusíasa uchirí Jekunías ni yachi armia nujai. Nuí Papirúnianmaya shuar Israer shuaran mesetjai nupetkar Papirúnia nun̄kanam achirar júkiarmiayi.

¹² Nu ukunman̄ka Jekuníasa uchirí Saratiár akiiniamiayi. Tura nuna uchirí Surupapír.

¹³ Surupapíra uchirí Awiut. Nuna uchirí Iriakím. Nuna uchirí Asur.

¹⁴ Asura uchirí Satuk. Nuna uchirí Akim. Nuna uchirí Eriut.

¹⁵ Eriuta uchirí Ereasár. Nuna uchirí Matan. Nuna uchirí Jakup.

¹⁶ Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti.

¹⁷ Tuma asamtai Apraámnumia Tawitnium Jesusa weatrí katurse (14) áiniawai. Tawitniumiasha Papirúnianam jukimiunma nuísha katurse weat áiniawai. Papirúnianam jukimiunmayasha Krístunam ataksha katurse áiniawai.

Jesukrístu akiiniamu (Rúkas 2.1-7)

¹⁸ Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaniatsain̄ Yusa Wakaní ajaprumtikiamiayi.

¹⁹ Ajaprukmetaisha Jusé Marin iniatsaatsuk nin ajapatniun enentáimpramiayi. Tura ti pénker asa aya iniaisatniun wakerimiayi aents nékainiatsain̄.

²⁰ Nuna tu enentáimia pujái, mesekranam Yusa suntari tarí chicharuk tímiayi “Juséá, ame weatrum Tawitchakait. Tuma asam Marijjai nuatnaikiatin ashamkaip. Uchin jurertatna nuka Yusa Wakaníniuiti.

²¹ Uchin áishman̄kan takustatui tura nuna naari *JESUS* anaikiattame. Ashí ni shuarín ni tunaariya uwemtikiartin asa Jesus anaikiatniuiti” tímiayi.

²² Yus ni etserniurijjai yaunchu timia nu uminkiat tusa nu túrunamiayi. Juna áamtikramiayi:

²³ “Nuwa natsa ajapruktatui tura uchin takustatui. Nuna náarisha Emanuér anainiaktatui.” Tu áarmaiti.

Emanuérsha nu chichamnum “Yus iijjai pujuwiti” tawai.

²⁴ Jusesha mesekranmaya shintiar Yusa suntari timia núnisan̄ Marin nuatkamiayi.

²⁵ Tura uchin júreatsain tsañinchamiayi. Tura jurermatai uchin Jesus anaikiamiayi.

2

Ti neka apach Jesusan eakarmiania nu

¹ Jutía nunkanam Piriñ pépru ana nuí Jesus akiiniamiayi. Nuísha nú nunka akupniurí Irutisauyayi. Akiiniamtai ti neka apach nantu tátainmaaniya Jerusareñ péprunam táarmiai.

² Taar inintruiniak “¿Israer shuara úunt akupniurí tui akiiniait? tiarmiayi. Nantu tátainmaani pujaati ni yaari wáinkiamji. Tura tikishmatratai tusar winiaji” tiarmiayi.

³ Irutis nuna antuk nusháa enentáimpramiayi. Tuma asamtai ashí Jerusareñnumia shuarsha antukar nusháa enentáimprarmiayi.

⁴ Irutis nuikia ashí Israer-patri uuntrincha tura yaunchu akupkamun jintinniuncha untsukarmiayi. Tura Kristu akiiniatniurín inintrusmiayi.

⁵ Tutai chichainiak “Jutía nunkanam Piriñ pepru ana nuí akiiniatniuiti, tiarmiayi. Yaunchu Yúsnan etserin tu áaruiti:

⁶ “Jutía nunkanam, Piriñ pepru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar ásarmatai, péñker wáinkiattawai,” tawai Yus.” Tu tiarmiayi.

⁷ Nuna tuíniakui Irutis ti neka apachin úusan, urutía yaa emka wáinkiamarum tusa aniasarmiayi.

⁸ Nuyá Piriñnum akupeak “Nuí werum uchi péñker inintrusrum wáinkiatarum. Tura wáinkiarum ujakatarum. Wisha werin tikishmátuutaj” tímiayi.

⁹⁻¹⁰ Tutai ti neka apach wearmiayi. Tura yaa, yajaya wáinkiamiania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuí ejeniarmiayi.

¹¹ Jeá wayawar uchincha ni nukurí Marijjai wáinkiararmiayi. Tura uchin tikishmatrarmiayi. Nuyá ni kajuntriyan kurincha, mirá kunkuinniasha, chíkich kunkuinniasha súsarmiayi.

¹² Nuyá mesekranam Yus “Irutisaini weerap” tutai chíkich jintianam waketkiarmiayi.

Ejiptunam pisaamu

¹³ Ti neka apach waketrantai Yusa suntari mesekranam Jusen ujakmiayi. “Nantakim uchi ni nukuríjjai Ejiptu nunkanam jukim nuí pujustá. Irutis uchin máataj tusa eaktatui. Tura ukunam ankant ajasmatai ujaktajme” tímiayi.

¹⁴ Tutai Jusé kurat shintiar nú káshik uchincha nukuríjjai Ejiptunam jukimiayi.

¹⁵ Irutis jáatsain nuí pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi: “Ejiptunmayan winia Uchirun untsukmajai.”

Tu áarmiai.

Irutis uchin máawarat tusa akupkamu

¹⁶ Irutissha ti neka apach nin anañka yajá waketran nekáa ti kajekmiayi. Ti kajek ashí áishmanchin Piriñnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi.

¹⁷ Nuka Yusnan etserin Jeremías aarmia nu uminkiamiayi. Juna áarmiai:

¹⁸ “Ramá nunkanam ti úutainiak uur ajainiawai. Raker ti uutu asa atsañkrachminiaiti ni uchirí jákarmatai.” Tu áarmiai.

¹⁹ Tura Irutis jakamtai Yusa suntari mesekranam Jusen ujakmiayi.

²⁰ “Uchin máataj tiarmia nuka jákarai. Yamaikia ataksha uchi ni nukuríjjai jukim Israer nunkanam waketkitia” tímiayi.

²¹ Tutai Jusé nantaki uchincha nukuríjiaí jukin Ejiptunmaya Israer nunkanam waketkimiayi.

²² Túrasha Irutisa uchirí Arkiráu Jutía nunkanam uunt akupin ajasun nekáa nui wétinian aránkamiayi. Mesebranmasha ujakma asa nui pujutsuk Kariréa nunkanam wémiayi.

²³ Nui jeá Nasarét péprunam pujusmiayi. “Nasarétnumiá átatui” Yusnan etserin yaunchu tu etserkamu nujai uminkiamiayi.

3

Imiakratin Juan atsamunam etserkamiania nu (Márkus 1.1-8; Rúkas 3.1-9, 15-17; Juan 1.19-28)

¹ Nuyá imiakratin Juan Jutía nunkanam aents atsamunam etserki támiayi.

² “Enentáim yapajíatarum. Tsawant ishichik ajasai Yus jui akupin ajastin.” Tu etserkamiayi.

³ Nú Juan kan yaunchu Yúsnan etserin Isayas juna áarmiayi: “Shuar atsamunam aents untsümü. Untsumuk “Atumí enentái Uunta jinti iwiarturatum tura naka awajsatarum” tawai.” Tu áarmiayi.

⁴ Nu Juan sha kamiyu ure najantramun entsauyayi. Emenmamkesha nuapeyayi. Tura yutai-títikriátsnasha chinijiaí yúuyayi.

⁵ Tura Jerusarén péprunmaya shuarsha tura ashí Jutía nunkanmaya shuarsha Jurtañ entsanam matsamiarmia nú shuarsha mash Juán kan tariarmiayi ni chichamen an-turkatai túsar.

⁶ Tura ni tunaarín paant etserkarmatai Juan Jurtañ entsanam imiainiarmiayi.

⁷ Juan sha Pariséuncha Satuséuncha imiatti tusa wininian wáiniak tímiayi “Napia áaniutirmincha, ¿ya atumniasha ti asutniátniunmaya uwempratniuncha ujatmakmarum? tímiayi. Asutiátin tsawant ishichik ajasai.

⁸ Tuma asantai enentáim yapajíamuitkiuinikia péñker wekaamurmijiaí paant iniak-mastarum.

⁹ Atumsha “Iikia Apraám weeitji” tu enentáimtumasairap. Nujai uwemprashtatrome. Yus wakerakka ju kayan Apraáman tiran ki najankainti, tímiayi.

¹⁰ Numi ajaktinia áintsan kampuwarín jacha atuttsamuiti. Tura numi péñker nereat-sna nuka tsupikia jinium apeamu ártatui.

¹¹ Wikia aya entsajain imiajrume atumi enentái yapajíawakrumin. Antsu winia ukuruí winiana nuka péñker awajtamsataj tusa imiantinia áanis tura já áanis Yusa Wakanin enketramprattarme. Wijiaí nan kaamantu asantai wikia tsuntsumpruan ni sapatrínkisha atitrachminiaitjai.

¹² Aruusa nerejai túruinia áintsan átatui. Awajtiutairín achikiuiti tura nujai saepen awajtittiwai. Tura neren péñker ikiustatui, antsu saepénka jinium apeattawai. Nu jisha tuke kajinchaiti.” Tu tímiayi Juan.

Juan Jesusan imiainiu amia nu (Márkus 1.9-11; Rúkas 3.21-22)

¹³ Nuyá Jesus Kariréa nunkanmaya winis Jurtañ entsanam támiayi Juan imiatti tusa.

¹⁴ Juan sha emka nakitiak Jesusan tímiayi “Ame winia imiatminiaitme. Túrutamniaiatmesha ¿urukantai winia tarutnium?” tímiayi.

¹⁵ Tura Jesus tímiayi “Ántsan asati yamaikia. Núnisrik ashí Yus akupkamu umirkat-niuitji.” Tutai Juan iniaisamiayi.

¹⁶ Tura Jesus imiani entsaya jíinkímtai nayaimpⁱ uranmiayi. Tura Yusa Wakaní yámpitsa áintsan Jesusan tarimiayi. Niisha wáinkíamiayi.

¹⁷ Túramtai nayaimpinmaya Yus chichaak “Juka winia Uchiruiti. Ti aneamuiti. Ti shiir enentáimtaji” tímiayi.

4

*Uunt iwianch Jesusan anankataj tímiania nu
(Márkus 1.12-13; Rúkas 4.1-13)*

¹ Nu túrunamtai Yusa Wakaní Jesusan iwianchjai nekapmamtiksattsa aents atsamunam jukimiayi.

² Nuí kuarenta (40) tsawant, káshisha tsawaisha yurumtsuk pujak tsukarmiayi.

³ Nuí uunt iwianch Jesusan nekapsataj tusa tarí tímiayi “Nekas Yusa Uchirinkiumka ju kaya apatuk najanata.”

⁴ Tutai Jesus tímiayi “Yus-Papinium áarmaiti:

“Aents aya apatkujaiñ iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

⁵ Tutai uunt iwianch Jerusaréñ péprunam jukí Yusa Uunt Jee cháikín iwiak

⁶ tímiayi “Nekas Yusa Uchirinkiumka juyá akaikim iniaata. Kame Yus-Papinium áarmaiti:

“Yus ni suntarín akatar akúptúrmaktatui. Nawemin kayanam ajiintsumniñ wenkurmaktatui” tawai” tímiayi.

⁷ Tutai Jesus tímiayi “Núnisan Yus-Papinium áarmaiti:

“Ame Úuntrum Yus “Nekapsataj” tiip” tawai” tímiayi.

⁸ Ataksha uunt iwianch naint yakí wájakmanum iwiakmiayi tura nuyá ashí nunkanmayá péprun shiira nuna iniaktusmiayi.

⁹ Tura tímiayi “Winia tikishmatrurakminkia juna mash amastatjai.”

¹⁰ Tutai Jesus tímiayi “Werumta, uunt iwianchi. Yus-Papinium aarma awai:

“Ame Úuntrum Yúsak tikishmatrata tura Niñki shiir awajsata” tawai” tímiayi.

¹¹ Tutai uunt iwianch Jesusan ikiuak wémiayi. Túramtai Yusa suntariñ tariar atsumamuriñ súarmiayi.

*Jesus Kariréa nunkanam etserkamiania nu
(Márkus 1.14-15; Rúkas 4.14-15)*

¹² Juan sepunam enketui taman antuk Jesus Kariréa nunkanam wémiayi.

¹³ Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkariñ pujumiayi. Ti yaunchusha Jakupu uchirí Sapurúnsha tura Niptarísha nu nunkanak nuí pujustaitсар achikiaruyayi.

¹⁴ Jesus nuna túramtai yaunchu Yúsnan etserin Isayas aarmia nu uminkiamiayi. Juna áarmiayi:

¹⁵ “Sapurúnsha Niptarísha nayaantsanam tíjiuch Jurtañ entsa amainini nunkan achikiarmiayi. Nuka Kariréaiti Israer-shuarcha matsatainia nuí.

¹⁶ Nu aents kiritniunam pujuiniayatan ti tsáapninián wáinkiarimiayi. Jákatniunam pujuiniañ tsáapin tsáapnirmiayi.” Tu áarmaiti.

¹⁷ Nuyá Jesus étseruk tímiayi “Tunaarum enentáimturum enentáim yapajiátarum. Ju nunkanam Yus akupkatin tsawant ishichik ajasai.”

*Jesus kuaru aents namakan achinian ni unuinamuriñ ajasarat tusa achikmiania nu
(Márkus 1.16-20; Rúkas 5.1-11)*

¹⁸ Jesus Kariréa antumianka kánmatkariñ wesa jimiará áentsun nuámtak yáchinini wáinkiamiayi. Chikichik Antresauyayi, chikichcha Semunkauyayi. Nu Semun núnisan Pitru náartiniuyayi. Namakan achin ásar namakan nekajai nanquíak yujaarmiayi.

¹⁹ Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamáí namak achíarmena núnisan shuaran-eau awajsatjarne.”

²⁰ Tutai ni nekarin ikiukiar Nin nemiarimiayi.

²¹ Nuyá ishichik wésan ataksha nuámtak yachinniun wáinkiámiayi. Jakupu Juanjaj mai Sepetéu uchirí ármiai. Niisha kanunam enkemsar ni nekarin ni aparíjaj iwiarainiak pujuriarmiayi. Tura Jesus “Nemartusta” tutai

²² nu chichamaik kanuncha tura aparíncha ikiukiar Jesusan nemariarmiayi.

Jesus untsurí shuaran jintintiamiania nu

(Rúkas 6.17-19)

²³ Ashí Kariréa nunkanam Jesus Israer-shuar iruntainiam etserki wémiayi. Yus ju nunkanam akupkatin chichaman etserkamiayi. Tura untsurí sunkurjaj jáinian ashí tsuármiai.

²⁴ Ashí Siria nunkanam Jesus tsuákratman nekaawar ashí nánkamas sunkurjaj wáitin armia nuna Jesusan tsuarti tusa itiararmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuármiai.

²⁵ Tura untsurí shuar Jesusan nemariarmiayi. Kariréa nunkanmayasha, Tekapuris-numiasha, Jerusaréñ péprunmayasha, Jutía nunkanmayasha, Jurtañ entsa amainiyasha Jesusan nemariarmiayi.

5

Náinnium Jesus etserkamu

¹ Jesus untsurí shuar káunkarun wáiniak náinnium waka nuj pujusmiayi. Tura ni unuiniamurisha taar pujusarmiayi.

² Nuyá Jesus júnis unuiniamiayi.

Warastin ainia nu

(Rúkas 6.20-23)

³ “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinniuitrume.

⁴ Kúntuts pujarum nu warastarum. Yus atsan tamprattarme.

⁵ Péejchach enentáimtumarmena nu warastarum. Yus ashí nunkan amastatrume.

⁶ Eseer wekasataj tusa aya kitiamarum nu warastarum. Yus imiktamprattarme.

⁷ Waitnenkratniutiram warastarum. Yus waitnentramprrattarme.

⁸ Péñker enentáimniutiram warastarum. Yus wáinkiáttarme.

⁹ Chícham iwarin árum nu warastarum. Yusa uchirí turamartatui.

¹⁰ Péñker túrakrumin yajauch awajtamainiakui warastarum. Yus akupeamunam pachiiniuitrume.

¹¹ Wíi shuar asakrumin katsekramainiakuisa, itit awajtamainiakuisa, tura ashí tsanumprutmainiakuisa warastarum.

¹² Núnisan yaunchu Yúsnan etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péñker akinkiattarme’ tímiayi.

Ju nunkanam átum tsáapninia áintsarum tura weeya áintsarum árumé

(Márkus 9.50; Rúkas 14.34-35)

¹³ ‘Átumka ju nunkanam wee ana áintsan ketrume. Tura wéeaitiat jeakchaitkiunka míchuiti. ¿Nusha itieur yuámniak ati? Antsu ántraiti. Tuma asantai aa najatai tepet tusar ajapashtinkiait’ tímiayi.

¹⁴ ‘Átumka ju nunkanam shiripkia áintsan ketrume. Náinniumka pepru úumkachminiaiti.

¹⁵ Núnisan shiripik ekeemakam kajunnum enkeatsme. Antsu yakí sukúatsmek ashí jeanam ana nu paant atí tusam.

¹⁶ Núnisan atumsha Yusjaj péñker túramu paant atí. Tura ashí aents nuna iisar niisha Yus Apan shiir awajstartatui’ tímiayi.

Yaunchu akupkamun pachis Jesus unuiniamiania nu

¹⁷ ‘Muisais akupkamuncha tura yaunchu Yúsnan etserin etserkarmia nuna ántar awajsattawai’ turutiirap. Antsu nuna Wikia umiktaj tusan táwitjai.

¹⁸ Nekasan tájarne. Ashí túrunatniua nu amúatsain nu akupkamu ishichkisha yapa-jniáshtatui. Nayaimpisha tura nun_kasha tuke amúatsain nu akupkamusha amuukash-tatui.

¹⁹ Nu asamtai shuar chikichik akupkamun, yúpichuch ana nunaksha, umirchakka tura chíkich shuaran umirkashtinian unuiniakka Yus nekas akupin paant ajastatna nuí nú shuar uunt áchattawai. Antsu ashí shuar akupkamun umíana nu tura chíkich shuaran umirkatniun unuiniiana nusha Yus nekas akupin paant ajastatna nuí, nu shuarka uunt átatui.

²⁰ Tuma asamtai Yus akupeamunam pachiinkiataj tákumka Pariséujai nan_kaamas tura akupkamu jintinniu_jai nan_kaamas eseera wekasatniuitrume’ tímiayi.

Kajeamun pachis Jesus unuiniamiania nu

(Rúkas 12.57-59)

²¹ ‘Yaunchu tiniu armia nu ántichukaitrum: “Mañkartuawairap. Mañkartana nuka asutniátniuiti” tiniu ármiai.

²² Tura Wisha tájarne: Shuar ni yachin aya kajerakka nusha asutniátniuiti. Ni yachin kátsekea nuka akupniunam junaktiniaiti. Tura ni yachin “netsé” tákun_ka jinium akupnakminiaiti.’

²³ ‘Tuma asamtai Yus susataj tusam wakerakum tura ame yatsum ámin itit enentáimturman enentáimpramka,

²⁴ suamu nuí ikiuakum emka ame yatsum werim niijjai iwiarata. Turam waketkim Yus suam nu susata.’

²⁵ ‘Shuar úuntnum júramkuinkia jintian wesam niijjai iwiarata úuntnum ejetamtsain. Túrachakminkia úuntnum surutmaktatui tura niisha suntarnum surutmaktatui tura sepunam enketmattawai.

²⁶ Tura nekas tajai, nuí enkemamka ashí rearchisha akikmachkumka jíinkishtatme’ tímiayi.

Tsanirmatniun pachis Jesus unuiniamiania nu

²⁷ ‘Yaunchu tiniu armia nu ántichukaitrum: “Tsanirmawaip.”

²⁸ Tura Wisha tájarne: Shuar nuwan tsanirmataj tu iiska nu_kia ni enentáin tsanir-mayi.’

²⁹ ‘Tuma asamtai ame jimi tunaanum yajauch awajtamkuinkia ukuinkiam yajá ajap-ata. Ashí ame ayashim jinium esaatsain aya chikichik ayashmi muchitmarí emesratin pé_nkeraiti.

³⁰ Ame ewejmesha untsuurmetiat tunaanum ajunmakuinkia tsupikiam yajá ajapata. Ashí ame ayashim jinium esaatsain aya chikichik ayashmi muchitmarí emesratin pé_nkeraiti.’

Nuwa ajapatniun pachis Jesus unuiniamiania nu

(Mateu 19.9; Márkus 10.11-12; Rúkas 16.18)

³¹ ‘Núnisan yaunchu tiniu ármiai: “Shuar ni nuarín ajapatniun wakera nuka papí najana susati.”

³² Tura Wisha tájarne: Shuar ni nuarín tsanirmachun ájapeakka nuwan tsanirmamtiki-aiti. Tura ajapamujai nuatnaiyakka nuka tsanirmaiti.’

Jesus aya nekasa nu titinian unuiniamiania nu

³³ ‘Núnisan yaunchu tiniu ármiai: “Yusa naarí pachisan turattajai” tákumka nekas takamtsuk umiktiniaitme.”

³⁴⁻³⁷ Tura Wisha tájarme: Áyatik “Ee” tákumka tura “Atsá” tákumka wáitruksuk nuke titiá. Támena nu nekas umiktaj takum ame nú arant pachistiniatkiúmka nuka yajauchiiti, iwianchnumiáiti. Ti nekas tajai tusam nayaim pachischatniuitme. Nuka Uunt Yus pujutainti. Nun̄kasha pachischatniuiti Yusa tarimtaiṛi asamtai. Jerusaren̄ péprusha pachischatniuiti Uunt Akupin pujutai nuṛi asamtai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.’

Ikkiatniun pachis Jesus unuiniamiania nu
(Rúkas 6.29-30)

³⁸ ‘Yaunchu tiniu armia nu ántichukaitrum: “Shuar máanikiar jii apujtukka niisha apujtuktiniáiti. Tura naj̄ akarkasha ni naj̄sha akarkatniuiti.”

³⁹ Tura Wisha tájarme: Yajauch shuar taritairap. Antsu ame yapimin ijiutmamtai áatú yapimsha tsan̄katkata.

⁴⁰ Tura pushirmin jurutramkitiaj tákuisha sakurmesha susata.

⁴¹ Tura káarkancha chikichik kirumitruk jurutkitia túramkui ámeke jimiará kirumitru ejeeta.

⁴² Seatmana nu susata. Ikiatmakuisha páchitsuk ikiasta.’

Nemasri aneetniun Jesus unuiniamiania nu
(Rúkas 6.27-28, 32-36)

⁴³ ‘Núnisaṇ̄ tiniu armia nu ántichukaitrum: “Ame shuarum aneeta tura nemasrumka kajerkata.”

⁴⁴ Tura Wisha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta.

⁴⁵ Atumsha nu túrakrum atumí Aparī nayaimpiniam pujana nu túrana áitkiasrumek túrame. Iista, Yus yajauch shuarnumsha péñker shuarnumsha tsáapin awajmatkiatsuk. Núnisaṇ̄ yumincha yajauch shuar pujuiniamunmasha péñker shuar pujuiniamunmasha yútumtiktsuk.

⁴⁶ Aya atumin anenmainia nuke aneakmesha ¿yaki akirmakat? Yajauch shuarsha nuna túrin áiniawai.

⁴⁷ Aya ame yatsumek shiir chichaakmeka ¿warí péñkerak túram? Yus-shuarchasha nuna túrin áiniawai.

⁴⁸ Nu asamtai atumí Aparī Yus nayaimpiniam pujana nujaṛi métek ti péñker átiniaitrum.’

6

Péñker túratniun Jesus unuiniamiania nu

¹ ‘Ashí íimiainiaṇ̄ aya shuar iirsarti tusarum Yusna nu takasairap. Tu takaakrumniñkia Yus Apa nayaimpiniam pujana nu pen̄ké akirmakchattarme.

² Nu asamtai shuar atsuma nu yaiyaḱmeka ashí shuar ujakairap. Anañkartin ainia nuka iruntainmasha tura pepru jintí wekasasha ashí íimiainiaṇ̄ shiir túrajai tusar nuna túrin áiniawai. Junasha “péñker túrawai” tu enentáimturarti tiniu ásar Yus akiátsaṇ̄ aya tu enentáimturmajaiṇ̄ akinkiaruiti, nekas tajai.

³ Antsu átumka atumainia nu yaiyaḱmeka pen̄ké úḱkam túrata. Chikichkisha nu yaṇ̄man nekaashti.

⁴ Úḱkam túrakminkia ame Apa Yus uḱkman wainia nu, nuna akirmaktatui.’

Yus áujsatniun Jesus unuiniamiania nu
(Rúkas 11.2-4)

⁵ ‘Atumsha Yus áujeakrumsha ántar chichamtin ainia núnis áujšairap. Nu shuarka iruntainmasha tura pepru jintísha shuar iirsarti tusa wajakiar Yúsan áujin áiniawai. Nekasan tájarme, Yus akíatsain aya nu iismajain akinkiaruiti.

⁶ Tura ame Yus áujeakmeka ame kuárturmin wayam waiti epenim nuí amek ame Apa Yus áujšata. Nuna ame Apa Yus uuka túramu waitma asa akirmaktatui.’

⁷ ‘Yus áujeakmesha ántram esaram áujšaip. Yúsan nékainiatsna nuka “Esaram áujeakuinkia Yus anturtuktatui” tu enentáimainiawai.

⁸ Niijiaí métek ajasairap. Átumka seatsrumnin Yus Apa átum atsumamun nékawai.

⁹ Nu asamtai Yus áujkuram júnis títiniaitrome:

‘Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti.

¹⁰ Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisaj ju nuñkanmasha uminkiatí.

¹¹ Aparu, ii yurumkarí ashí tsawant amasta.

¹² Tura winia nemasrun tsankurajna núnismek, Aparu, winia tunaaru tumashrisha tsankurturta.

¹³ Tunáa wakeruktin tsankatrukaip. Antsu ashí tunaanumiá uwemtikrurta. Tuke ashí aents akupkanniaitme. Núnisam Amesha tuke ti kakarmaitme. Tura ti shíiraitme. Tuma asakmin seajme. Nuke atí.’

¹⁴ ‘Amesha chíkich shuar yajauch awajtamka nu tsankureakminkia Yus Apa nayaimpiniam pujana nu amincha tsankurtamprattawai.

¹⁵ Tura chíkich tsankureachkumniñkia Yus Apasha ame tunaarmincha tsankurtamprashtatui.’

Ijiarmatniun pachis Jesus unuiniamiania nu

¹⁶ ‘Ijiarmarum Yus áujkurmesha wake mesekrum susuntrairap. Anankartin shuar chíkich shuar “ijiarmaiti” tu enentáimtursarti tusa tuma áiniawai. Nekasan tájame, Yúska akíatsain aya nujai akikma áiniawai.

¹⁷ Antsu ámeke ijiarmamsha péñker temashmaram péñker jaupmitia.

¹⁸ Shuar ijiarmaiti tu enentáimturmasarain. Aya Yus Apak nekaattawai. Tura asa akirmaktatui.’

Kuítian pachis Jesus unuiniamiania nu

(Rúkas 12.33-34)

¹⁹⁻²⁰ ‘Ju nuñkanmaya kuit ikiaunkatniujai nankaamas nayaimpiniam kuit ikiaunkata. Juñkia kayaa yúchakait tura mash meseatsuk. Tura kasasha wayá kasamtsuk. Antsu nayaimpinmanka kayaaasha yuatsui tura mash meseatsui tura kasasha wayá kasamtsui.

²¹ Kuítrum ana nuí enentáimtustatme. Tuma asam nayaimpiniam ikiaunkata.’

Ayashi tsáapnintrí

(Rúkas 11.34-36)

²² ‘Ame jímiijiaí tsáapin amiin wayamniaiti. Tuma asamtai ame jíimi péñkeraitkiuñkia amiin tsáapin wayá tuke tsáapniiti.

²³ Antsu ame jíimi yajauchitkiuñkia tsáapin amiin wayachmin asamtai tuke kiritin átatui. Núnisaj yajauchia nu wakerakmeka péñkera nu ame enentáimiin wayachmin asamtai tuke kirit ajastatui. Nu kiritcha imiá yajauchiti.’

Yussha kuitsha máimtek enentáimtuschaniaiti

(Rúkas 16.13)

²⁴ ‘Shuar jimiará úuntrin umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisaj átumka Yussha kuitcha máimtek enentáimtustin tujinkiattarme.’

Yus ni uchirín péñker wáinkiaiti
(Rúkas 12.22-31)

²⁵ ‘Tuma asamtai tájarme: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschamniakait. Tura ju ayashniasha najana asa entsataincha amaschamniakait.

²⁶ Chínkisha enentáimpratarum. Yaki nanamainiak yurumkan arakmainiatsui. Tura juuk yurumkan ikiuiniatsui. Tuma ain Yus Apa nayaimpiniam pujana nú Yusak áyureatsuk. Atumsha chinikia nú nankaamaschakaitrum.

²⁷ Nu arantcha ti enentáimkiumsha ¿nujai tsakartatmek?’

²⁸ ‘Nuikia ¿urukamtai entsartincha timiá enentáimprum? Iistá, kukujsha takachuitiat tura najanchaitiat

²⁹ ti shíirmach áiniawai. Yaunchu uunt akupin Sarumún ti shiir iwiarmamniuitiat kukujia tímianchayayi.

³⁰ Iis, nupa yamá tsakaawai tura kashin aents tsupikiar jinium epeenawai. Tuma ain Yus ti shiir áentseatsuk. Nuna tura asa atumniasha nú péñker waitmakchattawak. ¿Urukamtai Yus nekas enentáimtatsrum?

³¹⁻³² Ju nunkanam ana nu pachikiairap. Chíkich shuar, Yúsan nékainiatsna nu, warin yuattajⁱ warin umartatajⁱ warin entsartatajⁱ nuna ti pachiiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai.

³³ Tuma asamtai Yusjai shiir wekasatin tura Yus akupkamu ana nu umiktin emka enentáimsatarum. Túrakrumniñkia atsumamurmin Yus suramsattawai.

³⁴ Kashin átatna nujai itiurchat enentáimsairap. Kashinkia nusháa itiurchatrijjai tsawarchattawak. Yamái tsawanta jujai máakchakait.’

7

Chíkich sumamtikiawairap
(Rúkas 6.37-38, 41-42)

¹ ‘Chikicha tunaari ti enentáimtusairap. Núnisan Yus atumí tunaari iirtamsashtatui.

² Chíkich wárik sumamtikiatin enentáimkiumniñkia Yus núnisan sumamtikramattawai. Tura ame chikicha túramuri nekapmarmena nú nekapkajain amincha nekapmarmattawai.

³ Tuma asamtai ¿itiurtsuk atumi jijn numi enketna auk ítskesha atumi yachí jijn tsuat enketusha iyarum?

⁴ Ame jijimin numi tuke enketajsha ¿itiurtsuk ame yatsumi jiyá tsuátan jurustajme tame?

⁵ Antar shuará, ame yáintaj tákumka emka ame jijimin numi enketna nu jusata. Nuyá paant iistatme yatsumi jijn tsuat enketna nu jurustin.’

⁶ ‘Ti shiira nuka yawá súsashtiniaiti. Nuna nakitrar amincha esatmichartimpiash. Kuítrumsha kuchi súsashtiniaiti. Aya najatrachartatuak.’

Yus seekmin suramsattawai
(Rúkas 11.9-13; 6.31)

⁷ ‘Yus seekrumin suramsattawai. Eakrumka wainkiattarme. “Winiajai” tákurmin awaintiamattarme.

⁸ Seana núnaka suíniawai. Eana nuka wáiniui. “Winiajai” tuinia núnaka awainiawai.’

⁹ ‘Ame uchiram apatkun seatmakui ¿kayaash súsaintiam?’

¹⁰ Tura namakan seatmakui ¿napíash súsaintiam?’

¹¹ Nuikia átum yajauchitirmesha atumi uchirí péñker ana nu tuke súuchakaitrum. Nuna nankaamas nuikia seekrumniñkia atumi Aparí nayaimpiniam pujana nu péñker ana nuna suramsashtatuak.’

12 ‘Júnaka Muisaissha Yúsnan etserniusha akupenawai: “Chíkich ámin túrutatí tusa wakerakmeke amesha núnismek túratá.” Tu akupenawai.’

Wañkaram jintiasha tura yupikiach jintiasha

(Rúkas 13.24)

13-14 ‘Wañkaram jintia awai. Wayatniusha yúpichuchiiti. Nuisha untsurí wáiniawai. Tura nusha menkakatniunam jeawai. Túrasha chíkich jintia awai. Nusha yupikiach asa itiurchataiti. Wayatniurisha yupikchiiti. Nuí ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.’

Nerejai numi nekaatainti

(Rúkas 6.43-44)

15 ‘Aneartarum. Wáitruiniak “Wi Yúsnan étserjai” tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawa áinis áiniawai. Pátatek shiir chichainiawai tura ni enentáin yajauch piakuiti.

16 Atumsha túramujai nin nekaatniuitrume. Naranmaya shuiya júukchamniaiti. ¿Tsachiksha kushin̄kiapen nerektatuak?

17 Núnisan̄ péñker numia nu tuke péñkeran nereatsuk. Tura yajauch numia nu yajauchin nereatsuk.

18 Péñker numi yajauchin nereatsui. Núnisan̄ yajauch numi péñkeran nereatsui.

19 Yajauch numi ajakar tsupirar jinium apeashtinkiait.

20 Tuma asamtai wáittrin ainia nuka túramujai nekanattawai.’

Ashikia Yus akupeana nuí jeachartatui

(Rúkas 13.25-27)

21 ‘Aya winia Apar nayaimpiniam pujana nuna wakeramurin umirin ainia nuke Yus akupeamunam pachiinkartatui. Chíkichka “Uuntá, Uuntá” turutainiyat nayaimpiniam jeachartatui.

22 Amuukatin tsawant jeamtai untsurí turutiartatui “Uuntá, Uuntá, ame náaram pachisar ashí nunkanam etserkachmakají. Ame náarmesha pachisar yajauch wakancha jiki akupkamji. Tura ame náaram pachisar aentsti tujintiamu túramji” turutiartatui.

23 Nuí chichainiakui “Werumtarum. Penke nékachuitjiarme. Aya yajauchitrume” títiatjai.’

Péñker ukurma tura yajauch ukurma

(Rúkas 6.47-49; Márkus 1.22)

24 ‘Shuar winia chichamprun antuk umirkanka nu shuar ti péñker enentáimniuiti. Niisha ju shuarjai méteketete. Jeá jeamuk kayanam ukurmai.

25 Tura yumi ti yutuk entsa nujan̄kruamai tura nase ti kakaram umpuimiai. Túmain̄ pukukachmai ni ukurmari kayanam ukuamu asamtai.

26 Tura shuar winia chichamprun antuk umirtukchan̄ka ju shuara núnisan̄ enentáimchaiti. Jeá jeamuk náikminiam ukurmai.

27 Tura yumi yutuk entsa nujan̄kruamai tura nase ti kakaram umpuimiai. Túmakui jeá mash saanaki iniaamai” tímiayi Jesus.

28 Jesus nuna tinia amukmatai ashí shuar ti enentáimprarmiyai.

29 “Yusa kakarmarijjai unuitiamtsujik. Israer-shuara jintinniur̄inkia núnis unuini-ainiatsui” tiarmiayi.

8

Jesus tunamarun tsuarmiania nu

(Márkus 1.40-45; Rúkas 5.12-16)

1 Jesus muraya támatai untsurí shuar Nin nemariarmiayi.

² Nuj shuar tunamaru Jesusan jearin tikishmatramiayi. Tura tímiayi “Uuntá, wakerakmeke tsuáramniaitme.”

³ Tutai Jesus uwejéjaj antin “Wakerajai. Péñker ajasta” tímiayi. Tutai tunamaru ni tunamarmari péñker ajasmiai.

⁴ Tura Jesus tímiayi “Pai, penké etserkaip. Áyatik Israer-patri iniakmamsam Muisais timia nu susata ashí shuar nekaawarti tusam.”

Jesus suntara uchirín tsuarmiania nu
(Rúkas 7.1-10)

⁵ Jesus Kapernáum péprunam wayamtai apachi suntara kapitiántri Nin tarimiayi.

⁶ “Uuntá, tímiayi. Winia uchir tampemaru jeá tepes ti wait ajáa tepawai” tímiayi.

⁷ Jesussha “Ayu, winin tsuartajai” tímiayi.

⁸ Tutai kapitián tímiayi “Uuntá, Ame ti nankaamaku asam winia jearuí wayachminiaitme. Áyatik “Péñker ajásti” tákumin winia uchir péñker ajatrustatui.

⁹ Iista, winiasha akuptuiniatsuk tura wisha suntaran akupenatsjak. Juna “Wetá” takui wéawai. Tura chikichnasha “Winitia” tutai winiawai. Tura takartinian “Ju túratá” tutai umíawai.”

¹⁰ Kapitián nuna tutai Jesus ti enentáimiuk Nin nemarainian tímiayi “Nekasan tájarne, Israer-shuar Yúsan tímiatrus enentáimtin atsawai.

¹¹ Maa, yajaya untsurí shuar Yus akupeana nuj jeawar Apraámjaisha Isakjaisha Jakupjaisha iruntrar yurumáwartatui.

¹² Tura Israer-shuar Yúsnum jeamnia áiniayat aa kiritniunam ajapnawartatui. Nuj ti úutin tura ti wáitsatin átatui.”

¹³ Nuyá Jesus kapitiánin chicharuk “Jeemjin waketkitia. Nekas enentáimtusú asakmin uchiram péñker ajatramsattawai” tímiayi. Túramtai ni uchirí nu chichamtaik péñker ajatsamiayi.

Jesus Pitru tsatsarin tsuarmiania nu
(Márkus 1.29-31; Rúkas 4.38-39)

¹⁴ Jesus Pitru jeen we Pitru tsatsarin tsuemujaj jaa tepan wáinkiamiayi.

¹⁵ Tura ni uwején antiñmatai tsuemun michatramiayi. Tura nuwá nantakin ashí ajamsarmiayi.

Jesus untsurí jáinian tsuarmiania nu
(Márkus 1.32-34; Rúkas 4.40-41)

¹⁶ Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichik chichamjai chicharas jiki akupiararmiayi. Ashí jáiniancha tsuáramiayi.

¹⁷ Yúsnan etserin Isayas “Ii pimpirmaríncha ii sunkuríncha jurutramkimiaji” yaunchu timia nu uminkiatu tusa nu túrunamiayi.

Jesus nemarsatin
(Rúkas 9.57-62)

¹⁸ Shuar untsurí Jesusan káutkarmatai “Entsa amain katiñtai” tímiayi.

¹⁹ Nuj Israer-shuara jintinniuri Jesusan tarí tímiayi “Uuntá, Ámin páchitsuk nemarsatniun wakerajme.”

²⁰ Tutai Jesus tímiayi “Kujanchmasha ni waarin takaktsuk. Chinkisha pasunken takaktsuk. Tura Wi Yúsnumiáitiatan tepestiniur atsawai.”

²¹ Nin nemarniusha tímiayi “Uunta, emka winia aparun iwiarsan ikiuuttajai.”

²² Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

Nasesha entsasha Jesusan umirkarmiania nu
(Márkus 4.35-41; Rúkas 8.22-25)

²³ Nuyá Jesus ni unuiniamurijjai uunt kanunam enkemámiayi.

²⁴ Nui nase ti kakaram umpuimtai antumian ti tamparintin ajasmiayi. Tura entsa kanunam yarána piákmiayi. Tuma ain Jesus kanunam kanar tepemiayi.

²⁵ Nuyá ni unuiniamuri kúrashim Jesusan ishintiarar tiarmiayi “Uuntá, wayaji. Kakaram ajachkumniñkia jakattaji.”

²⁶ Jesus tímiayi “¿Urukamtai timiá ashamarum, Yus enentáimtutskesha?” Nuyá wajaki nasencha entsan cha chicharkamiayi. Tutai mash miaaku ajasmiayi.

²⁷ Nuna íisar ni unuiniamuri ti enentáimsarmiayi. Tura tiarmiayi “Júsha ¿warí áentsuit? Nasésha entsasha Nin umirainiatsuk” tiarmiayi.

Jatara nunkanam Jesus yajauch wakantrukun tsuármiania nu
(Márkus 5.1-20; Rúkas 8.26-39)

²⁸ Nuyá Jesus entsá amaini katin Jatara nunkanam jeamiayi. Nui jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nankaamachu ármiai.

²⁹ Niisha Jesusan wáinkiar kakantar tiarmiayi “¿Warí pujuram iijjai, Jesusá, Yusa Uchiría. Tsawant jeatsain in amukratkataj tusamek taum?” tiarmiayi.

³⁰ Nui arant kuchi untsurí shushunmak yujaarmiayi.

³¹ Yajauch wakancha Jesusan seainiak “Jiiki akupkartakmeke kuchíniam wayatin tsankatkartukta” tiarmiayi.

³² Tutai Jesus “Pai, wetarum’ tímiayi. Yajauch wakancha shuara enentáiya jíinkiar kuchiniam enkemáwarmiayi. Túramtai kuchi wáurkiar arau utsanamiayi. Nuyá entsá iniankar jakerarmiayi.

³³ Kuchí wáinniusha nuna ashamkar péprunam tseke wéarmiayi. Nui jeawar ashí túrunamun etserkarmiayi. Yajauch wakantrukun péñker ajasmancha etserkarmiayi.

³⁴ Nuyá ashí nú peprunmaya shuar Jesusan inkiuntai tusar ashinkiararmiayi. Tura inkiunkar ni nunkeya waketkiti tusar seawarmiayi.

9

Jesus emearun tsuármiania nu
(Márkus 2.1-12; Rúkas 5.17-26)

¹ Nuyá Jesus kanunam enkemar antumian amaini katinmiayi. Tura nui ni péprurin Kapernáumnum jeamiayi.

² Nui jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarmatai Jesus jaan tímiayi “Uchirú, kakaram ajasta. Ashí ame tunaarum tsankuramuiti.”

³ Takui Israer-shuara jintinniuri yajauch enentáimprar “Juka Yúsan ti yajauch chicharui” tiarmiayi.

⁴ Tu enentáimainian Jesus nekáa tiarmiayi “¿Urukamtai imiá yajauch enentáimprum.

⁵ Tua imiá yúpichuchit. Shuara tunaarin tsankuratin yúpichuchikiait. Tura emearun “Nantakim wekasata” titin yúpichuchikiait?

⁶ Wi Aents Ajasua núchakaitiaj. Ju nunkanam Wi tunaan asakátratniuitjai. Wátsek, nu nekaatarum tusan juna iniakmastatjai.” Nuna tinia emearun “Wajaktia, tepetairam jukim jeemiin wetá” tímiayi.

⁷ Tutai emearu tsuámar nantaki ni jeen wémiayi.

⁸ Tura nuna ashí aents wáinkiar Yus kakarman shuáran susa asamtai ashamkar Yúsan shiir enentáimtusarmiayi.

Jesus nemartusat tusa Mateun achíawai
(Márkus 2.13-17; Rúkas 5.27-32)

⁹ Nuyá Jesus wémiayi. Nuj wesa Mateun kuit júutainium pujan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

¹⁰ Nú ukunmasha Mateu jeen yurumuk pujaj yajauch armia nu Israer-shuar untsurí káunkar Jesusa unuiniamurijjaj irunar yurumiarmiayi.

¹¹ Pariséusha nuna ísar Jesusa unuiniamurin aniasarmiayi “¿Urukamtia atumí Uuntri kuitia achinjaisha tunaarinniujaisha irunar yuruma?”

¹² Tura Jesus nuna antuk tímiayi “Pénker ainia nuka tsuákratniun atsumainiatsui. Antsu jainia nu tsuákratniun atsumainiawai.

¹³ Werum ju aarma unuimiutarum:
“Murik maam Winia surusum nujaj “máakete” tátsujai. Antsu waitnenkartutain wakerajaj,” Yus-Papinium tu áarmaiti.

Wikia “pénkeraitjai” tuínian untsuktaj tusan táchaitjai. Antsu tunáa shuar ni enentáin yapajáwarat tusan táwitjai” tímiayi.

*Ijiarmatniun Jesusan aniasarmiania nu
(Márkus 2.18-22; Rúkas 5.33-39)*

¹⁴ Nuyá imiakratin Juanka unuiniamurj Jesusan tariar aniasarmiayi. “¿Urukamtai iikia tura Pariséusha ijiarmaji tura ame unuiniamurmeka ijiarmainiatsu?” tiarmiayi.

¹⁵ Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakuí úutchamin áiniawai. Núnisan Wi pujakuí ijiarmashtin áiniawai. Tura tsawant jeattawai nuatua áintsan Wi junaktatjai. Antsu nuikia ijiarmawartatui’ tímiayi.

¹⁶ ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nankaamas jaaktatui.

¹⁷ Nijiamanch yamáí nawar nuap najanamun arutnum yaraachminiaiti. Túramka kariak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniaiti. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai pénker ártatui.”

*Jesus Jairu nawantrincha tura chíkich nuwancha tsuármiania nu
(Márkus 5.21-43; Rúkas 8.40-56)*

¹⁸ Jesus nuna taj Israer-shuara uuntri Jesusan tarí tikishmatar tímiayi “Winia nawan-tur jarutkayi, tura Ame winim ewejmijjaj antintrukakminkia ataksha nantaktiatui.”

¹⁹ Tutai Jesus ni unuiniamurijjaj wajakiar niijjaj wearmiayi.

²⁰ Tura jintiá weenaj nuwa tuse (12) uwitin numpá ajapeak wáitias pujú asa Jesusa ukurinj amainian ni pushirin antinmiayi.

²¹ “Áyatik ni pushirin antiñnaka pénker ajastatjai” tu enentaimpramiayi.

²² Nuna nekáa Jesus ayantar nuwan tímiayi “Shiir enentáimprata, nawantru. Yus shiir enentáimtusu asam pénker ajasume.” Nu chichamtaik ni jáamurj pénker ajasmiayi.

²³ Nuyá Jesus uunta jeen jeamiayi. Tura nuj charaatum ajainiancha tura jakan iwiarsatai tusar péeman umpuinioncha wáiniak

²⁴ tímiayi “Aa jíintratarum. Nuwachikia jákachai antsu aya kanarai.” Penké jakan nékayat túratta nuna neka asa “aya kanarai” tímiayi. Takui aents Nin wishikrarmiayi.

²⁵ Tura nuna ashí jjiir Jesus jeá wayá nuwachin uwejnum achik iniantkimiayi. Túram nantakmiayi.

²⁶ Nu túramu ashí nu nunkanam etsernarmiayi.

Jesus kusurun jímiaran tsuármiania nu

²⁷ Nuyá Jesus wéakui jimiará shuar jji kusuru untsumki weriarmiayi. “Uuntá, ii Uuntri Tawit ame weatrum asamtai in waitnenkarturta” tiarmiayi.

²⁸ Jesus jeá wayamtai jji kusuru tariarmiayi.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiayi.

²⁹ Tuíniakui Jesus ni jiin antinkiar tímiayi “Átum nekas enentáimtarmena núnisan túrunati.”

³⁰ Nujai ji péñker ajasarmiayi. Nuyá Jesus “Etserkairap. Shuar penké nekáwarain” tímiayi.

³¹ Táraitiat jíinkiar Jesus túramun ashí nu nunkanam etserkarmiayi.

Jesus chichachun péñker awajsamiania nu

³² Nuyá wenai shuar yajauch wakantruku chichachun Jesusan itiararmiayi.

³³ Tura Jesus yajauch wakanin jiiki awemamtai nu chichachu chichakmiayi. Ashí nuna íisar ti enentáimprarmiayi. Tura tiarmiayi “Yáunchusha Israer nunkanam jujai métek túramu penké atsuwiti.”

³⁴ Antsu Pariséuka yajauch enentáimtuiniak tiarmiayi “Nu shuar iwianchi uuntri kakarmarijai yajauch wakanin jiiki akupeawai.”

Jesus shuaran waitnentawai

³⁵ Jesus ashí péprunam we ni iruntairin wayá “Yus akupeana nui enkemátarum” tu etsermiayi. Tura ashí nánkamas sunkurjai jáiniancha tsuáirmiayi.

³⁶ Shuaran íisar murik wáinchatia núnis pimpikiar tura kúntuts pujuinia asantai waitnentrarmiayi.

³⁷⁻³⁸ Nuyá ni unuiniamurin tímiayi “Ju aents Yus-Chicham ujaktinaitji Yus-shuar ajasarat tusar. Nu takat ti núkap awai tura takarin ishichik áiniawai. Nu takatka júuktinia áintsankete. Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

10

Jesus tuse (12) unuiniamurin achikmiayi tuke nemarsatniun

(Márkus 3.13-19; Rúkas 6.12-16)

¹ Nuyá Jesus tuse (12) unuiniamurin achik Yusa kakarmarin súsarmiayi yajauch wakanin shuara enentáiya jiiki akupkatniun. Núnisan ashí sunkurjai jáinian tsuáartinian susamiayi.

² Ju áiniawai Jesus tuse (12) unuiniamurin achikiarmia nu: Emka Semun núnisan Pitru náartiniuyayi. Nuyá ni yachi Antres. Nuyá nuámtak yáchintin Jakupusha Juansha, Sepetéu uchiri armia nu.

³ Nuyá Jiripi, Parturumí, Tumas, Mateu. Mateusha kuítian achiniuyayi. Arpeu uchiri Jakupusha. Ripíu núnisan Tateu náartiniuyayi.

⁴ Ásumpí Semunsha nuyá Jútas Iskariúti Jesusan ukunam surukmia nu. Nu tuse (12) achikma áirmiayi.

Jesus ni unuiniamurin etserkarti tusa akupkarmiania nu

(Márkus 6.7-13; Rúkas 9.1-6)

⁵ Nu tuse (12) unuiniamurin Jesus júnis chicharak akupkarmiayi. “Israer-shuarcha matsatmanum weerap. Samaria nunkanam péprunam weerap.

⁶ Antsu Israer-shuar murikiua áinis Yusaiya wákaru ainia nu weritiarum.

⁷ “Tsawant ishichik ajasai Yus jú nunkanam akupin ajastin” tu etserki wetarum.

⁸ Tunamarusha chíkich sunkurjai jainia nusha tsuatarum. Jakasha iniantkitiarum. Yajauch wakancha shuara enentáiya jiiki awematarum. Nu túratin kuítchajai kakaram susamuitrume, tuma asantai atumsha ashí ántarmek túratarum.’

⁹ Kurisha ashí kuitcha jukiirap.

¹⁰ Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin áiniawai.’

11 ‘Péprunam jearmesha péñker shuar wáinkiarum nuí wayarum tuke nuíñ pujstarum.

12 Nu jeanam wayamsha “Ju jea shiir atí” titiá.

13 Nekas péñker shuaraitkiunka shiir ajasarti. Antsu nu shuar péñker itiarma-chkunka shiir ajascharti.

14 Tura nánkamsan atumin awaintiamainiachkuinkia anturtamainiachkuinkia nuyá jíinkitiarum. Nu shuar yajauch ásarmatai jíinkirum atumí naweya nunka japimiarum ikiuktiarum. Ni tunaari aents nekaawarat tusarum túratarum.

15 Nu shuaran nekapsatin tsawant jeamtaí Yus asutiáshtatuak. Sutum péprunmaya shuara nankaamas Kumura péprunmaya shuarnasha nankaamas Yus asutiáttawai nu shuaran’ tímiayi.

Yajauch awajsatniun ujakmiania nu

16 ‘Aneartarum. Wisha murik yawanum akupkatniua áintsanak akupeajrume. Tuma asantai shiir nawamkartin áyatrum aneartarum.

17 Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui.

18 Wíi shuar asakrumin uuntnumsha tura nuyá akupniunmasha juramkiartatui. Núnisrum akupniuncha tura Israer-shuarchancha winia chichamur ujaktatrum.

19 Tura akupniunam surutmakakrumnisha wariniak títiaj tu enentáimprairap. Nuí uuntjai chichaakrumin Yus títinian jintintramattarme.

20 Nuinkia átum enentáimmiajai chichaschattarme antsu atumí Aparí Yusa Wakaní atumin chichamtikramsattarme.’

21 ‘Shuar ni yachincha máawarti tusa suruktatui. Apasha ni uchirín surukartatui. Uchisha ni aparín máawarti tusa surukartatui.

22 Tura Wíi shuar asakrumin mash muíjramkartatui. Tura tuke katsuntea nu uwemprattawai.

23 Chikichik péprunam yajauch awajtamainiakui chíkich péprunam pisartarum. Wi Aents Ajasuitjai. Tuma asan nekasan tájarme, átum Israer-shuar mashi ujatsrumniñ wantinkiatjai.’

24 ‘Unuiniamuka nin unuiniana nuna nankaamaschaiti. Takarniusha ni uuntri nankaamaschaiti.

25 Unuiniamuka nin unuinia nujai métek ajaska maak. Takarniusha ni úuntrijjai métek ajaska maak. Wátsek, Winia atumí úuntrin “Iwianchi uuntri” túrutainiakui atumniasha nuna nankaamas yajauch turamtatui.’

Yúsak ashamkatniuiti

(Rúkas 12.2-9)

26 ‘Tuma asantai aentska ashamkairap. Ashí uukma nu paant nekanattawai.

27 Ishishmasan kiritniunam ujaajrumna nu, tsawái kakantrarum etserkatarum.

28 Aya ayashin main ainia nu ashamkairap. Wakanin máachmin áiniawai. Antsu wakanniasha ayashniasha mai jinium emesramnia asantai Yus ashamkatarum.’

29 ‘Jimiará chinke penké ishichik kuitjai surukmin áiniawai. Túmaitiat Yus tsankateachkuinkia nuká jaka iniainiatsui.

30 Ame intiashmisha mash nekapmarmaiti.

31 Nu asantai jákatin ashamkairap. Yusjai átumka ti untsurí chin kijjai nankaamas péñkerchakaitrum.’

Jesus natsantrashtiniaiti

(Rúkas 12.8-9)

32 ‘Ashí shuar ashí íimiainiain Winia natsantruiniatsna núnaka Winia Apar yakí nayaimpiniam pujana nuí natsantrashtatjai.

³³ Antsu shuar íimiainiain Winia natsantra núnaka Wisha yakí nayaimpiniam winia Apar pujana nuí natsantrattajai.'

Jesusa chichamejai shuar akannartatui
(Rúkas 12.51-53; 14.26-27)

³⁴ 'Ashí shuar nawamnaikiar shiir pujusarat tusan ju nunkanam táchaitjai. Nuna túrat tusarum enentáimturairap. Antsu wi tamaajai shuar péñker ajasarmatai yajauch shuar nin nakitrartatui.

³⁵ Shuar ni aparín nakitrattawai. Nuwasha nukurín nakitrattawai. Najatísha tsatsarín nakitrattawai.

³⁶ Tuma asa shuar ni shuarijjai nemasrintin ártatui.'

³⁷ 'Shuar ni aparíncha nukuríncha Wijjai nankaamas aneakka Wíi shuar áchamniaiti. Núnisañ ni uchiríncha nawantríncha nankaamas aneakka Wíi shuar áchamniaiti.

³⁸ Tura ashí wáitsatniun surimiatsuk ni krúsrín yanaki jukí nemartachkunka Wíi shuar áchamniaiti.

³⁹ Aya jú nunkanam péñker pujustaj tana nu ni iwiaakmarín emesrattawai. Tura Winia anentu asa ju nunkanam péñker pujustinian páchiatsna nu tuke shiir pujustatui.'

Akinkiatin
(Márkus 9.41)

⁴⁰ 'Atumin itiaarma nuka Winia itiaarui. Tura itiaarea nuka Winia akuptukmia nunasha itiaawai.

⁴¹ Yúsnan etserniuncha Yúsnumiá winiá asamtai itiaakka etserin akínkiáttana nujai métek akínkiáttawai. Péñker shuárnasha péñker asamtai itiaakka péñker shuar akínkiáttana nujai métek akínkiáttawai niisha.

⁴² Uchincha Wíi shuar asamtai entsá michan shikirak súsañka imiá nekas nusha akínkiáttawai." Tu tímiayi Jesus.

11

Imiakratin Juan Jesusaj shuaran akupkamiania nu
(Rúkas 7.18-35)

¹ Tura tuse (12) unuiniamurín Jesus tinia akupkar Niisha nú nunka péprunam we Yus-Chichaman jintiák etserkamiayi.

² Tura Juan sepunam enkemas Kristu túramun antukmiayi. Antuk ni unuiniamurín jímiarán Jesusaj akupkamiayi.

³ Tura Jesusan aniasarmiayi "¿Nekas ame Kristu Yus akupkamu tátinia nukaitiam. Kame chikichak nákastataj?"

⁴ Tutai Jesus tímiayi "Waketkirum ashí ántarmena nusha wáintrumna nusha Juan ujaktarum.

⁵ Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuítrinchanmasha uwempratin chicham ujakmaiti. Nu ujaktarum.

⁶ Túrásha yawetsuk Winia tuke shiir enentáimturna nú shuar shiir átatui." Jesus nuna tutai waketkiarmiayi.

⁷ Waketkiarmatai shuar káunkarun Jesus Juánkan pachis áujmatmiayi. "Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juánka nú shuarchaiti.

⁸ Nuikia ¿warí werimiarum. Shuar péñker iwiarmampra ístai tusarmek wémarum? Warí, péñker iwiarmampraka uunta jeen pujuiniatsuk.

⁹ Nuikia ¿warí werimiarum. Yúsnan etserniuk werimiarum? Maa, túrachmashiuram. Túrásha Juánka yaunchu etserniu nankaamas enentáimtustiniaiti.

¹⁰ Yaunchu Yus-Papinium áarmaiti:

“Winia akatramurun amiini emka akupeajai ame jintimin iwiarat tusa.”

Juan nu akatramuiti.

¹¹ Nekasan tájarme, shuar imiakratin Juanjaj nankaamas uunt atsuwiti. Tuma ain Yus akupeamunam pachiinia nu shuarnaka, nekasmianchancha, Juanjaj nankaamas shiir enentáimtustiniaiti. Tuma asamtai nu pachiinkiatin enentáimpratarum.’

¹² ‘Kakaram shuarka imiakratin Juan támia nú tsawantnumia Yus akupeamunam ti pachiinkiatniun wakeruiniak kakarmajaj pachiinkiatniun enentáimiainiawai.

¹³ Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi.

¹⁴ Yaunchu Yúsnan etserin “Kristu táatsain Erías tátiniaiti” tímiayi. Tura nekaatin wakerakrumka Juan nu Eríasaiti.

¹⁵ Antuktin jeakrumka nekaatarum.’

¹⁶ ‘Ju áentsnasha ¿warijjai métek nakumkataj? Uchijjai métek áiniawai. Ni aijjai iruntrar nakurustaj táyatan tuiniawai

¹⁷ “Námpera áinis nakurustaitisar peem umpuarji túrasha jantsemáchure. Nuyá iwiansatniua áinis nakurustaitisar íwiareakur kantamtai kantamáji túrasha átum úutcharme.”

¹⁸ Atumsha núnisaitrume. Kame Juan núkap yurumsuk nijiamchinchá úmutsuk wekaimiayi. Túmakui átumka “Yajauch wakantrukuíti” tímiarme.

¹⁹ Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujaj Yus nekas nékamu nekanattawai.”

*Yajauch péprunmayá shuaran chicharkamiania nu
(Rúkas 10.13-15)*

²⁰ Nuyá tujintiamun túramiania nú peprunmayá shuaran pachis Jesus chicharkamiayi. Tuma ain nuyá shuar ni enentáin yapajíácharu asamtai juna chicharkamiayi.

²¹ “Wáinkiatá, Kurasín péprunmayatiram, Petsaitia péprunmayatirmesha. Nu aents tujintiamun ti túraitjai. Tiru péprunmasha Setun péprunmasha nu tujintiamu túramuitkiuinikia yaunchu ni enentáin yapajíáwaraayi. Túrawar kúntuts pujutai pushín entsarar yunkunim ajakiaaayi.

²² Tura Wisha tájarme, nekapsatin tsawant jeamtai Yus atumin tí asuttiamattarme. Tirunmayá shuaran nankaamas tura Setunnumia shuaran nankaamas asuttiamattarme.’

²³ ‘Tura atumsha Kapernáum péprunmayatirmesha, ashí nankaamas nankaamantu ajastin enentáimtumarme. Antsu ashí emestamprartatui. Atumjin aents tujintiamun ti túraitjai. Sutuma péprunam nu tujintiamu túramuitkiuinikia nu pepru yamaisha tuke aayi.

²⁴ Tura Wisha tájarme, nekapsatin tsawant jeamtai Yus Sutumanmayá shuar nankaamas atumin asuttiamattarme.”

*“Winin ayampratarum” tímiania nu
(Rúkas 10.21-22)*

²⁵ Nuyá Jesus tímiayi “Shiir enentáimtajme, Aparu, ashí nayaimpisha nunkasha Úuntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nankaamantu enentáimtumainiatsna nú shuar paant awajtusuitme.

²⁶ Ame, Aparu, núnis wakera asam túraitme.’

²⁷ ‘Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai.

²⁸ Ashí pimpikniutirmesha itiurchat pujarmena nusha Winí winitiarum. Túrakrumnikia ayamtikrattajrume.

²⁹ Wi kajechu asan tura péejchach enentáimin asamtai Winí winirum unuimiartarum. Winia chichamur ántakrum umíakrumniṅka atumí wakaní ayamprattawai.

³⁰ Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

12

Jesusa unuiniamuri ayampratin tsawantaj trikiu neren pakaarmiania nu (Márkus 2.23-28; Rúkas 6.1-5)

¹ Nuyá Jesus ayampratin tsawantaj ajanman ajapeniṅ nanṅkaamamiayi. Ni unuiniamurisha tsukarar trikiu neren majusar yukí wekasarmiayi.

² Pariséu shuarsha nuna wáinkiar Jesusan aniasarmiayi “Iista, ame unuiniamuram ayampratin tsawantaj túratin surimkiamua nuna túruiniawai.”

³ Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum.

⁴ Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni nemanin ana nunasha suritkiamuyayi. Túmain yúawarmiayi.

⁵ Muisais akupkamunam aarma nu áujkachukaitrum. Israer-patrikia ayampratin tsawantaj takainiayatan nusha tunaachuiti.

⁶ Nekas tájarme, yamá Yusa Jeen enentáimtustinia nuna nanṅkaamas Wíniaka Aents Ajasuitjiana nu, nekas enentáimtursatniuitrume.

⁷ Yus-Papinium tawai:

“Murik maam Winia surusum nujaj “maakete” tátsujai. Antsu waitnenkartutain wakerajai.”

Nu chicham nekas nékaitkiurmeka yamá túrarmena núnisrum tunáa túrachu ántarum súmantikiachaintrume.

⁸ Wi Aents Ajasu asan ayampratin tsawantan Úuntriñtjai.”

Shuara uweje jakan Jesus tsuármiania nu (Márkus 3.1-6; Rúkas 6.6-11)

⁹ Jesus nuyá wé Israer-shuar iruntainiam wayamiayi.

¹⁰ Nui shuar ámiayi ni uweje jaka. Tura Jesusan ántar nekapsatai tusa wakeruinia ásar aniiniak “¿Ayampratin tsawantaj jaa shuar tsuarminkiait?” tiarmiayi.

¹¹ Tutai Jesus tímiayi “Atumsha atumí murikrj ayampratin tsawantaj waanam akaiki iniamtai jusatai tusarum wéchaintrupash.

¹² Antsu shuarka murikjaj nanṅkaamaschakait. Tuma asamtai ayampratin tsawantajsha péñker ana nu túramniaiti.”

¹³ Tinia iniais áishmanṅkan uweje jakan tímiayi “Uwejem takuitia.” Tutai uweje takuj chikich uwejējaj métek péñker ajasmiai.

¹⁴ Nuna túramtai Pariséu shuarsha aa jinkiar Jesus itiurak máawaintiaji tusar chichaman najatiarmiayi.

Isayas Jesusnan tímia nu uminkiamiayi

¹⁵ Jesus nin máatniun nekaama nuyá jinkimiayi tura wéakui untsurj shuar nemariarmiayi. Untsurj jáiniancha tsuámiayi.

¹⁶ Tsuar “etserkairap” tinia akupiararmiayi.

¹⁷ Yaunchu Yúsnan etserin Isayas tímia nu uminkiat tusa túrunamiayi. Niisha juna áarmiayi:

¹⁸ “Júiti Wi achikmaj nu. Niisha Wi tájana nuna umin asamtai ti aneakun Nijijaj waraajai. Winia Wakantru kakarmarin takamtsuk susattajai. Túramtai winia uwempratin chichamprun ashí Israercha nunṅkanmasha etserkattawai.

19 Jiakchattawai tura kakaram chichaschattawai. Winia anturtukarat tusa péprunam weak untsukchartatui.

20 Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisan shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui.

21 Tura Israer-shuarchasha Nin nekas enentáimtusartatui.”

*Jesusan “iwianchi uuntri kakarmarijiaí túrawai” tiarmiania nu
(Márkus 3.19-30; Rúkas 11.14-23; 12.10)*

22 Nuyá Jesusan shuar yajauch wakantrukun itiararmiayi. Nu shuar jii kusurusha chichachusha ámiayi. Tura Jesus tsuármatai paant ímsamiayi tura chichakmiayi.

23 Nuna wáinkiar shuar shiir enentáimprar tiarmiayi “¿Tawitia uchirí pampanku iniannamu uwemtikkiartin tátinia nuáshit?”

24 Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitiántrin Pirsepún umirniuiti. Tuma asa nuna kakarmarijiaí yajauch wakanin jii ki akupeawai.”

25 Jesus tu enentáimainian neka asa tímiayi “Nú nunkanmaya shuar nuamtak kajer-naiyakuinkia nú nunka wari meserchattawak. Núnisan nuamtak shuar ní shuarjai mánainiakka amunaikchartatuak.

26 Núnisan íwianch nuamtak jii ki akupnainiakka máanaikiar wárik amuukashtatuak.

27 Kame Wi Pirsepú iwianchi kakarmarijiaí iwianchin jii ki akupeakuinkia atumí uchirísha ¿yana kakarmarijiaín jii ki akupena? Ni túramurijiaí átum awajirma neka-matarum.

28 Wi Yusa Wakaní kakarmarijiaí yajauch wakanin jii ki akupea asantai atumsha Yusa akupeamurí atumjin jeartarmena nu nekaatniuitrume.”

29 ‘Iista. Shuar kakaram shuara kuítrin kasarkatin wakerakka emka kakarman jiníkiá aya túran ni jeen wayá kasarkamniaiti. Wi iwianchin jii kmiajai uunt iwianch nupetkamua nu nekaamniaiti.’

30 ‘Wijiaí tsanin pujatsna nuka winia nemasruiti. Núnisan Winia yáintsuna nu aya itiurchat nájateawai.’

31 ‘Tuma asantai tájarne, Ashí shuar tunáa túruinia nusha yajauch chichainia nusha tsankuratin awai. Antsu Yusa Wakanin yajauch chicharin ainia nuka tsankurashtiniaiti.

32 Winiasha Aents Ajasuitjiana nuna yajauch chichartuinia nú shuarsha tsankuramniaiti. Tura Yusa Wakanin yajauch áujmatainia nuka penké tsankurachminiaiti. Ju nunkanmasha tura ukunmasha tsankurnarchattawai’ tímiayi.

*Ni nerejai numi nekaamniaiti
(Rúkas 6.43-45)*

33 ‘Yutai numi péñkeran nereawai. Tseas numisha yajauchin nereawai. Ni nerejai numi nekaamniaiti. Núniskete atumjai.

34 Tseas wenunniutirmesha, ¿atumsha itiurak imiá yajauchitirmesha péñker chichamsha chichastarum? Shuar ni enentáin enentáimna nuna chichaawiti.

35 Péñker shuar péñker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti.

36 Tura Wisha tájarne, nekapsatin tsawant jeantai ashí enentáimtsuk chichakma nuna Yúsan paant ujakartatui.

37 Iis, ame chichammijiaí nekanattarme. Péñker chichakuitkiumka sumamashtatme. Tura péñker chichachaitkiumka sumamattame.”

*Nu shuar yajauch ásar iniakmamun seawarmiania nu
(Márkus 8.12; Rúkas 11.29-32)*

³⁸ Pariséu shuarsha Israer-shuara jintinniurisha Jesusan chicharuk “Uuntá, ame Yúsaiyáitjai tusam nayaimpinmaya kakarmajai iniakmamu túrata, iisha wáinkiatái” tiarmiayi.

³⁹ Tutai Jesus tímiayi “Shuar yajauch tura Yúsan enentáimtachu ásar nayaimpinmaya iniakmamun seainiawai. Tuma asamtai, áyatik yaunchu Junas túrunamu iniakmastini-aiti.

⁴⁰ Junas menaintiu kashi menaintiu tsawantcha namaka ampujen enkemsamiayi. Núnisnak Wi, Aents Ajasu asan, menaintiu kashi menaintiu tsawantcha nunká jakan tepestatjai.

⁴¹ Júnás Níniwi péprunmaya shuaran Yus-Chichaman etserkamtai nu shuar ni tunaarin enentáimtusar ni enentáin yapajíawarmiayi. Tura juí yamáí Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmaya shuar juyá shuaran súmamtikiawartatui.’

⁴² ‘Yaunchu nuwá yajaya shuaran úunt akupniuriyayi. Nu nuwá Sarumún ti neka asamtai nin anturkataj tusa tarimiayi. Tura juí yamáí Sarumúnjai nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

*Yajauch wakan jüiki akupkamuitiat wáketna nu
(Rúkas 11.24-26)*

⁴³ ‘Shuara enentáiya yajauch wakan jíinkin yumi penké yútatsna nuí wéawai. Tura nuí penker pujustinian wáinkiach ataksha waketkitniun enentáimiui.

⁴⁴ “Wi jíinkimij nuí waketkittiajai” tawai. Tura waketki shuara enentáin penker iwiamamu tura ankantán wáiniak

⁴⁵ ni ain siati (7) iwianchin níijjai nankaamas yajauchin itia shuara enentáin enkemáwartatui. Túrunamtai nu shuar nuiki núna nankaamas yajauch ajastatui. Núnisan juyá shuar túrunawartatui” tímiayi Jesus.

*Jesusa yachí, Jesusa nukurí
(Márkus 3.31-35; Rúkas 8.19-21)*

⁴⁶ Jesus nu shuarjai tuke chichaak pujai ni nukurísha ni yachísha tariarmiayi. Tura aa wajasar Níijjai chichastaj tiarmiayi.

⁴⁷ Túramtai Jesusan ujarak “Ame nukusha yatsumsha aa wajasar chichastaj turamainiawai” tiarmiayi.

⁴⁸ Chichaman ujakmia nuna Jesus tímiayi “¿Ya ainia winia nukursha winia yatsursha?”

⁴⁹ Nuyá ni unuiniamurin iniakmas tímiayi “Ju áiniawai winia nukur tura winia yatsursha.

⁵⁰ Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur áiniawai” tímiayi.

13

Untsurí métek-taku chichamjai Jesus unuiniamiania nu

*(1) Atsaamin atsaampramiayi
(Márkus 4.1-9; Rúkas 8.4-8)*

¹ Nu tsawantaj Jesus ni jeeya jíinkin antumianka kánmatkarin pujusmiayi.

² Tura ti untsurí shuar káunkarmatai kanunam enkemar nuí pujusmiayi. Shuarsha antumianka kánmatkarin pujusarmiayi.

³ Túrunawarmatai untsurí métek-taku chichamjai unuiniamiayi. “Atsaamin atsaamprataj tusa jíinkimiai, tímiayi.

⁴ Atsaamki wesa arakri jintia písunmasha iniaarmai. Tura chiniki tariar yuawarmai.

⁵ Chikichcha kaya írunmanum iniaarmai. Nunka ishichik asamtai wárik tsapainiarmai.

⁶ Tura nantu etsantramtai pēnker kaṅkáprúrcharu asa sukuam káararmai.

⁷ Chikichcha jaṅkí nupanam iniaarmai. Tura jaṅki wárik tsakar nupetak ajakramai.

⁸ Chikichcha pēnker nuṅkanam iniaarmai. Nusha pēnker nerekar chíkich siaṅsha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai.

⁹ Kuishim ákuṅkia antuktatum” tímiayi.

*“¿Urukamtai aya métek-taku chichamjai jintiam?” aniasarmiania nu
(Márkus 4.10-12; Rúkas 8.9-10)*

¹⁰ Nuyá ni unuiniamurin Jesusan taruntar aniiniak “¿Urukamtai aya métek-taku chichamjai ju shuar unuiniam?” tiarmiayi.

¹¹ Tutai Jesus tímiayi “Urukuk ju nuṅkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chíkich nuna nekaachmin áiniawai.

¹² Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisaṅ Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittarme.

¹³ Tuma asamtai aya métek-taku chichamjai unuiniajai. Nú shuarka íniayatan wáiniániatsui. Ántuiniayatan ántachua núnis nékainiatsui. Túmainiak Winia nekarainiatsui.

¹⁴ Nujai yaunchu Yúsna etserin Isayas timia nu uminkiaiti. Juna tímiayi: “Ti ántayatrum anturkashtatume. Wáiniatrumsha nekaashtatume.

¹⁵ Ju shuara enentái kátsuram ásar pēnker nuna nakitiainiawai. Nu asamtai pēnker ántuiniatsui, jṅisha pusá áinis áiniawai. Túrachkunka paant nekaawarainti, tura nekas antukarainti, tura enentájjai enentáimias Winia tsuarat tusa tarutiarainti.”

¹⁶ Tura átumka paant wainkia asarum pēnker anta asarum shíraitrume.

¹⁷ Nekasan tájarne, untsurí Yúsna etserniusha tura pēnker shuarsha átum yamá wáintrum nuna wáinkiatniun wakeruiniayatan wáinkiacharmiai. Tura átum yamá ántarme nuna antuktinian wakeruiniayatan antukcharmiai’ tímiayi.

*Jesus atsaampramu chichaman paant jintintiamiania nu
(Márkus 4.13-20; Rúkas 8.11-15)*

¹⁸ ‘Ayu, antuktatum. Atsaampramu chichaman paant jintintiatjarne.

¹⁹ Árak jintia písunam iniaararma nuka shuar Yus-Chichaman ántayatan ni enentáin ikuiiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai.

²⁰ Árak kaya írunmanum iniaararma nuka shuar Yus-Chichaman antuk waras umirainia núiti.

²¹ Tura núkap kaṅkaprurcharu ásar katsuiniatsui. Antsu itiurchatan ínkiuiniak tura Yus-Chichaman wakeruinia ásarmatai chíkich yajauch áujmatam wárik iniaisar ikiuiniawai.

²² Árak jaṅkí nupanam iniaararma nuka shuar Yus-Chichaman antuk emka umirniua núiti. Tura ju nuṅkanam írunna nuna tuke páchiniak ni kuítrincha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai.

²³ Tura árak pēnker nuṅkanam iniaararma nuka shuar Yus-Chichaman antuk pēnker umirainia núiti. Tura pēnker nerenawai. Chíkich siaṅ (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis áiniawai” tímiayi Jesus.

(2) Yajauch nupa tríkiunam atsaamkamu

²⁴ Jesus ataksha ju métek-taku chichaman áujmatsamiayi. “Shuar Yus akupeamunam pachiinkiertin júnisaiti. Shuar pēnker arakan, tríkiun ni nuṅken araamai.

²⁵ Tura ashí kanararmatai nemasrĭ kashi taa trikiu arakmanum yajauch nupañ aratak ikiukmiai.

²⁶ Trikiu tsapakar nereakui nuyá yajauch nupaşa nusháa nereku asa ti paant ajasmai.

²⁷ Nuna ísar takainia nu ni úuntrĭn werí tiarmai “Uunta, ¿pénker arak araachmakam. Itiura jusha yajauch nupaşa tsapakuit?” ’

²⁸ ‘Tutai nérentin timiai “Winia nemasur arakuiti.” ’

‘Takui ni takarniurĭ tiarmai “¿Yajauch nupañ uwerat tusam wakeramek?” ’

²⁹ ‘Tutai timiai “Atsá, uwerairap. Yajauch nupa uweaj tukamarum trikiu uweniirum.

³⁰ Iniaisatarum. Antsu métek tsakakti. Júuktin tsawant jeamtaí winia takartinian emka yajauch nupañ uwer irumar jinkiawarat tusan akupkartatjai. Tura áesawartatui. Tura trikiu nerĕn júukar pénker ikiusarat tusan akupkartatjai” timiai” tímiayi Jesus.

(3) Mustasa jinĭkiái

(Márkus 4.30-32; Rúkas 13.18-19)

³¹ Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jinĭkiaiya áintsanĭkete. Shuar pénker nunĭken araamaí.

³² Mustasa jinĭkiáikia imiá uchichiitiat tsapáí tsakaakka ashí numichijjái nanĭkaamas uunt ajawai. Ti uunt asamtaí chinĭki ni kanawen pasunmainiawai” tímiayi Jesus.

(4) Karin enĭketatin

(Rúkas 13.20-21)

³³ Núnisanĭ chĭkich métek-taku chichaman áujmatsamiayi. “Shuar Yus akupeamunam pachiinkiertin karinia áintsanĭkete. Nuwaĭ nijiamchiniam karinia enĭkea mashi páchimiawai. Tura nu mash karimtikiawai” tímiayi.

Jesus aya métek-taku chichamjainĭ jintintiamiania nu

(Márkus 4.33-34)

³⁴⁻³⁵ Ashí nuna Jesus métek-taku chichamjainĭ áujmatsamiayi. Yaunchu Yúsnan etserin timia nu uminkiatĭ tusa túramiayi. Etserinĭ juna áarmiayi:

“Métek-taku chichamjainĭ áujmattiatjai. Yámankamtaiknumiá nékashtain etserkattajai” tu áarmiayi.

Nu asamtaí aya métek-taku chichamjainĭ áujmatmiayi Jesus.

Jesus yajauch nupa trikiunam atsamkamun paant awajsamiania nu

³⁶ Nuyá shuaran ikiukin Jesus jeá támiayi. Túramtai ni unuiniamurĭ tariar “Yajauch nupa áujmatmena nu paant awajsata” tiarmiayi.

³⁷ Tutai Jesus tímiayi “Wi Aents Ajasuitjai. Wi pénker arakan atsaamkaitjai.

³⁸ Ashí nunĭka aja áintsaiti. Pénker jinĭkiái Yus-shuaran Yus akupea nuna nakumeawai. Yajauch nupa iwianchna ainia nuna nakumeawai.

³⁹ Tura íwianch ii nemasrĭ asa yajauch nupañ arakuiti. Tura nunĭka amúamunam Yusa suntarĭ arakan júuktinia áintsanĭ shuaran yaruaktatui.

⁴⁰ Yajauch nupa irur jinium áesatniua áanis nunĭka amúamunam túrunattawai.

⁴¹⁻⁴² Nujĭ Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irurar jinium apeawartatui. Nujĭsha ti úutin ti wáitsatniusha átatui.

⁴³ Antsu pénker túruinia nuka ti shiir wincha ajarar ni Aparĭ akupeana nujĭ etsa núnis tsáapnin ajasartatui. Wats, kuishim átsuk. Antukta.’

(5) Kuit wáinkiamu

⁴⁴ ‘Shuar Yus akupeamunam pachiinkiatin kuit nunĭká uukma áintsanĭkete. Shuar nu kuítian wáiniak nujĭn ataksha uukmai. Tura ti waras waketki nu kuit niiniu atí tusa ashí ni takakman suruk nu nunĭkan sumakmai.’

(6) Kaya shiirmach ti kuitia nu

⁴⁵ ‘Shuar Yus akupeamunam pachiinkiatin júnisaiti. Shuar kayachin ti shíрман eak wekaana áintsankete.

⁴⁶ Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

(7) Neka

⁴⁷ ‘Shuar Yus akupeamunam pachiinkiertin júnisaiti. Shuar nekajai namakan achía áintsankete. Nekan nayaantsanam ajuntak niisháa namakaim achíawai.

⁴⁸ Tura nekanam nemarmatai kukar jiki, nu pénker namaknasha chaninnium chumpiniawai. Tura yajauch namaknaka ajapenawai.

⁴⁹ Núnisan átatui nunka amúamunam. Yusa suntari taar Yus-shuaran tura íwianch shuaran akantrattawai.

⁵⁰ Tura íwianch shuarnaka uunt jinium apeattawai. Nuisha ti úutin ti wáitsatin átatui.” Nuna ashí ni unuiniamurijiai áujmatsamiayi Jesus.

Yamá nekaamujai sha tura yaunchu nekaamujai sha Yus-shuaran yáintiniaiti

⁵¹ Jesus nuna tinia amuk “¿Ju mash antukurmek?” tímiayi.

Tutai ni unuiniamuri “Ee, Uunta, ashí antukji” tiarmiayi.

⁵² Tuiniakui Jesus tímiayi “Shuar ashí Yúsnan pénker unuimiaruka aents kuítriniua áintsankete. Ni ikiutairiya yamarmancha yaunchu sumakmancha jusamniaiti. Núnisan nu shuar yamá nekamujai sha tura yaunchu nekamujai sha Yus-shuaran yáintiniaiti.”

Jesus Nasarénum waketkimiania nu

(Márkus 6.1-6; Rúkas 4.16-30)

⁵³ Jesus nu métek-taku chichaman áujmatas amuk nuyá wémiayi.

⁵⁴ Tura ni péprurin Nasarénum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiayi. Tura “¿Jusha tui imiá unuimiaruit, tiarmiayi. Itiurak aents tujintiamun túramniat?”

⁵⁵ Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas áiniatsuk.

⁵⁶ Tura ni umaisha iijiai írutra pujuiniatsuk. ¿Nuikia itiura mash neka?” tiarmiayi.

⁵⁷ Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar pénker anturainiawai, antsu aya nuna nunkeyanaka ni shuarinkia nin anturainiatsui” tímiayi.

⁵⁸ Tura nú shuar Jesusan enentáimtuiniachu asamtai aentsti tujintiamun aya ishichik túramiayi.

14*Imiakratin Juan jakamu*

(Márkus 6.14-29; Rúkas 9.7-9)

¹ Kariréa nunkanam Erutis akupniuyayi. Tura Jesus túramuncha antukmiayi.

² Tura ni írutramurin tímiayi “Nuka imiakratin Juan jakamunmayá nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

³⁻⁴ Akupin Erutis ni yachí Jiripi nuwen Jirutíasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juan kan achik jirujai jinkia sepunam enkeatarum tusa akupkamiayi.

⁵ Niisha Juan kan máataj tukamá aentsun ashamiarmiayi. Ashí aents “Juan Yúsnan etserniuiti” enentáimtuiniakui ashamiayi.

⁶ Tura akupin Erutis akiiniamu tsawantri jeamtai nú námpertin Jirutíasa nawantri ashí ipiaamu pujuiniamunam jantsemamiayi. Túramtai Erutis shiir enentáimtak

⁷ “Ame ashí wakeram nu seattia, tímiayi. Nekasan amastatjai, Yussha iirui” tímiayi.

⁸ Tutai nu nuwäch emka ni nukurí akatramu asa Erutisan chicharuk “Imiakratin Juanka muuké tsupikiam amamkunam enkeram surústá” tímiayi.

⁹ Tutai Erutis wake mesekmiayi. Túrasha “nekas Yus iirui” tiniu asa tura ni amikrisha antukaru asamtai umikmiayi.

¹⁰ Ni suntarín sepunmayan Juanka muuken tsupik itianti tusa akupkamiayi.

¹¹ Tura amamkunam itiar nuwächin súarmiayi. Tura niisha ni nukurí susamiayi.

¹² Nuyá Juanka írutramurí tariar ayashí jukiar iwiarsarmiayi. Túrawar Jesusan ujauwearmiayi.

*Jesus senku mir (5000) áishmankan ayuramiania nu
(Márkus 6.30-44; Rúkas 9.10-17; Juan 6.1-14)*

¹³ Jesus nuna antuk Niñki ni unuiniamuríjjiaín kanunam enkemar arant aents atsamunam wémiayi. Túrasha nuna aents nekaawar kukarak weriarmiayi Jesusan.

¹⁴ Kanunmaya jíiniaj tukamá untsurí áentsun wáinkiamiayi. Tura wáiniak waitnen-trarmiayi. Tura jániancha tsuárarmiayi.

¹⁵ Kíakui ni unuiniamurí Nin tariar tiarmiayi “Kíawai, Uunta. Tura shuar tíjiuch pujaaka atsawai. Ju aents akupkarta. Péprunam wear sumak yuuwearti” tiarmiayi.

¹⁶ Tutai Jesus tímiayi “¿Urukamtaik wearat? Antsu atumek ayuratarum.”

¹⁷ Tutai tiarmiayi “Iikia takaktsuji. Aya senku (5) tantachik jimiaarchik namakchijiaín takakji.”

¹⁸ Tuíniakui Jesus “Wats, nu itiantitiarum” tímiayi.

¹⁹ Tinea aents chírichriniam pujusarti tusa akupkamiayi. Nuyá senku (5) tantancha jímiar namaknasha achik nayaimpiniam ímias Yúsan yuminsamiayi. Tura puur ni unuiniamurín aents ayuratarum tusa súarmiayi.

²⁰ Ashí yurumáwar jémararmiayi. Tura nuyasha puunaruka tuse (12) chankein tíarmiayi.

²¹ Nuí yurumáwarmia nusha nuwasha uchisha nekapmatsuk senku mir (5000) aya áishman áarmiayi.

*Jesus entsá pátatek wekasamiania nu
(Márkus 6.45-52; Juan 6.16-21)*

²² Nuyá Jesus ni unuiniamurín kanunam enkemprarum amain émaa ajatarum tusa akupkarmiayi. Niisha áentsun akupkarmiayi.

²³ Akupkarsha naint waka Yúsan áujumiayi. Káshisha nuí Niñki tuke pujumiayi.

²⁴ Tura antumian tí wanakaram asamtai kanu ajapén ajasmatai nase tukumma entsa tamparukmiayi.

²⁵ Tsawaana aí nii tuke wenai Jesus entsá pátatek wekas pujuiniamunam jeamiayi.

²⁶ Tura ni unuiniamurí entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

²⁷ Tuíniakui Jesus tiarmiayi “Kakaram ajastarum. Wiitjai. Ashamprukairap.”

²⁸ Takui Pítiur chicharuk tímiayi “Uunta, Ámetkumka nuí wekasa jeatin untsurkata.”

²⁹ Takui Jesus tímiayi “Wats, winitiá.”

Tutai Pítiur kanunmaya akaikin Jesus wajana nuí jeataj tusa entsá pátatek wekasamiayi.

³⁰ Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu untsummiayi.

³¹ Nu chichamtaik Jesus uwejnun achik júak “Maa, Yus imiá ishichik enentáimtuscheme” tímiayi.

³² Tura kanunam enkemáwarmatai nashesha menkakamiayi.

³³ Túramtai kanunam enkemarmia nusha Jesusan tikishmatar chicharuk “Nekas ame Yusa Uchirínme” tiarmiayi.

Jesus Jinisarítiumiá shuaran tsuármiania nu
(Márkus 6.53-56)

³⁴ Tura amaini katiñkiar Jinisarít nuñkanam jearmiayi.

³⁵ Tura nuyá aents Jesusan nekaawar nu nuñkanam ashí ujanairarmiayi. Túrawar jaancha ni pujamunam itiariarmiayi.

³⁶ Ni pushirinkisha antintai tusar seawarmiayi.

15

Shuáran yajauch awajeana nuna Jesus jintintiamiania nu
(Márkus 7.1-23)

¹ Nuyá Jerusarén péprunmayá Pariséusha yaunchu akupkamu jintinniurisha Jesusan tariar aniasarmiayi

² “¿Urukamtai ame unuiniamuram ii uuntri yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

³ Tuíniakui Jesus aniasarmiayi “¿Urukamtai atumsha Yus akupkamu umirtsuk aya aents akupkamu umiirum?”

⁴ Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

⁵⁻⁶ Antsu átumka tárume “Shuar ashí niiniu írúnna nuna mash “Yúsnaiti” takui nuikia nujai ni aparíncha nukuríncha yáinchamniaiti, tárume. Nin yáintinian nakitiak ayatik “Ashí winia áiniana nu Yusna asamtai yáinchamniaitjame” tíniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi.

⁷ Antra chichamtiniaitrume. Yúsnan etserin Isayas yaunchu nekas atumin áartampramiayi juna:

⁸ “Ju aents ni wenejai shiir awajtuiniawai, tura ni enentái jeachat pujuiniawai.

⁹ Tura tukeneasan shiir awajtuiniawai. Aentsu chichamen jintintiainiayat “Yusa chichamente” tuiniawai.” Tu áarmiayi” tímiayi Jesus.

¹⁰ Tinja shuaran untsuk tiarmiayi “Ju antukrum péñker nekaatarum.

¹¹ Aents yúana nuka shuáran yajauch awajsashtatui. Antsu wenunmayá jiinia nuka shuáran yajauch awajeawai” tímiayi.

¹² Nuyá ni unuiniamuri Jesusan tariar “Maa, Pariséu ame chichammin antukar ti itiurchat enentáimprarai” tiarmiayi.

¹³⁻¹⁴ Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáñnam akaiki iniaawartatui. Wats, ajanam nupá áintsan áiniawai. Tura ashí winia Apar nayaimpiniam pujana nu araachmaka takamtsuk uwé ajapamu átatui” tímiayi Jesus.

¹⁵ Takui Pítiur Jesusan tímiayi “Nu métek-taku chicham paant awajsata.”

¹⁶ Tutai Jesus tímiayi “¿Atumsha nekaachurmek.

¹⁷ Enentáimprachurmek? Ashí wenunam wayaana nu wakenam wéatsuk. Tura nuyá iniankastiniaiti.

¹⁸ Antsu wenunmayá jiinia nu enentáinmayá jiiniu asa áentsun yajauch awajeawai.

¹⁹ Enentáinmayá ashí yajauch enentáimsatin jíiniainiawai. Mankartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha

²⁰ ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

Nuwá Israer-shuaracha Jesusan enentáimtusmiania nu
(Márkus 7.24-30)

²¹ Jesus nuyá jiinki Tiru péprunmasha Sitiun péprunmasha wémiayi.

22 Tura nu nun_{kan}maya_u nuwa_u Jesusan tarí tímiayi “Uunta, uunt akupin Tawit ame we_{at}rum asamtai winia waitnentrurta. Nawantur yajauch wakantruku asa ti wáitrutawai” tímiayi.

23 Tura Jesus áikchamiayi. Tura ni unuiniamur_i tariar “Awemata, tiarmiayi. Tuke untsumki apapétmaji” tiarmiayi.

24 Nuyá Jesus tímiayi “Aya Israer-shuarnum men_{ka}karu áinia nuna e_{ak}tinian Yus akuptukuiti.”

25 Túrasha nuwa_u tikishmatar tímiayi “Uunta, waitnentrurta.”

26 Tutai Jesus tímiayi “¿Uchí apatkur_i jurukir yawá susamniakait?” tímiayi.

27 Tutai nuwa_u tímiayi “Nekas, Uunta, tame. Tura yawasha ni aentsr_i yurumainiakui nun_{ka} iniaarun yu_{ni}atsuk.”

28 Takui Jesus tímiayi “Maku, nekas Winia enentáimtursaitme. Ame wakeram núnisan atí” tímiayi. Tura nu chichamaik ni nawantr_i pé_nker ajasmiai.

Jesus untsur_i jáinian tsuararmiania nu

29 Jesus nuyá jiinki Kariréa antumian_{ka} káanmatkar_{in} waketkimiayi. Tura naint waka nu_i pujusmiayi.

30 Nu_i untsur_i aents Nin tariar shutuapnasha kusuruncha chichachuncha tsupirkamuncha chíkich jáiniancha itiararmiayi. Túrawar nawenam aeprusarmiayi. Túram tsuararmiayi.

31 Nuna ísar chichachusha chichainiakui, tsupirkamusha pé_nker ajainiakui, shutuapsha pé_nker wekainiakui, kusurusha wáinmainiakui, ti shiir enentáimprarmiayi. Yus ni áentsr_{in} Israeran yáin_{ma}tai shiir yum_{in}sarmiayi.

Jesus kuaru mir (4000) áishman_{kan} ayuramiania nu (Márkus 8.1-10)

32 Nuyá Jesus ni unuiniamur_{in} untsukar tiarmiayi “Ju aentsun waitnentainiajai. Warí, menaintiu tsawant Wijia_i yurumtsuk yujainiatsuk. Ayurtsuk ni je_{en} akupkachminiaitjai. Jintiá pimpiki wáitsartatui.”

33 Ni unuiniamur_i tiarmiayi “Túrasha, Uunta, ¿shuar atsaasha tuyan_u yurumak imiá sumaktaj_i ju aents ayurawartincha?”

34 Jesus aniasarmiayi “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiayi.

35 Nuyá aents nun_{ka} pujusarti tusa akupkamiayi.

36 Tura siati tantan achik namaknasha achik nuyá Yúsan yum_{in}samiayi. Tura puur aents ayuratarum tusa ni unuiniamur_{in} susamiayi.

37 Ashí yurumáwar jémararmiayi. Tura puunaru siati cha_nkin tiármiayi.

38 Tura nu_i yurumáwaruka nuwasha uchisha nekapmatsuk aya áishman_{kan} kuaru mir (4000) ármiayi.

39 Nuyá Jesus áentsun akupak kanunam en_{ka}mar Maktara nun_{kan}am wémiayi.

16

Pariséusha Satuséusha iniakmamur_{in} Jesusan seawarmiania nu (Márkus 8.11-13; Rúkas 12.54-56)

1 Pariséusha tura Satuséusha Jesusan nekapsatai tusar tariarmiayi. Túrawar “Ame Yúsai_yaitkiumka kakarmarmijia_i nayaimpinnmaya_u iniakmasta, iisha wáinkiatatui,” tiarmiayi.

2 Tutai Jesus tímiayi “Átumka “Kapa_{aku} pé_{etar} kintiamkui kashin esatrurtatui” t_{ni}uitrume.

³ Túrasha “Te ajas kapaaku péetar tsawaakui yumi yajauch átatui” tñiuitrume. Tura nekasaiti. Maa, átumka nayaim ísrum ju nunkanam túrunattana nu nékarme. Antsu Yus yamá jü nunkanam tura nuka nékatsrume. Ántraitrume.

⁴ Aents yajauch ásar tura Yusan enentáimtachu ásar kakarmajaj iniakmamun wakeru- iniawai. Túrasha áyatik Junas túrunamia nuke iniakmastiniaiti” tímiayi. Tinia ikiuak wémiayi.

Pariséusha Satuséusha jintintiainia nu aneartiniaiti
(Márkus 8.14-21)

⁵ Tura entsá amaini katiñkiar ni unuiniamurj tantan júkitniun kajinmatkiarmiayi.

⁶ Nuyá Jesus tímiayi “Wáinkiatarum, Pariséusha Satuséusha wakaprutai takakainia nújajisha aneartarum.”

⁷ Tutai ni unuiniamurj tiarmiayi “Ii tanta itiachakrin tátsuk.”

⁸ Jesus nuna antuk tímiayi “¿Urukantai tanta itiachji tunaiyarum. Yusa kakarmari kajinmatkintrumek.

⁹ Senku tantajaj túramiaj nu kajinmatkintrumek. Senku mir (5000) áishmañkan ayuramtai untsurj chañkin tiármia nu enentáimtsurmek.

¹⁰ Tura siati tantajaj kuaru mir (4000) áishmañkan ayuramtai nuna ishichik chañkin tiármia nu kajinmatkintrumek.

¹¹ Itiurak imiá nékatsrum? Wi Pariséu wakaprutairisha Satuséu wakaprutairisha aneartarum tákun penké tantan tátsujaj” tímiayi.

¹² Nuna Jesus takui ni unuiniamurjisha nekaawarmiayi. Penké tantaa wakaprutairin tíchamiayi antsu Pariséusha Satuséusha unuiniatairjín tímiayi.

Pítiur Jesusan Yus anaikiamun paant ujakmiania nu
(Márkus 8.27-30; Rúkas 9.18-21)

¹³ Tura Sesaria-jiripiunam jeawar Jesus ni unuiniamurjín aniasarmiayi “Aents Aja- suitjiana juna ¿yaiti turutainiawa Winia?”

¹⁴ Niisha ayak tiarmiayi “Chíkich, imiakratin Juánkaiti turamainiawai. Chíkichka, Eríasaiti turamainiawai. Chikichcha Jeremíasaiti, chikichcha chíkich aents Yúsnan et- serniuiti turamainiawai” tiarmiayi.

¹⁵ Tutai nincha aniiniak “¿Atumsha yaiti túrutrum?” tímiayi.

¹⁶ Semuñ Pítrusha “Ámetme Kristu, Yus Anaikiamu. Nekas iwiaaku Yusa Uchirínme” tímiayi.

¹⁷ Tutai Jesus tímiayi “Shiiraitme Junasa uchirj Semuñka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame.

¹⁸ Tura Wisha tájame, ame Pítruitme, kayach tútaim. Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrisha nu jeaman pukukchattawai.

¹⁹ Yus akupeamu yawincha amastatjai. Ju nunkanam jinñkiatniusha atíatniusha amas- maiti. Tuma asamtai ame ju nunkanam suritiam nu nayaimpinmasha suritniaktatui. Tura ju nunkanam tsañkateam nu nayaimpinmasha tsañkatnaktatui” tímiayi.

²⁰ Nuna tinia Jesus ni unuiniamurjín Krístuítiaj nu etserkairap tinia akupkarmiayi.

Jesus Nin máatniun etsertumakmiania nu
(Márkus 8.37-9.1; Rúkas 9.22-27)

²¹ Nuyá Jesus juna unuiniatan nanñkammiayi. “Wi Jerusarénum wétiniaitjai. Nuñ Israer-shuara úuntrisha, Israer-patri úuntrisha, Israer-shuara jintinniurisha ti wáitkiarsartatui. Nuyá mantuawartatui túrasha menaintiú tsawantaj nantaktiatjai.”

²² Takui Pítiur arantach jukí chicharuk tímiayi “Uunta, nuka penké áchatniuiti. Áminkia túrutmcharminiaiti.”

²³ Jesus ayanmatar Pítrun tímiayi “Werumta, Satanása. Yajauch awajtame. Ámeká Yus wakeramu enentáimtsume. Antsu jú nunkanam enentáimainia áinis enentáimme.”

²⁴ Nuyá Jesus ashí ni unuiniamurín tímiayi “Shuar Winia nemartustaj tusa wakerakka ni wakeramurín iniais ni krusí yanaki Winia nemartusti.

²⁵ Shuar áyatik péñker pujustaj tákuñka nu shuar uwemtsuk jakattawai. Antsu jákatniuitkuisha péñker pujustinian enentáimtsuna nú shuar nekas iwiaakman wainkiat-tawai.

²⁶ Wats, shuar ashí jú nunkanam írúnna nuna sumakka tura nujái ni wakaní émesek ¿itiurak péñker pujustin? Shuara wakaní emesramu ¿ashí jú nunkanam írúnna nujái iwiamniakait?

²⁷ Wi Aents Ajasu asan, winia Aparu kakarmarijiaí tura ni suntarijiaí tana ashí shuáran ni takasmajái métek akiktatjai.

²⁸ Paant tájarne, shuar juí wajainia ju játsuk Wi akupin ajasmatai wáitkiartatui” tímiayi.

17

Jesus nushá iira ajasmiania nu

(Márkus 9.2-13; Rúkas 9.28-36)

¹ Nuyá sais (6) tsawant nankaamasar Pítruncha, Jakupuncha, tura ni yachí Juannasha níniak júkiar Jesus náinnium yakí wakamiayi.

² Nuí Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirísha ti puju jiitsumir ajasmiai.

³ Nuísha Muisaisnasha Eríasnasha Jesusjái chichainian wáinkiarmai.

⁴ Nuyá Pítiur Jesusan tímiayi “Uunta, ti shiir pujaji juí. Wakerakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna.”

⁵ Tura Pítiur tu auju wajái yuraním ti puju amuamiayi. Tura nu yuranminmaya chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiayi Yus.

⁶ Nuna ni unuiniamurí antukar ti ashamkar pákea ajakiarmiayi.

⁷ Túrunawarmatai Jesus táriar antin “Ashamkairap, nantaktiarum” tiarmiayi.

⁸ Tura pañkainiar íimiaj tukamá aya Jesusan wáinkiarmai.

⁹ Nuyá náinniumiá akainiak Jesus tiarmiayi “Átum íisurména nu penké etserkairap. Wi Aents Ajasu asan jakamunmaya nantaatsain etserkairap’ tímiayi.

¹⁰ Nuyá ni unuiniamurí Jesusan aniiniak “¿Urukamtai in jintinramin “Kristu táatsain Erías emka tátiniaiti” tuinia?” tiarmiayi.

¹¹ Tuíniakui Jesus áikmai “Nekas Erías tátiniaiti. Tura nii mash iwiarattawai.

¹² Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajsarmiayi. Núnisan Winiasha, Aents Ajasu ain, wáitkiarsartatui.”

¹³ Nuna takui ni unuiniamurí imiakratin Juánkan áujmatui, tu enentáimprarmiayi.

Jesus iwianchin jiki akupkamiania nu

(Márkus 9.14-29; Rúkas 9.37-43)

¹⁴ Ataksha aents matsatmanum jeawarmatai shuar Jesusan tarí tikishmatramiai.

¹⁵ Tura tímiayi “Uuntá, winia uchir waitnentrutata. Wainchi tukum ti wáitniuiti. Jiniumsha patamniuiti. Entsasha iniainaiti.

¹⁶ Ame unuiniamurmíncha itiarjiaí túrasha tujinkiarai.”

¹⁷ Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjiarum? Wats, uchi itiertitiarum’ tímiayi.

¹⁸ Itiarim Jesus yajauch wakanin jiki akupkamiayi uchi ayashínia. Túramtai nu chichamaik péñker ajasmiai.

¹⁹ Nuyá urum ni unuiniamurí Jesusjái niníki pujusar áujmatainiak “¿Urukamtai yajauch wakan jiktin iikia tujinkiamaj?” tiarmiayi.

²⁰ Tuíniakui Jesus tiarmiayi “Yus nekas enentáimtachu asarum tujinkiarne. Túmaitiat nekasaiti mustasa jin̄kiái timiá uchichitiat ti uunt tsakaatsuk. Núnisañ Yus ishichkisha enentáimtakrumka nu naint ékemkata tutai nu naint túrunattawai. Pen̄ké tujinkiashtatrume Yus nekas enentáimtakrumka.

²¹ Kame nu yajauch wakan jin̄ki akupkatniuka ijiarmam Yus áujsatniuiti.”

Ataksha Jesus ni játniun ujakmiania nu

(Márkus 9.30-32; Rúkas 9.43-45)

²² Jesus ni unuiniamurijjai Kariréa nun̄kanam wekas juna ujakarmiayi. “Wi Aents Ajasu asan, aentsnum surunkattajai tura mantamnattajai.

²³ Túrutawarmatai menaintiú tsawantaj nantaktiatjai.” Tura ni unuiniamurj nuna antukar ti kúntuts enentáimprarmiayi.

Jesus an̄kantaitiat akiktinia nuna akikmakmiania nu

²⁴ Jesus ni unuiniamurijjai Kapernáum péprunam jeawarmiayi. Tura kuítian achin Pítrun tariar aniasarmiayi “¿Atumi uuntrj Israer-patrin akiktinia nuna akínkaiit?”

²⁵ Tutai Pítiur “Ee” tímiayi.

Tura Pítiur jeá wayá chichaatsain̄ Jesus emka tímiayi “Chíkich nun̄kanmaya akupin ¿yana kuítrijjaiñ takainia. Ni shuar̄iniunkek atantainia. Antsu yajaya shuárnan atantainiatsuk. Nekaschak, Semun̄ká?”

²⁶ Tutai Pítiur “Nekas yajaya shuárnan atantainiawai” tímiayi.

Jesus tímiayi “Nuikia ni shuarj an̄kant áiniawai. Iisha núnisrik nu akiktin an̄kantaitji.

²⁷ Túrasha ititurchat enentáimprarin̄ tusar akiktai. Ame tsau jukim entsá wetá. Túram emka namak japikim iwian̄kam nuj kuit wáinkiatame. Nu jukim Winiasha áminiusha akikmakta.”

18

“¿Ya imiá nan̄kaamantuit?” tunaiyarmiania nu

(Márkus 9.33-37; Rúkas 9.46-48)

¹ Nu tsawantaj ni unuiniamurj tariar Jesusan aniasarmiayi “Yus akupeamunam pachiinia nu ¿ya imiá nan̄kaamantu áiniiait?”

² Nuna tuíniakui Jesus uchin untsuk ajapen awajtusar

³ tímiayi “Tí nekasán tájarne, atumí enentáimtaij yapajjarum uchia áinis ajachkurmeka Yus akupeamunam pachiinkiachminiaitrume.

⁴ Nu asantai ju uchia áinis péjchach enentáimtumana nuka Yus akupeana nuj nekas nan̄kaamantu ajasminiaiti.

⁵ Nú arantcha Winia anentuk uchin itiaana nú shuar Winiasha itiaareawai’ tímiayi.

Tsumainti yajauch túrumtikiatin

(Márkus 9.42-48; Rúkas 17.1-2)

⁶ ‘Shuar ju uchin Winia umirtana nuna tunaanum ajuarmatain̄kia nuna túratsain̄ niisha kuntujén kayajai jin̄kiar nayaantsanam ajapen kunanam ajunmaitkiun̄ka maak ainti, tímiayi.

⁷ Ju nun̄kanam tunáa iniaatai írunuk tuke ititurchataiti. Antsu shuar chikichan tunaanum ajuarka ti ititurchatan in̄kiuntatui’ tímiayi.

⁸ ‘Nu asantai ame uwejem tura nawem tunaanum ajunmatniuitkiuin̄kia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti.

⁹ Núnisañ ame jin̄mi tunaanum ajunmatniuitkiuin̄kia ukuinkiam ajapata. Kame chikichik jin̄jiai pujusam nayaimpiniam wétin péñkeraiti. Antsu jinium mai jin̄tiuk wétin imiá yajauchiiti’ tímiayi.

*Murik menkaaka áujmatsamu
(Rúkas 15.3-7)*

¹⁰ ‘Uchi ainia nu nakitraitrap. Yusa suntari nin wáinkiatniua nu winia Aparuj tíjuch pujuiniawai.

¹¹ Kame wi Aents Ajasu asan, menkaakarun eaktajtsan táwitjai.’

¹² ‘Enentáimpratarum. Shuar sian (100) murikiun takakuiat chikichik menkakamtai untsurí menkakacharun náinnium matsaak, menkakan eaushtatuak.

¹³ Wáinkiasha untsurí menkakacharua nujai nankaamas waraschattawak.

¹⁴ Núnisan atumi Aparí nayaimpiniam pujana nu, nu uchi chikichkisha menkakacharti tawai’ tímiayi.

*Yus-shuarti tsankurnairatin
(Rúkas 17.3)*

¹⁵ ‘Chikich Yus-shuar ámin yajauch túrutmakuinkia nii werim áujzata. Tura ámechik werim ame yatsumjai chichasta. Anturtamkuinkia ame yátsum yáinkiume.

¹⁶ Tura anturtamchakuinkia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam.

¹⁷ Túrasa yatsum tuke ántachkuinkia Yus-shuar iruntainiam iwiainiakta. Túrasa yatsum tuke ántachkuinkia Yus-shuarcha núnisan enentáimtusta nu shuar.’

¹⁸ ‘Nekasan tájarme, ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui.’

¹⁹ ‘Núnisnak tájarme, ju nunkanam pujusrum jimiará Yus-shuartiram métek enentáimprarum winia Apar nayaimpiniam pujana nu seakrumniinkia wakerarmena nuna surámsattarme.

²⁰ Jímiar menaintiusha Yus-shuar Winia enentáimturuk iruntrarmatai Wissha nují-ijjai pujajai” tímiayi Jesus.

²¹ Takui Pítur werí Jesusan aniasmiayi “Uuntá, winia yatsur yajauch awajtakui ¿urutma tsankuratniuitiaj. Siátikik tsankuratniuitiaj?”

²² Jesus aiyak “Siátik tátsujme, antsu iniannatsuk tsankuratniuitme” tímiayi.

Takakmau tsankurachun pachis áujmatsamiania nu

²³ Tuma asa Jesus Yus akupeamunam pachiinkiaru tsankurnairartiniaiti tusa ju métek-taku chichaman áujmatuk tímiayi, “Uunt akupin takarin tumashin akirkarat tusa untsukarmai.

²⁴ Yama nánkamuk tí nukap tumashmakua nuna untsukmai. Akikmakchamnia ti tumashmakuyi.

²⁵ Tura nu takakmau kuitri atsakui uunt akupin “Yajasma áitkiasrum nuartiuk uchir-tiuk ashí waririntiuk suruktarum, timiai. Nu kuitjai akirkati” timiai.

²⁶ Tutai nu takakmau uunt akupniun tikishmatar seek timiai “Uunta, waitneasam nákarsatá. Auka, mash akiktatjame.”

²⁷ Uunt akupin waitnentar mash tsankur ankant akupkamai.

²⁸ Tura nú chichamaik nú takakmau jiinki ni ajn inkiunmai. Nú aisha nin ishichik tumashiiyi. Tura tsékeki suwenam achik chicharuk timiai “Wari akirkata tumashitmena nu.”

²⁹ Tura ni aj nin tikishmatar timiai “Waitneasam nákarsatá. Auka, mash akiktatjame” timiai.

³⁰ Túrasa nakitramai. Antsu tsankurtsuk sepunam enkeamai ashí akirkati tusa.

³¹ Chikich takakmau nuna wáinkiar ti kúntuts enentáimtuiniak uunt akupniun ashí etsertukarmai.

³² Nuna antuk uunt akupin untsuk itia timiai “Yajauchiitme. ¿Winia “waitnentrurta” túrutkumin tsankurachmakjam?”

³³ Amesha núnismek ame ajm tsankuratniuitme” timiai.

³⁴ Tinia uunt akupin kajekmai. Tura ashí tumashin akikmatsuk asutniati tusa sun tarnum surukmai.”

³⁵ Jesus nuna áujmatas amúak tímiayi “Núnisan winia Apar nayaimpiniam pujana nu atumin túrutmattarme atumi yachí nekas enentájjiai tsankureachkurminkia.”

19

Jesus nuwa ajapatniun áujmatsamiania nu

(Márkus 10.1-12; Rúkas 16.18)

¹ Jesus nuna tinia ikiuak Kariréa nunkanmaya wémiayi. Tura Jurtan entsa amain Jutía nunkanam jeamiayi.

² Untsurí aents nemariarmiayi tura jáiniancha péñker awajsamiayi.

³ Nuí Pariséu Jesusan nekapsataj tusar aniasarmiayi “¿Shuar ni nuwen itiurchat akui ajapamniakait?”

⁴ Tutai Jesus tímiayi “¿Átumka Yus-Papí áujkachukaitrum? Yámankamtaik Yuska shuáran áishman kan nuwancha najanamiayi tawai.

⁵ Tuma asamtai áishman ni aparín ni nukurín ikiuki ni nuwejjai tsaniñ chikichik ayashtinia áinis ajasartatui, tu áarmaiti, tímiayi.

⁶ Tuma asa jímiarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti’ tímiayi.

⁷ Takui tiarmiayi “Nuikia ¿urukantai papí áarar nuwa ajapatniun Muisais tsankatkamia?”

⁸ Tutai Jesus tiarmiayi “Timiá ántichu asakrumin nuwa ajapatniun tsankatkamiayi. Túrasha émkaka núnischauyayi.

⁹ Wi tájarne, shuar ni nuwen chíkichjai pujuschan ajapeakka tura chikichan nuatkuñka tsanirmayi. Chíkich áishmansha nuwa ajapamun nuátkan ka nusha tsanirmayi” tímiayi.

¹⁰ Takui ni unuiniamurí tiarmiayi “Nuikia áishman ni nuwé penké ikiukchamniaitki iunkia nuátkachminiaiti.”

¹¹ Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai.

¹² Chíkich chíkich nuátkachmin áiniawai. Chíkich nuátkachmin akiiniawaru áiniawai. Chikichcha aentsjai nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jeáka antukti.”

Jesus uchin shiir awajsamiania nu

(Márkus 10.13-16; Rúkas 18.15-17)

¹³ Nuyá Jesusan uchin itiariarmiayi. Nin antiñ Yúsan áujtusarat tusar wakariarmiayi. Túruiniakui ni unuiniamurí chicharkarmiayi.

¹⁴ Túruiniakui Jesus tímiayi “Uchi Winí winitin tsankatkatarum. Suritkiairap. Kame ju uchía áintsan péejchach áinian nunak Yus akupkamniaiti.”

¹⁵ Tinia uchin miniakas nuyá wémiayi.

Kútrintin Jesusjai chichasmiania nu

(Márkus 10.17-31; Rúkas 18.18-30)

¹⁶ Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

¹⁷ Tutai Jesus nin enentámtikrataj tusa tímiayi “¿Urukantai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

¹⁸ Tutai shuar “¿Tuna nekas umirkatniuitiaj?” tímiayi.

Takui Jesus tímiayi “Mankartuawaip, tsanirmawaip, kasámkáip, chíkich shuar tsanumpruraip,

19 ame apa nukusha umírkatá, ame shuárum ame ayashim aneamna nútiksamek aneeta.”

20 Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

21 Takui Jesus tímiayi “Nekas péñker átaj tákumka, weme ame kuítrum kuítrincha ainia nu sústartá. Tura nayaimpiniam kuítrintin ajastatme. Nuyá Winia nemártústá” tímiayi Jesus.

22 Tura natsa nuna antuk kúntuts wémiayi ti kuítrintin asa.

23 Nuyá Jesus ni unuiniamurín tiarmiayi “Nekasan tájarme, kuítrintin Yus akupeamunam pachiinkiatin ti itiurchataiti.

24 Ataksha tájarme, kamiriuka kawái nan̄kaamas uunt asa auja j̄in wayachminiaiti. Núnisan̄ kuítrintin Yus akupeamunam pachiinkiatin ti itiurchataiti.”

25 Ni unuiniamurí nuna antukar antúu ajarmiayi. Túrawar aniniainiarmiayi “¿Nuikia yaki uwempranniat?”

26 Tuíniakui Jesus ashí íisar tímiayi “Aents uwempratniun nekas tujintiainiawai antsu Yuska ashí tujintiatsui.”

27 Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Warín wáinkiatjaji iisha?”

28 Jesus tímiayi “Nekasan tájame, ukunman̄ka ju nun̄ka yamaram ajastatui. Aents Ajasu asan, Wisha nuí, uunt akupin ajastatjai tura atumsha winia nemartusutirmeka Wijjiaí métek akupin ajastatrume ashí Israer-shuar akupkatin.

29 Tura shuar ni jeencha, yachin̄cha, umain̄cha, aparin̄cha, nukurin̄cha, nuarin̄cha, uchirin̄cha, tura nun̄ken̄cha Winia anentu asa ikiukin wekaakka, nu shuar nii ikiukmia núnisan̄ yamaisha ti untsurí wáinkiatjawai tura ukunmasha tuke shiir pujustatui Yusjai.

30 Untsurí yamáí pen̄kerí áiniana nu ukunam ukunmaani pujusartatui, tura yapajjáwar yamáí ukunmayá áiniana nu ukunam emka pujusartatui’ tímiayi Jesus.

20

Jesus takarniun pachis áujmatsamiania nu

1 ‘Yus akupeamunam pachiinkiatin júnisaiti. Nun̄ka nérentin ni araamurín júuktaj tusa káshik iniartaj tusa j̄inkimiayi.

2 Chikichík tenariu kuit̄ jean tsawant takamtsuk akiktajrume tusa chichas ni araamun júuktinian akupkarmiayi.

3 Nantu takuntaísha ataksha jiinki shuar yujan wáiniak

4 timiai “Atumsha winia arakur júuktin yáintkiatarum. Shiir akiktajrume.” Tutai wearmai.

5 Ataksha tutupin aī nuyá áan̄kúsha jiinki, núnisan̄ tinia akupkarmai.

6 Ataksha nantu patamsaī j̄inkimiai. Tura shuaran yujan wáiniak “¿Urukantai takak-matskesha áani pujarum?” timiai.’

7 “Warí, iincha iniatmainiatsji” tiarmai.’

‘Tuíniakui timiai “Atumsha winia nun̄karuī takautarum. Péñker akiktajrume.”

8 ‘Kirit ajátekiáí takatr̄in wáinniun timiai “Takatan takasaru untsukam akikiarta. Kíarai nan̄kamawaru emka akikiarta. Túram káshik nan̄kamawarujai amuktá” timiai.

9 Takui nantu patamsa aī nan̄kamawaru wayawarmatai chikichík tenariu kuit̄ jean ashí akikiarmai.

10 Mash umintramtai nuyá emka nan̄kamawaru wayawar “nuna nan̄kaamas achikchatjash” tu enentáimsarmai. Tura chikichík tenariu kuit̄ jean achikiarmai.

11 Achikiar nérenniun itiurchat enentáimturarmai.

12 Tura tiarmai “Iikia ashí tsawant nantujai wáitsachjik. Ju shuarsha nantu patamsa aī nan̄kamawaruka pen̄ké ishichik takasaraí. Túrusha iijjiaí métek akikiarume” tiarmai.

13 Tutai nérentin chikichkiniak iniakmas timiai “Umpá, penké kasartsujme. Káshik chikichík tenariu kuit jeá chichasar iijiai iwiarachjik, timiai.

14 Pai, ame kuítrum achikiume. Nantu patamsaj takasuncha amijiai métek akiktinian wakerajai.

15 Warí, winia kuítrujai wi wakeramun túrachminkaitiaj. Antsu wi tsanka asamtai ¿yajauch enentáimturmek?” timiai.’

16 ‘Núnisaiti Yus-shuarnum. Émkaru áinia nu uku ártatui. Tura ukuya áiniana nu, emka ártatui. Untsurí ipiaamu áiniawai tura ishichik achikma áiniawai.” Tu áujmatsamiayi Jesus.

Jesus ataksha ni jákatniurín etserkamiania nu
(Márkus 10.32-34; Rúkas 18.31-34)

17 Jesus Jerusarénum jintiá wesa ni unuiniamurín akankin tiarmiayi

18 “Iistarum, Jerusarénum wéaji. Nuisha Israer-patri úuntrin tura ni jintinniuríncha Winia surutkartatui. Nuisha, wi Aents Ajasu ajn, “mantamnati” túrutartatui.

19 Tura apachnium surutkartatui. Nu katsekrukar, awattiar krúsnum máawarti tusar túrutawartatui. Túrasha jakayatan menaintiú tsawantaj nantaktiatjai” tímiayi.

Jakupu tura Juanka nukurí Jesusan seamiayi
(Márkus 10.35-45)

20 Nuyá Jakupusha Juansha, mai Sepetéu uchirí, nukuríjiai tariar Jesusan tikishma-trarmiayi. Tura nukurí Jesusan waitnentrutarat tusa seamiayi.

21 “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nu winia uchir chikichik untsuur-umaani chikichcha menaanmaani akupkarti tusam apujsarta.”

22 Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniaitjai. Núnisan wáitsatniujai imiaitniua áintsan imiantiniaitjai. ¿Nú pininnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

23 Tuíniakui Jesus tímiayi “Ayu. Winia pininkruiya umartatrum. Wi imiantiatjana nujai imiantiatrum. Antsu Wijiai tsaninkia pujustinniaka Wikia íschatniuitjai, antsu winia Apar iwíarturu áinia nuna nu apujsattawai” tímiayi.

24 Chíkich tias (10) unuiniamurí nuna antukar nu jímiaran kajerarmiayi.

25 Túmainiakui Jesus untsukar tiarmiayi “Ju nékarme, apachniumka kapitían ajasar ni shuarín nérenniua áinis ti akupenawai. Ni úuntrisha waantu enentáimsar “wítjai akupniun” tu enentáimtikiainiawai.

26 Antsu atumjainkia núnis áchatniuiti. Nankaamaku ajastaj tákunka chikicha yaintri átiniaiti.

27 Ame kapitíantrum ajastaj tákunka ashí shuara yaintri ajástí.

28 Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuaran tunáa tumashrin akikmatkataj tusan jákatniuitjai. Nuna tarimjai” tímiayi Jesus.

Jímiar jii kusurun Jesus tsuármiania nu
(Márkus 10.46-52; Rúkas 18.35-43)

29 Jirikiú péprunmaya wénakui untsurí aents Nin nemariarmiayi.

30 Nu jintiá yantam jímiar jii kusuru pujuarmiayi. Jesus wéawai taman antukar kakan-tar untsukarmiayi. “Uuntá, uunt akupin Tawitia Uchirínchukaitiam. Waitnentrurta” tiarmiayi.

31 Tuíniakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiriá, waitnentrurta” tiarmiayi.

³² Tuíniakui Jesus wajas jii kusurun untsukar aniasarmiayi “¿Warí itiuurtukat tusarum wakerutarum?”

³³ “Uuntá, iimtiaí tusar wakeraji” tiarmiayi.

³⁴ Tuíniakui Jesus nin waitnentrar ni jiiin antiñkiarmiayi. Nu chichamaik ímiar niisha Jesusan nemariarmiayi.

21

Jesus Jerusaréñnum wayamiania nu

(Márkus 11.1-11; Rúkas 19.28-40; Juan 12.12-19)

¹ Jerusaréñnum nuntumsar Petpajái péprunam jeawarmiayi. Nusha Uriwiu náinnium ayamchiiyayi. Nui jeawar Jesus ni unuiniamurin jímíaran akupeak tímiayi

² “Tíjjuch péprunam wérum umpuuru umpuuruchijjai jinñkiamu wáinkíattarme. Nu atiarum itartitiarum.

³ Tura aents “Urukamtaí áitkiarum” túramkurminkia “Uunt wakerawai, tura wárik awainkittiawai” titiarum” tímiayi.

⁴ Tura nusha yaunchu Yúsnan etserin aarmia nu umínkiatí tusa tímiayi. Júnis áarmiayi:

⁵ “Ashí Israer-shuarnum ju etserkatarum:

“Iistarum, atumi Akupniuri, péejchach ajas umpuuruchiniam ekeemak winitram-prume. Péejchach asa káarak áintstai umpuuru uchirín ekeemak winitrámtatrume,” titiarum.” Tu áarmaiti.

⁶ Tutai nu jímíar unuiniamurí wear Jesus timia núnisañ túrawarmiayi.

⁷ Umpuuruchin nukurtiuk itiararmiayi. Tura ni pushirín áitkiaram Jesus entsamkami-ayi.

⁸ Shuar untsurí ásar ni wéamunam pushirín áitkiarmiayi. Chikichcha nuká jurukar ni wéamunam áeprurarmiayi.

⁹ Shuar untsurí eem wearmia nusha tura uku winiarmia nusha kakantar untsumi-armiayi. “Juná weatrí uunt akupin Tawit asamtaí nanñkaamakuiti. Yusa náariin winiana ju ii Untrinti. Shiir atí. Nayaimpinmasha Yus shiir awajsatai.” Tu untsumiarmiayi.

¹⁰ Jesus Jerusaréñnum wayamntai ashí shuar ti enentáimainiak “¿Jusha yait?” tiarmiayi.

¹¹ Chikichcha “Yúsnan etserin Jesusaiti, tiarmiayi. Nasarét pepru Kariréa nunñkanmayaiti” tiarmiayi.

Yusa Uunt Jeen suruktinian Jesus surimkiamiania nu

(Márkus 11.15-19; Rúkas 19.45-48; Juan 2.13-22)

¹² Nuyá Jesus Yusa Uunt Jeen wayá kuítian súruiniak tura súmainiak pujan akúprámiayi. Kuítian yapajinia misaríncha ayanturmiayi tura yampitsa súruinia kutañkríncha núnisañ ayanturmiayi.

¹³ Nuyá tímiayi “Yus-Papinium áarchamukait,

“Yusa Jeenka Yus aujtai jéaiti.” Antsu átumka kasa matsamtajya nútikiarme” tímiayi.

¹⁴ Nui Yusa Jeen jii kusurarusha shutuapsha Jesusan tariarmiayi. Túramtai tsuárarmiayi.

¹⁵ Tura Israer-shuar pátrisha tura Israer-shuara jintinniurísha aents tujintiamun Jesus túrakui íisar kajerarmiayi. Nu arantcha uchi Yusa Jeen “Juná weatrí uunt akupin Tawit asamtaí nanñkaamakuiti” untsumainiakui Jesusan ti kajerarmiayi.

¹⁶ Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana juka áujsachukaitrum. Júnis tawai,

“Uchisha kuírchisha Yusa náarin imiá shiir awajtusarat tusa Yus tsañkatkaiti.” Tu áarmaiti.

¹⁷ Nuna tinia ikiuiniak Jerusaréñnumiá jiinki Petania péprunam we nui kanarmiayi.

Jesus iikiu numin yuminkramiayi

(Márkus 11.12-14, 20-26)

¹⁸ Kashin tsawaar Jerusarénnum waketas Jesus tsukaarmiayi.

¹⁹ Iikiu numi jintiá yantam wajan wáiniak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerekchattame.” Takui nu chichamaik káarmiayi.

²⁰ Nuna wáiniak ni unuiniamurí ti enentáimprar aniasarmiayi “¿Urukaku imiá wárik jaka?”

²¹ Tuíniakui Jesus tiarmiayi “Nekasan tájarme, Yus nekas enentáimtakrumka, “nekas-pash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam iniañta” tutai túrunattawai.

²² Ashí Yus áujeakum seamna nu, Yus nekas enentáimtakum seakmeka, wáinkiáttame” tímiayi.

Yusa kakarmaríjiaí Jesus takasmiania nu

(Márkus 11.27-33; Rúkas 20.1-8)

²³ Yusa Uunt Jeen Jesus wayá unuiniamiayi. Turají Israer-patri uuntri tura Israer-shuara úuntri sha Jesusan tariar aniasarmiayi “¿Yana chichamejái ju túram. Ya ju túratniuncha akuptamkai?” tiarmiayi.

²⁴ Tutai Jesus tiarmiayi “Wisha aniastaj tusan wakerajrume. Ju áirkakrumniñkia Wisha yana chichamejái túraj nuna ujaktatjarme.

²⁵ Wats, ¿ya imiakratin Juan kan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniñkia “¿urukamtai enentáimtichuitrum?” túramtatji.

²⁶ Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuíniatsuk” tiarmiayi.

²⁷ Nuyá Jesusan “Nékatsji” tiarmiayi.

Tutai Jesussha aíniak “Wátsek, Wisha núnisnak akuptukua nuna ujakchattajrume” tímiayi.

Jimiará uchi tiarmia nuna áujmatsamiania nu

²⁸ Jesus unuiniak tiarmiayi “Enentáimpratarum. Shuar uchin jímiarar takakuuyi. Nuna chikichkin chicharuk timiai “Uchirú, arakur júuktin yamáí wetá.”

²⁹ ‘Tutai uchi “Atsá, nakitiajai” timiai. Tayat urum enentáimiar takaumai.’

³⁰ ‘Nuyá aparí chikichnasha werí núnisar timiai.’

‘Tutai uchi “Apawa, páchitsuk wetajai” timiai, túrasha wéchamai.’

³¹ ‘¿Túa ni aparí wakeramun umirkama?’ tímiayi Jesus.

Tutai “Emkaa nu” tiarmiayi.

Tuíniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiintsrumniñ nii emka Yus akupeamunam pachiinkiertatui.

³² Iis, imiakratin Juan péñker wekasatniun etserkamiayi, túrasha antukchamarume. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaarí enentáimturhamarme’ tímiayi.

Yajauch takaun áujmatsamiania nu

(Márkus 12.1-12; Rúkas 20.9-19)

³³ ‘Ju chíkich áujmatmasha antuktaram. Nunká nérentin uwa ajan ajammai. Tura wenuimiai. Uwa neketaincha najanamai. Kumpin jeancha najanamai. Tura mash péñker iwiar shuar wáitrukarti tusa apujkimiai. Tura niñkia yajá nunkanam wemai.

³⁴ Tura júuktin tsawant jeamtai juuk nakak akúptúrkartí tusa chíkich takarniurí akupkamai.

³⁵ Tura nuĵ pujuinia nu, akupkamun achikiar chikichnaka katsumkar, chikichnasha máawar, chikichnasha kayajajĵ tukurar máawarmai.

³⁶ Túrawarmatai nérentin takarniun nuna nanĵkaamas akupramai. Ataksha nuĵ pujuarmia nu núnisanĵ túrawarmai.

³⁷ Amúamunam ni uchirĵn akupeak “Winia uchir asamtai umirkachartimpiash” timiai.

³⁸ Túrasha nu takau nérenniu uchirĵn wáinkiar “Nuna aparĵĵ jakamtaĵ ĵuna mashi ĵúkishtatuak, tiarmai. Maatai, túrar ii nérentin ajastai” tiarmai.

³⁹ Tiar achikiar arant ĵúkiar nuĵ máawarmai.”

⁴⁰ Tinja Jesus aniasarmiayi “Nunĵká nérenniurĵ taa nu takaun ĵitiurkatinĵ?” tímiayi.

⁴¹ Tutai tiarmiayi “Nu shuar ti yajauch ásarmatai waitnantsuk máawartatui. Tura nu ajan chĵkich takaun neren akanak nin susamnia nuna apujsattawai” tiarmiayi.

⁴² Tuĵniakui Jesus tímiayi “Átumka Yus-Papikia ĵpenĵkek áujchaitrum? ĵúnis áarmaiti: “ĵeĵ jeamin utsanĵkarmia nú kaya ashĵ kayajajĵ nanĵkaamas apujsamuiti. Núnaka ii Uuntrĵĵ Yus túraitĵ. Iisha íisar ti enentáimtajĵ.” Tu áarmaiti.

⁴³ Tuma asamtaĵ tájarme, Yusna írúnna nu wáinkiatárum tusa suramsamuitiat atumĵya ĵunas chĵkich aents súnastatui. Niisha awanĵtukiartatui.

⁴⁴ Tura shuar nu kayan tukumainia nuka kupinrtartatui. Tura nu kaya shuarnum iniarka tsai tsai awajsattawai auka” tímiayi Jesus.

⁴⁵ Israer-patri uuntrĵsha Pariséusha Jesus áujmatman antukar “in túramĵi” tusar achiktaj tiarmiayi.

⁴⁶ Tura ashĵ aents “Jesus Yúsnan étserui” tuinia ásarmatai nin ashamkarmiayi.

22

Métek-taku chichamĵajĵ nuatnaiyamun Jesus áujmatsamiania nu

¹ Jesus ataksha áujmatuk ĵuna tímiayi:

² “Yus akupeamunam pachiĵnkiartin ĵúnis enentáimpramniaiti. Uunt akupin ni uchirĵ nuáteakui nampermamai.

³ Túrak ni takarniurĵn ipiaamautarum tusa akupkarmai. Tura ipiaamusha nakitrarmai.

⁴ Ataksha chĵkich takarniuncha ipiaamakrum ĵu titiarum tusa akupkarmai. ““Mash yurumkan iwiarajai, tawai, titiarum, timiai. “Waakasha máatarum tusan akupkarĵai, tawai. Ajaermancha máatarum tusan akupkajai, tawai. Ashĵ nuatnaiyamunam winiarti,” tawai” titiarum” timiai.

⁵ Táraitiat nú ipiaamusha nakitrarmai. Chikichik ni nunĵken wemai. Chikichcha kuĵtĵan suruktĵnian wemai.

⁶ Chikichcha ipiaakratniun achikiar yajauch awajsarmai, tura chikichnaka máawarmai.

⁷ Túramtaĵ uunt akupin ti kajek, ni suntarĵ mash máatarum túrarum ni ĵeĵ mash ekeemáktárum tusa akupkarmai.

⁸ Nuyá ataksha ni takarniurĵn akupkamai. “Nuatnaikiatin ĵísat mash iwiaramuiti, timiai. Tura nu ipiaamu winichmin armai.

⁹ Tuma asamtaĵ pepru ĵintĵ werum ashĵ shuar nánĵkamas wáintrum nu ipiaatarum” timiai.

¹⁰ Takui takarniurĵ ĵĵinkiar pepru ĵintĵn wajainian, yajauch shuarnasha péĵker shuar-nasha, ashĵ ipiaawarmai. Túramtaĵ ĵeĵ piákmaj.

¹¹ Nuyá uunt akupin ipiaamun íisartaj tusa wayamaj. Nuĵ shuaran péĵker iwiarmam-prachun wáinkiamaj.

¹² Tura timiai “Umpá, ĵurukamtaĵ nuatnaiyamunam entsataĵ pushĵ entsatsuk wayam?” Tutai nu áishmanĵ tákamtak pujusmiayi.

¹³ Nuyá uunt akupin yurumka ajaaman timiai “Achikrum nawenmasha uwejnusha jinkiarum aa júikrum kiritniunam ajapatarum. Nuisha ti úutin ti wáitsatin átatui” timiai.

¹⁴ Kame untsurí ipiaamu ániawai antsu ishichik achikma ániawai.”

Uunt akupin Sésar akiktinia nu

(Márkus 12.13-17; Rúkas 20.20-26)

¹⁵ Nuyá Pariséu chichaman najatawar uyumtikiatai tusar tiarmiayi.

¹⁶ Túrawar ni shuarincha tura akupin Erutisa nemarniurisha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintiame. Shuar shiir enentáimturarat tusam jintiatsme, tiarmiayi.

¹⁷ Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

¹⁸ Jesus ni yajauch enentáijiai aníam nekáa tiarmiayi “Aya shiir chichamtiniaitrome. ¿Urukamtai uyumatkiarkatin wakerutarum? tímiayi.

¹⁹ Wats, Sésar akiktinia nú kuit itiaritiarum.” Takui chikichik kuítian itiararmiayi.

²⁰ Nuna iis Jesus aniasarmiayi “¿Jui yana yapimpiait tura yana naari áarmait?”

²¹ Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi.

²² Tura nuna antukar ti enentáimprarmiayi. Tura ikiuiniak wearmiayi.

Jesusan jakamunmaya nantaktinian aniasarmiania nu

(Márkus 12.18-27; Rúkas 20.27-40)

²³ Nu tsawantaik Satuséusha Jesusan tariarmiayi. Satuséuka jakamunmaya nantachatniuiti tuiniawai. Nuna tiniu ásar juna Jesusjai áujmatsarmiayi.

²⁴ “Uuntá, Muisais juna áartampramiai, “áishman uchin yajutmatsuk jakamtainkia ni yachi nu nuwan nuatak ni yachin yajútmátrati,” tu áarmiayi, tiarmiayi.

²⁵ Ayu, íi shuarnum siati (7) yáchintin áarmiayi. Iwiairi nuatak uchin yajutmatsuk jakamiayi. Tura wajen ni yachin ikiurkimiayi.

²⁶ Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi.

²⁷ Nuyá nuwasha jakamiayi.

²⁸ Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

²⁹ Tuíniakui Jesus tímiayi “Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarne.

³⁰ Nekaatarum. Jakamunmaya nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui.

³¹ Túrasha jakamunmaya nantakiartatna nu nekaatajtsa wakerakrumka ju enentáimsatarum. Muisais aarma nu áujkachukaitrum. Júnisan áarmiayi:

³² “Wiitjai Apraáma Yúsrinjai, Isaka Yúsrinjai, Jakupu Yúsrinjai.” Tu áarmiayi.

Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjai iwiaaku pujuiniak nantakmin ániawai” tímiayi.

³³ Ashí aents nuna antukar nu jintintiam ti enentáimprarmiayi.

Yus akupkamu imiá enentáimtustinia nu

(Márkus 12.28-34)

³⁴ Satuséu Jesusan aiktinian tujinkiarumatai Pariséu nuna antukar iruntrarmiayi.

³⁵ Tura chikichik Pariséu jintintin asa Jesusan uyumtikiataj tusa aniasmiayi

³⁶ “Uuntá, ¿túa Yus akupkamu imiá nankaamas enentáimtustiniait?”

³⁷ Tutai Jesus tímiayi “Júiti: “Ame Yúsrum ashí enentáimjají aneeta. Ashí ame wakanmijjajishá tura tuke enentáimtusam aneeta.” Tu áarmaiti, tímiayi.

³⁸ Núiti emka ashí akupkamu nan̄kaamas enentáimtustinia nu.

³⁹ Chikichcha jujají métek-taku awai. Nusha tawai: “Ame írutramuram ame ayashim aneamna nútiksamek aneeta.”

⁴⁰ Nu jímiar akupkamu umirkam ashí Muisais akupkamia nusha tura ashí Yúsnan etserin unuiniararmia nusha umirkattame” tímiayi.

Kristu Tawit weeaitiat Yusa Uchirínti

(Márkus 12.35-37; Rúkas 20.41-44)

⁴¹ Tura Pariséu tuke irunar pujuiniakui

⁴² Jesussha aniasarmiayi “Kristu tutai çya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

⁴³ Tuíniakui Jesus tiarmiayi “Nuikia çurukamtai Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

⁴⁴ “Uunt Yus winia Úuntrun juna tímiayi: “Akupin pujutainium, winia untsuuruini, pujusam nákarsata. Ashí ame nemasrumin nupetkan Ámin umirtamkarti tusan amastatjai” tímiayi Yus.” Tu tímiayi Tawit.

⁴⁵ Watsek, Tawit Krístun “winia Úuntur” taisha çitiurak ni pampan̄mari áti?” tímiayi Jesus.

⁴⁶ Nuna takui pen̄keshá áikcharmiayi. Túrawar atakka uyumantikiatai tusar anischarmiayi Jesusan.

23

Jesus Pariséuncha Israer-shuara jintiniuríncha “yajauchitrume” timiania nu

(Márkus 12.38-40; Rúkas 11.37-54; 20.45-47)

¹ Jesus ni unuiniamuríncha tura ashí shuárnasha tiarmiayi

² “Israer-shuara jintinniurísha tura Pariséusha Muisais akupkamun paant ujatmaini-awai.

³ Tuma asamtai tuinia nu umirkatarum. Túrasha ni túruinia nu jumamkiirap. Nu shuar shiir chichainiayat nusháa túrin áiniawai.

⁴ Ti ititurchat ana nuna akupeenak ti emeram entsaktinia áintsan áentsun apujtuini-awai. Túrasha chikichik uwejejaishá ishichkisha takuitniun nakitiainiawai.

⁵ Aya shuar írsarti tusar ashí túruiniawai. Ashí shuar péñker enentáimturarti tusar Yus-Papin nijjaincha tura kunturíncha ti wan̄karam awajsar anujak yujainiawai. Tura nu arantcha pushirí sasariarman ashí shuarjají nan̄kaamas esaram awajas wekainiawai.

⁶ Nampernumsha péñker iwiamunam pujustinian wakeruiniawai. Iruntainmasha nan̄kaamantu ajasa pujustinian wakeruiniawai.

⁷ Jintiá wekainiaksha ashí aents áujtuiniak “Jintínkiartiniá” turutiarti tusa wakeruini-awai’ tímiayi.

⁸ “Túrasha átumka ashí shuar “Jintínkiartiniá” turutiarti tusa enentáimsashtiniaitrume. Átumka nuámtak yáchintrume. Átumka chikichik jintinkiertin ni naari Krístu takakrume. Nu asamtai “Jintínkiartiniá” túramcharmin áiniawai.

⁹ Ju nun̄kanmasha shuar “Aparú” tiirap. Chikichik nayaimpiniam pujana nu atumí Aparínti.

¹⁰ Atumi uuntri aya Krístuk asamtai “Uuntrú” túramcharmin áiniawai.

¹¹ Antsu átum írutkamunmayá uunta nuka peejchach átiniaiti.

¹² Shuar nan̄kaamantu ajastaj tákuinkia Yus nin peejchach awajsattawai. Antsu peejchach ana nuna Yus nin nan̄kaamaku awajsattawai’ tímiayi.

13 ‘Maa wáinkiatárum jintinniutirmesha, Pariséutirmesha. Ántrarum shiir chicham-tiniaitrum. Yus akupeamunam wayatín waiti epenniuitrum. Atumsha wayatsuk chikichcha wayataj tuinia nusha suritniuitrum.’

14 ‘Maa wáinkiatárum jintinniutirmesha, Pariséutirmesha. Ántrarum shiir chicham-tiniaitrum. Wajé jee atankiirum aents enentáimturarain tusarum ti esaram Yus áujtiniaitrum. Túrin asarum átum ti asutniátniuitrum.’

15 ‘Maa wáinkiatárum jintinniutirmesha, Pariséutirmesha. Ántrarum shiir chicham-tiniaitrum. Nunkanmasha nayaantsanmasha yajá wekainiuitrum chikichík shuar winí nemartusat tusarum. Tura atumi nemari ajasmatai atumjai nankaamas tunáa sumamannia awajearme.’

16 ‘Wáinkiatárum átumka. Jintinkiartiniaitrum nékachu asarum kusurua áiniuitrum. Ju jintiarne: “Shuar nekasan tajai tusa Yusa Jee páchiakka nii tana nuna umitsuk ikiukminiaiti. Antsu nekasan tajai tusa Yusa Jee kuri ana nuna páchiakka ti nekas umiktiniaiti” tniuitrum.’

17 Nétsetrum. Yúsjainkia ashí kuri ánrachukait. Antsu Yusa Jee írunna nuka aya nuin ikusma asa Yusna ajasuiti. Tuma asantai kurijai nankaamas Yusa Jee enentáimtustiniaiti. Enentáimcha asarum kusurua áinin wáakuitrum.

18 Nu arantcha tniuitrum: “Shuar nekasan tajai tusa naman-maar-Yus-sútain páchiakka nii tana nuna umitsuk ikiukminiaiti. Antsu Yús-sutainiam naman patasman páchiakka ti nekas umiktiniaiti” tniuitrum.

19 Nétsetrum. Penké naman Yusjai ánrachukait. Aya Yús-sutainiam patasma asa nu naman enentáimtuschatniukait. Enentáimcha asarum kusurua áinin wáakuitrum.

20 Enentáimpratarum. Shuar nekasan tajai tusa Yús-sútain páchiakka aya sútainiak páchiatsui antsu sutaicha tura nu patasmancha mái-metek páchiawai.

21 Núnisan shuar Yusa Jee páchiakka aya nunak páchiatsui antsu Yus nu jeanam pujú asantai nunasha páchiawai.

22 Núnisan shuar nayaimpin páchiakka Yus pujutainchsetrum. Penké naman Yusjai ánrachukait. Aya Yúa tura Yus nu pujana nunasha páchiawai.’

23 ‘Maa wáinkiatarum jintinniutirmesha, Pariséutirmesha. Ántrarum shiir chicham-tiniaitrum. Kumintsu nukésa, anisa nukésa, menta nukésa tias (10) akantram chikichik akankamu Yus súwitrum. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrum. Yus nekas enentáimtustincha, wait-entáimturincha tura tuke péñker túratniusha enentáimtsuk ikiuwitrum.’

24 Átumka jintinkiartiniaitrum nékachu asarum kusuru áiniuitrum. Kutanam yajasmach enketu wáinkiumeka júwitrum. Túrayatrum kamiriu wáinkiumeka kawai nankaamas úunt ain takamtsuk kújawitrum.’

25 ‘Maa wáinkiatarum jintinniutirmesha, Pariséutirmesha. Ántrarum shiir chicham-tiniaitrum. Átumka tsapasha pininsha initiaaní nijiatsuk aya pátatek nijiawitrum. Núnisrum pátatek shiir awajmamniuitrum tura enentáiminkia kasamkatniusha tura chikichna wakeruktincha nujai piákuuitrum.’

26 Kusuru áiniuitrum, Pariséutirmeá. Antsu emka initiaaní tsapasha pininsha nijiaktarum. Túrakrumninkia pátatkesha mai péñker átatui. Núnisrum atumsha atumi enentáin ana nu shiir awajsarum pátatkesha shiir átatrum.’

27 ‘Maa wáinkiatarum jintinniutirmesha, Pariséutirmesha. Ántrarum shiir chichamtini-aitrum. Iwiarsamu pújujai yakarar shiir awajsamua áiniuitrum. Aaní shiir ániawai. Tura initkia jaká ukunchijai piákuiti.’

28 Núnisaitrum atumsha. Chikich shuar ísmaka ti shiira áiniuitrum. Túrasha atumi enentáinkia ashí mujmiai piákuiti.’

29 ‘Maa wáinkiatarum jintinniutirmesha, Pariséutirmesha. Ántrarum shiir chicham-tiniaitrum. Yaunchu Yúsnan etserin iwiarsamunam átumka shiir enentáimtakrum jea

jeamkairume. Tura pé_nker shuar yaunchu jákarusha shiir enentáimturta_j tusarum ni iwiarsamu shiir awajearme.

³⁰ Túrakrum ju t_iniuitrume: “Iikia yaunchu ii weat_rij_iai pujaitkiurkia Yús_nan etserin máatin yáimkiach_aaji.”

³¹ Nuj_ai ti paant chichaarme atumsha. “Ii weat_ri Yús_nan etserniun máawar tunáa túrin ármiayi” tárume. Tura “Yáimkiach_aaji” táyatr_um, atumsha métek túrin asarum “Nii_jai méteket_ji” tárume.

³² Wats, atumi weat_ri nan_kamawarmia nu átum amuktatrume’ t_imiayi Jesus.

³³ ‘Napia áiniuitrume. Shuar aya yajauch awajniuitrume. Túmatirmesha Yus tunáa shuaran jinium akupkartatna nuy_a ¿itiurak uwempratarum?

³⁴ Untsur_i shuaran akuptuktatjarme. Yús_nan etserniuncha, ti nekan_{ch}a, jintinkiertin_inasha akuptuktatjarme. Tura atumsha ch_ikich máattarme, ch_ikichcha krúsnum ajin_truarum máattarme, ch_ikichcha iruntai je_nam asutiáttarme, tura ch_ikichcha ash_i nun_kanam áintrattarme.

³⁵ Nu tura asarum pé_nker shuara numpé puarma nuj_ai átum sumamattarme. Yámankamtaik Apir ti pe_nker shuáraitiat máamuyayi. Tura ukunam Perekíasa uchir_i Sakarías atumi uun_tr_i Yusa Jee ámanum nama_n-maar-Yús-sutai ajapén aténkamunam máawarmiayi. Wats, Apir máamunmay_a Sakarías máamunam ash_i pé_nker shuar ti untsur_i máamuj_ai sumamattarme.

³⁶ Nekasan tájarme, yamá p_ujuinia nú shuar ash_i nuj_ai sumamawartatui’ t_imiayi Jesus.

Jerusarénnumi_a shuaran Jesus aneak úutmiania nu

(Rúkas 13.34-35)

³⁷ ‘Jerusarénnumiatirmeá, Yús_nan etserin máiniait_rume. Yus akatar akupturmak_masha kayaj_ai tukuram máiniait_rume. Túrin árumni_n waitnentajrume. Atash ni uchir_in weaana áitkiasnak weartinian wakerimjarme, tura nakitramarme.

³⁸ Iistarum. Ame pépruram ajapamuiti.

³⁹ Tura “Yusa náari_n winiana nu, shiir atí” títiatrumna nu tsawant jeats_ain_n pe_nké wáitkiashtatrume. Nuna tájarme” t_imiayi Jesus.

24

Yusa Unt Jee saanaktinian Jesus ujakmiania nu

(Márkus 13.1-2; Rúkas 21.5-6)

¹ Jesus Yusa Unt Jee_nia j_iinki wea_i ni unuiniamur_i nin tariar Je_n iniaktusar áujmatsarmiayi.

² Tura Jesus tiarmiayi “Nu mash yamá wáintrume. Tura nekasan tájarme ukunman_ka mash saanaktiatui. Chikich_ik kayaksha eken_tramur_i atsuttawai” t_imiayi.

Amúamu tsawant nekaatin

(Márkus 13.3-23; Rúkas 21.7-24; 12.22-24)

³ Nuyá Uriwiu náinnium wear ni_nki nu_ji pujusar ni unuiniamur_i Jesusan aniasarmiayi “¿Nusha urutaik túrunat_i. Tura ame tátin_{ch}a tura nun_ka amuukatin tsawant jeakuisha wari_jia_n nekaattaj_i? Nu u_jatkata” tiarmiayi.

⁴ Tu_niakui Jesus t_imiayi “Aneartarum, ana_nkramawairap.

⁵ Untsur_i shuar winia náarun pachisar “wi Krístuit_jai” tiar untsur_i shuaran ana_nkawartatui.

⁶ Ti untsur_i meset chicham antuktatrume túrasha sapijmiakairap. Núnisa_n átiniaiti nun_ka amúats_ain_n.

⁷ Apach_{ch}a ch_ikich nun_kanmay_a apach_jai máaniawartatui. Tura ti tsukasha átatui. Sun_kursha ti pampartatui. U_usha ti u_urkartatui. Nuka untsur_i nun_kanam ash_i túrunawartatui.

⁸ Nuj_ai ti wáitsatin aya yama nan_kamui’ t_imiayi.

⁹ ‘Nuyá atumniasha yajauch awajsarti tusa surutmakartatui. Tura mantamawartatui. Tura winia naar pachia asakrumin ashí shuar muíjramkartatui.

¹⁰ Nu tsawantaj untsurí shuar Yúsán iniaisartatui. Túrawar nuamtak muíjniainiak surunairartatui.

¹¹ Untsurí shuar wáitruiniak “wi Yúsán etserniuitjai” tiartatui. Túrawar untsurí shuáran nusháa enentáimtikrartatui.

¹² Tura tunáa ti ákui nuamtak anenaichartatui.

¹³ Tura shuar ashí nuna tuke katsuntra nu uwemprattawai.

¹⁴ Ashí aents nekaawarat tusa Yus-Chicham ashí nunkanam etsernaktatui. Túramtai amuukatin tsawant jeattawai” tímiayi.

¹⁵ Shuar juna áujea nu enentáimprati. Kame Jesus tímiayi “Yúsán etserin Taniar muijmiamtik tuke emesratin ana nuna yaunchu aar etserkamiayi. Nuka Yusa Jeen wantinkiamtai

¹⁶ ashí shuar Jutía nunkanam írúnna nu, muranam pisararti.

¹⁷⁻¹⁸ Ti wárik pisartin asamtai shuar jea yakí pujaksha tura shuar ajanam wekaakusha jeá waketki warirí jukitiaj tíchati. Antsu nuyañ wárik pisarti.

¹⁹ Nu tsawantaj nuwá ajamtincha tura kuírchin takaku ainia nusha ti wáitsartatui.

²⁰ Ayampratin tsawantajsha tura michá nántutincha nu pisartin tsawant áchati tusarum Yus seatarum.

²¹ Maa, nu tsawantaj ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai.

²² Nu wáitsatin ti esarmaitkiuinikia chikichkísha uwemprachainti. Tura Yus nu wáitsatniun wárik amuntikiattawai. Shuar Niiniu ajasarat tusa achikma ainia nu uwemprarat tusa wárik amuntikiattawai’ tímiayi.

²³ “Tura atumin “Júiti Kristu,” tuíniakuisha tura “Nuí pujawai” tuíniakuisha anturkairap.

²⁴ Untsurí shuar Krístuitjai tusar wantinkiertatui. Untsurísha “Yúsán etserniuitjai” tiartatui. Tura shuáran anañkataj tusar aents tujintiamun iniakmasartatui. Tura ti kakarman túruiniak Yús-shuarnasha anañkamin áiniakuinikia anañkawarainti.

²⁵ Túrunatsain nuna emka ujaajrume.

²⁶ Tuma asamtai “Iis, Kristu nuí aents atsamunam pujawai” túramainiakuisha nuí wéerap. “Juí úumak pujawai” tuíniakuisha anturkairap.

²⁷ Núnisan úumkan táchattajai. Peem péetuk ti wárik ashí nunkanam wáinkiachminkiait. Núnisnak wi Aents Ajasuka winiakun paant wantinkiertajai.

²⁸ Wats, jaka tepaana nuí chuan káutkachartatuak’ tímiayi.

Kristu tátintri

(Márkus 13.24-37; Rúkas 21.25-33; 17.26-30, 34-36)

²⁹ “Ti wáitsatin nankaasmatai ti wárik tsawáj nantu kajinkiertawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha peantrartatui.

³⁰ Nuíkiá Wi Aents Ajasuka, tátiniur paant átatui. Tura ashí nunkanmaya aents Wi winiáj wáitkiar asuttiamattaji tusar úutiartatui. Wisha ti kakaram tura Yusa wincharíjiaj yurañminiam winiáj wáitkiartatui.

³¹ Yusa suntarín kachu kakaram umpuarterum tinia akupkamtai nu suntar ashí nunkanmaya ashí Yús-shuarn, Yus achikma ásarmatai, irurartatui’ tímiayi.

³² ‘Ikiu numirí nakumea nu nekaatarum. Ni nukén eteakui “esat nantu jeatemayi” táturmek.

³³ Núnisan ashí ju wáinkiumeka “amuukatin tsawant nekas jeatemayi” tíiniaitrumé.

³⁴ Nekasan tájarne, yamáí aents pujuinia nu amúatsain ashí túrunattawai.

³⁵ Nunkasha nayaimpisha amuukartatui antsu winia chichamur amuukashtatui’ tímiayi.

³⁶ ‘Tura nu túrunatin tsawant nekanachminiaiti. Yusa suntarisha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai’ tímiayi.

³⁷ ‘Wi tátiniur jeamtaí yaunchu Nuai pujumia nú tsawantin túrunamia núnisañ átatui.

³⁸ Nu tsawantin, tuke amaartsain, aya júnisañ aa asamtaí yurumuk umarar pujuarmi-ayi. Nuatnainiarmiayi. Ni nawantríncha nuatmamtikarmiayi. Tura tumá pujuiniaí Nuai uunt kanunam enkemamtaí

³⁹ nu aents tuke nékainiatsain ama amarak mash amuukarmiayi. Núnisañ átatui Wi tátin jeamtaí.

⁴⁰ Nu tswantaik jimiará shuar ajanam pujuttawai. Chikichik junaktiatui tura chíkichkia ikiunkittiawai.

⁴¹ Núnisañ jimiará nuwá shana nekeak pujuttawai. Chikichik junaktiatui chikichcha ikiunkittiawai’ tímiayi.

⁴² ‘Nu asamtaí atumsha iwiarnarum pujustarum. Nekaachminiaiti uruk ájintsuk taritjarum.

⁴³⁻⁴⁴ Tuma asamtaí aneara pujustarum. Wi nekaachmanum tátin júnisañ enentáimpramniaiti. Shuar ju kashi kasa tátinian nekaanka kánutsuk kasa táawai tusa iwiarnar nákasainti. Núnisrum aneara pujutarum.’

*Pénker takamtikniuncha yajauch takamtikniuncha Jesus áujmatsamiania nu
(Rúkas 12.41-48)*

⁴⁵ ‘Shuar pénker uminian tura pénker enentáimniun áujmatsattajai. Nuna uuntri yajá irauweak “Yurumátin jeamtaí winia takartin ayuratarum” tíchanpiash.

⁴⁶ Nu takamtikniuncha ni uuntri taa takatrín tímiatrusañ túran tariñkia shiir enentáimtusainti.

⁴⁷ Nekasan tájame, umin asamtaí ni uuntri ashí ni warirín wáitrúkat tusa takatan susattawai.

⁴⁸⁻⁴⁹ Antsu úuntur wau táchattawai tusa takamtikin ni uuntri yáintrín yajauch awa-jeak tura takatsuk aya yurumátiniun tura nampektinian wararkunka nu takamtikin yajauchiiti.

⁵⁰ Turaj ni uuntri aya aneachma taa nu takamtikniun, yajauch asamtaí,

⁵¹ ti kakaram asutiattawai. Yajauch shuar pujuinia nui akupkattawai. Nuisha ti wáitiak ti úuttiatui’ tímiayi Jesus.

25

Jesus tias (10) nuwan áujmatsamiania nu

¹ ‘Yus akupeamunam pachiinkiatin júnis átatui. Nuatnaikiatin jísat akui tias nuwá natsa kantiran akaawar nuátkattana nu áishmankan inkiun jeá itiatái tusar wearmai.

² Senku nuwá enentáimcha armai. Tura chíkich senku nuwá enentáimin armai.

³ Enentáimcha arma nú nuwá aya akaamunak júniak amuukamtaí yaraatniun asutin júkicharmai.

⁴ Antsu chíkich senku núwaka akaamuncha júniak tura ataksha amuukamtaí yaraatniun asutin júkiarmai.

⁵ Tura jíinkiar matai nuatkatin áishman wari taachkui kari pujakui kanararmai.

⁶ Nuyá kashi ajapén shuar untsukum “Pai nuatkatin winiawai. Werirum inkiuntarum” timiai.

⁷ Tu untsumon antukar nantakiar kantiran akaatai tusar pujursarmai.

⁸ Nuyá senku nuwá enentáimcha arma nu, chíkich nuwá enentáimniun tiarmai “Incha atumi asutiri ishichik ajamprusaitia. Ii kantirisha kajiniawai.”

⁹ ‘Tutai chíkich senku nuwá tiarmai “Atsá, warí íncha jeartamchattaji. Tura atumnia penké jeashtatui. Nekaska surutainium werum sumaka utumtarum” tiarmai.’

10 “Tura nuyá senku nuwá enentáimcha arma nu, asuitian sumak utitiai tusar wéarai ukunam nuatkatin áishman tamai. Túramtai enentáimin nuwá arma nuka nuatnaikiatin námpernam nuatkatniujai wayawarmai. Túramtai wáitin epeniarmai.

11 Tura epeniarai enentáimcha nu táarmai. Tura tiarmai “Úuntá, waiti uratritia.”

12 “Tu unsumainiakui nu uunt kajerak chichak “Cha, ¿yátsukaitrum? Penké nékatsjarne” tiarmai.”

13 Jesus nuna áujmatas umik tímiayi “Aents Ajasuitjai tura tátin tsawantrusha tura uruk ain tátaj nusha nékatsrume. Tuma asarum tuke iwiarnarum pujustarum’ tímiayi.

Kuit susamun áujmatsamiania nu

14 ‘Núnisan Wi tátin júnisaiti. Shuar chíkich nunkanam wéaku ni takarniurin untsukar ni kuítrin akanak súsarmai.

15 Chíkichkiniak senku mir (5.000) kuítian susamai. Chikichnasha jimiará mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujai métek súsarmai. Tura ikiuak yajá wemai.

16 Takarin senku mir kuítian achikmia nujai takakmas ataksha senku mir kuítian patakmai.

17 Chikichcha núnisan jimiará míran achikmia nujai takakmas ataksha jimiará míran patakmai.

18 Tura chíkich shuar ni uuntri kuítrin chikichik míran achikmia nuna wáa taur úukmai.’

19 ‘Nuyá ukunam nu shuara uuntri támai. Tura kuítian súkiarma nujai itiurkarmakit tusa untsukarmai.

20 Emka senku mir kuítian achikmia nu tamai. Nuyá ni uuntrin chíkich senku mir patakman suak timiai “Uuntá, senku mir kuit surusmame. Pai, atak senku míran patasmajai.”

21 ‘Takui ni uuntri timiai “Ti pénger takakmauwitme. Nekas uminiaitme. Ishichk-ijjaisha ti pénger takakma asakmin ti núkap yamaikia amastatjai. Winí wayam wijjai ti shiir warasta” timiai.’

22 ‘Nuyá chíkich shuar jimiará míran achikmia nu tarí timiai “Uuntá, jimiará mir surusmame. Pai, ataksha jimiará míran patasmajai.”

23 ‘Takui ni uuntri timiai “Ti pénger takakmauwitme. Nekas uminiaitme. Ishichk-ijjaisha ti pénger takakma asakmin ti núkap yamaikia amastatjai. Winí wayam wijjai ti shiir warasta” timiai.’

24 ‘Nuyá chíkich shuar chikichik míran achikmia nu tarí timiai “Uuntá, ti kajen asakmin tura araachiatam tura atsaamprachiatam júurtuktarum tiniu asakmin

25 sapijmiakun ame kuítrumniaka nuká táutran úukmajai. Pai, juíti ame surukmiam nu” timiai.’

26 ‘Takui ni uuntri timiai “Ámeke yajauchiitme. Aya nákiitme. Wi araachiatan tura atsaamprachiatan júurtuktarum tíniuitme túrutsumek.

27 Tu enentáimkiumka ¿urukamtai kuit-iruntainiam ikiurtuschamam? Nuikia wi táakun patasan achikiájai” timiai.

28 Nuna tinia nuj wajainian tiarmai “Ju shuar chikichik mir kuit atankirum tias mir kuítian takaka nu susatarum.

29 Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuiat jurunkittiwai.

30 Ju umichu shuarsha aa kiritniunam ajapatarum. Nuji ti wáitai ti úuttiatui” timiai”. Tu áujmatsamiayi Jesus.

Akantratin átatna nu

31 Jesus áujmatuk tímiayi ‘Aents Ajasuitjiana nu ashí akupin ajasan Yusa suntari énekma winittijai. Tura Uunt Akupin asan shiir pujutairui pujustatjai.

³² Túramtai ashí nun_{kan}maya aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrattajai.

³³ Tura kachurtichunka, pé_nkera nuna, untsuuruin_i awajsartatjai. Tura kachurtinni-aka, yajauchia nuna, menaaruin_i awajsartatjai.

³⁴ Túran nekas Uunt Akupin asan untsuuruin_i wajainian títiatjai “Atumniaka winia Apar shiir awajtamsaitrume. Wi akupeajna nu_i winitiarum. Yus nun_{kan} najanamia tímianaik átum nu_i warastinian tsan_{kat}ramkamiarme.

³⁵ Kame Wi tsukamá wekai_{ay} ayurtuamiarme. Kitiamo wekai_{sha} umartin surusmiarme. Wait ajá wekai_{sha} itiaararum ajamprusmiarme.

³⁶ Pushir atsa_{isha} átumka surusmiarme. Jaa tepa_{isha} íiráimiarme. Sepunam en_{ket}a_{isha} tarum íiráimiarme” títiatjai.

³⁷ Tutai untsuuruin_i wajainia turutiartatui “Uuntá, ¿urutia tsukamá wekaamnisha ayuramaji. Urutiá iisha kitiamo wekáa wainkiarsha umartincha amasmaji.

³⁸ Tura urutia wait ajá wekaamnisha tura pushiram mamurmataisha iisha amasmaji.

³⁹ Urutia iisha jaa tepamin tura sepunam en_{ket}min wainkiarsha winitir íimiai?” turutiartatui.’

⁴⁰ “Turutainiakui Wi Uunt Akupin asan tiartatjai “Nekasan tájarme, ashí ju_{wí} shuar péejchachisha waitnentramarum nu Winia anentakum túraitrume” tiartatjai’ tímiayi.

⁴¹ ‘Wi Uunt Akupin asan menaaruin_i wajainian tiartatjai “Atumsha yajá wetarum. Yajauchijai yumin_kramuitrume. Yus uunt iwianchi ni suntarijia_i tuke kajinkiashtin jinium apeatniua nu_i wétatrume atumsha.

⁴² Átumka Wi tsukamaj_{ay} ayurtuachmarme. Kitiamaj_{isha} umartin suruschamarme.

⁴³ Wait ajá wekai_{sha} ikiatrachmarme. Pushirun imiampra_{isha} entsartin suruschamarme. Jaa tepa_{isha} tura sepunam en_{ket}a_{isha} íiraichmarme” tiartatjai.’

⁴⁴ “Tutai niisha turutiartatui “¿Urutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha íisha winitir yáin_{ch}amaji?” turutiartatui.’

⁴⁵ ‘Wi Uunt Akupin asan tiartatjai “Nekasan tájarme, Ashí Wíi shuar, péejchachisha waitnentrachmarum nu_i Winiasha túrutachuitrume” tiartatjai.

⁴⁶ Nu shuarka tuke wáitsatniunam weartatui. Tura Yus achikma ainia nusha tuke iwiaaku Yus_{jai} pujustinnium weartatui” tímiayi Jesus.

26

Jesus achiktin chichaman jurusarmiania nu

(Márkus 14.1-2; Rúkas 22.1-2; Juan 11.45-53)

¹ Jesus ashí nuna tinia umik ni unuiniamur_in tiarmiayi

² “Atumsha nékarme, Paskua jisat jeatin jimiarchik tsawant ajasai. Nu_i Wi Aents Ajasu asamtai krúsnum máawarti tusar surutkartatui” tímiayi.

³ Nuyá Israer-patri uuntrisha Israer-shuara jintinniurisha Israer-shuara úuntrisha Kaipiasa jeen áarin iruntrarmiayi. Kaipiassha Israer-patri uuntriayi.

⁴ Nu_i ana_nkat_in chichamjai Jesus achikiar maatai tusar chichaman jurusarmiayi.

⁵ Tura tiarmiayi “Jístatin túrachminiaiti aents téetet ajarai_n tusar.”

Nuwa Jesusan kun_{ku}inian ukatramiania nu

(Márkus 14.3-9; Juan 12.1-8)

⁶ Jesus Petania péprunam pujus tunamaru Semun_{ka} jeen pujumiayi.

⁷ Nu_i pujai nuwa ti kuit jeá kun_{ku}inian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kun_{ku}inian ukatramiai.

⁸ Túramtai ni unuiniamur_i nuna íisar kakerkar tiarmiayi “¿Urukamtai au kun_{ku}in imiá kuítniasha áantrasha wasurea?

⁹ Antsu ti kuitjaj suruk shuar kuítríncha ainia nuna yáítskesha” tiarmiayi.

¹⁰ Jesus tuinian anturak tiarmiayi “¿Urukamtai ju nuwa yajauch enentáimtarum? Túrutana ju ti péñkeran túrayi.

¹¹ Kuítríncha tuke atumjaj pujushtatuak. Antsu Wikia atumjaj tuke pujushtatjai.

¹² Ju nuwa kunkuinjaj ukatruraj júka, Wi iwiarnastin asamtai áitkiarayi.

¹³ Nekasan tájarne, ashí nunkanam uwempratin chicham etsernakui tuke ju nuwa pachinias etsernaktatui. Túramtai ni túramurj kajinmankishtatui” tímiayi.

Jútas Jesusan surukmiania nu

(Márkus 14.10-11; Rúkas 22.3-6)

¹⁴ Nuyá Jesus tuse (12) unuiniamunmaya chikichik ni naari Jútas Iskariúti Jesusan suruktaj tusa Israer-patri uuntriin wémiayi.

¹⁵ Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuítian akikiarmiayi.

¹⁶ Nu akikiam Jútas itiurak Jesusan súsaraintiaj tu enentáimias wekaimiayi.

Kristu jakamu enentaimtustin námper

(Márkus 14.12-25; Rúkas 22.7-23; Juan 13.21-30; 1 Kurintiunam 11.23-26)

¹⁷ Wakapruachu tantan yurumáinia nú námper yama nankamkui Jesusa unuiniamurj tariar aniasarmiayi “¿Tuj paskua námper iwiaarakrin yurumáttam?” tiarmiayi.

¹⁸ Tuíniakui Jesus tímiayi “Péprunam wetarum. Nuí chikichík shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjaj ame jeemijn yurumátjai” tawai” titiarum” tímiayi.

¹⁹ Tutai ni unuiniamurj wear Jesus timia nuna umikiar paskua nampertin yurumátniun iwiararmiayi.

²⁰ Tura kashi ajasái Jesus ni tuse (12) unuiniamurjijaj misanam yurumuk pujumiayi.

²¹ Nuí yurumáiniaj Jesus tiarmiayi “Nekasan tájarne, átum pujarmena juyá chikichik Winia surutkattawai.”

²² Nuna takui ti kúntuts enentáimprar mai aní awajiararmiayi “Uuntá, ¿wiáshitiaj?”

²³ Mai tu awajenam Jesus tiarmiayi “Wi nú pininnuman jimiartukan yuajna ju Winia surutkattawai.

²⁴ Wi Aents Ajasu asan Yus Chicham tana nujaj métek túrunattajai. Túrasha shuar Winia surutkattana nuka ti asutniátin asa akiinmainchu ajakuiti” tímiayi.

²⁵ Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

²⁶ Tura yurumuk pujuiniaj Jesus yurumkan achik Yúsan yuminsamiayi. Tura puur ni unuiniamurj suiniak tímiayi “Ju yuatarum. Júka winia ayashruiti.”

²⁷ Nuyá pininkian achik Yúsan yuminsamiayi. Tura suiniak tiarmiayi “Jusha ashí umartarum.

²⁸ Júka winia numparuiti. Tura winia numpar puármatai, yamaram chicham nekas uminkiatatawai tawai. Tura puármatai untsurj shuara tunaarj tsankurattawai.

²⁹ Tura ataksha átum Yus akupea nuí jeatsrumniñ ju uwa yumirj umarchattajai. Tura tsawant jeamtai atumjaj Yus akupeana nuí yamarman umartatjai” tímiayi Jesus.

Pítiur natsantratniua nuna Jesus ujakmiayi

(Márkus 14.26-31; Rúkas 22.31-34; Juan 13.36-38)

³⁰ Yús-kantan kantamáwar umikiar Uriwiu náinnium wearmiayi.

³¹ Nuí Jesus tímiayi “Ju kashi átum Winia ashí natsantrurtatrame. Kame Yus-Papinium áarmaiti “Murikiu wáinnium mantuattajai túram murik pisarartatui.” Tu áarmaiti.

³² Tura nantakin Kariréa nunkanam Wi émkattajai átum wéatsrumin.”

³³ Takui Pítiur tímiayi “Chíkich natsantramainakuisha wikia túrashtatjai.”

34 Tutai Jesus tímiayi “Nekasan tájame, ju kashi atash shiniatsain menaintiú natsantrurtatme.”

35 Pítiur tímiayi “Maa, Ámijjai métek mántuiniakuisha penkesha natsantrashtatjame.” Ashí ni unuiniamuri núnisan tiarmiayi.

Jesus Jitsemaní ajanam Yúsan áujsamiania nu
(Márkus 14.32-42; Rúkas 22.39-46)

36 Nuyá Jesus ni unuiniamurijjai Jitsemaní náartin ajanam jeá tímiayi “Juí pujusrum nákarsatarum. Aranta aj wena Yúsan áujsatjai.”

37 Tinia Pítruncha tura mai Sepetéu uchirí jukí wémiayi. Nuisha ti kúntuts enentáimiuk wake mesekmiayi.

38 Nuyá Jesus tímiayi “Ti kúntuts jakamnia enentáimjai. Atumsha juí pujusrum Wijjai métek iwiáa pujutarum.”

39 Tinia Jesus arantach we nui tikishmar tsuntsuma Yúsan áujeak tímiayi “Winia Aparú, Wi túrunatniua nu nusháa iwiamniaitkiuinikia ju wáitsatniua nu tsankatrukaip. Tura Wi wakeraj núniska áchatí antsu Ame wakeram núnis atí” áujuk tímiayi.

40 Nuyá ni menaintiu unuiniamuri pujuiniamunam waketki kanúu pujuinian jeariar Pítrun tímiayi “Átumka chikichik úraksha Wijjai iwiáa pujutin ¿tujinkarmek?

41 Iwiáa pujusrum Yus áujsatarum. Tunáa nupettamkairap. Enentáimin ti wakerini-aitrume túrasha ayashim pimpiruiti.”

42 Tinia ataksha we Yúsan áujeak tímiayi “Winia Aparú, Wi imiá nekasan wáitsatniuitkiuinikia nuikia Ame wakeramna nu atí.” Tu áujsamiayi.

43 Nuyá ataksha taa ni menaintiu unuiniamuri tarimiayi. Tura kari ti nupeteam ataksha kanúu pujuarmiayi.

44 Túmainiakui nin ikiukin ataksha áujmia núnisan Yúsan áujsataj tusa waketkimiayi.

45 Áujas umik ni unuiniamuri pujamunman wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu ain, tunaarintin shuarnum surunkatin jeayi.

46 Wari nantaktiarum. Wéartai. Súrutna nu winiawai” tímiayi.

Jesusan achikiarmiania nu
(Márkus 14.43-50; Rúkas 22.47-53; Juan 18.2-11)

47 Jesus tu chichaj Jútas támiayi. Nusha ni unuiniamuriyayi. Nujajisha untsurí shuar puniajajisha tura numijajajisha winiarmiayi. Nu shuaran Israer-patri uuntrisha Israer-shuara úuntrisha akupka ármiayi.

48 Jútas, Jesusan sura, tuke Jesusaj jeatsuk nu shuaran tiarmiayi “Wi miniakkan mukunattajna núiti. Nu achiktaram.”

49 Nu asamtai Jesusan tarí “Winiajai Uuntá” tinia mukunamiayi.

50 Takui Jesus tímiayi “Amikrú, ¿warí winitiam?” Nuyá achikiar Jesusan júkiarmiayi.

51 Nui chikichik Jesusa tsaníakmarí ni puniarin ukuiniak shuara kuishin tsupirkamiayi. Nu shuarsha Israer-patri uuntrí takarniuriyayi.

52 Túramtai Jesus tímiayi “Puniarum enkeata. Ashí puniajai máanainia nusha puniajai mantamnashatuak.

53 Wi wakeraknaka winia Aparun timiá untsurí suntarin seakui páchitsuk akup-turkainti. ¿Nu nékatsmek?

54 Tura nuna túramtainkia Yus-Chichamnum tana nu uminkiachainti” tímiayi.

55 Nuna tinia Jesus nu shuaran tiarmiayi “Átum kasá achiktaj tawa nútiksarum puniajajisha numijajajisha tarutniurme. Kame ashí tsawantaj Yusa Jeen atumjai pujusan Yus-Chichaman etsermiajai. Nuisha achirkachmarme.

56 Antsu yamaikia yaunchu Yúsnan etserin áararmia nu umínkiatí tusarum jútikrarme.” Tu tímiayi Jesus.

Nuyá ni unuiniamurj̄ Jesusan Níniak ikiuiniak pisararmiayi.

Israer-patri uuntriin Jesusan júkiarmiania nu
(Márkus 14.63-65; Rúkas 22.54-55, 63-71; Juan 18.12-14, 19-24)

⁵⁷ Shuar Jesusan achikiarmia nusha Kaipiasaj̄ júkiarmiayi. Nusha Israer-patri uuntriyaŷi. Nuisha Israer-shuara jintinniurisha Israer-shuara uuntri armia nusha irunar matsamarmiayi.

⁵⁸ Tura Pítiur árantak Jesusan nemarkin uuntri jeen aari jeamiayi. Tura suntarjaj̄ tsaniñ pujusmiayi Jesusan itiurkartin̄ tusa.

⁵⁹ Tura Israer-patri úuntrisha Israer-shuara úuntrisha tura ashí naamka uunt armia nusha Jesusan wait-chichamjaj̄ súmamtikiatai tusar áujmatiarmiayi.

⁶⁰ Untsurj̄ shuar ántar tsanumpruiniakuisha máatin chichaman nekaracharmiayi. Nuyá jimiará shuar tsanumpruiniak

⁶¹ tiarmiayi “Ju áishman̄ chichaak “Yusa Uunt Jeen yumpuaran ataksha menaintiú tsawantin jeamminiaitjai,” tu chichamai” tiarmiayi.

⁶² Nuyá Israer-patri uuntri wajaki Jesusan tímiayi “¿Áimtsumek. Turamainia nusha anturmammek?”

⁶³ Túrasha Jesus tuke áimchamiayi. Túmakui Israer-patri uuntri chicharuk “Nekas iwiaaku Yusa náariin̄ tájame nekasa nu táchakminkia Yus írmastatui. ¿Ame Krístukaitiam. Yusa Uchirínkaitiam? Paant etsérkatá” tímiayi.

⁶⁴ Tutai Jesus tímiayi “Ee, ame támena nútjai. Tura ataksha atumin tájarme, wi Aents Ajasu asan ti kakaram Yusa untsuurin̄ pujaj̄ wáitkiáttarme. Tura yuranminiam winiaisha wáitkiáttarme” tímiayi.

⁶⁵ Nuyá Patri uuntri nuna antuk ti kajek ni pushiri jaak tímiayi “Ju áishman̄ ni chichamejaj̄ Yúsan nekas yajauch chicharniuiti. Nuyásha ¿warí atsumaj? Atumsha Yúsan yajauch chicharu antukcharumek.

⁶⁶ ¿Waritia enentáimprum?”

Tutai “Sumamayi. Mantamnati” tiarmiayi.

⁶⁷ Tiar usukiawarmiayi yapiniam. Tura awattiararmiayi. Chikichcha yapiniam awati wishikiainiak tiarmiayi

⁶⁸ “Ame Krístuchukaitiam. ¿Ya awattama? Íitsuk nekaata.” Tu chichariarmiayi.

Pítiur Jesusan natsantramiania nu
(Márkus 14.66-72; Rúkas 22.56-62; Juan 18.15-18, 25-27)

⁶⁹ Nu túmain̄ Pítiur aa pujaj̄ nuwa chikichik jeari tímiayi “Amesha ju Kariréanmaya Jesus tutajjaj̄ wekaichamkam.”

⁷⁰ Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

⁷¹ Nuna tinia jíinkitiaj̄ tusa wéai chíkich shuar wáiniak nu pujuinian tiarmiayi “Au áishman̄sha Nasarénumia Jesusaj̄ wekainiuiti.”

⁷² Tutai Pítiur ataksha tímiayi “Nekasan tájarme, ju áishman̄kan penké nékatsjai.”

⁷³ Árusan̄ nu pujuarmia nu Pítrun tariar tiarmiayi “Nekas amesha aujaj̄ wekaimiame. Warí, chichammijjaj̄ páantaiti.”

⁷⁴ Tutai Pítiur “nekas Yus írui” taku tímiayi “Nu áishman̄kan penké nékatsjai.” Nuna taj̄ atash shiniukmiayi.

⁷⁵ Túramtai Pítiur Jesus nuik tímia nuna enentáimpramiayi. “Atash shiniatsain̄ menaintiú natsantrurtatme” tímiayi Jesus. Pítiur nuna enentáimiar jíinki we ti útmiayi.

27

Piratui Jesusan júkiarmiania nu
(Márkus 15.1; Rúkas 23.1-2; Juan 18.28-32)

¹ Kashin tsawarmatai Israer-patri uuntrisha Israer-shuara úuntrisha Jesus maatai tiarmiayi.

² Tiar Jesusan jin̄kiawar apachi uuntrin̄ Punsiu Piratū júkiarmiayi.

Jútas máamamiania nu

³ Jútas Jesusan suruk tura máatai tuínian antuk enentáimiar trainta kuítian Israer-patri uuntrin̄cha Israer-shuara úuntrin̄cha awantukiarmiayi.

⁴ Tura tímiayi “Nu áishman̄ tunaarinch̄an máatarum tusan surukan wi sumamajai.”

Takui tiarmiayi “Nusha íjjaisha warí urukatin̄. Nuka amek íischatniukaitiam.”

⁵ Tinia Jútas nū Yusa Uunt Jeē kuítian utsan̄ ikiuak nuyá we kajempramiayi.

⁶ Nuyá Israer-patri uuntrī nū kuítian júukar tiarmiayi “Jū kuit shuar sumakma asamtai Yusa kuítrijaī irurchamniaiti.”

⁷ Tura nuamtak áujmatsar “nun̄ka sumaktai” tiar Nuwe Najantai nun̄kan sumakarmiayi yajayā shuar nū iwiarsatniun.

⁸ Shuar sumakma kuitjaī sumakma asamtai yamaisha Numpá Nun̄ka tuke tuíniawai.

⁹⁻¹⁰ Nujaī yaunchu Yúsnan etserin̄ Jeremías timia nu uminkiamiayi:

“Uunt Yus turutmia núnisan̄ túrawarmiayi. Israer-shuar trainta kuítian seawarmatai nuna akantrar nujaī Nuwe Najantai nun̄kan sumakarmiayi.” Tu áarmiayi.

Piratu Jesusan aníasmania nu

(Márkus 15.2-5; Rúkas 23.3-5; Juan̄ 18.33-38)

¹¹ Jesusan apachi úuntrīin̄ ejeniarmatai nii aniasmiayi “¿Nekasmek Israer-shuara uunt akupniuríntiam?”

Tutai Jesus “Ame támena núitjai’ tímiayi.

¹² Nuyá Israer-patri úuntrisha Israer-shuara úuntrisha súmantikia Jesus pachischamiayi.

¹³ Nuyá Piratu tímiayi “Ashí yajauch chichartamainia nu ¿anturmammek?”

¹⁴ Tútaisha Jesus pen̄ké áimkiachmiayi. Túmakui akupin̄ ti enentáimiar títinian nekaachmiayi.

Piratu Jesusan “mantamnati” tímiania nu

(Márkus 15.6-20; Rúkas 23.13-25; Juan̄ 18.39-19.16)

¹⁵ Jísat tsawantin̄ apachi uuntrī Israer-shuar shiir enentáimprarat tusa sepunam en̄ketun shuar wakeramun̄ j̄iki an̄kant akupniuyayi.

¹⁶ Nūj sepunam tunáa shuar Parapás náartin̄ pujumiayi. Ashí shuar nékarmiayi.

¹⁷ Tuma asamtai Piratu Israer-shuar iruntrarun̄ aniasmiayi “¿Yana an̄kant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi.

¹⁸ Kame Israer-shuar ántar kajerainiak ni itiarman̄ nekaamiayi.

¹⁹ Tura Piratu nuna inintrak pujaī ni nuarí chichaman̄ akuptukmiayi. “Jū pen̄ker áishman̄ súmantikiatniujaī pachiinkiaip. Mese Kranam̄ nii áitkiatniun nekaan wáitsan tsawarjaī” tímiayi.

²⁰ Túrasha Israer-patri úuntrisha Israer-shuara úuntrisha “Parapás an̄kant wetí, tura Jesus mantamnati” titiarum tusar shuáran akatrarmiayi.

²¹ Apachi akupniurī ataksha aniasarmiayi “Jū jimiará áentsun̄ ¿yana an̄kant akupkat tusarum wakerarum?”

Tutai “Parapás” tiarmiayi.

²² Tutai aniasarmiayi “Jesusnasha. Yusa Anaikiamurī Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

²³ Tuíniakui Piratu tiarmiayi “¿Warí yajauchinia túrait?”

Tutai kakantar untsukum “Krúsnum máatá” tiarmiayi.

24 Tura Piratu Jesus uwentikrachminiaitkiui antsu ashí shuar charaatum ajainiakui entsa uturtitiarum tusa seamiayi. Tura ashí ímiainiajn̄ ikijmiak tímiayi “Jū péñker áishmañ máatniunam wikia pachiintsujai. Antsu atumek íistarum.”

25 Tutai ashí shuar tiarmiayi “Iik ii shuarijjai jū áishmañ máatin íistaji.”

26 Nuyá Piratu Parapásan an̄kant akupkamiayi. Tura Jesus asutiárum krúsnum máatárum tusa akupkamiayi.

27 Nuyá akupin pujutai jeñam akupniu suntarī Jesusan júkiar ashí suntaraim iruntu-rarmiayi.

28 Tura pushirī áitkiar akupin entsatain kapaaku pushin áentsrarmiayi.

29 Múuknúmsa tawaspan jañki najanamun etsentikiarmiayi. Tura karisun akupniu numir̄ia áaniun untsuur̄inj̄ ataksarmiayi. Túrawar wishikiainiak tikishmatrar tiarmiayi “Israer-shuara uunt akupniur̄inme.”

30 Tiar usukiarmiayi. Tura karisun jurukiar múuknum awatiarmiayi.

31 Tura núkap wishikrar kapaaku pushin áitkiar ni pushirin̄ áentsrarmiayi. Nuyá krúsnum maatai tusar júkiarmiayi.

Jesusan krúsnum máawarmiania nu

(Márkus 15.21-32; Rúkas 23.26-43; Juan̄ 19.17-27)

32 Jesusan júki wésar Serini nuñkanmayā shuaran, ni naarī Semuñ, Jesusa krúsr̄in jurukit tusar achikiarmiayi.

33 Nuyá Kúrkutanam ejeniarmiayi. Kúrkutaka, shuar chichamjain̄kia, muuka ukunch tútainti.

34 Nūi Jesusan umutai yapájai pachimpra najanamun áartaj tusar súsararmiayi. Tura Jesus apas iis umarchamiayi.

35 Krúsnum ajintrurar suntar yáki Jesusa pushirin̄ jukit tusar nakurusar awakmakua nuna súsararmiayi. Nújain̄kia yaunchu Yúsnan etserin̄ áarmia nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsararmiayi.” Tu áarmiayi.

36 Nuyá wáinkiatatai tusar pujursarmiayi.

37 Tura urukamtaí máamuit ashí aents nekaawarti tusa áarman muuknumaani anuj-tukarmiayi. *JŪITI JESUS, ISRAERA UUNT AKUPNIURI*

Tu áarmauyayi.

38 Núnisan̄ Niijjaī métek jimiará kasa chikichkin untsuurnuman̄i tura chikichnasha menaanman̄i krúsnum máawarmiayi.

39 Shuar nūi nan̄kaamainiak muuke pēatar wishikiainiak

40 tiarmiayi “Ame Yusa Uunt Jee sáakim menaintiú tsawantin jeamtatjai tíchakaitiam. Nekas Yusa Uchir̄inkiumka krúsnumīa akaikim uwemprata” tiarmiayi.

41 Núnisan̄ Israer-patrī úntr̄isha, Israer-shuara jintinnur̄isha, Pariséusha, Israer-shuara úntr̄isha, Jesusan wishikiainiak nuamtak tiarmiayi

42 “Chikichnaka uwentikrati tura Nín̄kikia uwemtsui. Israera Uunt Akupni-ur̄intkiun̄ka krúsnumīa akaikimtai nekas enentáimtustatji.

43 “Yúsán nekas enentáimtiniaitjai” tawai. Wátsek, Yus nekas Nin aneakka uwentikrati. “Wi Yusa Uchir̄intjai” turamchamkaj” tiarmiayi.

44 Kasá shuarsha Niijjaī ajintruamu armia nusha Nin wishikrarmiayi.

Jesusa jakamuri

(Márkus 15.33-41; Rúkas 23.44-49; Juan̄ 19.28-30)

45 Nuyá tutupin̄ aī tee ajasmiayi. Túrunayat ataksha aañku tsáapin̄ ajasmiayi.

46 Nunī aī Jesus kakantar untsuamkamiayi. “Erí, Erí, rama sapaktani’ tímiayi. Nusha shuar chichamjain̄kia “Yusrú, Yusrú, ¿urukamtaí ajapa ikiurkiniam?” tawai.

⁴⁷ Shuar nu̇j wajarmia nusha nuna enentáimtsuk antukar tiarmiayi “Yaunchu Yúsnan etserniun Eríasan untsuawai.”

⁴⁸ Tura chikichik tsékeñki we uruchin itiamiayi. Tura churuinian ajamper sapapjai ijiú mukunati tusa susamiayi.

⁴⁹ Tura chikichcha wíshikeak tiarmiayi “Iniáisatá, Erías tarí uwemtikratpiash.”

⁵⁰ Jesus ataksha kakantar untsamak nuyá jakamiayi.

⁵¹ Nu chichamaik Yusa Uunt Jee tarach ajamu yakiiniya achik nunkaani tseu jaanakmiayi. Nunkasha úurkamiayi. Kayasha jakukarmiayi.

⁵² Núnisan iwiarsamusha uraniarmatai untsurí Yus-shuar jákarusha nantakiarmiayi.

⁵³ Nusha emka Jesus nantakmiatai niisha nantakiar iwiarsamun ikiukiar Yusa péprurin Jerusarénnum wayawarmatai untsurí shuar wáinkiarimiayi.

⁵⁴ Nuyá suntar Jesusan wáinkiarimia nusha tura ni kapitiantrisha nunka úurkamtai nuyá chikichcha ashammai ajasmatai ti sapijmiakarmiayi. Tura tiarmiayi “Ju áishman nekas Yusa Uchirinti.”

⁵⁵ Nuisha nuwá Jesusan nemariarmia nu, arant wajasar, ii wajaarmiayi. Nusha Kariréanmaya pataatukiar Jesusan yainki ejeniarmiayi.

⁵⁶ Nujai Máktaranmaya Marisha, Sepetéu nuwésa, tura chikich Marisha ármiayi. Chikich Marikia Jakupuncha tura Jusencha nukuríyayi.

Jesus iwiarsamu

(Márkus 15.42-47; Rúkas 23.50-56; Juan 19.38-42)

⁵⁷ Kiarai shuar ti kuítrintin Arimatéu péprunmaya ni naari Jusé támiayi. Nusha Jesusan enentáimtiniuyayi.

⁵⁸ Nii Piratuj we Jesusa ayashin seamiayi. Nin súsarat tusa Piratu akupkamiayi.

⁵⁹ Túram Jusé Jesusa ayashin krusnumia jusa ti péñker tarachjai penuarmiayi.

⁶⁰ Tura kaya waa táurmanum yamaram amia nu̇j iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjai etektuk ikiuak wémiayi.

⁶¹ Nuisha Máktaranmaya Marisha tura chikich Marisha iwiarsamunam naka ii pujuarmiayi.

Jesus iwiarsamun suntar wáinkiarimiania nu

⁶² Nú kiarain ayampratin tsawantna mash iwiarnakui Israer-patri úuntrisha Pariséusha Piratuj wearmiayi.

⁶³ Tura tiarmiayi “Uuntá, nu wáittrin áishman iwiaaku pujus “Menaintiú tsawant jakan nantaktiatjai” tiniuyi.

⁶⁴ Nu asantai iwiarsamunam menaintiu tsawant suntar wáinkiarat tusa akuptukta. Ni unuiniamurí kashi tariar tura ni ayashin kasamkar “Pai, nantakni” shuáran tiarain. Jujainkia nuna nankaamas shuáran anankawarainti” tiarmiayi.

⁶⁵ Tutai Piratu tiarmiayi “Nu̇j suntar takakrume. Werum iwiarsamu urakchamnia péñker wáinkiatárum.”

⁶⁶ Tutai wear iwiarsamun urankashti tusar etektukma inkiunmanum serajai yakarar ni áarmarin anujtukarmiayi. Tura suntarnasha awajtukiarmiayi.

28

Jesusa nantakmiari

(Márkus 16.1-8; Rúkas 24.1-12; Juan 20.1-10)

¹ Ayampratin tsawant nankaasmatai tumintin yama tsawaana ai Máktaranmaya Marisha chikich Marijiai iwiarsamu iyutai tusar wearmiayi.

² Tumaj Yusa suntari nayaimpinmaya iwiarsamun tarí kaya atutkamun urak nu̇j pujusmiayi. Túmakui nunka ti úurkamiayi.

³ Yusa suntarisha peemia tímiatrus wínchauyayi. Pushirisha ti puju áuyayi.

⁴ Tura iwiarsamun wáiniarmia nú suntarsha nuna wáinkiar ashamainiak ti kurankarmiayi. Jaká áinis ajasarmiayi.

⁵ Nuyá nayaimpinmaya suntar nuwan tímiayi “Ashamkairap. Jesus krúsnum máawarmia nu eątsrumek.

⁶ Juinkia pujatsui. Nii timia núnisañ nantakniuiti. Pai, áepsarma nu ítiarum.

⁷ Wárik wérum ni unuiniamurj “Jesus jakamunmaya nantakni tura wari Kariréanam wétatui. Nuñ werirum wáinkiáttarme” titiarum. Wats, nunak tájai” tímiayi.

⁸ Tutai nu nuwá iwiarsamunmaya wárik jíinkiar ashamainiayat ti warasar tseke waketkiarmiayi ni unuiniamurjñ ujaktai tusar.

⁹ Tumaj Jesus wantintiukarmiayi. Tura “pujarmek” takui Jesusan tariar tikishmatrar nawencha miniakrusar shiir awajsarmiayi.

¹⁰ Túram Jesus tiarmiayi “Ashamprukairap. Werum winia yatsur ujatruktarum. Kariréanam weartí. Nuñ wear wáitkiartatui. Tu ujaktarum” tímiayi.

Suntar etserkarmiania nu

¹¹ Nuwá wéarmatai iwiarsamu wáinin suntarsha péprunam wéar Israer-patri úuntrjñ ashí túrunamun ujakarmiayi.

¹² Niisha nuna antukar Israer-shuara úuntrijjaj áujmatsatai tusar wearmiayi. Áujmatsar suntaran ti kuít akikiar

¹³ tiarmiayi “Atumsha étserkuram “Kashi kanararin ni unuiniamurjñ taar Jesusa ayashin kasamkarmai” titiarum.

¹⁴ Tura akupin átum kanarman nekamtaisha nijjaj ii iwiarattaji atumin yajauch awajtamsajñ tusar” tiarmiayi.

¹⁵ Nuyá suntarsha kuítian achikiar tiarmia nuna tímiatrusañ titiái tusar wéarmiai. Tura tuke yamaisha Israer-shuar tu túrunaiti tuíniawai.

Jesus ni unuiniamurjñ akatar akupkarmiania nu

(Márkus 16.14-18; Rúkas 24.36-49; Juan 20.19-23)

¹⁶ Nuyá ni auntse (11) unuiniamurjñ Kariréanam wéarmiai. Tura Jesus timia nú nainnium jeawar

¹⁷ nuñ Jesusan wáinkiar tikishmatrarmiayi. Kame chíkichka Jesusashit tuíniayat Nin wáinkiar tikishmatrarmiayi.

¹⁸ Nuyá Jesus tjijuch tantá tímiayi “Ashí nayaimpinmasha nuñkasha akupkatniun kakarman surusúiti.

¹⁹ Tuma asamtai ashí nuñkanam werum ashí shuar jintintiarum Wíi shuar awajstarum. Túrarum Yus Apa náarijjaj, Yus Uchi náarijjaj, tura Yus Wakanj náarijjaj imiaitiarum.

²⁰ Ashí atumin Wi akatramajrum nu nútiksarmek umiktin unuiniartarum. Tura ju nekaatarum: Tuke tsawantaj ikiutsuk atumjaj pujuttajai” tímiayi Jesus.

Yúsan Shiir Chichamen

MÁRKUS aarmia nu

Imiakratin Juan̄ka etserkamur̄i

(Mateu 3.1-12; Rúkas 3.1-9, 15-17; Juan̄ 1.19-28)

¹ Jūi Jesukrístunu shiir chicham nánkameawai. Jesukrístu Yusa Uchir̄inti.

² Yuska imiakratin Juan̄kan pachis ni etserniur̄in Isayasan ti yaunchu ni Papiriin̄ juna áamtikramiayi:

“Iisiana, ame wéamurm̄in emka wetí tusan winia akatramurun akupeajai. Niisha ame jintimin iwiarattawai.

³ Niisha aents atsamunam untsumuk juna títiatui: “Uunta jintī iwíarturtarum; naka awajsatarum.”

Nuke áarmaiti.

⁴ Wats, aents atsamunam imiakratin Juan̄ imiaittsa pujus étseruk, ““tunaarun Yus asakatrurat” tusarum, enentáim yapajjár̄um imiantiarum” tímiayi.

⁵ Anturkatai tusar ashí Jutía nun̄kanmayā shuar tura Jerusarén peprunmayā shuarsha Niin̄ tariarmiayi. Taar, ni tunaar̄in ujakarmatai, Juan̄ Jurtañ̄ entsanam imiainiarmiayi.

⁶ Juan̄sha kamiriu ure najantramun entsauyayi. Emenmamkesha nuapeyayi. Tura chinijiāi yutai-títikriatsnasha yuuyayi.

⁷ Niisha áentsun ujaak tímiayi “Wíjiāinkia nan̄kaamas ana nu winia ukurūi winittiawai. Niisha nekas ii Uuntrī asamtai, wikia tsuntsumpruan ni sapatr̄i jin̄kiamur̄inkisha atitrachminiatjai.

⁸ Wikia entsajain̄ aya ayashmin imiaajrume, antsu Niñkia imiantinia áanis Yusa Wakan̄i atum̄i enentáin̄ en̄ketramprattarme” tímiayi.

Juan̄ Jesusan imiaimiania nu

(Mateu 3.13-17; Rúkas 3.21-22)

⁹ Juan̄ áentsun imiak pujurainiāi, Jesuska Nasarét pepru Kariréa nun̄kanam ana nuyá jiinki Juan̄kan tarimiayi. Tura Juan̄ Jurtañ̄ entsanam Jesusan imiaimiai.

¹⁰ Nuiñ, Jesus entsayā jiiniuk, nayaimpin uranniun wáinkiamiayi. Tura Yusa Wakan̄in̄ yámpitsa núnin najanar Niin̄ taarun wáinkiamiayi.

¹¹ Tura nayaimpinmayā chichaamun juna antukmiayi, “Ámeka winia aneamu Uchiruitme. Ámin shiir enentáimtajme.”

Unt iwianch Jesusan anankataj tímiania nu

(Mateu 4.1-11; Rúkas 4.1-13)

¹² Nuyá wárik Yusa Wakan̄i Jesusan atsamunam jukimiayi.

¹³ Tura nui, yajasma yujamunam, kuarenta tsawant pujumiayi. Nui pujai uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiat̄ai tusar nayaimpinmayā suntar tariarmiayi.

Kariréa nun̄kanam ni takatr̄in Jesus nan̄kammiania nu

(Mateu 4.12-17; Rúkas 4.14-15)

¹⁴ Ukunam, Juan̄kan sepunam enkeawarmatai, Jesuska Kariréa nun̄kanam Yusa akupeamur̄in pachis shiir chichaman etserki támiayi.

¹⁵ “Tsawant jeayi. Shuarnum Yusa akupeamur̄i jeatemai. Tuma asamtai, yaunchu enentáimsamuram yapajjár̄um, Uwempratin Chicham umirkatarum” tu etserkamiayi.

*Jesus namakan achinian ni unuiniamuri ajasat tusa kuaru achikmiania nu
(Mateu 4.18-22; Rúkas 5.1-11)*

¹⁶ Jesus Kariréa antumianka kánmatkariin wekas, namakan achinian Semunasha ni yachi Antresnasha nekan ajuntuk pujuinian wáinkiamiyai.

¹⁷ Wáiniak “Nemartustarum, tímiyai. Namak achiarmena nútiksanak áentsun-eau Yusna arti tusan awajsatjarne” tímiyai.

¹⁸ Tura nuyanka ni nekarin ajapa ikiuiniak Jesusan nemarsarmiyai.

¹⁹ Nuyasha Jesus ishichik arantach wesa, Sepetéu uchirin Jakupun ni yachin Juannasha kanunam ni nekarin apaa pujuinian wáinkiarimiya.

²⁰ Wáiniak, nemartusta tusa untsukarmiya. Tutai ni aparincha, ni aparit takarniurincha kanunam ikiuiniak Jesusan nemarsarmiyai.

*Jesus iwianchin áishmannumia jiki akupkamiania nu
(Rúkas 4.31-37)*

²¹ Nuyá Kapernáum péprunam jeawarmiya. Nui Israer-shuara ayampratin tsawantri jeakui Jesus Israer-shuar iruntainiam wayá Yus-Chichaman unuiniamiya.

²² Tura ni jintinniuri jintintiarmita nuna iniankas uunt chichamjai Jesus jintiakui ni chichamen anturkar ti enentaimprarmiyai.

²³ Nui sha nu iruntainiam áishman iwianchruku ámiyai. Niisha untsukumuk

²⁴ “¿Warí iturtamkattsamea incha taum, Nasarétnumia Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiyai.

²⁵ Tutai, Jesus kakantar chicharuk “Takamátsatá. Ni enentáiya jíinkitia, tájame” tímiyai.

²⁶ Tutai iwianch áishman kan ukurak ajakniñkiar untsamak kakaar aa jíinkimiya.

²⁷ Nuna wáinkiar, ashankar nuámtak aniniaisarmiyai. “¿Ausha warinkit. Yamaram chicham warí chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiya.

²⁸ Tura ti wárik nu túrunamu ashí Kariréa nunkanam antunkamiya.

*Jesus Semunka tsatsarin tsuarmania nu
(Mateu 8.14-15; Rúkas 4.38-39)*

²⁹ Nuyá Israer-shuara iruntai jeenia jiki Jesuska Jakupujai Juanjaisha we, Semun ni yachi Antresjai pujuarmia nu jeawarmiya.

³⁰ Semunka tsatsari tsuer peaknum jaa tepemiya. Núnaka wárik Jesusan ujakarmiya.

³¹ Nuiñkia Jesus werí uwejum achik iniantkimiya. Tura nu chichamaik micha-tramiya. Michatar, péñker ajas, Jesusnasha ni nemarniurincha ayurawarmiya.

*Untsurí jaan Jesus péñker awajsarmiania nu
(Mateu 8.16-17; Rúkas 4.40-41)*

³² Nu tsawantaj kiaraj, ashí jáinian, iwianchrunkunha Jesusan itiararmiya.

³³ Tura ashí nú péprunmaya shuar taar wáitiniam Jesusan káutkarmiya.

³⁴ Untsurí shuáran chíkich sunkuraim jáinian Jesus tsuararmiya. Tura iwianchruku armia nuna enentáiyán iwianchin jíirkiarmiya. Jesuska iwianch nékamu asa, winia náarun ántar pachisarain tusa suritkiarmiya.

*Kariréa nunkanam Jesus Yus-Chichaman etserkamiania nu
(Rúkas 4.42-44)*

³⁵ Nuyá kashin káshik tsawaatsain Jesus nantaki Yúsan áujsatat tusa jiki atsamunam wémiya.

³⁶ Tura Semun ni amikrijiai Jesus wemaanum wéarmiya.

³⁷ Nin wáinkiar “Ashi shuar Ámin eátmainiawai” tiarmiya.

³⁸ Tutai Jesus chichaak “Chíkich péprunmasha arantach wetai. Nui Yusa chichame etserkatai; nuna túratsan táwitjai” tímiya.

³⁹ Nuna ti ashí Kariréa nunkanam Israer-shuar iruntai jeanam etseras wekaimiayi; tura núnisan iwianchniasha jiki akupkini wekaimiayi.

Tunamaru shuaran Jesus tsuármiania nu
(Mateu 8.1-4; Rúkas 5.12-16)

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmeke tsuaratin tujintratsme.”

⁴¹ Jesus nin waitnentak uwejejai antiñmiayi. Antiñ “Wakerajme. Péñker ajasta” tímiayi.

⁴² Nu chichamaik, Jesus chichakmatai, ni sunkurí menkakamiayi. Tura péñker ajasmiayi.

⁴³ Túrunamtai Jesus kakantar chicharuk

⁴⁴ akupeak “Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi.

⁴⁵ Tura etserkaip támaitiat, jinki ni túrunamurin mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

2

Jesus emearun péñker awajsamiania nu
(Mateu 9.1-8; Rúkas 5.17-26)

¹ Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi.

² Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchayuyai. Jesuska Yus-Chichaman nu aentsun ujaak pujurmiayi.

³ Nuñkia ni amikrin emearun kuatru shuar tampumpuawar júkiar Jesusan itiararmiayi.

⁴ Tura jeawar, untsurí shuar írunu ásamtai jeá wayatniun tujinkiararmiayi. Tuma ásar, yakinini wakar jea urakar, áankawar, tampunam ni amikrin Jesus pujamunam awaintiuawar itiararmiayi.

⁵ Tura niisha Jesus nekas tsuártatui tu enentáimmiarin Jesus nekáa emearun chicharuk, “Uchirú, ame tunaarumka tsankuramuiti” tímiayi.

⁶ Israer-shuara jintinniurisha nuna antúu pujuarmiayi. Tura ni enentáijjai enentáimsar,

⁷ “¿Jusha urukamtai emearun tu chichara? Yúsán imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

⁸ Jesuska ni enentáimmiarin nekarawar “¿Urukamtia átum tu enentáimprum? tímiayi.

⁹ Emearu, tunaarum tsankuramuiti títinjai, emearu, wajakim tampuram entsakim wekasata títinjai ¿tuá imiá yúpichuchit?

¹⁰ Wats wi, Aents Ajasu asan Yusa kakarmarijjai shuara tunaari tsankuramniaitjiana nuna paant iwiaintiuktajrume” tímiayi. Nuna tinia emearun chicharuk

¹¹ “Wajaktia, tájame; túram tampuram jukim jéemiin wetá” tímiayi.

¹² Nu chichamaik emearu wajaki, tampurin jukí, ashí ímiainiajn jinkimiayi.

Nuna túrunamtai ashí ashankarmiayi. Tura “jútikiamu penké wáinchaitji” tiar Yusa náarin uunt awajarmiayi.

Jesus Riwin untsukmiania nu
(Mateu 9.9-13; Rúkas 5.27-32)

¹³ Nuyá ukunam Jesus antumiannum waketkimiayi. Tura ashí shuar káunkarmatai jintintiawarmiayi.

14 Tura jintintiawar amuk, akupin akitiai jeanam nan̄kaamak, Arpeu uchirin Riwin pujan wáinkiamiyi. Wáiniak “Nemartusta” tímiayi. Tutai Riwi wajakí Jesusan nemarsamiayi.

15 Chíkich tsawant, Riwishá Jesusan ni jeen itiaamiayi. Tura untsurí kuítian-juu shuarsha, yajauch shuarsha Jesusjái ni unuiniamurijjáiasha ashí nuim misanam pujuarmiai.

16 Tura kuítian-juu shuarsha yajauch shuarsha Jesusjái irunar yurumáinian wáinkiar, Pariséu jintinniurísha Israer-shuara jintinniurísha Jesusa unuiniamurín aniasarmiai. “¿Urukamtai ame úuntrum Jesus, kuítian-juu shuarjái tura yajauch shuarjáiasha yuruma?” tiarmiayi.

17 Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

*Yurumtsuk Yus áujsatniun Jesusan aniasarmiania nu
(Mateu 9.14-17; Rúkas 5.33-39)*

18 Juan̄ka unuiniamurísha Pariséu unuiniamurísha yurumtsuk Yúsan áujiarmiayi. Túmakui chíkich shuar Jesusan tariar chicharainiak, “Juan̄ka unuiniamurísha, Pariséu unuiniamurísha yurumtsuk Yúsan áujainiatsuk; ¿ame unuiniamurmeka urukamtai yurumtsuk áujainiatsu?” tiarmiayi.

19 Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ni amikrj warainiak ijiarmachartin ainiawai. Núnisan̄ winia unuiniamur, Wi pujakui, warainiak yurumtsuk pujuschartin áiniawai.

20 Tura tsawant jeattawai, Winia jurukiartin. Nuiñkia winia unuiniamur ijiarmawartatui’ tímiayi Jesus.

21 Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chin̄kiá nuna nan̄kaamas jáaktatui.

22 Nijiamanch yamáí nawar nuap najanamu arutnum yaraachminiaiti. Túramka wakaprua kariak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

*Trikiu nerēn yuawarmiania nu
(Mateu 12.1-8; Rúkas 6.1-5)*

23 Chíkich ayampratin tsawantaj Jesus ajanman̄ ajapén nan̄kaamarmiayi. Tura ni unuiniamurj trikiu nerēn majukiar wearmiayi.

24 Nuna wáinkiar Pariséu Jesusan chicharainiak “¿Warí, urukamtai ame unuiniamuram ayampratin tsawant takastin surimkiamu aisha takainia?” tiarmiayi.

25 Tutai Jesus tímiayi “Ii uuntri Tawitia túramurj Yús-Papinium áujasachukaitrum. Niisha ni nemarniurísha tsukamainiak, ni yurumkarj atsakui, túrawarmia nu áujasachukaitrum.

26 Apiatár Yusnan pujurniu uuntri pujaj Uunt Tawit Yusa Jeen wayamiayi. Tura Tawitkia, patri nan̄kaamas uunt asa, pátrichuiat, iniaktusma tantan, aya patri yútainiak, yuamiayi; tura ni nemarniuríncha ajamsamiayi. Nu áujasachukaitrum, tímiayi.

27 Ayampratin tsawantaj túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi.

28 Wisha, Aents Ajasu asan imia ayampratin tsawantan Nerenniuríntjai” tímiayi.

3

*Uweje jakan Jesus tsuármiania nu
(Mateu 12.9-14; Rúkas 6.6-11)*

¹ Ataksha chíkich tsawantaj Israer-shuar iruntainiam Jesus wayamiayi. Nuj shuar ámiayi, ni uweje jaka.

² Tura tunáan túrayi titiai tusar wakeruiniak “ayampratin tsawantaj tsuártimpiash” tusar, Pariséu shuarsha Jesusan ii pujuriarmiayi.

³ Nuinkia Jesus uweje jaka shuaran chicharuk “Ajapén wajasta” tímiayi.

⁴ Nuinkia mamikmaun chicharuk “¿Ayampratin tsawantaj péñker túratin yajauch túratniujaj tuá imiá péñkerait. Shuar uwentikratin máatniujaj tuá imiá péñkerait?” tímiayi.

Nuna takui niisha pachischarmiayi.

⁵ Tura Jesus kajek nin íiyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmasmatai ni uweje jaruku ataksha péñker ajatsamiayi.

⁶ Nuyá Pariséu shuar jíinkiar, Jesus maami tusar Erutis shuarjaj áujmatsarmiayi.

Untsurí shuar Jesusan káutkarmiania nu

⁷ Nuyá Jesus ni unuiniamurijaj antumiannum wémiayi. Kariréa nunkanmaya untsurí shuarsha Jesusan nemariarmiayi.

⁸ Untsurí nunkanmayasha káunkarmiayi. Jutía nunkanmayasha, Jerusarén péprunmayasha, Itiumía nunkanmayasha, Jurtañ entsa amainiasha, Tiru tura Setun pepru pujuinia nú nunkanmayasha, untsurí shuar ni túramurin nekaawar, Jesusan káutkarmiayi.

⁹ Untsurí káunkar chanuntawarain tusa Jesus ni unuiniamurin kanuram ini-anáastarum tusa seamiayi.

¹⁰ Kame untsurí shuaran Jesus nuik tsuaru asantai, jaa shuar nuj káunkarmiania nu Jesusan antiñtaj tusar shitianainiakui nuna seamiayi.

¹¹ Tura iwianchrukusha Jesusan wáinkiar tikishmatrarmiayi. Untsumainiak “Ame nekas Yusa Uchirinme” tiarmiayi.

¹² Tura nuna etserkairap tusa Jesuska kakantramiayi.

Jesus tuse shuaran anaikiarmiania nu

(Mateu 10.1-4; Rúkas 6.12-16)

¹³ Nuyá Jesus náinnium wakamiayi. Tura anaikiatniun wakerimia nú shuaran untsukmiayi. Tura niisha Jesusan weriarmiayi.

¹⁴ Tura Nijijaj wekasar Yus-Chichaman unuiniartinian tuse shuáran anaikiarmiayi.

¹⁵ Tura sunkur tsuártinian, iwianchcha jiki akupkatniun ni kakarmarin súsarmiayi nú shuaran.

¹⁶ Ju shuáran anaikiamu ármiai: Semun, Jesus chíkich naarin Pítiur apujtusmiania nu;

¹⁷ Sepetéu uchirí Jakupu, ni patai Juánsha; ipiamtajaj métek kakaram ásarmatai nuna mai “Puanérjis” naari susamiayi. Nusha shuar chichamjainkia “ipiamta nuke” tawai.

¹⁸ Nuyá Antressha, Jiripi, Parturumí, Mateu, Tumas, Arpeu uchirí Jakupu, Tateu, ásump Semun,

¹⁹ Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

Yusa Wakanin yajauch chicharna nu

(Mateu 12.22-32; Rúkas 11.14-23; 12.10)

²⁰ Waketkiarmatai, ti untsurí shuar taarmatai takatři ti akui, yurumátniun jeacharmiayi.

²¹ Jesusa shuarisha nuna nekaawar Jesus ti itiurchat pujus wáurtsuash tu enentáimsar jukitiai tusar nu jeanam jeariarmiayi.

²² Nuyá Israer-shuara jintinniurí Jerusarénumiá táarmiania nu, Jesusan áujmatainiak “Pirsepú enkea asa iwianchrūkuiti. Tuma asa uunt iwianchi kakarmarijjiai iwianchin jiki akupeawai” tiarmiayi.

²³ Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha itiur ajapmamatín?

²⁴ Chikichik nú nunkanmaya shuar nuámtak kajernaiyakuinkia, nu nunka wari meserchattawak.

²⁵ Nuámtak shuar ni shuarijjiai kajernaiyakuinkia nu shuarsha amunaikchartatuak.

²⁶ Núnisan ¿Satanáskesha ni suntarijjiai máaniakka itiurak tuke pujusarat? Amunaikiar-tatui.

²⁷ Nánkamas shuar kakaram shuara jeen wayá, nérenniun jinikiatsuk ni kuítrin kasarkachminiaiti. Antsu nérenniun jinikiá ni kuítrin kasarkamniaiti.

²⁸ Nekas tájarme, shuar tunáa ashí túruiniana nuka tsankuramniaiti. Winiasha winia Aparnasha yajauch áujmatusha tsankuramniaiti.

²⁹ Antsu Yusa Wakanín yajauch áujmatna nuka tsankurachminiaiti; antsu nu shuar ninki tuke sumamattawai.”

³⁰ “Jesuska iwianchrūkuiti” tuíniakui Jesus nuní tímiayi.

Jesusa yachi Jesusa nukurí

(Mateu 12.46-50; Rúkas 5.19-21)

³¹ Nuyá ni yachi ni nukuríjjiai taar aa wajasar, Jesusan untsukat tusa akupkarmiayi.

³² Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

³³ Tutai Jesus chichaak “Ya ainia winia nukursha yatsursha” tímiayi.

³⁴ Nin téntakar pujuarmia nuna iis “Júiti winia nukurka, yatsurka, tímiayi.

³⁵ Shuar Yusa wakeramurín uminiana nu winia yatsuruiti, winia umaruiti, winia nukuruiti” tímiayi.

4

Atsaamin atsaampramiania nu

(Mateu 13.1-9; Rúkas 8.4-8)

¹ Nuyá jiinki antumianka yantamen Jesus ataksha unuiniartinian juarkimiayi. Tura untsurí shuar iruntrarmatai, kanunam enkempramiayi. Shuarsha antumianka káanmatkarín pujuarmiayi.

² Jesuska métek-taku chichamjai ti jintintiármiai. Jintintiuk juna tímiayi:

³ “Antuktarum. Atsaamin atsaamprataj tusa jínkimiai.

⁴ Atsaamkui ni arakrj jintiá iniararmai. Chiniki yakiya káutkar yuawarmai.

⁵ Chikichcha kaya irunmanum iniararmai, nunka ishichik ámanum. Tura nunka ishichik asamtai wárik tsapainiarmai.

⁶ Tura etsa etsantar sukuám kancape atsa asamtai káararmai.

⁷ Chikichcha janquí nupanam iniararmai. Jankisha tsapainiar kankar ajakrarmai; túram nerekcharmai.

⁸ Chikichcha pénger nunkanam iniararmai. Tura tsapainiar nerekarmai, chikich trainta, chikich sesenta, chikich sian nerekarmai.

⁹ Kuishim ákuinkia antuktarum” tímiayi.

(Mateu 13.10-17; Rúkas 8.9-10)

¹⁰ Untsurí wearmatai, ishichik Nijjai juakarmiania nu, ni tuse unuiniamuríjjiai aniasarmiayi “¿Ame jintintiamna nusha warimpiait?” tiarmiayi.

¹¹ Tutai Jesus chichaak “Yuska ni akupeamurín atumin paant nekamtikramattsa wakerutmarme. Antsu chikich shuarka aya métek-taku chichamjai jintintiáwartatui.

12 Íiniyatan wáinkiacharat tusa, antukarsha nekaacharat tusa, umirtsuk ni tunaari tsan̄kurnacharat tusa túrattawai' tímiayi.

(Mateu 13.18-23; Rúkas 8.11-15)

13 Tura tímiayi 'Wi jintintiajrumna nú métek-taku chicham nekaachurmek. Nu nékachkurmeka ¿itiurak chíkich métek-taku chichamsha nekaatarum?

14 Atsaamniua nuka Yus-Chichaman étserna nuna nakumui.

15 Jĩn̄kiái jintiá iniaarua nuna chíkich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampramun jurawai.

16 Chíkich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai.

17 Tura ni kan̄kape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chíkich itiurchatan wáinkiar Yúsaiya kanainiawai.

18 Chíkich ántuiniamuka jan̄kí nupanam atsaampramua núniskete. Nu shuar Yus-Chichaman ántuiniawai.

19 Ántuiniayat ju nun̄kanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kan̄kar emen̄katui. Tuma asamtai nerektinian tujintiainiawai.

20 Tura chíkich ántuiniamusha péñker núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar trainta, chíkich shuar sesenta chíkich shuar siañsha nerenawai.'

Uukma ana nu paant nekanattawai

(Rúkas 8.16-18)

21 Nuyá Jesus juna tímiayi '¿Shuar shiripkin ekeemak itia pitiaknum en̄keattawak. Peaknum wakenam ikiustatuak? Atsá. Antsu misanam ekentsashtinkiait.

22 Núnisan̄ ashí uukma ana nu ukunam paant nekanattawai. Tura núnisan̄ yamá ishishmasa chichasmasha ukunam paant nekanattawai.

23 Kuíshim ákuin̄kia antuktaram.'

24 Tura nuyá tímiayi 'Ántarmena nu esetrarum enentáimsarum antuktaram. Urutá péñkerak enentáimsatarum, núnisan̄ Yuska ámin nekaatniun suramsattarme, tura nú nukap patatramsattarme.

25 Tuma asamtai shuar nukap takakna nu patatnastatui. Antsu chíkich shuar ishichik takakuk jurunkittiawai.'

Yusa akupeamuri júnisaiti

26 Nuyá Jesus chichaak juna tímiayi 'Yusa akupeamuri júnisaiti. Shuar jin̄kiain atsaampratniua núniskete.

27 Jĩn̄kiáin atsaamar, untsurí kanar, tsawar, uruksanpi tusa nákwai. Tura itiura tsapainia núnaka nékatsui.

28 Kame jin̄kiái nun̄kanam init aku nin̄ki tsapaatsuk; emka nukareawai, nuyá tuyureawai tura nujamar katsuawai.

29 Túruna káakmatai júuktin tsawant jeayi tusar juíniawai.'

(Mateu 13.31-32; Rúkas 13.18-19)

30 Ataksha Jesus tímiayi '¿Yusa akupeamuri warijiaĩn̄k' nakumkataj. Warijiaĩn̄k' métek-takuit?

31 Mustasa jin̄kiái araamua nujai métek-takuiti. Nu jin̄kiaisha ashí nan̄kaamas ishi-tiupchichiti.

32 Tura araam tsapái ashí nan̄kaamas uunt ajawai; tura tseñkeakmarisha kámpuram asamtai nuj mikintranam chin̄kisha shiir ayamainiawai."

(Mateu 13.34-35)

³³ Núnisan̄ Jesus untsurí métek-taku chichamjaj̄ Yus-Chichaman ujaamiayi. Nii nekaat-niun jearmia nunak ujaamiayi.

³⁴ Chíkich shuaran aya métek-taku chichamjaj̄ ujaamiayi; antsu ni unuiniamurijjaj̄ Nínki pujus ashí paant jintintrarmiayi.

*Nasencha, entsanacha Jesus imijiánmia nu**(Mateu 8.23-27; Rúkas 8.22-25)*

³⁵ Nu tsawantaj̄ etsa akaikimtai Jesus ni unuiniamurin̄ chicharainiak “Entsa amain katintai” tímiayi.

³⁶ Tutai kanunam enkemprarmiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atampriarmiayi.

³⁷ Tura nasesha ti nasenkatasa nan̄kammiayi; chíchimi kanunam yaráná piáktasa ajamiayi.

³⁸ Jesuska kanú senkarin̄ atamprus kanúu tepemiayi. Tura, ni unuiniamurí Jesusan ishintiak chicharuk “Uunta ii wayajnia júka pachitmatmek” tiarmiayi.

³⁹ Tutai Jesus nantaki nasen kakantramiayi. Entsanacha chicharuk “Takamatsata. Miaku ajasta” tímiayi. Tutai nasesha men̄kakamiayi, entsasha miaaku ajasmiai.

⁴⁰ Túrunamtai Jesus ni unuiniamurin̄ chicharainiak “¿Urukamtai ashamarum? Itiura Yus nekas enentáimtatsrum” tímiayi.

⁴¹ Tura imiá ashamainiak “¿Maa júsha yait? Nasesha entsasha nin umirainiatsuk” tunaiyarmiayi.

5

*Jataranmayan̄ iwianchrukun Jesus tsuármiania nu**(Mateu 8.28-34; Rúkas 8.26-39)*

¹ Nuyá antumian̄ amaini Jatara nun̄kanam jeawarmiayi.

² Jesus kanunmayá jiinkimtai áishman̄ iwianchruku, shuar jakáa iwiartainiumiá wárik taa Jesusan in̄kiun̄miayi.

³ Nu shuar iwiartainium tuke pujuyayi. Tura jirujain̄kia nin jinkiaatniun tujinkiar-miayi.

⁴ Jirujaj̄ nawenmasha, uwejumsha tuke jin̄kiau ármiai. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi.

⁵ Tuke tsawaishá káshisha, iwiartainiumsha murasha kayajaj̄ ijiunmak untsumuu wekainiuyayi.

⁶ Tura yajayan̄ wáiniak Jesusan tseke tarimiayi; tura tikishmatramiayi.

⁷⁻⁸ Túrunamtai Jesus chicharuk “Iwianchiá, ni enentáiya jiinkitia, tájame” tímiayi.

Takui íwianch kakantar chichaak “¿Winiasha urukamtai tarutnium, Uunt Nan̄kaamaku Yusa Uchirí Jesúsá? Yus iirmanum wáitkiarsaip, tájame” tímiayi.

⁹ Takui Jesus tímiayi “¿Ame náarmesha yait?”

Tutai niisha ayak̄ “Untsurí ásar wikia Untsurí-suntar tu anaikiamuitjai” tímiayi.

¹⁰ Nuna tī amik, nu nun̄kanmayá akuptukain̄ tusa Jesusan ti seamiai.

¹¹ Nuishá nainnium nuntumas untsurí kuchí shushun̄mak matsarmiai.

¹² Tuma asamtai, kuchiniam en̄kemátin̄ tsan̄katrukta tusar Jesusan seawarmiayi.

¹³ Tuiniakui Jesus “ayu” tímiayi. Takui íwianch áishman̄kainiá jínkiar kuchiniam en̄kemáwarmiai. Kuchisha ti untsurí, jimiará mir (2.000) áchiawash. Ashí mash nánatanam iniaawar antumian̄num inian̄karmiayi. Nuishá entsá k̄iakar jakerarmiayi.

¹⁴ Túrunamtai kuchin̄ wáinin̄ pisarar péprunmasha shuarnumsha nuna etserarmiayi. Tuma asamtai iyutai tusar ashintiukarmiayi.

15 Túrawar Jesusaj jeawarmiayi. Jeawar áishman yaunchu iwianchrukun yamaikia péñker ajasun pushirín entsar pujan wáinkiararmiayi. Wáinkiar ashankarmiayi.

16 Tura waketkiar kuchi túrunamuncha iwianchruku péñker ajasmancha mash et-serkarmiayi.

17 Tuma asamtai ni nunkeya jiinki wetá tusa seawarmiayi. Jesus kanunam enkemamtai áishman nuik iwianchruku amia nu Jesusan chicharuk

18 “Wi Ámijjai tuke tsaninkian wekasatjai” tímiayi.

19 Tura núnaka Jesus suritkiamiayi. “Antsu ame jeemiin, áminiurmijn weme, ashí Uunt Yus túrutma nu tura waitnentrampra nusha ujakarta” tímiayi.

20 Tutai áishmansha wémiayi. Tura antsu Tekapuris nunkanam Jesus nin péñker awajsamia nuna ashí shuaran ujakmiayi. Nu nunkanmayá shuarka nuna antukar ti enentáimprarmiayi.

*Jimiará jaan Jesus tsuármiania nu
(Mateu 9.18-26; Rúkas 8.40-56)*

21 Ataksha Jesus kanujai katinmatai, aents untsurí Nin irunturarmiayi. Jesuska antumianka káanmatkari wajamiayi.

22 Tura Israer-shuar iruntai jea náampruku, ni naari Jairu, támiayi. Taa, Jesusan wáiniak, piniakum tepersamiayi.

23 Piniakumar ti seak, “Winia nawantur jarutui. Winitia, túram péñker ajasat tusam uwejmijjai antinrukta. Nuiñkia jarutkashtatui” tímiayi.

24 Tu tímiatai Jesus niijjai wémiayi. Tura untsurí shuar wena ásar Nin chánuarmiayi.

25 Nui pachitkia nuwá ti jaa wémiayi. Niisha tuse uwí numpan ajapeak wáitias pujuyayi.

26 Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kuítríncha ashí ajapaitiat tsuámarchauyayi; antsu tsuamsha nu arant ajauyayi.

27 Nu nuwasha, Jesus túramun antuku asa, ni ukuurini amainian ni pushirín antinmiayi.

28 “Wi aya ni pushirín antinñaka péñkerapi ajasaintjia” tu enentáimiar túramiayi.

29 Tura Jesusa pushirín antin nú chichamaik numpa ájapman menkakamiayi. Péñker ajasman ayashijn nekapramiayi.

30 Tura nuin Jesuska, ni kakarmariijjai tsuarman nekapmampramiayi. Tura nuna nekáa, ayantar chichaak “¿Yaki winia pushirun antinruka?” tímiayi.

31 Tutai ni unuiniamuri tiarmiayi, “Untsurí Ámin antinmainiasha ¿urukamtai “yaki winia antintkia” tame?”

32 Tura Jesus, yaki túruta tusa ashi ímpramiayi.

33 Nuiñkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurín ashí paant ujakmiayi.

34 Takui Jesus nin chicharuk “Nawantru, Winia nekas enentáimtursa asakmin, péñker awajtamsaitme. Shiir wetá, tura tuke péñker pujusta” tímiayi.

35 Tura Jesus nuna tuke chichas pujai, iruntai jea uuntri jeenia tariarmiayi. Tariar chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

36 Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata’ tímiayi.

37 Tura Niijjai wétinian aya Pítruncha, Jakupuncha ni yachi Juanjai tsankatkarmiayi.

38 Iruntai jea uuntri jeen jeawar, áentsun charaatum ajainian, úutainian untsukum ajainiancha Jesus wáinkiamiayi.

39 Tura nuwach penké jakan nékayat, wayá nin chicharuk “¿Urukamtai timiá úutrum, tura wa wa ajarum? Nuwach jákachai, antsu kanarai” tímiayi.

⁴⁰ Nuna takui wishikrarmiayi. Tura Jesus ashí jiiir akupkarmiayi. Áyatik nuwachi aparín, nukuríncha tura Niijjai táaruncha nuwachi tepamurín jukimiayi.

⁴¹ Tura wayawar Jesuska nuwachi uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai.

⁴² Nuwach tuse uwí takakuya nu, nú chichamaik nantaki wekasamiayi. Túramtai nuí pujuarmiania nu ti enentáimprarmiayi.

⁴³ Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

6

Jesus Nasarénum pujusma

(Mateu 13.53-58; Rúkas 4.16-30)

¹ Jesus nuyá jiiinki ni nunken waketkiayi. Ni unuiniamurísha nemariarmiayi.

² Nuísha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tui unuimiaruit. Ni nekaatniuríncha yaki susait. Tura aentsti tujintiajnia nuna Niisha itiurak tura?”

³ Jusha karpintíruchukait; Marí uchirínchukait. Ni yachisha Jakupusha, Juresha, Jútassha, Semunsha nékatsjik. Tura ni umaisha jui ijjai pujuiniatsuk” tiarmiayi. Túrawar Nin nekas enentáimtustinian tujinkiarimiayi.

⁴ Túrasha Jesus nin chicharuk “Yúsnan etserniun chíkich nunkanmayanka shiir anturainiawai. Antsu ní nunkeyanka, ní shuarsha anturainiatsui” tímiayi.

⁵ Tura nuísha, ni nunkenkia aentsti tujintiamun túratniun tujinkiamiayi. Antsu jaancha aya ishichik ni uwejejai antiñ tsuármiayi.

⁶ Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

Yus-Chicham etserkatarum tusa Jesus ni unuiniamurín akupkarmiania nu

(Mateu 10.5-15; Rúkas 9.1-6)

⁷ Tuse unuiniamurín untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarín súsarmiayi.

⁸ Tura chicharuk “Jintiá yurumátniusha jukiirap, uyuntrumiincha kuitcha enkearum jukiirap. Antsu aya áanik mashtun jukiirum wetarum.

⁹ Sapat uwekatarum, tura entsartincha jímiar jukiirap, tímiayi.

¹⁰ Tura jea wayarmena nuín pujustarum; pujá-pujakuarum nuyá chíkich peprunmasha wetarum.

¹¹ Tura nánkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch áiniawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

¹² Nuyá Jesusa unuiniamurí jíinkiar enentái yapajjar Yúsai enentáimtumartinian etserkarmiayi.

¹³ Tura iwianchruku enentáiyá iwianchin jiiirki akupkarmiayi, tura asuitijjai yakarar untsurí jáinian tsuararmiayi.

Juanka jakamurí

(Mateu 14.1-12; Rúkas 9.7-9)

¹⁴ Jesusa náarín tura ni túramurín ashí aents áujmatin ásarmatai, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi.

15 Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya núkete” tiarmiayi.

16 Erutis nuna antuk “Nekas Juánkaiti. Ni muuken tsupiktinian akupkamiaj nu, jakamunmaya nantakniuiti” tímiayi.

17-19 Kame Uunt akupin Erutis, ni yachí Jiripi nuarín nuatkamiayi. Nu nuwá naari Jirutíasaiti. Juansha uunt akupniun Erutisan chicharuk “Yatsumi nuarí akintrukchat-niuitme’ tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrasha uunt akupin Erutis nuna surimkamiayi. Antsu Juan achikrum sepunam enkeatarum tusa akupkamiayi.

20 Juansha tuke enentájjai Yusa jintin wekainiuyayi. Erutis, ni esetar enentáimniun neka asa Juánkan ashamak Jirutías wakeramurín túrawain tusa suritkamiayi. Kame Erutis Juan étserman nékachuitiat antuktinian wakerimiayi.

21 Jirutías, itiurak máawaj tu pujai, uunt akupin Erutis, ni akiiniamu tsawantri jeamtai, ni suntaríncha, Kariréa nunkanmaya úuntríncha, kuítrintin armia nunasha untsukar, namperan najanamiayi.

22 Nuisha Jirutías nawantri wayá jantsemámtai Erutis tura niijjai nampernum matsarmia nusha shiir enentáimsarmiayi. Túramtai uunt akupin nuwáchin chicharuk “Ame wakeram nu seattia. Wi amastatjai.

23 Nekas tájame, ashí ame seatmena núnaka amastatjai. Wats, seatkumniñkia takak-jana nuna jímiapetek nakakan, amastatjai” tímiayi.

24 Tutai nuwách jiinki ni nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juanka muuke seata” tímiayi.

25 Nu chichamaik nuwách wari wayá Erutisan chicharuk “Yamaikia uunt amamkunan Juanka muuken wakerajai” tímiayi.

26 Nuna takui uunt akupin ti kuntuts enentáimpramiayi. Tura nii tiniu asa ni amikri matsatainia nu antukaru ásarmatai surimkiatniun tujinkiamiayi.

27 Tuma asa uunt akupin Juanka muuke itiata tusa ni suntarín wárikmas akupkamiayi.

28 Túramtai suntar wari we, sepunam Juanka muuken tsupikmiayi. Tsupik, amamkunan itia, nuwan susamiayi. Túram achik ni nukurín susamiayi.

29 Juan maamun antukar ni unuiniamurí ni ayashín iwarsatai tusar júkiarmiayi.

*Senku mir áishmankan Jesus ayuramiania nu
(Mateu 14.13-21; Rúkas 9.10-17; Juan 6.1-14)*

30 Tura Jesusa unuiniamurí Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniararmia nunasha ujakarmiayi.

31 Tura untsurí shuar táiniakui, niisha ankant ajastinniasha yurumátniuncha tujinkiarmiayi. Tuma asamtai Jesus chichaak “Iijjai wemí aents atsuiniamunam; nuí ishichik ayamprarmi” tímiayi.

32 Nuyá Jesus ni unuiniamuríjjai kanunam enkemprar, aents atsuiniamunam jeatai tusar jíinkiarmiayi.

33 Túrasha shuar ni wéenan wáinkiarmiayi. Tura “Jesusaiti” tiarmiayi. Tuma ásar ashí péprunmaya untsurí shuar tseke ashintiukar, ni jeatniunam nákakarmiayi.

34 Jesus kanunmaya jiinki ti untsurí aents iruntrar matsatun wáinkiamiayi. Murik péñker wáinchatajya núnisan matsatu ásarmatai Jesus nin wáitnentrarmiayi. Tura núkap unuiniararmiayi.

35 Nuyá kiakui ni unuiniamurí Jesusan tariar chicharainiak “Atsamunam pujatsjik; tura yamá kiatsuk.

36 Shuar wari akupkarta. Tíjiuch péprunmasha, shuarnumsha wearti, ni yurumkarí sumarmakarati” tiarmiayi.

37 Tutai Jesus chichaak “Atumek ayuratarum” tímiayi.

Tutai “Isha ju shuar ayuratai tusar, ¿jimiara sian kuitjai yurumak sumaktai tusar wétinkiaitiaj?” tiarmiayi.

³⁸ Tura Jesus ni unuiniamurin chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka sénkuchikiiti, tura namaksha jímiarchikiiti” tiarmiayi.

³⁹ Tutai Jesus tímiayi “Ju shuar chírichriniam pujusarti tusar akupkatarum.”

⁴⁰ Ankant ankant sian siansha, senkuenta senkuenta iruntrar matsamsarmiayi.

⁴¹ Jesuska senku tantancha, jímiar namaknasha jusa, yakí nayaimpinmaani ímias Yúsan yuminsamiayi. Tura yurumkan púurmiayi. Puur ni unuiniamurin súarmiayi. Namaknasha puur súarmiayi, ashí shuáran ajamsarat tusa.

⁴² Ashí yurumáwar ejemarmatai,

⁴³ puunaruncha, namak ampirmancha achikar, tuse chaninian áimkiar júkiarmiayi.

⁴⁴ Nu yurumkan ti untsurí yurumáwarmiayi. Aya áishmankak senku mir (5.000) áirmiayi.

Jesus entsá pátatek wekasamiania nu

(Mateu 14.22-27; Juan 6.16-21)

⁴⁵ Nuyá Jesus ni unuiniamurin chicharainiak “Kanunam enkemprarum, katinkrum amain émaa ajatarum, Petsaitia péprunam. Wisha ju shuara áujas ikiuktatjai” tímiayi.

⁴⁶ Shuáran áujas ikiuki Yusjai chichastaj tusa náinnium wémiayi.

⁴⁷ Tura kirit ajasmanum kánuka antumiannum ajapén nanammiai. Jesuska niniki juakmiayi.

⁴⁸ Jesusa unuiniamurisha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nankaamaktiasa wea núnisan wémiayi.

⁴⁹ Jesus entsá wekaan ni unuiniamurí wáinkiar, wakanhashit, tu enentáimprarmiayi. Túrawar ti untsumkarmiayi.

⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajatarum, wíitjai Jesus; ashamprukairap” tímiayi.

⁵¹⁻⁵² Nuinkia entsaya kanunam waka enkemprarmiayi. Túramtai nasesha majaantmiayi. Ni unuiniamurinkia enentái kiritia áintsan áarmatai Jesus yurumkan núkap awajsamia nuna paant nekaatniun tuke tujinkiararmiayi. Tuma ásar yamáí túrunamu ititurak aankia tusar ti enentáimprar sapijmiakarmiayi.

Jinisarítniumia shuáran Jesus tsuármiania nu

(Mateu 14.34-36)

⁵³ Nuyanka katinkiar, Jinisarít núkanam jeawarmiayi. Jeawar kanun ajuiniarmiayi.

⁵⁴ Kanunmaya jíntrarmatai, nu nunkanmaya shuar Jesusan nekaawarmiayi.

⁵⁵ Tura “Jesus pujawai” táman antukar, ashí jeanmaya jaan ni peakrintiuk Jesus pujamunam itiaarmiayi.

⁵⁶ Tura Jesus wekaak wémia nuisha, péprunmasha, shuar matsatmanumsha, ishichik matsatkamunmasha jaan itiarar jintiá áeprusarmiayi. Túmainiak Jesusan pushirmin antiñtaj tusar seawarmiayi. Tura ashí antiñkiarmia nuka péñker ajasarmiayi.

7

Jesus Pariséun áujmatsarmiania nu

(Mateu 15.1-20)

¹ Pariséusha, Israer-shuara jintinniurisha Jerusarénumia Jesusan tariarmiayi.

² Tura Jesusa unuiniamurin ikijmiatsuk yurumun wáinkiar “Israer-shuara túrutairin túruiniatsui” tiarmiayi.

³ (Kame Pariséusha, tura ashí Israer-shuarsha, ni uuntri jintintiamurj̄n umikiar ti núkap ikijmiarar yurumin ármiai.)

⁴ Péprunmaya tari “ikijmiatsuk yurumáshtiniaiti” tiniu ármiai. Tura ti untsurj̄ ni uuntri túrutairj̄ núnisañ ármiai. “Tsapancha, ichiñnasha, jiruncha, peaknasha niñiakartiniaiti” tiniu ármiai.)

⁵ Tuma asamtai Pariséusha, Israer-shuara jintinniurj̄sha Jesusan chicharainiak “¿Urukamtai ame unuiniamuram ii uuntri jintintramniuitiaj nuna túruiniatsu. Urukamtai ikijmiatskesha yurumáinia?” tiarmiai.

⁶ Tutai Jesus tímiayi “Ántar chichamtiniaitrume. Isayas yaunchu nekas atumin áartampramiayi juna:

Ju aents ni wenejaj̄ Winia “ti péñkeraiti” turutainiawai, tímiayi Yus, tura ni enentáinkia jeachat pujuiniawai.

⁷ Tura tukeneas Winia shiir awajtuiniawai. Aentsu chichame jintiainiyat, “Yus-Chichamaiti” tuñiawai.”

Tu áarmaiti.

⁸ Tura átum Yusa chichame iniaisarum, aentsu jintintiamurj̄ umirkarum, ichiñnasha, tsapancha niñiaktin, tura chíkich túrutaisha áintsarmek untsurj̄ túrarme.

⁹ Túrákrum Yus-Chichamka tsukintiaani ikiusurme atumí uuntri chichame umirkatai tusarum.

¹⁰ Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiai:

Shuarsha ni aparj̄n, nukurj̄ncha yajauch chichareakka, nu shuar jákatniuiti.

¹¹⁻¹² Túrasha átumka Pariséútirmeka, antsu ju tárume: “Shuar ni aparj̄n ni nukurj̄n chicharuk “Wi yáintinian takakjana nu Kurpanaiti” takuñkia, atumsha péñkeraiti, aparj̄ncha nukurj̄ncha yáinchatí” tarume. (Kurpan tana nuka, Yus susamu, tawai.)

¹³ Nekaatarum, Pariséútiram. “Íi yaunchu uuntri chichame tuke umiki wétiniaitji” tákurum, Yus-Chicham penké ántar chichama núnin awajearme. Núnisrumek chikichcha untsurj̄ túrarme.” Tu tímiayi Jesus.

¹⁴ Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi.

¹⁵ Aaya ayashnium wayaana nu, shuáran yajauch awajsachminiaiiti; tura antsu ni enentáinia jinia nu, yajauch awajsattawai.

¹⁶ Shuar nuna ántakka enentáimprati” tímiayi.

¹⁷ Nuyá áentsun ikuiak, jea wayamtai, ni unuiniamurj̄ aniasarmiai “¿Nu métek-taku chicham warintiu?” tiarmiai.

¹⁸ Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiiti.

¹⁹ Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi.

²⁰ Nuyá tímiayi “Shuara enentáinia jinia nu, yajauch awajsamniaiti.

²¹ Shuara enentáinia, inia, yajauch enentáimsatniusha, tsanirnatniusha, natsa tsanirnatniusha, shuar máatniusha,

²² kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka inia wininiatsuk.

²³ Ashí nu tunáa ainia nu, shuara enentáinia jiniu asa, shuáran yajauch awajainiawai” tímiayi.

*Serupinísianmaya nuwa Jesusan nekas enentáimtusmiania nu
(Mateu 15.21-28)*

²⁴ Tiru pepru, Setún péprusha Serupinísia nunkanam ámiayi. Nuka Israer-shuara nunkenchayayi. Nu nunkanam Jesus wémiayi. Tura jeá, jeá wayáa pujusmiayi. Tura nuj pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi.

²⁵ Wárik nu nunkanmaya nuwa Jesus pujan nekaamiayi. Nu núwaka nawantri iwianchrukuyayi. Tuma asa Jesusan tarí ni nawen piniakum tepersamiayi.

²⁶ Nu nuwa Israer-shuarcha, Serupinísianmayayuyayi. Túmaitiat, nawantru enentáiya iwianchin jirturkitia tusa Jesusan seamiayi.

²⁷ Tutai Jesus nuwan chicharuk “Uchi emka ejemarartí. Uchi apatkuri atankir yawach súsatin pénkerchaiti” tímiayi.

²⁸ Tutai nuwa ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yúniatsuk” tímiayi.

²⁹ Tutai Jesus tímiayi “Pénker tame. Tuma asam, shiir wetá; ame nawantrumi enentáiya iwianch jíinkiyi” tímiayi.

³⁰ Takui niisha wémiayi. Tura ni jeen jeá, ni nawantrin íwianch jíinkimtai pénker ajas peaknum tepan wáinkiamiayi.

Jesus empekun tsuármiania nu

³¹ Jesus Tirunmaya jiinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi.

³² Nu chichachu ámiayi, kuishin empeku. Nu shuáran Jesusan itiarar, ni uwejejai antinkiat tusar seawarmiayi.

³³ Shuar matsatmanumia Jesus nin akanki jukí kuishin tsara uwejejai tsutsukruamiayi. Tura usukia, nu shuara iniajin antintkiamiayi.

³⁴ Tura nayaimpinmaaní ímias súkaska mayati “Epata” tímiayi. Nuka, shuar chichamnumka “chinkiatí” tawai.

³⁵ Nu chichamaik ni kuishisha chinikiamiayi, iniaisha séermiayi. Tura paant chichasmiayi.

³⁶ Tura Jesus chicharainiak “Penké etserkairap” tímiayi. Jesuska surí-suritiamaitiat, nu nankaamas etseriarmiayi.

³⁷ Tura ti enentáimprarmiayi. Enentáimprar, “Ju Jesus aya pénkeran túrawai. Empekuncha ántumtikniaiti, tura chichachun chichamtikniaiti” tiarmiayi.

8

Kuattru mir shuáran Jesus ayuramiania nu

(Mateu 15.32-39)

¹ Nu tsawantái shuar timiá untsurí iruntrarmiayi. Yurumkarí atsakui Jesus ni unuiniamurín untsukar juna tímiayi:

² “Ju shuáran waitnentajai. Menaintiú tsawant Wijjai pujuinia ásarmatai ni yurumkarí amuukachaik.

³ Tura ni jeen ayurtsuk akupeamka, tsukariin jintiá pimpikiartatui, yajaya káunkaru ásar” tímiayi.

⁴ Tutai ni unuiniamurí chichainiak “Túrasha juí atsamunam, ju aents ejemaratat tusar ¿tuyá yurumkak wáinkiatatí?” tiarmiayi.

⁵ Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

⁶ Nuiñkia ashí áentsun “nunká pujustarum” tiarmiayi. Tura tantan achik, Yúsan yuminsamiayi. Tura puuk, áentsun ajamsatarum tusa ni unuiniamurín susamiayi.

⁷ Tura uchich namaksha ishichik aan achik, Yúsan yuminkias, ni unuiniamurín chicharuk “Jusha shuar ajamsatarum” tímiayi.

⁸ Turam ashí yurumáwar ejemararmiayi. Ampirma púunaruncha siati chaṅkinnium áimkiarmiayi.

⁹ Kwatru mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmiayi.

¹⁰ Tura ni unuiniamurijjai kanunam enkemprar Tarmanúta nunkanam wearmiayi.

*Pariséu Jesusan iniakmasta tiarmiania nu
(Mateu 16.1-4; Rúkas 12.54-56)*

¹¹ Pariséu Jesusjai áujmatsatai tusar tariarmiayi. Nekapsatai tusar wakeruiniak Nin chicharuk “Nayaimpinmaya kakaram iniakmasta” tiarmiayi.

¹² Tuíniakui Jesus kúntuts enentáimias, súkaska mayati “¿Urukamtai, yamaiya aentstiram, nayaimpinmaya kakarman iniakmasat tusarum wakerarum? Nuka penké sunaschatarme, paant tájarne” tímiayi.

¹³ Nuyá nin ikiukiar ataksha kanunam enkemar amain katiñmiayi.

*Pariséu túramurijjai aneartarum, tímiayi Jesus
(Mateu 16.5-12)*

¹⁴ Tura ni unuiniamuri yurumak jukitai tukamá kajinmatkiarmiayi. Kanunmanka aya chikichik tantanak takaku ármiai.

¹⁵ Jesussha ni unuiniamuri enentáimtikiuk tímiayi “Wáinkiatarum; Pariséusha Erutisha wakaprutain takakainia nújajsha aneartarum” tímiayi.

¹⁶ Tutai ni unuiniamurisha tunaiyarmiayi “Tanta kajinmatkin asakrin nuna túramtsujiash” tiarmiayi.

¹⁷ Tura Jesus nuna nekáa chichaak “¿Urukamtai aya yurumkak enentáimtarum? Tuke nékatsrumek. Penké enentáimtsurmek. Atumí enentái tuke kiritkai? tímiayi.

¹⁸ Jimi ajsha itiura wáintsurmea. Kuíshim ajsha itiura ántatsrum. Ashí kajinmatkintrumek.

¹⁹ Nekaatarum, nuik, senku tantan púuran senku mir áishman kan ayurachmakaj. ¿Tura ampirma urutmá chaṅkinnium chumpiamarum?” tímiayi.

Niisha tiarmiayi “Tuse chaṅkinnium chumpiamji.”

²⁰ Ataksha Jesus tímiayi “Tura siati tantajai kwatru mir shuaran ayuramtai, ¿ampirmasha urutmá chaṅkinnium chumpiamarum?”

Niisha “siati” tiarmiayi.

²¹ Tuma asamtai Jesus tímiayi “¿Itiura imiá nékatsrum?”

Jesus kusurun ímtiksamiania nu

²² Nuyá Petsaitia péprunam jeawarmiayi. Jeawarmatai, áishman jii kusurun Jesusan itiararmiayi. Túrawar antinta tusar seawarmiayi.

²³ Tuma asamtai Jesus uwejnum achik péprunam aani enkeki jukí jii usukijjai kuérmiayi. Tura uwejéjai antin “¿íimmek?” tímiayi.

²⁴ Tutai kusuru ími tímiayi “Aentsun iiyajai, túrasha paantcha. Numi wekainian áaniun iiyajai” tímiayi.

²⁵ Nuyá ataksha Jesus ni uwejéjai kusuru jii antinmiayi. Tura kusurusha úmamkes iis, péñker ajas, ashí paant ímpramiayi.

²⁶ Jesus chichaak “Jeemiin weakum péprunam wayawaip tura shuar ujakaip” tímiayi.

*Pítiur Jesusan “Yusa Anaikiamurinme” tímiania nu
(Mateu 16.13-20; Rúkas 9.18-21)*

²⁷ Jesus ni unuiniamurijjai uunt pepru Sesaria-jiripiunam jeatsuk, tíjuch uchich péprunam irasarmiayi. Jintiá wésar Jesus ni unuiniamuri chicharainiak, “¿Yaiti turutainiawa Winia?” tímiayi.

²⁸ Tutai niisha áimkiarmiayi “Chíkich chichainiak, imiakratin Juankaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

²⁹ Tutai Jesus tímiayi “Atumsha, ¿waritrume. Yáitij?” tímiayi.

Tutai Pítiur tímiayi “Ámeke Krístuitme; Yúsaiya akupkamuitme.”

³⁰ Tutai Jesus chichaak “Penké etserkairap” tímiayi.

*Jesus ni jákatniurin ujakmiania nu
(Mateu 16.21-28; Rúkas 9.22-27)*

³¹ Unuiniak: “Wi Aents Ajasuitjiana ju ti wáitsatniuitjai. Israer-shuarti ii uuntrisha, Patri úntrisha, ii jintinniurisha Winia nakitrurar mantuawartatui. Túrasha menaintiu tsawant nankaasmatai nantaktiniaitjai” tímiayi.

³² Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

³³ Tutai Jesus ayantmatar, ni unuiniamurin iis, Pítrun kakantar chicharuk “Satanása, werumta. Ámeke Yusna ana nu enentáimtatsme, antsu aya áentsnak enentáimtame” tímiayi.

³⁴ Nuna tuasua amik tura nu matsamarmia nunasha, ni unuiniamurincha untsuk tímiayi, “Shuar Winia nekas nemartustasa wakerakka ni wakeramurinkia iniaisati; tura ni krusi yanaki nemartusti.

³⁵ Kame shuar ju nunkanam aya niki anenmamkunka nu shuar ni iwiaakmarin emenkaktatui. Antsu Winia anentu asa tura winia chichamprun anea asa, shuar aya penker pujustinniak enentáimtsuna nu, nekas iwiaakman wáinkiatatawai.

³⁶ Nekaata, shuar ashí ju nunkanam írunka nuna sumaksha túrasha ni wakan jinium wéakuisha, ¿itiurak penker pujusaint?

³⁷ Shuarka wakanin uwentikrataj tusa wakerak ¿urutmak akikmakaint?

³⁸ Antuktarum. Yamaiya aents Yusan nakitiar ajapawaru yajauch ainia nu ímiainiamunam shuar Winia natsantrakuinkia tura winia chichampruncha natsan-takuinkia, wi, Aents Ajasuitjiana ju, winia Aparu kakarmarijiai tura nayaimpinmaya penker suntarjai atak taakun, nú shuaran natsantrattajai Wisha. Tu tímiayi Jesus.

9

¹ Ataksha Jesus nin chicharuk, ‘Nekas tájarme, shuar játsuk Yus ni kakarmarijiai aentsu enentáin akupkattana nú tsawantan wáinkiatatna nu ju iijiai pujuiniawai’ tímiayi.

*Jesus nusháa iira ajasmiania nu
(Mateu 17.1-13; Rúkas 9.28-36)*

² Nuyá sais tsawant nankaasmatai, Jesus Pítruncha, Jakupuncha, Juánnasha uunt náinnium júkiarmiayi. Nuisha Jesus nushá iira ajasmiai.

³ Ni pushirisha ti puju jíitsumir ajattsarmiayi. Nujai métek puju awajsatin ju nunkanam atsawai.

⁴ Túruna nu Erías, Muisaisjai wantinkiar Jesusjai chichainian wáinkiararmiayi.

⁵ Nuyasha Pítiur Jesusan chicharuk “Uuntá, ii ju pujustin ti penkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi.

⁶ Jesusa unuiniamurí sapijmainiak, Pítiur wariniak titi nekaachmiayi. Nékachu asa nuna tímiayi.

⁷ Tura yuran kim tara mikintiu awajsamiayi. Yuranminmaya chichaak “Júiti winia aneamu Uchir. Nii anturkatarum” tímiayi.

⁸ Nuyanka ni unuiniamurí ayantmar iiyaj tukamar aya Jesusnak wáinkiararmiayi. Chíkichkia atsuarmiayi.

⁹ Nuyá náinniumiá akainiak Jesus nin chicharuk “Wáinkiarumna nu etserkairap. Wi, Aents Ajasuitjiana ju jakamunmaya nantaatsain nu etserkairap” tímiayi.

¹⁰ Tutai ni tímian ímiatrusan úukarmiayi. Tura “jakamunmaya nantaatsain tana nu, ¿wariniak ta?” nuamtak tunainiarmiayi.

¹¹ Tura Jesusan aniasarmiayi “¿Urukantai Israerti ii jintinniurisha, Erías emka tátiniaiti, tuinia?” tiarmiayi.

¹² Tutai Jesus tímiayi “Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintuia?

“Ti wáitsattawai; Nin nakitrartatui.” Tu áarmaiti.

¹³ Wi tájarne, Erías nekas táwiti. Támatái, shuar ashí ni wakeriarmia nuna nin túrawarmiayi. Yusa Papiriin Eríasa túrunatniuri aarma amia tímiatrusan túrawarmiayi” tímiayi Jesus.

*Jesus iwianchin jiki akupkamiania nu
(Mateu 17.14-21; Rúkas 9.37-43)*

¹⁴ Tura ni unuiniamuri matsatmanum atak wáketuk, ti untsurí aents káutkar Israer-shuara jintinniurisha niijiai tunai pujuinian wáinkiamiayi.

¹⁵ Tura aencha, Jesusan wáinkiar warainiak, tsékenki weriar, áujsarmiayi.

¹⁶ Túrunawarmatai, Jesus chicharainiak, “Warí tunaiyarum?” tímiayi.

¹⁷ Tutai chikichik ayak “Uuntá, winia uchirun Ámin itiarjame. Iwianchruku asa chichachuiti.

¹⁸ Túmakui íwianch enkemtakun paat ajar áepeawai; túram uchisha saun kaput apak nain kátetete awajeawai. Túram kakaakcha ame unuiniamurmin seamjai, jirtukti tusan, túrasha tujintrutkarai” tímiayi.

¹⁹ Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi.

²⁰ Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiayi. Uchisha chichiptur nunká iniaan péper-péper ajakin wenunam saun apakmiayi.

²¹ Túrunamtai Jesus ni aparín aniasmiayi “¿Urutá yaunchu áinkiait?”

Tutai ni aparí tímiayi “Úchichik áinkiaiti.

²² Tuma asa take jutikiú pujurniuiti; jiniumsha apeawai, entsá maataj tusa ajuaawai. Yaintrukminiaitkiumka waitneasam yaintrukta” tímiayi.

²³ Tutai Jesus chicharuk “¿Urukantai, yaintrukminiaitkiumka, tame? Nekaata, shuar Winia nekas enentáimturna nu ashí túramniaiti” tímiayi.

²⁴ Tutai uchi aparí kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

²⁵ Tura shuar untsurí káunainian Jesus wáiniak kakantuk “Empeku chichachu awajin iwianchi jinkitia, tájame. Jíinkim ataksha wayawaipia” tímiayi.

²⁶ Tura íwianch jiiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtai untsurí shuar “jakayi” tiarmiayi.

²⁷ Támanak Jesus uwejen achik awajkimiayi, tura uchi nantaki wajakmiayi.

²⁸ Tura Jesus jeá wayamtai, niñki pujusar, ni unuiniamuri aniasar “¿Urukantai iisha jiktin tujinkiamaj?” tiarmiayi.

²⁹ Tutai Jesus tímiayi “Ju iwianchkia ijiarmar Yus áujkur jikminiaiti” tímiayi.

*Jesus ataksha ni jákatniurin ujakmiania nu
(Mateu 17.22-23; Rúkas 9.43-45)*

³⁰ Nuyá jíinkiar Kariréa nunkanmaani nankaamakarmiayi. Ni unuiniamurin unuinia asa nu nankaamamun nekaawarain tusa Jesus nakitmiayi.

³¹ Unuuniak juna tímiayi: “Wi Aents Ajasuitiaj juna mantamnati tusar achirkar surtkartatui. Tura máamuitiatnak, iwiarsamunmayan menaintiú tsawantaj nantaktiat-jai” tímiayi.

³² Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nankaamantuit?”

(Mateu 18.1-5; Rúkas 9.46-48)

³³ Nuyá Kapernáum péprunam jeawarmiayi. Tura Jesus jeá pujus ni unuiniamurin aniniak, “¿Atumsha jintiá winisrum warí áujmatmiarum?” tímiayi.

³⁴ Tura natsarar pachischarmiai. Kame jintiá wésar “iijjai ¿yaki imiá nankaamantu ajasat?” tunainiarmiayi.

³⁵ Ni unuiniamuri pachischarmatai, Jesus pujus ashí tuse unuiniamurin irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi.

³⁶ Tura uchin itiáa miniakas chichaak:

³⁷ “Shuar uchin winia naarui shiir awajeakka Winia shiir awajtai. Tura Winia akuptukua nunasha shiir awajeawai” tímiayi.

“Shuar in nakitramachkunka in páchitkiawai”

(Rúkas 9.49-50; Mateu 10.42)

³⁸ Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura iijjai írutkachu asamtai nu túratin suritkiamji” tímiayi.

³⁹ Tutai Jesus tímiayi “Antsu suritkiarap. Shuar winia náarun pachis tujinkiamun túrakka, nu shuar warí tsanumprutatniun tujinkiattawai.

⁴⁰ Shuar in nakitramachkunka, in páchitkiawai, tímiayi.

⁴¹ Winia nemarka asakrumin shuar yumiichinkesha ajampramkuka ántar túratsui; akikma átatui’ tímiayi.

(Mateu 18.6-9; Rúkas 17.1-2)

⁴² “Tura shuar ju uchin Winia umirtuinia nuna yajauchin túrumtikiamtainkia, ti asutniattawai. Tuma asamtai uchin yajauchin túrumtiktsain kuntujen kayajai jinkiar nayaantsanam ajunmaka maak ainti.

⁴³ Ame uwejmek yajauchin túrumtikramamniaitkuinkia tsupikta. Mai uwejtuk wáitsatniunam jeatniujainkia chikichík uwejjai ju nunkanam pujusar tuke iwiaaku pujustinnium jeatin ti shiiraiti. Warí, wáitsatniunmanka ji kajinkiashtin awai,

⁴⁴ jákaru akarisha jáiniatsui tura jisha tuke kapaawai.

⁴⁵ Nawemsha yajauchin túrumtikramamniaitkuinkia nusha tsupikta. Mai nawentuk wáitsatniunam jeatniujainkia chikichík nawejai ju nunkanam pujusar tuke iwiaaku pujustinnium jeatin ti shiiraiti. Wáitsatniunmanka ji kajinkiashtin awai,

⁴⁶ jákaru akarisha jáiniatsui tura jisha tuke kapaawai.

⁴⁷ Jimisha yajauchin túrumtikramamniaitkuinkia ukuinkiata. Mai jiiintiuk wáitsatniunam jeatniujainkia chikichík jiiijai ju nunkanam pujusar Yus akupeana nui jeatin ti shiiraiti;

⁴⁸ wáitsatniunmanka jákaru akarisha jáiniatsui tura jisha tuke kapaawai.

⁴⁹ Naman Yus susamu weaktinia áintsan aentstirmesha jijiai nekapnastatrum.

⁵⁰ Weesha ti penkeraitiat michumarka, ¿itiurak jea-jeat áitinkí? Wats, wee jeakua áintsarmek atumek shiir enentáimtunaistarum” tímiayi Jesus.

10

Nuwa ajapatniun Jesus áujmatsamiania nu

(Mateu 19.1-12; Rúkas 16.18)

¹ Jesus Kapernáumnumiá jiinki, Jutía nunkanam nankaamaki, Jurtan entsa amain jeamiayi. Nuí pujai, aents ataksha Nin irunturarmiayi. Iruntrarmatai tuke túrin asa ataksha unuiniamiayi.

² Tura Pariséu Jesusan nekapsatai tusar wakeruiniak, Nin chicharainiak “¿Áishman ni nuarí ajapatin tsankamkamukait?” tiarmiayi.

³ Tutai Jesus tímiayi “¿Muisais wariniak timia?”

⁴ Tutai “Papíjjai in ajapatniun tsankatramkamiayi” tiarmiayi.

⁵ Tutai Jesus tímiayi “Atumí enentai kátsuram asamtai nu chichaman atumin tsankatramkamiarme.

⁶ Tura Yus yámankamtaik ashí najanamia nuí, áishmannasha nuwancha najanamiayi.

⁷ Tuma asamtai áishman ni aparíncha nukuríncha kanaki ikiuki, ni nuaríjjai tsanintiniaiti.

⁸ Warí, áishman nuaríjjai jímiaraitiat chikichik ajasartatui. Tuma asamtai yamá jímiarhaiti, antsu chikichik ajasuíti.

⁹ Tuma asa, Yus atsaniania nuna, aents akankashtiniaiti” tímiayi.

¹⁰ Tura urum jeá wayawar, Jesusa unuiniamurí nu chichaman ataksha aniasarmiayi.

¹¹ Tuiniakui Jesus tímiayi “Shuar ni nuarín ajapa ikiuak chikichan nuátkañka, emka nuarín yajauch awajas, ikiuak, tsanirmayi.

¹² Nuwasha ni áishri ajapa ikiuak, chikichjai niiniurtukka, niisha tsanirmayi” tímiayi.

*Jesus uchin shiir awajsamiania nu
(Mateu 19.13-15; Rúkas 18.15-17)*

¹³ Antiñkiarat tusar uchin Jesusan itiararmiayi. Túruiniakui Jesusa unuiniamurí “itiairap” tiarmiayi.

¹⁴ Tura Jesus nuna wáiniak, kajek juna tímiayi “Uchi Winí winitin tsankatruktarum. Suritkiairap. Iis, shuar ju uchia núnisan peejchach enentáimtumainia nu Yusa akupeamurín pachiinkiamniaiti.

¹⁵ Nuní asamtai tájarme, uchi umiana núnisan Yusa akupkamurín shuar umíachkunka nuna pachiinkiachminiaiti.

¹⁶ Nuyá uchin miniakas, “Yus yáinmakarti” tímiayi.

*Kuítrintin Jesusan áujksamiania nu
(Mateu 19.16-30; Rúkas 18.18-30)*

¹⁷ Ukunam, Jesus nuyá weai, shuar tseke Nin tarimiayi. Tarí tikishmatar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁸ Tutai Jesus tímiayi, “¿Urukamtai Winia, péñkeraitme, túrutam? Shuarka chikichkisha péñkerka atsawai. Aya Yúsak péñkeraiti.

¹⁹ Yus akupkamu nékatsmek. Ju áiniawai: tsanirmawairap, mankartuawairap, kasamkairap, chíkich shuar tsanumprurairap, anankartuawairap, apasha nukusha umirkatarum. Nu áiniawai” tímiayi.

²⁰ Tutai kuítrintin chichaak “Uunta, núnaka úchichik mash umiki tsakaruitjai” tímiayi.

²¹ Tutai Jesus iis waitnenmai tímiayi “Chikichik táasume. Weme ashí áiniu ana nu surukta. Túram nu kuit kuítrincha susarta. Túrakum nayaimpiniam kuítrum ikiaun_kattme. Túram winitia, krus yanaktinia áintsamek itiurchatrum aín nemartusta” tímiayi.

²² Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

²³ Nii wématai, Jesus ashí ni téntakmarín iis, ni unuiniamurín chicharuk, “Kuítrintin ainia nu Yusa akupeamurín pachiinkiatin ti itiurchaiti” tímiayi.

²⁴ Takui ni unuiniamurí nuna antukar niisháa enentáimprarmiyai. Túramtai Jesus tímiyai “Uchiru antuktarum. Shuar kuítríniak enentáimtuinia nuka, Yusa akupeamurín pachiinkiatin penké itíurchataiti.

²⁵ Uunt kamiriu auja jín wayatin ana nú nankaamas, kuítrintin Yusa akupeamurín pachiinkiatin itíurchataiti” tímiyai.

²⁶ Nuna antukar nú arant niisháa enentáimprarmiyai. “¿Nuiñkia yaki uwempramniait?” tunaiyarmiyai.

²⁷ Tura Jesus nin iisar chichainiak “Aents niñki túrachminiaiti, antsu Yus túramniaiti. Yuska ashí túramniaiti” tímiyai.

²⁸ Nuyá Pítíur Nin chicharuk “Íis, iikia ashí ikiukir némartujuk” tímiyai.

²⁹ Tutai Jesussha tímiyai, “Nekas tájarme, shuar Winia nemartak Yus-Chichamnasha ipiampartasa wakerak ni jeencha, yachíncha, umaincha, aparíncha, nukuríncha, nuaríncha, uchiríncha, nunkencha uyumatsuk ikiuakka,

³⁰ nu shuar ju nunkanam sian patatnas jeencha, yachíncha, umaincha, nukuríncha, uchiríncha, nunkencha, ju nunkanam wáitíayat sunastatui. Tura ukunam, nunka amuukamtai, nu shuarsha jáchatainíum tuke péñker pujustatui.

³¹ Tura untsurí shuar yamáí penkerí ainia nu, ukunam ukunmaaní pujusartatui, tura íksan untsurí shuar yamáí ukunmayá ainia nu, ukunam eem pujusartatui” tímiyai Jesus.

Jesus ni jákatniuri ataksha ujakmiania nu

(Mateu 20.17-19; Rúkas 18.31-34)

³² Nuyá arak Jerusarénum wéenak, jintiak wearmiyai. Jesuska émak wémiyai. Ni unuiniamurísha niisháa enentáimprarmiyai. Ashamainíayatan Jesusan nemarsarmiyai. Túmainíai atak ni nekas unuiniamurín akankiar, ni túrunatniurín ujakmiyai.

³³ Ujaak tímiyai “Antuktarum, arak Jerusarénum wéaji. Nui Winia, Aents Ajasuitjiana juna, Patrí uuntriíncha, jintinniunmasha surutkartatui. Niisha apachníum mantamnatí tusar surutkartatui.

³⁴ Nusha Winia wishikrurar, katsumprukar, usukruawar mantuawartatui. Túramaitiatnak menaintíú tsawantai nantaktiatjai” tímiyai.

Jakupu Juanjai seawarmiania nu

(Mateu 20.20-28)

³⁵ Sepetéu uchirí Jakupusha Juansha Jesusan taruntarmiyai. Taruntar “Uuntá, ii seattajnia nu túrak tusar wakeraji” tíarmiyai.

³⁶ Tutai Jesus tímiyai “¿Warí itíurtukat tusam wakerutam?”

³⁷ Tutai “Ame nupetmaktin tsawantrum jeamtai, iisha Ámijíai pujustaitsar wakeraji, wi untsuurumini, winia yatsursha menarmini. Nu tsankatrukta” tíarmiyai.

³⁸ Tura Jesus tímiyai “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiyai.

³⁹ Niisha tíarmiyai, “Túramniaitji, páchitskea.”

Tuñiakui Jesus tímiyai “Wats, Wi umartatjana nu umartatrume, tura Wi imiantiatjana núnisrumek imiantiatrume.

⁴⁰ Túrasha winia untsuuruini, menaruinísha átum pujustinian Wikia súsashtiniaitjarme, antsu Yus wakerana nu nuin apujstatawai” tímiyai.

⁴¹ Tura chíkich tias unuiniamurí nuna anturkar Jakupuncha, Juánnasha ti kajerkar-miyai.

⁴² Tura Jesus ni unuiniamurín irur tímiyai “Ju nékarme; Yus-shuarchanum akupniuitjai tuinia nu, waantu enentáimtumas, ni shuarín ti akupeawai; tura uunt ainia nusha ashí shuar ti takamtikiainiawai.

⁴³ Antsu atumjai núnisan atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniatrume.

⁴⁴ Shuar atumí penkeri ajastajtsa wakerakka, takarniua nuke ajas, umirtamkatí.

⁴⁵ Wisha, Aents Ajasuitjiana ju, shuar takartusarat tusan táchamjai, antsu ashí shuáran yáintaj tusan táwitjai. Wisha jarukan shuáran uwemtikratajtsan táwitjai” tímiayi.

Jesus Partimiásan tsuármiania nu

(Mateu 20.29-34; Rúkas 18.35-43)

⁴⁶ Jesus ni unuiniamurijjai, tura chíkich untsurí aentsjai Jirikiú péprunam jeawarmiayi. Nuyá Jirikiúnmayasha jíinkiar weenai, Timiasa uchirí Partimiás, kusuru amia nu, jintiá yantam kuítian seamu pujumiayi.

⁴⁷ Niisha, Nasarénumia Jesusaiti táman antuk, untsukum “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta” tímiayi.

⁴⁸ Tura untsurí nui matsamarmia nu nin chicharainiak “Takamatsata” tiarmiayi.

Niisha nú nankaamas untsummiayi “Tawit weeá Jesúsá, winia waitnentrurta.”

⁴⁹ Nuna antuk Jesus wajatas, chichaak “Untsuktarum” tímiayi.

Takui shuar kusurun untsuiniak “Kakaram ajasta. Wajaktia; untsurmawai” tiarmiayi.

⁵⁰ Tuiniakui niisha esekmatairín ajapa ikiuak wajaki Jesusan tseke tarimiayi.

⁵¹ Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, íimtiasan wakerajai” tímiayi.

⁵² Tutai Jesus chichaak “Shiir wetá. Winia nekas enentáimtursa asam péker ajasume” tímiayi. Tura nu chichamaik íimpramiayi. Tura Jesusan nemarki wémiayi.

11

Jesus Jerusarénum wayamiania nu

(Mateu 21.1-11; Rúkas 19.28-40; Juan 12.12-19)

¹ Wésar Jerusarénum tura Petpajái péprusha Petania péprusha Uriwiu naint ínkuiasmak ámanum jeawar, Jesus jimiará unuiniamurín ujuikimiayi.

² Ujuiak tímiayi “Aatuniní pépruchiniam werum nuin umpuuru uchich jinkiamu wáinkiatarme. Nu umpuuruuka tuke entsamprukchamuiti. Nu atiarum utitiarum.

³ Tura “¿Urukamtia áitkiarum?” turamainiakuisha, “ii Uuntri wakerawai” titiarum” tímiayi.

⁴ Tutai wearmiayi. Tura umpuurun wáitiniam aani jinkiamun, jintiá yantamnum wajan wáinkiar atiawarmiayi.

⁵ Nui pujuarmia nu “¿Warí áitkiarum. Urukamtai umpuuru atíarum?” tiarmiayi.

⁶ Takui, niisha Jesus timia nu ujakam suritkiacharmiayi.

⁷ Tura umpuurun Jesusan itiarar pushirín umpuurunam awantkarmiayi. Túram Jesus entsamkamiayi.

⁸ Tura untsurí shuarsha pushirín jintianam ayapar áinkiararmiayi. Chíkichcha jintiá yantamnumian nukan juuk jintianam áintrarmiayi.

⁹ Eem wearmia nusha, uku winiarmia nusha warainiak “Jusanna” untsumkarmiayi. “Yusa náarín winiana nu imiá pékeraiti.

¹⁰ Ii uuntri Tawitia akupeamurí tátatna nu imiá penker atí. Ii Yusri naari shiir ati.” Tu untsumki wearmiayi.

¹¹ Tura Jesus Jerusarénum jeamiayi. Jeá, Yusa Uunt Jeen wayamiayi. Tura ashí iya-sua amik, kintiampraj tusa ni tuse unuiniamurijjai tíjiuch Petania péprunam wearmiayi.

Jesus iikiu numin yuminkramiania nu

(Mateu 21.18-19)

¹² Kashin tsawar, Petanianmaya jintia wesa, Jesus tsukammiayi.

¹³ Tura arant wajan iikiu numir_{in} núkenniun wáiniak, nereatsuash tusa iyumiayi. Tura nereshtair_{in} asamtai neren pen_{ké} wáinkiachmiayi.

¹⁴ Nuyá iikiu numin yum_{in}keak: “Ame nerem pen_{ké} yunaashti” tímiayi. Ni unuiniamur_{isha} nuna táman antukarmiayi.

*Yusa Uunt Jeen suruktinian Jesus suritkiamiania nu
(Mateu 21.12-17; Rúkas 19.45-48; Juan 2.13-22)*

¹⁵ Nuyá atak Jerusare_{nn}um jeawarmiayi. Nui Jesus Yusa Uunt Jeen wayá suruktai tusar pujuarmia nuna j_{iiki} akupkatasa nan_{kam}miayi. Kuítian yapaj_{in} armia nuna misar_{in} tura yampitsan súrin armia nuna kutan_{krin}cha ayanturmiayi.

¹⁶ Tura káarak entsaki Yusa Uunt Jeen nan_{kaam}aktinian suritkiarmiayi.

¹⁷ Nuyá “Yus áuj_{satai} tusar ashí shuar Yusa jeen wayamnia átatui” tú aarchamukait Yusa Papi_{riin}. Antsu átumka Yusa jee kasa matsam_{taiya} nútikiarme” tímiayi.

¹⁸ Aents nui matsamarmia nu Jesusa chichamen antukar ti enentáimprarmiayi. Tuma asamtai Israer-patri úuntr_{isha}, Israer-shuara jintinniur_{isha}, nuna nekaawar, Jesusan ashamainiak mantamnati tusar chichaman jurusarmiayi.

¹⁹ Nuyá kiakui Jesus Jerusare_{nn}umia j_{iink}imiayi.

*Iikiu numin káarun wáinkiarmaniania nu
(Mateu 21.20-22)*

²⁰ Kashin káshik nan_{kaam}ainiak iikiu numin kan_{kaptuk} jaka wajan wáinkiar_{miayi}.

²¹ Tura Pítiur enentáimias Jesusan tímiayi “Uunta, iista, iikiu Ame yum_{in}kramam nu kan_{kaptuk} káarchaik.”

²² Tutai Jesus tímiayi “Yus nekas enentáimtustarum.

²³ Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju náintian “j_{iinki} nayaantsanam iniá_{nti}” táku_{inkia}, páchitsuk inia_{ntatui}, tímiayi.

²⁴ Tuma asamtai tájarme, ashí Yus áuj_{kuram} searmena nuna suramsattarme. “Wi seajna nuna yamá takakjai” tu enentáimkiurmeka, wáinkia_{ttarme}.

²⁵ Tura Yus áuj_{kuram} pujarmena nu, kajernaiyamuram áku_{inkia} tsan_{kurnáir}atarum. Atumí Aparí nayaimpiniam pujana nu atumí tunaar_{in} tsan_{kurturti} tusarum túratarum.

²⁶ Atumsha tsan_{kurnáiyach}kur_{minkia}, núnisa_n atumí Aparí nayaimpiniam pujana nu atumí tunaar_{in} tsan_{kurtám}prashtat_{rume}” tímiayi Jesus.

*Yusa kakarmar_{jia}i Jesus takasmiania nu
(Mateu 21.23-27; Rúkas 20.1-8)*

²⁷ Ataksha Jerusare_{nn}um waketkiarmiayi. Jesus Yusa Uunt Jeen wekai, Israer-patri úuntr_{isha}, Israer-shuara jintinniur_{isha}, Israer-shuara iruntai-jee úuntr_{isha} Nin káut_{karmiayi}.

²⁸ Káutkar Jesusan tiarmiayi “¿Yana kakarmar_{jia}i ju túram. Ame túramna nuna ya tsan_{katrama}?” tiarmiayi.

²⁹ Tuiniakui Jesus tímiayi, “Chikichkiniak ania_{statjarme}. Áirkatarum. Túrakrumni_{nkia} Wisha winia takastinian tsan_{katruk}mia nuna ujaktatjarme.

³⁰ Wats, turutiarum, ¿ya Juan imiaitniun tsan_{katkama}? ¿Shuar tsan_{katkamka}? ¿Yus tsan_{katkamka}? Áirkatarum” tímiayi.

³¹ Tura niisha enentáimprar “Yus akupk_{aiti}” tákurn_{inkia}, “¿urukamtia umirkachuram?” turamchattajik.

³² Antsu “shuar tsan_{katkaiti}” tákur_{kia}, ashí shuar ashamaji” tunainiar_{miayi}. Ashí aents Juan nekas Yús_{nan} etserni_{uiti}, tu enentáimainiakui asham_{miarmiayi}.

³³ Nuyá Jesusan tiarmiayi “Iikia nékats_{ji}.”

Tutai Jesus tímiayi “Wisha núnisnak yana kakarmar_{jia}i takaaj nuna ujakchattaj_{rume}.”

12

Yajauch takau armia nu

(Mateu 21.33-46; Rúkas 20.9-19)

¹ Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetain najanamai. Tura kumpin jean najanamai. Najana takartusti tusa shuáran ikiuak nin_{nkia} jeachat wémai.

² Neretai tsawant jeamtai, ni takarniur_{in} júukman akankat tusa akupkamai.

³ Tura ajanam takau arma nu, nu takarniun achik, katsumkar, áyatik awain_{nkia}rmiai.

⁴ Ataksha chíkich takarniun akupkamai, tura nunasha kayaj_{ai} tukurar, múuknum katsumkar, katsekar awain_{nkia}rmiai.

⁵ Tuma ai_n ataksha chíkichan akupkamai, tura nunasha máawarmai. Ti untsur_{in} akupramai. Chikichnasha katsumkarmai, chikichan máawarmai.

⁶ Tura niij_{ai} chikichik tuke ámiayi, nuka ni aneamu uchiri. Nu uchinha ukunam akupkamai. Akupeak “Winia uchirnaka shiir awajsartatui” tímiayi.

⁷ Tura ni uchir_i winian wáinkiar, takau shuar nuámtak chichainiak “Ju_{ka} ajá nérenniu uchir_{inti}. Wátsek, maatai; túramka ájaka iiniu átatui” tiarmiai.

⁸ Túsar achikiar máawarmai. Ayashincha ajanmayá ajapawarmai” tímiayi.

⁹ Tura nuyá aniasmiayi, “¿Wats, warí enentáimsarum; ajá nérenniur_i ititurkattawa? Jeashtanmayá taa, ajá takainia nú shuaran amuktatui. Ni ajar_{in}cha chikichan ikias-tatui.

¹⁰ Ju, Yus-Papinium aarma ana nu áujsachukaitrum:

Kaya pé_{nkernak}, jeammin “yajauchiiti” tusar ajapawarmia nu ashí kayaj_{ai} nan_{kaamas} pé_{nk}er apujsamuiti.

¹¹ Nusha Yus túramuiti. Iisha íisar ti enentáimtaji.

Nuke áarmaiti” tímiayi.

¹² Tura nú metek-taku chichamj_{ai} nin áujmatma asa achiktai tusar chichaman jurusarmiayi. Túmainiyat shuáran ashamainiak Jesusan ikiuiniak wearmiayi.

Unt akupin súsatin tura Yus súsatin

(Mateu 22.15-22; Rúkas 20.20-26)

¹³ Tura wear, imiaamtikiar yajá chichakmatai núj_{ai} yajauch títaii tusar Pariséu shuarnasha, Erutisa neman_{in} shuarnasha akatar Jesusan akuptukarmiayi.

¹⁴ Túram Nin jeariar chicharainiak: “Uuntá, aents nakitiainia_n tuke nekas chicham páchitsuk chichaame, nu nékaji. Aents pátatek iiyatsme, antsu nekas Yusa jint_i unuiniame. ¿Waritia enentáimiam, ii kuitr_i uunt Sesar súsatin pé_{nk}erkait. Susattajik. Suritkiattajik? Nu nekaatai tusar wakeraji” tiarmiayi.

¹⁵ Tura Jesus ni yajauch enentáimmar_{in} nekara “¿Urukamtai Winia yajauch titi tusarum wakerutarum? Kuit itiatarum, Wi íistaj” tímiayi.

¹⁶ Tutai kuítian itiararmiayi.

Jesus nuna iis tímiayi, “¿Ju_{isha} yana yap_i tura yana naar_i áarmait?” tímiayi.

Tutai “Uunt Sésarna” tiarmiayi.

¹⁷ Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamur_{in} antukar ti enentáimprarmiayi.

Aents nantaktinian Satuséu anintrusarmiania nu

(Mateu 22.23-33; Rúkas 20.27-40)

¹⁸ Nu_{isha} Satuséu aents, jakamunmayá nantaktin pen_{ké} atsawai tiniu armia nu, Jesusan tariarmiayi. Taar Jesusan chicharainiak:

¹⁹ “Uuntá, Muisais juna áatrampramiji:

“Áishman_n ni nuar_i júreats_{in} jakamtain_{nkia}, yachin yajutmatrattsa, ni yach_i nu wajen nuátkatniuiti.”

²⁰ Wats, siati yachi ármiai. Iwairi nuwan nuatak yajutmatsuk jakamiayi.

²¹ Ni yachi wajen akinkiamiayi. Nusha núnisan yajutmatsuk jakamiayi. Nuna yachisha núnisan tura nuna yachisha núnisan túramiai.

²² Tura ashí siati patainman, patainman nu nuwan nuátkarmiayi. Yajutmatsuk, yajutmatsuk jiniawarmiayi. Tura ukunam nuwasha jakamiayi.

²³ Nuinkia nantaktin tsawantai, nantakiarmatai, ¿yana nuarın ati? Ashí siati nuátkacharmaka” tiarmiayi.

²⁴ Tutai Jesus tímiayi ““Jakamunmayá nantaktin atsawai” tátsurmek. Yusa chichame tura Yusa kakarmari nékachu asarum awajiarme, tímiayi.

²⁵ Iimiatarum, aents jakamunmayá nantakiarmatai, nuatnaikiatin atsuttawai, antsu nayaimpinmayá suntara núnisan pujusartatui.

²⁶ Tura jakamunmayá nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmayá Muisaisan chicharuk “Wikia Apráama Isaaka tura Jakupu Yúsrıntjai” Yus tímiayi.

²⁷ Yaunchu jákaru ain, Yus nuna taku, ayashnium jakayat iwiaaku pujuinia nuna Yusrıntjai, tawai. Nekas jaka ainia nuna Yusrınchuiti. Nantaktin atsawai tau asarum awajirurme” tímiayi Jesus.

*Yus akupkamu imiá péñker ainia nu
(Mateu 22.34-40)*

²⁸ Jesussha Satuséusha áujmatnainian Israer-shuara jintinniuri taa anturkamiayi. Anturak, Jesus ti péñker áimkiui, niisha Jesusan juna aniasmiayi: “¿Yus akupkamu tuá imiá péñkerait?” tímiayi.

²⁹ Tutai Jesus tímiayi “Júiti Yus akupkamu imiá péñker: Antukta Israer shuará. Ii Yusrı úuntaiti, tura Niñki nekas Yúsaiti.

³⁰ Tuma asantai, tuke enentáimjai ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas péñker akupkamu, tímiayi.

³¹ Nuyasha chikichcha awai, “ame ayashim aneamna tímatrusmek ame írutramurmesha aneeta.” Chikich nu nankaamas péñker akupkamu atsawai’ tímiayi.

³² Tutai jintintin tímiayi “Ee, péñkeraiti, Uunta. Nékasmeke tame. Chikichík Yus awai, chikichkia atsawai.

³³ Tura tuke enentáijjai ti enentáimsar, ii kakarmarisha Yus íktusar Nin aneakrikia, ii ayashi aneajnia núnik ii írutramurisha aneatniuitji. Nusha ashí Yus sutai ana nujai nankaamas péñkeraiti’ tímiayi.

³⁴ Nuna tiniu asantai Jesus ni péñker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chikich shuar Jesusan aniastinian arantukarmiayi.

*Kristu tutai ¿yana uchirimpait?
(Mateu 22.41-46; Rúkas 20.41-44)*

³⁵ Jesus Yusa Uunt Jeen ununiak pujumiayi. Tura chichaak “¿Urukamtaii jintinniuri “Yus anaikiamu Krístun Tawitia shuari” tuinia?”

³⁶ Tawit, antsu, Yusa Wakaní aarta tutai, Yus-Papinium juna áarmiayi: Uunt winia Úuntron tímiayi “Ame nemasrumin nupetkatin amuatsain winia untsuuru-inin pujusta”.

³⁷ Kame Tawitkia, Krístun áujmatuk, “winia Uuntru” taisha, ¿itiura ní shuarisha átink’?” tímiayi Jesus. Tuma asantai untsurı shuar nui matsamarmia nu ti shiir antukarmiayi.

*“Israer-shuaran jintintin ainia nújai aneartarum” Jesus tímiania nu
(Mateu 23.1-36; Rúkas 11.37-54; 20.45-47)*

³⁸ Jesus unuiniak tímiayi, “Israer-shuara jintinniurí ainia nujai aneartarum. Ni-isha waantu enentáimtumasar, esaram pushin entsarar wekasatajtsar wakeruiniawai. Péprunmasha shuar shiir áujtusarat tusa wakeruiniawai.

³⁹ Israer-shuar iruntainiam penkerí pujutainium pujustinian wakeruiniawai. Nam-pernumsha penkerí pujutainium pujustinniasha wakeruiniawai.

⁴⁰ Tura wajé jeencha atantainiawai. Túrawar aents nekaracharat tusar ti esaram chichamjai Yúsán áujainiawai. Nincha chikichjai nankaamas Yus asutiawartatui” tímiayi.

Waje kuítrín susamiania nu

(Rúkas 21.1-4)

⁴¹ Jesus Yusa Uunt Jeen kuit enketainiam naka pujus áents kuítrín chumpian wáinkiamiayi. Untsurí kuítrintin núkap enkeawarmiayi.

⁴² Nuyá waje kuítrincha taa jimiará uchich kuítian, reara áantsan, enkeamiayi.

⁴³ Jesuska unuiniamurín untsuk “Nekas tájarme, ju waje kuítrinchaitiat, ashí enkeena nú nankaamas núkap enkeayi.

⁴⁴ Iis, kuítrinniusha nii ampirma nuna enkeenawai, tura antsu ju nuwá kuítrinchaitiat, ampirmatsuk ni yurumatniurín takurmakman ashí enkeayi” tímiayi.

13

Yusa Uunt Jeen yumpuntratniun Jesus ujakmiania nu

(Mateu 24.1-2; Rúkas 21.5-6)

¹ Yusa Uunt Jeeniá Jesus jiinkimtai, unuiniamurí Nin tímiayi “Iisia, Uunta, kayasha ti shiir áiniawai. Jeasha imiá úuntchakait.”

² Tutai Jesus tímiayi “Ju imiá uunt jea wáinmek. Kaya ekenramu au ashí mash yumpuntrartatui” tímiayi.

Amuukatin tsawantin uruku átatna nu

(Mateu 24.3-28; Rúkas 21.7-24; 17.22-24)

³ Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, nínkimias Jesusan aniiniak

⁴ “Uuntá, tímiam nu, ¿urutiá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵ Tutai Jesus tímiayi “Aneartarum, anankramawairap.

⁶ Nekaatarum, untsurí winia naarun pachisar winiartatui. Chíkich chíkich “Wiitjai Kristu” taku, untsurín anankawartatui.

⁷ Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nujajisha amuukatin tsawantka tuke jeatsui, tímiayi.

⁸ Shuar chíkich shuarjai mesetan najanawartatui; apachcha chíkich apachjai núnisaran mesetan najanawartatui. Untsurí nunkanam úurkattawai. Tsukasha ártatui, charaatum ajamusha núnisan átatui. Tura nujai iturchatka aya yama nankamui.’

⁹ “Túmaitkui atumsha aneartarum. Akupin iruntainiumsha surutmakartatrome, tura íi shuar iruntainmasha katsumpramkartatrome. Wíi shuar asakrumin, kapitíannium, akupniunmasha juramkittiarne. Nui jearum, Winia chichastatrome.

¹⁰ Nu túruntsain ashí áentsnum Yus-Chicham etsernaktiniaiti.

¹¹ Atumin surutmaktasar juramainiakuisha, warintiajak tusarum ti enentáimsairap. Chichastin jeamtai, Yusa Wakaní jintinramattarmena nu titiarum. Iis, atumí enentáijjai tíchattarme, antsu Yusa Wakaní jintintiam títiatrome.

¹² Nu tsawantin shuarsha ni yachin mantamnati tusa suruktatui. Apasha ni uchirín suruktatui. Uchisha aparíncha nukuríncha kajerak, jakati tusa suruktatui. Núnisan untsurí shuar túrawartatui.

13 Nuin̄kia Wíi shuar asakrumin ashí nakitramprartatui. Tura shuar yawetsuk katsuntraṅka uwemprattawai” tímiayi.

14 Nuyá Jesus tímiayi “Shuar juna áujeana nu nekaati. Yúsnan etserin, ni naari Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkiuermesha, ashí Jutía nuṅkanam pujarmena nu, náinnium pisartarum.

15 Jeá yakiiniṅ pujana nu akaiki wariri achiktajtsa, jeen wayashti.

16 Ajanam pujana nusha ni pushirṅin jukitiajtsa waketskishti.

17 Tura ajamtin áiniana nusha, kuírchin umuntsainia nusha, nu tsawantin timiá itiurchatan wáinkiertatui.

18 Tuma asamtai átum pisaarmena nuṅ yumitin ahati tusarum Yus seatarum.

19 Nu tsawantinkia ti wáitsatin átatui. Yama naṅkamtaik Yus nuṅkan najanama nuṅsha, yamaisha ukunmasha timiu wáitsatin penké atsuttawai.

20 Tura Uunt Yus wáitsatin tsawantan ishichik awajsattajai tíchaitkuin̄kia, uwempratin penké atsuinti. Tura ni shuarṅin anaikiamia nuna yáin̄tajtsa wakerak, nu tsawantan ishichik awajsattawai.

21 Nu tsawantaj “júiti Kristu” túramkuin̄kia anturkairap.

22 Kame “Kístuitjai” ántar tuinia nu, tura “Yúsnan etserniuitjai” ántar tuinia nusha wantinkiertatui. Wantinkiar Yus anaikiamu shuárnasha anaṅkatai tusar wakeruiniak, ni kakarmarṅin iniakmainiak aentsti tujintiamun túrartatui.

23 Tura átum aneartarum. Aetak, túruntsain̄ ujakchajrumek’ tímiayi Jesus.

Aents Ajasu tutai tátintri

(Mateu 24.29-35, 42-44; Rúkas 21.25-36)

24 Jesus tuke unuiniak juna tímiayi: “Tura nu wáitsatin naṅkaamasmatai, etsaasha nantusha etsantrashtatui.

25 Yaasha nayaimpinmayaṅ kakekartatui, tura nayaimpiniam kakaram ainia nu mu-chitrrartatui.

26 Nuyasha ashí aents Winia wáitkiartatui. Wi, Aents Ajasuitjiana ju, ti kakaran, ti wincha ajasan, yuraṅminiam winiái wáitkiartatui.

27 Nuṅ nayaimpinmayaṅ suntarun akupkattajai, Wíi shuaran ashí nuṅkanmayan irurarat tusan. Arakaaniyaṅ, nuṅkaaniyaṅ, ashí nuṅka náṅkatkamunmayan Wíi shuaran irurartatui.’

28 ‘Ikiu numi nakumea nu nekaatarum. Ni chin̄kimpriṅ pun̄kak nukeṅ jeakuṅ, “ju nuṅkanam esat jeatemei” táturmek.

29 Núnisrumek Wi tájarmena nu wáinkiuermeka, ni tátintriṅ jeatemei tu nekaattarme.

30 Nekas tájarne, yamaí aents pujuinia nu kajiṅ amuiniatsain̄, ashí Wi tájana nu túrunatniuiti.

31 Nayaimpisha nuṅkasha amuukatniuiti. Tura winia chichampruka amuukashtini-aiti.

32 Tura tsawantcha nekanachminiaiti. Nayaimpinmayaṅ suntarsha nékainiatsui; Wisha Yusa Uchir̄intiati nékatsjai. Aya winia Aparuk nékawai.

33 Atumsha anearum enentáimprarum Yus aujsa pujustarum, tsawant nékachu asarum.’

34 ‘Tura Wikia ju shuarjaiṅ méteketjai. Ju shuarsha jeachat weak, ni jeen ikiuawai. Ikiuak ni shuarṅin wáitrukartí tusa apujas ikiuak ashí shuaran takatrṅin súawai. Tura wáitin wáinniun, “ameja penker wáinkiaata” tímiayi.

35 Wikia nu jeá nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátataj.

36 Nérentin aya aneachmak taa, kanúu tepaiṅ wáitkiaṅ tusarum aneartarum.

37 Wi atumin tájana nu, ashí shuáran tajai, anearum pujustarum” tímiayi Jesus.

14

Jesusan chichaman jurusarmiania nu

(Mateu 26.1-5; Rúkas 22.1-2; Juan 11.45-53)

¹ Jímiarchikí tsawant ajasmiayi paskua tutai námper jeatin. Paskua námpertincha wakapruachu tantan yuatin námpernasha métek najanin ármiayi. Israer-patri uuntrisha, Israer-shuara jintinniurisha Jesusan anañkar achikiar maatai tusar wakeriarmiayi.

² Túrasha “Jista tsawantin túrachmi, aents charaatum ajarain tusar” tiarmiayi.

Nuwa kunkuinian Jesusan ukatramiania nu

(Mateu 26.6-13; Juan 12.1-8)

³ Jesussha Petania péprunam tunamaru Semunka jeen misanam pujan, nuwa tarimiai. Nartu kunkuinian arapástru tutai kaya najanamunam piakun itiamiayi. Nu kunkuin ti kuitiati. Mutí chuchuke kupik Jesusa muuken kunkuinian ukatramiai.

⁴ Tura nuí pujuarmia nu, kajerar tunaiarmiayi “¿Urukamtai ju kunkuinian ántar wasurea?”

⁵ Junasha súrakka, menaintiú sian kuítnium surukminiuyi. Nu kuitcha kuítrinchan súsanaka maak” tiarmiayi. Tusa nuwan kajerkarmiayi.

⁶ Antsu Jesus chicharainiak “Iniaisatarum. ¿Urukamtai au kajerarum? Winia shiir túrutayi, tímiayi.

⁷ Kuítrincha atumjai tuke íruntsuk. Wakerakrumka tuke péñker awajsatniuitrume. Antsu Wikia atumjai tuke pujushtatjai.

⁸ Ju nuwa ashí nii túramnia núnaka umikiai. Wi jákatin jeatsain, iwiansatin kunkuinian shiir ukatrurai.

⁹ Nekas tájarme, ashí nunkanam Yus-Chicham etsernaktatna nuí, ju nuwa túramurisha etsernaktatui, nin kajinmatkiarain tusa” tímiayi.

Jútas Jesusan suruktaj timiania nu

(Mateu 26.14-16; Rúkas 22.3-6)

¹⁰ Nuyá Jútas Iskariúti, Jesusa unuiniamurintiat, Israer-patri uuntrin werimiayi, Jesusan suruktaj tusa.

¹¹ Niisha nuna antukar, warasar “Kuit amastatji” tiarmiayi. Jútassha Jesusan itiurak yúpichuch tsankamkattaj tusa enentáimias wekaimiai.

Jesusjai iruntrar yurumáwarmia nu

(Mateu 26.17-29; Rúkas 22.7-23; Juan 13.21-30; 1 Kurintiunam 11.23-26)

¹² Wakapruachu tantan yuatin jisat nanakama tsawant tsawarmatai, paskua námpertin yúatin murik máatin jeamtai, Jesusa unuiniamurí iniasarmiayi “Paskuatin murikiu yúatin iwiaratai tusar ¿túi wétataj. Tui yurumattam?” tiarmiayi.

¹³ Tutai Niisha jimiará unuiniamurín akatar akupeak “Péprunam wetarum. Nuí áishman yumin jukí wéa wáinkiatarme. Nu áishman nemarsatarum.

¹⁴ Wayana nuí jeá nérenniurí títiarum “Uunt túramui, ¿wisha, unuiniamurjai tui yurumáttaj?”

¹⁵ Nu nérentin, yakí písunam uunt tesamunam ashí iwiamun iniakturmastatrume. Nuí jisat ii najanatin iwiaratarum” tímiayi.

¹⁶ Ni unuiniamurí wear, péprunam jeawar, Jesus timia núnisan wáinkiararmiayi. Tuma ásar paskua námperan iwiararmiayi.

¹⁷ Nuyá kíakui Jesus ni tuse unuiniamuríjiai wayawarmiayi.

¹⁸ Niisha misanam pekaamak, yurumáiniak pujusar, Jesus tímiayi. “Nekas tájarme, chikichík shuar Wijiai yurumna nu, surutkattawai.”

¹⁹ Nujai kúntuts enentáimprarmiayi. Chíkich chíkich Jesusan aniasar “wíashitiaj” tiarmiayi.

²⁰ Jesus tímiayi “Ju misanam tuse irunar yurumprum nu, chikichik surutkattawai. Wijíaj pininnum yurumkan ayak yuana núiti.

²¹ Nekas Wi, Aents Ajasuitjiana ju, jákatniunam wéajai, áarturma áintsanak. Tura áishman súrutna nu ti wáitsattawai. Niisha akiinmainchu ajakuíti” tímiayi.

²² Yurumainiak Jesus Yúsan yuminkias, yurumkan achik, puuk, chicharainiak “Achik-tarum, júsha winia ayashruíti” tímiayi.

²³ Pininasha achik, Yúsan yuminkias, ni unuiniamurin súsarmiayi. Ashí umararmiayi.

²⁴ Umararmatai Jesus tímiayi “Júiti winia numpar, untsurín yáintajtsa puártinia nu. Nujai Yamaram Chichaman Yus najanaiti.

²⁵ Nekas tájarme, uwa yumirí ataksha juí umarchattajai. Tura tsawant jeamtai, ukunmasha, Yus akupeana nuí yamarman umartatjai” tímiayi.

*Pítiur natsantratniua nuna Jesus ujakmiania nu
(Mateu 26.30-35; Rúkas 22.31-34; Juan 13.36-38)*

²⁶ Yus-kantan kantámawar, jíinkiar, Uriwiu náinnium wearmiayi.

²⁷ Nuinkia Jesus nin tíarmiayi “Ju kashi átum natsantrurtatrome. “Murikiu wáinnium máattajai, túramtai murik tsakinmakartatui” tu aarchamukait.

²⁸ Tura ukunam Wi nantakin atumin Kariréanam émtuktiajrume” tímiayi.

²⁹ Tutai Pítiur chicharuk “Ámin ashí natsantramainiakuisha, wikia natsantrashtat-jame” tímiayi.

³⁰ Tutai Jesus tímiayi “Nekas tájame, ju kashi atash jimiará shiniatsain, natsantrurtatme. “Núnaka nékatsjai” menaintiú turuttiatme” tímiayi.

³¹ Tutai Pítiur kakaram chichaak “Ámijíaj métek máantuiniakuisha, núnaka penké tíchattajai” tímiayi. Ashí ni unuiniamurí núnisan tiarmiayi.

*Jesus Jitsemaní ajanam Yúsan áujsamiania nu
(Mateu 26.36-46; Rúkas 22.39-46)*

³² Nuyá Jitsemaní ajanam wearmiayi. Jeawar Jesus ni unuiniamurin tímiayi “Juí pujustarum, Yúsan áujsatasa pujají”.

³³ Pítrun, Jakupuncha, Juánasha jukimiayi. Tura Jesuska ti kuntuts enentáimiar wake mesek nekapsatasa nankammiayi.

³⁴ Tura nin chicharuk “Wi ti kuntuts enentáimjai, tura jakamnia nekapeajai. Juí iimia pujutarum” tímiayi.

³⁵ Jesussha ishichik arantach we, nunká piniakumar tepes Yúsan aujmiayi. “Ju wáitsatin átatna nu, túrutatniuitkuinkia iniaitiusta” tu seamiai.

³⁶ Tuke áujuk tímiayi “Apawá, ashí tujinchaitme. Pininnumia ashí umartinia áantsan ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.”

³⁷ Tura ni unuiniamurin tarin, kanúu tepenan wáinkiamiayi. Pítrun tímiayi “¿Semunka kánamek. Kanutsuk ishichkisha iimia pujustin tujinkiamek?”

³⁸ Anearum Yus áujsataram, tunaanum iniaaraj tusarum. Atumí wakanjin kakarmaitrume, antsu atumí ayashjin kakarmachuitrume” tímiayi.

³⁹ Ataksha we, nuik Yúsan áujsama núnisan áujsamiai.

⁴⁰ Ataksha waketruki, ni unuiniamurin kanúu tepenan tarimiayi. Karí ti pujá asamtai, Jesusan áujsatniun tujinkiarmai.

⁴¹ Jesus ataksha we, tarí tímiayi “Kandarum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai.

⁴² Nantáktiárum, wemí. Iis, Winia súrutna nu nuntumsai” tímiayi Jesus.

*Jesusan achikiarmiania nu**(Mateu 26.47-56; Rúkas 22.47-53; Juan 18.2-11)*

⁴³ Jesus nuna chicháa pujá unuiniamuri Jútas tarimiayi. Nijjaj untsurí aents puniá takaku, tura numincha takaku káutarmiayi. Israer-patri uuntri, Israer-shuara jintinni-uri, tura Israer-shuara úuntri akupkarma asa káutkarmiayi.

⁴⁴ Káuntsain Jútas chicharainiak, “Wi mukunattaj áujkin núiti Jesus. Achiirum, péñker emetarum jukitiarum” tímiayi.

⁴⁵ Tura Jesusan tarí, mukunuk áujas “Uuntá, Uuntá” tímiayi.

⁴⁶ Túramtai aencha Jesusan achikiar emetawarmiayi.

⁴⁷ Túruiniakui nuí wajatusha puniarí úkuitsan, patri uuntri takarniurín awati ni kuishín tsupirkamiayi.

⁴⁸ Túram Jesus áentsun tímiayi “Kasakaitiaj. Puniajai numijjai, kasá nútiksarmek achirkatai tusarum tarutniurme.

⁴⁹ Ashí tsawant atumjai Yusa Uunt Jeen wayan unuiniakun pujuchmakaj. Túmaj nuí achirkachmarme. Tura Yus timia nu uminkiat tusa ju túrunayi.”

⁵⁰ Nuiñkia ni unuiniamuri Niniak ikiuiniak pisararmiayi.

Natsa pisarmiania nu

⁵¹ Tura áishman nátsaach aya tarachin penumas Jesusan atamprimiayi. Tura natsaach suntar achikiam

⁵² tarachrín ajapa ikiuak misú tsékenkimiayi.

*Patri uuntriin Jesusan júkiarmiania nu**(Mateu 26.57-68; Rúkas 22.54-55, 63-71; Juan 18.12-14, 19-24)*

⁵³ Patri uuntriin Jesusan ejeniarmiayi. Nuí Patri uuntriisha, Israer-shuara jintinni-urisha, Israer-shuara uuntriisha irunturarmiayi.

⁵⁴ Tura Pítiur íkian nemarki Patri jeen aach jeá, Patri suntarijjai jinia anamuk pujumiayi.

⁵⁵ Patri uuntri ashí naamka uunt armia nujai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiai.

⁵⁶ Túrasha untsurí shuar Jesusan tsanumpruuniayatan yapajjá yapajjá chichainia ásarmatai wáinkiacharmiai.

⁵⁷ Nuyá chíkich wajakiar wáitruiniak juna tiarmiayi

⁵⁸ “Yusa Uunt Jeen, aents jeamarmia nuna yumpuntiatjai. Túran menaintiú tsawantaj, chikichan, aents jeamchamun jeamtatjai” tau antukmají” tiarmiayi.

⁵⁹ Tura tuke yapajjáwar tiarmiayi.

⁶⁰ Nuísha Patri uuntri ajapén wajaki Jesusan chicharuk “¿Áimsatin penké tujintiamek. Warinia turamainia?” tímiayi.

⁶¹ Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurínkaitiam. Ii Yusri Uunt tajinia nuna Uchirínkaitiam?”

⁶² Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurini pujai wáitkiattarme. Tura nayaimpinmaya yurañminiam winiaí wáitkiattarme” tímiayi.

⁶³ Tutai Patri uuntri kajek, ni pushirín jaak tímiayi “¿Chíkich títincha warí atsumají?”

⁶⁴ Nii tana nujai Yusan kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi.

⁶⁵ Chíkich chíkich Jesusan usukiáwarmiayi. Jiin epetkar awatiar “¿Ya áitkiarma? et-serkata” tiarmiayi. Patri suntarisha yapiniam awatiarmiayi.

*Pítiur Jesusan natsantramiania nu**(Mateu 26.69-75; Rúkas 22.56-62; Juan 18.15-18, 25-29)*

⁶⁶ Núnaka túruiniaj Pítru nuñká, jea aani pujan, nuwa Patri uuntri takarniuriya nu tarimiayi.

⁶⁷ Niisha Pitrun jinia anamu pujan wáinkiamiayi. Wáiniak, “Amesha Nasaretnumia Jesusjai wekaichukaitiam” tímiayi.

⁶⁸ Tutai Pítiur chicharuk, “Nékatsjai. Ame támena nuna nékatsjai” tímiayi. Tura aa wáitiainiam jiinkimiayi. Tumai atash shiniukmiayi.

⁶⁹ Nu núwasha Pitrun ataksha wáiniak, shuáran nuj pujuinian tímiayi “Júiti ni shuari.”

⁷⁰ Tura ataksha “atsá” tímiayi.

Ishichik árusañ, shuar nuj pujuarmia nu ataksha Pitrun chicharuk “Nekas ni shuar-inme. Kariréanmayá shuárchakaitiam. Auyá shuara nuní chichaame” tiarmiayi.

⁷¹ Tutai Pítrusha kakantar chichaak, “Ju áishmanaka átum tárugna núnaka nékatsjai. Wáitrakuinkia Yus írsati” tímiayi.

⁷² Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsajñ, ame, núnaka nékatsjai, menaintiu turuttiatme” tíchamka. Pítru nuna enentáimias ti útmiayi.

15*Jesusan Piratú ejeniarmiania nu**(Mateu 27.1-2, 11-14; Rúkas 23.1-5; Juan 18.28-38)*

¹ Tura kashin káshik Patri uuntri, Israer-shuara úuntriññaj, Israer-shuara jintinni-urijñaj, ashí naamka armia nujaj irunturar, chichaman jurusarmiayi. Túrawar Jesusan jinkiamun apach kapitián Piratujñ ejeniarmiayi.

² Ejeniarматаi Piratu aniasmiayi “¿Amesha Israer-shuara Uuntrinñaitiam?”

Tutai Jesussha “Amek tame” tímiayi.

³ Nuyá Patri uuntri ti tsanumprurarmiayi.

⁴ Ataksha Piratu aniasmiayi “¿Áimsatin penké tujintiamek? Ti untsurí etserturmaini-atsuk.”

⁵ Tura Jesus nunasha áikchamiayi. Túmakui Piratu ti enentáimpramiayi.

*Jesusan, mantamnati, tíarmiania nu**(Mateu 27.15-31; Rúkas 23.13-25; Juan 18.38-19.16)*

⁶⁻⁷ Shuar ámiayi, ni naari Parapás. Niisha ni shuariññaj meset ámanum, shuara maa asamtai sepunam enkeamuyayi. Tura námper tsawantaj Piratu sepunmayá chikichík shuarnak jñiki akupniuyayi, aents seawarmia nuna.

⁸ Nuisha untsurí shuar Piratun káutkar tiarmiayi “Ame ju námper tin tuke túramna nu túratá.”

⁹⁻¹⁰ Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurñ jñiki akupkattajak? ¿Nu waker-armek?” tímiayi.

¹¹ Tutai Patri uuntri áentsun chichainiak ““Antsu Parapás jñikim akúpkatá” titiarum” tiarmiayi.

¹² Tutai Parapásan seawarmatai Piratu ataksha chicharainiak “Jesusnasha, átum ii akupniurñ tarugna nuna, ¿itiurkattaja?” tímiayi.

¹³ Ataksha ni kakantar tiarmiayi “Krúsnum mantamnati.”

¹⁴ Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tíarmiayi “Krúsnum mantamnati.”

¹⁵ Tuma asamtai, aents shiir enentáimprartí tusa, Piratu tunáa shuaran, Parapásan jiiiki akupkamiayi. Tura Jesusnasha katsumkarum krusnum ajintrurtarum tusa suntaran tsan̄katkamiayi.

¹⁶ Tiniu asamtai suntar Jesusan jukiari, kapitiáni jeen awayawarmiayi. Nu jea naari Piritiúriiiti. Túrawar untsurí suntaran untsukarmiayi.

¹⁷ Ashí káunkar, pushin kapaanniun Jesusan áentsrarmiayi. Tawasap jan̄ki najanamun etsenkrumtikiarmiayi.

¹⁸ Nuisha Jesusan áujсар “Shíraitme, Jesusá, Israer-shuara akupniuriya” wishikiainiak tiarmiayi.

¹⁹ Muuknumsha sapapjai awatiarmiayi; nuyá usukiawarmiayi, túrawar ántar tikish-matrarmiayi.

²⁰ Tura Jesusan wishikrar amukar, kapaant̄in pushin áitkiar, ni pushir̄in áentsrarmiayi. Túrawar krúsnum ajintrurtai tusar jiiikiarmiayi.

Jesusa jakamuri

(Mateu 27.32-44; Rúkas 23.26-43; Juan 19.17-27)

²¹ Semun̄ Serini núñkanmaya shuárauyayi. Arijantruncha, Rupuncha aparíyayi. Semun̄kan takatnumiá winian suntar emetawarmiayi, Jesusa krusr̄in yanaki jukiti tusar.

²² Jesusnasha Kúrkuta náinnium júkiarmiayi. Kúrkuta, shuar chichamjain̄kia, muuka ukunch naint, tutainti.

²³ Jeawarmatai, karía, mira kun̄kuinjai pachimprar áartaj tusa susarmiayi Jesusan. Túrasha umarchamiayi.

²⁴⁻²⁵ Nantu yakí jatemsamtaí krúsnum ayapar ajintrurar ikiusarmiayi. Túrawar suntar yakí jukit tusar nakurutaijjai nakurusar Jesusa pushir̄in yaruakarmiayi.

²⁶ Urukamtaí máamuit, ashí aents nuna nekaawarat tusa, ni krús̄r̄in ju aarmauyayi: **ISRAER SHUARA AKUPNIURI**

²⁷ Nu náinnium jimiará kasa shuaran Niijjai máawarmiayi. Chikichik Jesusa untsur̄in̄i krúsnum, chikichik ni menar̄in̄i krúsnum máawarmiayi.

²⁸ Yus-Papinium aarma ana nujai uminkiauyayi. Nui “tunáa shuarjai nekapmar-mauyayi” tu áarmaiti.

²⁹ Shuar nan̄kaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt Jeen yumpun̄tiatjai, tura menaintiú tsawantaj ataksha jeamkattajai” tíchakaitiam, tiarmiayi.

³⁰ Amek krúsnumiá akaikim uwemprata.”

³¹ Núnisan Patri uuntrisha, Israer-shuara jintinniurisha Jesusan wishikrar chichar-naisarmiayi “Chikichan uwemtikraitiat, Niñki uwempratniun tujintiawai.

³² Yusa anaikiamur̄i Krístuashit, ii akupniur̄iniashit, tiarmiayi. Wats, yamáí krúsnumiá akáikití, iisha nu ísar Yus-shuar ajastai” wishikiainiak ántar nuna tiarmiayi. Jesusjai krúsnum ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

³³ Tutupin jeamtaí ti kiritin ajasmiayi ashí nun̄kanam. Tura, nantu nun̄kaach ajasmataí ataksha tsaapnirmiayi.

³⁴ Nuiñ Jesus kakantar untsukum tímiayi “Iruí, Iruí, rama sapaktani.” Nuka shuar chichamjain̄kia, “Yusrú, Yusrú, ¿urukamtaí ajapa ikiurkiniam?” tawai.

³⁵ Shuar nui pujuarmia nu, nu chichaman nékachu ásar, nuna antukar “Eríasan untsúawai” tíarmiayi.

³⁶ Chikichik shuar churuinian uruchjai ajamper, sapapjai ijiú mukunati tusa susamiayi. Tura tímiayi “Wajastarum, Erías Nin jukitiaj tusa winishtimpiash. Iistai” tímiayi.

³⁷ Nuiñkia Jesus kakaram untsamak jakamiayi.

³⁸ Túramtai Yusa Uunt Jēen ejamu nin̄ki jaan̄akmiayi, yakíya nun̄ká.

³⁹ Suntara kapitián̄trisha Jesusan ayamtus wajamia nu, Jesus kakaram untsumak jaamun iis tímiayi “Nuka ti nekas Yusa Uchir̄iyayi.”

⁴⁰ Nuwasha arant ii pujuarmiayi. Nu nuwajai Máktara péprunmaya Marí, chíkich Marisha, Sarumáisha pujuarmiayi. Chíkich Marisha uchich Jakupuncha Jusenchá nukur̄iyayi.

⁴¹ Nu núwaka, Kariréa nun̄kanam Jesus wekaimia nūi, Nin nemarsar yáin̄tatsar wekasarmiayi. Untsurí chíkich nuwasha Jesus̄jai Jerusarén̄num wear, nu nuwajai arant ii pujuarmiayi.

Jesusan iwiarsarmiania nu

(Mateu 27.57-61; Rúkas 23.50-56; Juan̄ 19.38-42)

⁴² Kiatemamtai, ayampratin tsawant jeatsain̄, námper iwiaratin tsawant asamtai,

⁴³ Arimiatianmaya Jusé arantutsuk, kakaram ajas, Piratuí jeá Jesusa ayash̄in seatajtsa utuamiayi. Nu Jusenchá ashí irunin ainia nu anturin ármiayi. Niisha Yus̄ ju nun̄kanam akupin ajasat tusa nákasmiayi.

⁴⁴ Tura Jesusa ayash̄in seam, Piratusha “wárik jaka” tímiayi. Tuma asa suntara kapitián̄trin̄ untsurak “¿Nekas jakayik?” tímiayi.

⁴⁵ Tutai kapitián̄ “Ee” takui, Jesusa ayash̄in Jusén tsan̄katkamiayi.

⁴⁶ Jusesha puju tarachin pén̄keran sumarak, Jesusa ayash̄in itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi.

⁴⁷ Tura Máktaranmaya Marí, Jusé nukur̄i Marij̄jai ni ikiumun ii wajarmiayi.

16

Jesus nantakmiania nu

(Mateu 28.1-10; Rúkas 24.1-12; Juan̄ 20.1-10)

¹ Tura ayampratin tsawant nan̄kaasmatai, Máktaranmaya Marisha, Jakupu nukur̄i Marisha, Sarumáisha, kun̄kuinian Jesusa ayash̄in kuertai tusar sumakarmiayi.

² Tura kashin Tumiñtin, ti káshik, nantu yáma j̄iniiai, iwiarsamunam jeariarmiayi.

³ Wésar chichainiak “Iwiarsamu wáitir̄i kayancha ¿yaki akan̄ketramkattaj?” tiarmiayi.

⁴ Jear uunt kaya akan̄kekman wáinkiar̄miayi.

⁵ Iwiarsamunam wayawar, natsan esaram puju pushin entsar, untsuurnumaan̄i pujan wáinkiar̄ ti ashamkarmiayi.

⁶ Túmainiakui natsa tímiayi “Ashamkairap. Nasarénumiá Jesus krúsnum jakama nu éarme. Iniantkimiuiti. Juī pujatsui. Wátsek, jū ikiusmanum íistarum.

⁷ Túrarum werum Pítrusha, chíkich unuiniamur̄isha jū ujaktarum. Kariréanam atumin émkiyi. Turammarumna núnisañ túruna wáinkiatarme” tímiayi.

⁸ Niisha ti ashamainiak purushniarar iwiarsamunmaya tseke wearmiayi. Ti ashamainia ásar, chikichkinkesha ujakcharm̄iayi.

Máktaranmaya Marin Jesus wantintiúkiania nu

(Juan̄ 20.11-18)

⁹ Émkaka Tumiñtin ti káshik Jesus nantaki, Máktaranmaya Marin wantintiúkmiayi. Nu Maríá enentáiyá siati iwianchin̄ Jesus yaunchu ajapruyayi.

¹⁰⁻¹¹ Marisha Jesusa nemarīi kúntuts uutu matsatainian werí, “Jesus iwiaakui, imia wi wainkijai” tímiayi. Támaitiat anturkacharmiayi.

Jesus jimiará shuaran wantintiúkiania nu

(Rúkas 24.13-35)

¹² Tura urum jimiaara shuar Jerusarén̄numiá tsaniñ weenan, Jesus nusháa iira ajas tarimiayi.

¹³ Niisha Jesusan wáinkiar waketkiar, unuiniamur_{in} ujakarmiayi, tura ni chicham_{en}cha anturkacharmiayi.

Jesus ni unuiniamur_{in} akupkarmiania nu
(Mateu 28.16-20; Rúkas 24.36-49; Juan 20.19-23)

¹⁴ Nuyasha Jesusa auntse unuiniamur_i misanam pekaamkar pujuinian Jesus tarimiayi. “¿Atumí enentá_i urukamtai kátsuram ainia, urukamtai Winia nekas enentáimtursachuram?” tímiayi. Ni nantakmiar_{in} wáinkiaru chicham_{en} anturkacharu ásarmatai kakantramiayi.

¹⁵ Nuyá chichaak “Ashí nun_{kan}am wetarum. Túrarum ashí shuarnum Yusa shiir chicham_e etserkatarum.

¹⁶ Shuar anturak imiani uwemprartatui. Shuar antukcharka, tuke sumamawartatui.

¹⁷ Shuar winia náarun pachis, Yúsan nekas enentáimtakka, juna túrawartatui, Yusa kakarmar_{in} iniakmastaj tusa: iwianchin j_iiki akupkartatui; chíkich chicham_{jai} chichasarukamtai Winia nekas enentáimturtatui;

¹⁸ napincha achiksha, tseasnasha úmaksha, jaa ajaschartatui. Jaa shuaran ni uweje_{jai} anti_n, nu shuaran pé_nker awajsartatui.” Tu tímiayi.

Jesus nayaimpiniam wakamiania nu
(Rúkas 24.50-53)

¹⁹ Jesus chichas amukmatai, Yus nayaimpiniam jukimiayi. Túruna Yusa untsuur_{in}i pujusmiayi.

²⁰ Ni unuiniamur_{isha} jíinkiar, ashí nun_{kan}am Yus-Chichaman etserkarmiayi. Tura Uunt Yus nin yáin_{mi}ayi. Tura etserainiakui, ashí aents ni kakarmar_{in} nekaawarat tusa, aentsti tujintiamun túratniun susamiayi. Nuke atí.

Yúsán Shiir Chichamen

RÚKAS aarmia nu

¹ Nekas iiní Jesus túramia nuna “ímiatrusan áartajai” untsurí aents tiarmiayi.

² Yámankamtaikniumiān ísarmia nú shuar, tura Yus-Chichaman etserkatniun yáinkiarmlia nusha in unuítiamprarmia nútiksaran áartinian wakeriarmiayi.

³ Wisha núnisnak esetsaran enentáimsan, yámankamtaikniumiā nuna nekaamjai. Tuma asan túrunamia nuna ímiatrusnak amincha áatratajtsan wakerimjiame, winia úuntur Tiupiru.

⁴ Jintintramawarma nú nankaamas nekaata tusan wakerakun áatjame.

Imiakratin Juan̄ka akiiniatniur̄in ujakmliania nu

⁵ Jutía nunkanam uunt akupin Erutis akupkamia nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeauyayi. Ni nuwēsha Irisapít Arun weeauyayi. Irisapítia úntr̄isha Israer-shuar Yúsnan pujurin ármiai.

⁶ Yúsjaisha Sakaríassha Irisapítcha mái-metek pen̄ker ármiai. Yus akupkamia nunasha umirin ármiai. Tuma asamtai pen̄kesha chíkich nin yajauch chicharkatin atsuarmiayi.

⁷ Yusjai pen̄ker wekainiayat Irisapít júrechuyayi. Túrasha mai úuntach ármiai.

⁸⁻⁹ Israer-shuar Yúsnan pujurin chíkich weeanmāyā nuyá chíkich weenam, an̄kant an̄kant Yusa jeen takáu ármiai. Chíkich tsawant, Sakarías weeá takastin amia nu, Sakaríaska kun̄kuinian ekeemaktaj tusa init wayatniuyayi.

¹⁰ Init kun̄kuinian ekeemai untsurí aents aani matsamsar Yúsán áujtak pujuarmiayi.

¹¹ Sakarías init pujai kun̄kuin ekeematainiam untsurnumaani aya aneachma nayaimpinmāyā suntar wajamiayi.

¹² Nuna wajan wáiniak Sakaríaska purushnairmiayi.

¹³ Túrasha nayaimpinmāyā suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan̄” anaikiata.

¹⁴⁻¹⁵ Ame uchiram akiiniattana nuka Yusjaisha nankaamantu átatui. Tuma asamtai akiiniamtai, amēsha shiir enentáimsam warastatme. Tura chíkich aents untsurí warasartatui. Ame uchirmēsha karía ainia nuna umarchattawai. Tura áetak akiinchanak Yusa Wakan̄i pimiutkattawai, tímiayi.

¹⁶ Tura ni shuar̄in Israer-shuar áiniana nuna, ii Uuntri Yusjai ataksha nawamtikiartatui.

¹⁷ Uunt Yúsaiyā akatramu átatui. Yaunchu Yúsnan etserin Erías kakaram etserkamia núnisān niisha etserkattawai. Nujai shuaran ni uchir̄ij̄jai nawamtikiartatui. Tura umichu áinia nuna eseer enentáimtikrartatui. Ni Uuntri taakui ni enentái iwiaramu arti tusa etserkattawai” tímiayi nayaimpinmāyā suntar.

¹⁸ Nuna takui Sakarías nayaimpinmāyā suntaran tímiayi “¿Nunasha warij̄j̄ain̄ paant nekaataj? Wisha nuar̄jai mái-metek ti úuntchichukaitaj” tímiayi.

¹⁹ Tutai nayaimpinmāyā suntar tímiayi “Wikia Kapriiraitjai, Yusa suntar̄intjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi.

²⁰ Túrasha wi tájamna nu “nekasaiti” tu enentáimprachume. Tura asam uchiram akiintsain̄ muut ajastatme. Chichastin pen̄ké tujinkiatame. Tura wi tajana nu, tsawant jeamtai túrunattawai.”

²¹ Nuna tumai Yusa jeen aani pujusar, Sakaríasan nákas pujuarmiayi. “¿Urukamtaik init we imiá men̄kaka?” tu enentáimprarmiai.

22 Nuyá Sakarías jiinkimtai, áujsartaj tukamá tujinkiarmiayi. Sakaríaska, muut ajasu asa, aya úwijmiasañ chichamiayi. Túmakui, Sakarías init pujus Yúsaj wáimiakun nekaawarmiayi.

23 Yusa jeen takastin tsawantri amuukamtai Sakaríaska ni jeen waketkimiayi.

24 Nuyá ukunam ni nuari Irisapít ajaprukmiayi. Tura senku nantutin aya jeen pujusmiayi.

25 Jeá pujus, “Aents wishikruuniakui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

Jesusa akiiniatniurin nayaimpinmaya suntar etserkamiania nu

26 Nu senku nantu nankaasmatai Yus ni suntarin Kapriiran Nasarét péprunam akupkamiayi. Nu pepru Kariréa nunkanam pujawai.

27 Nasarénumia nuwan, naari Marí, iyutí tusa akuptukmiayi. Nu núwaka áishmanjai pujuchuyayi. Niisha Jusejai nuatnaikiatsa anajmanair pujumiayi. Juseka uunt Tawit weeauyayi.

28 Wats, nayaimpinmaya suntar Marí pujamunam wayá tímiayi “Yus pénger enentáimturma asamtai, ámin winitjiame, Mariya. Yuska ámin nemartamuk ashí nuwa nankaamas pénger awajtamui” tímiayi.

29 Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi.

30 Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai.

31 Antukta. Amesha ajapruktatme. Túram Uchi takustatme. Nusha “Jesus” anaikiata.

32-33 Niisha uunt átatui. Nincha “Uunt Nankaamaku Yusa Uchiri” tiartatui. Tura Uunt Yuska yaunchu Tawitian uunt akupniuri awajsamia núnisan ame Uchirmin ame shuárumin Israer tutain Uunt akupin awajsattawai. Ni akupeamurisha Yus susamu asa penké amuukashtiniaiti” tímiayi.

34 Nayaimpinmaya suntar nuna tutai Marí tímiayi “Nusha winia áishur atsaisha, ¿itiurak túrunataj?”

35 Tutai nayaimpinmaya suntar Marín tímiayi “Yusa Wakaní tarutramtatui. Tura yuramnia núnisan Uunt Yusa kakarmari ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirinti” tiartatui, tímiayi.

36 Tura Irisapít ame kaná kaimia nusha núnisan weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin.

37 Yúsjainkia itiurchatka penké atsawai” tímiayi.

38 Tutai Marí tímiayi “Yus wakeramun túriniatjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntarka wémiayi.

Irisapítian Marí iyumiania nu

39-40 Nu tsawant Marí wárikmas muranam Jutía nunkanam ni kaná kajin Irisapítian iyutaj tusa wémiayi. Sakaríasaj jeá, ni jeen wayá, Irisapítian áujsamiayi.

41 Marí áujeamun antukmatai Irisapítia ampujén uchiri muchitkamiayi. Tumaj Yusa Wakaní ni enentáin pimiutkamiayi.

42 Nuiñkia kakantar chichaak Marin tímiayi “Yus amincha ti shiir awajtamsaiti. Tura Uchiram akiiniattana nusha Yus shiir awajsamuiti.

43 Kajirua, ame winia Uuntru nukurí áminin, Yus winia ti waitnentra asa, áujsata tusa ámin akuptamkachaik, tímiayi.

44 Warí, wisha ame áujtamna nuna ántakui ampujruj uchi waras muchitrukayi.

45 Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

46 Nuna tinia iniaisamtai Marí juna tímiayi:

“Wikia tuke enentairjai “Yus timiá úuntaiti” tajai.

⁴⁷ Tura Uunt Yuska winia Uwemtikruru asamtai ti waraajai.

⁴⁸⁻⁴⁹ Wisha péejchach aijn ni wakeramurjn umiktajtsan wakerakui winia enentáimturayi. Tuma asamtai ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajsaiti” turutiartatui. Núnaka yamá nankamamunak tuke turutú ajartatui.

⁵⁰ Tura Nin umirkatniun wakerana nunasha Yus tuke waitnentrartatui.

⁵¹ Ti iturchatan páchitsuk túraití Nii. “Nan̄kaamantuitjai” tu enentáimtumainia nuna nupetkaiti.

⁵² Ashí akupin ainia nuna awakkaruiti. Tura íksan̄ péejchach ainia nuna uunt awa-
jsaruiti.

⁵³ Péñker ana nuna kitiamainiakui Yus péñkeran súsaruiti. Tura antsu “ashí takakjai” tuinia nuna aya júnik awajsaruiti.

⁵⁴ Israer-shuar Niiniu ájinia núnaka waitnentratniun kajinmattsuk yáinmákuítji.

⁵⁵ Yaunchu ii Uuntri Aprááman tura ní shuarnasha “túrattajai” timia nuna ímiatrusan̄ tuke túraití.” Nuní tímiayi Marí.

⁵⁶ Marikia Irisapítjai menaintiú nantu pujus ni jeen waketkimiayi.

Imiakratin Juan̄ka akiiniamuri

⁵⁷ Nuyasha ni jurertin tsawantri jeamtaí Irisapítcha uchin áishman̄kan takusmiayi.

⁵⁸ Tura ni shuarisha, ni írutramurisha “Irisapítian Yus ti shiir yáinmiayi” tuñiak, nin iyuwearmiayi. Tura máí-metek warasarmiayi.

⁵⁹ Israer-shuar túrutai júnisaiti: uchi akiiniamuri uchu tsawant jeamtaí, shunichiri nuapen tsupiktin awai, sirkunsisiún tutai. Yus nuna tú tiniu asamtai tuke túrin ármiai. Wats, Irisapítia uchiri akiiniamuriniá uchu tsawant jeamtaí tsupirkatai tusar ni jeen jearmiayi. Nuñkia ni aparí naari Sakarías anaikiataitsar wakeriarmiayi.

⁶⁰ Tura ni nukurí tímiayi “Atsá. Antsu ni naari Juan̄ átatui.”

⁶¹ Tutai tiarmiayi “¿Nusha urukamtia? Amée shuarumsha nu náartincha áwak’ tiarmi-
ayi.

⁶² Nuñkia uchi aparín “¿Warí anaikiatajtsam wakeram?” tusar aya úwejejain̄ ini-
asarmiayi.

⁶³ Tutai uchi aparísha “Nakash surusta; áartaj tusan wakerajai” tusa aya úwejejain̄ iniakmamiayi. Takui nakash susam, ni naari Juán̄kaiti, tu áarmiayi. Nuna wáinkiar “Ayawa urukakun̄ ta” tu enentáimprarmiayi.

⁶⁴ Nú chichamaik Sakarías chichatsuk pujamun chichakmiayi. Tura nuñ Yusa náarin̄cha shiir awajsamiayi.

⁶⁵ Nuñkia ni írutramurisha ashamkarmiayi; tura ashí Jutía nuñka murá amia nuñ nu túrunamun ujakam ashí nekaawarmiayi.

⁶⁶ Nu túrunamun antukar ti enentáimsarmiayi. Tura “ju uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiayi.

Sakarías Yus jintintiam tímiania nu

⁶⁷ Uchi aparí Sakarías, Yusa Wakaní pimiutkam tura Yus jintintiam, juna tímiayi:

⁶⁸ “Israer-shuartí ii Yusri naari shiir awajsatniuitji. Ii Yúsrisha tarutmaitji. Tura uwemtikrampraitji.

⁶⁹ Yaunchu ii uuntri Tawit Yusa wakeramurijjai uunt akupin áchamkia. Tura ni ukurjn ti kakaram Uwemtikiartinian suramsaitji.

⁷⁰⁻⁷² Yuska ii nemasriya tura in nakitramainiajnia nuyá uwemtikrampratniun enentáimsamia nuna, yaunchu ni etserniurjn péñker armia nuna ujakmiayi. “Winia ti penker chichamprun tájana nuna yapajitsuk umirkan tuke wáitnentratajrume” yaunchu

ii úuntriñ tímiania nunasha ni etserniurin ujakarmiayi. Yaunchu nu ujakma yamá iisha wainji.

⁷³⁻⁷⁵ Nu ujakman Yuska yámankamtaik imiá yaunchu ii uuntri Apráaman tíchamkia. Apráaman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriya uwemtikrattajai. Sapijmiatsuk winia tuke takartusarat tusan túrattajai” Yus tímiayi Apráaman. Iisha ni shuari asakrin, nuna taku incha túramaji.

⁷⁶ Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Uuntaj émkim wétatme.

⁷⁷ Ni shuari, ni tunaari tsan̄kurnar uwemprarat tusam túrattame.

⁷⁸⁻⁷⁹ Yuska ashí shuaran anea asa, incha wáitnentrak ni pujamunmaya ni tsáapnintrin suramsaitji. Ni enentáin kiritniunam wekainia nuna, mesertinnium jeatemá ásarmatai, ni tsáapnintrí jeat' tusa túraiti. Tura ashí incha ii enentáin imiatkinchanum wekasarmí tusa túraiti.” Nuní tímiayi Sakarías.

⁸⁰ Uchisha tsakarmiayi. Tura Yúsan nekaki-nekaki wémiayi. Israer shuarum et-serkatin tsawantri jeatsain̄kia atsamunam pujuyayi.

2

Jesusa akiiniamuri (Mateu 1.18-25)

¹ Wats, Juan akiiniamia nú uwitin uunt akupin Akustu ashí nun̄kanam áentsun nekapmarartí tu chichakmiayi.

² Nu nekapmartinian yaunchu túrushtain yamá túriarmiayi. Siria nun̄kanam Seriniu akupin pujái túrawarmiayi.

³ Ni naari áartaj tusa ashí shuar ni nun̄kenin̄ wétin ármiai.

⁴ Tuma asamtai Jusé Nasarét péprunmaya Kariréa nun̄kanam amia nuyá jiinki Pirin péprunam Jutía nun̄kanam amia nuí wémiayi. Juseka Tawit weenam akiinia asa, ni nekas nun̄kenka Pirin̄kauyayi.

⁵ Nu asamtai, ni náarin áartaj tusa Jusé wémiayi Marijiaj. Marisha Jusé núweyayi. Tura tsanin̄charuyayi. Túmaitat Marisha Yusa Wakaní kakarmarijiaj ajamtiniuyayi.

⁶ Tura nuí Pirin̄num pujuiniaj Marí takustintri jeamiayi.

⁷ Nuí iwiair̄in uchin áishman̄kan takusmiayi. Tura uchi penutaijiaj penuar, waaka yurumtainiam áepsamiayi. Írar kanutainiam pujustin an̄kant atsá asamtai túrawarmiayi.

Murikiun wáinniun nayaimpinmaya suntar Yus akatar akuptukmia nu

⁸ Tura Pirin̄num tíjiuch murikiun wáinin kashi murikrin̄ wáiniuk pujuarmiayi.

⁹ Túmainiaj nayaimpinmaya suntar murikiun wáinin matsatainian wantintiukmiayi. Tura Yúsnumia tsáapnin ni matsatainiamunam etsantramiayi. Túrunamtai murikiun wáinniuka ti ashamkarmiayi.

¹⁰ Túrasha nayaimpinmaya suntar tímiayi “Ashamprukairap. Ashí áentsnum ti warastin atí tusan ti pen̄ker chichaman itiarjiarme.

¹¹ Júiti: yamá tsawantaj uunt Tawitia péprur̄in Pirin̄num yaunchu Yus anaikiamu KRISTU tutai, uwemtikramprataj tusa akiinturmarme. Nu Uchisha ashí áentsun akupniuiti, tímiayi.

¹² Tura jujaj nekaattarme: uchi penutaijiaj penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.”

¹³ Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

¹⁴ “Nayaimpinmasha Yus nan̄kaamantuiti tu enentáimtusarti. Tura ju nun̄kanmasha Yusjaj nawamnaikiaru ainia nu imiatkinchanum pujusarti.” Tu tiarmiayi.

15 Tura Yusa suntari nayaimpiniam waketkiarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

16 Nuna tiar wárik wearmiayi. Tura Marincha Jusenchá wáinkiar miayi. Tura uchinchá waaka yurumtainiam tepan wáinkiar miayi.

17 Wear nuna wáinkiar, nayaimpinmaya suntar uchi túrunamurin timia nuna et-serkarmiayi.

18 Tura murikiun wáinin tiarmia nuna antukaruka ti enentáimtusarmiayi.

19 Túrasha Marikia ashí túrunamia nuna ni enentáijiainkia enentáimtu pujumiayi.

20 Tura murikiun wáinniuka antukarmia nuna enentáimtusar, tura íisarmia nunasha enentáimtusar “Nayaimpinmaya suntar ujatmakmajnia tímatrusan túrunayi” tiarmiayi. Tuma ásar Yusa náarin shiir awájsar kantampruawar waketkiarmiayi.

Uchin Jesusan Yusa Uunt Jeen itiarmania nu

21 Tura uchi akiiniamu uchu tsawant jeamtai, ni túrutairin túrin ásar, ni shunichiri nuapen tsupirkarmiayi. Túrawar Marí ajapratsain nayaimpinmaya suntar tímia nútiksan “Jesus” anaikiarmiayi.

22 Tura Muisais akiiniatniunam akupkamia núnisan, tsawantri jeamtai, Yusa Uunt Jeen Jerusarénum uchin Yus iiktustai tusar júkiarmiayi.

23 Kame Yus-Papinium ju aarma awai:

“Ashí uchi iwiairi áishman akiinkiuŋka Yusna átatui.”

24 Tuma asamtai, Marí Yusa Uunt Jeen wáitsuk pujamu wayatniuri jeamtai, uchin Yus iistí tusa Yusa Uunt Jeen Jerusarénum pujana nu itiar miayi. Tura yampitsan jímiaran súsarmiayi. Muisáis akupkamun umiiniak nuna túrawarmiayi.

25 Nu túmai Semeún naartin áishman Jerusarénum pujumiayi. Semeúnsha Yusa Wakaní pujurma asa péŋker áishman kauyayi. Yusan nekas enentáimtiniuyayi. Yusa anaikiamurijiai Israer-shuar ankant ajastin jeati tusa nákauyayi.

26 “Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi.

27 Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantai Muisáis tímia núnisan umirkatai tusar Marisha Jusesha uchin Jesusan Yusa Uunt Jeen itiar miayi.

28 Itiariarmatai Semeún uchin jusa miniakas Yusan áujuk ju na tímiayi:

29 “Yamaikia, Uunta, Amiin wi jeatin ankant atí. Turutmiamna nu ímiatrusmek umiki-ume.

30-31 Ju Uchi ashí aents uwentikrartá tusam susamna nuna yamá imia winia jiiurujai wáinkiajai.

32 Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájina nuna ashí aents shiir enentáimtikrartí tusam ju Uchi akuptukmaiti. Nuna wáinkian shiir enentáimsan jákatniuitjai.”

33 Tura Semeún Uchiniun tu chicharkui Jusesha Jesusa nukurísha ti enentáimprarmiayi.

34 Semeúnsha chichaak “Yus shiir enentáimturmasartí” nin tímiayi. Nuyasha Marin chicharuk tímiayi “Nekaata. Ju Uchin Israer-shuartisha untsurí nakitrar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarin ti paant iniakmastatui. Tuma ain untsurí Aun yajauch chichariartatui.

35 Nujai shuar ni enentáin warinia enentáimia nu, paant átatui. Maaj, ashí nu túmakui, ijjiumua núnismek ame enentáimin ti wáitsattame, Mariya.” Tu chichasmiayi Semeún.

36 Nuwasha Ana naartin nu Yusa Uunt Jeen pujumiayi. Niisha Yusan etserniuyayi. Ni aparísha Panuíruyayi tura Aser shuarauyayi nu nuwá. Niisha ti úntchiyayi. Niisha yama nuatnaikiamujai siati uwi ni áishrijiai tsanin pujusarmiayi.

³⁷ Tura wajemamiayi. Tura uchenta kuartru uwi takakuyayi. Tura nin³⁷kia Yusa Uunt Jeen³⁷ia jíintsuk káshisha tsawaisha tuke Yúsan áujniuyayi. Tura yurumtsuk Yúsan áujniuyayi.

³⁸ Semeú³⁸n tuasua amikmatai Anasha taa, Uchin wáiniak Yúsan yuminsamiayi. Tura Jerusaré³⁸num Yus uwemtikrampratai tusa ná³⁸karmia nuna áujkun³⁸ka uchin áujmat wé³⁸miayi.

Nasaré³⁹num waketkiarmiania nu

³⁹ Nuyá Yus tímia nuna ashí tú³⁹rawar amikiar Kariré³⁹a nun³⁹kanam, kame nii pujumia nú peprunam Nasaré³⁹num Jusesha Marisha Uchisha waketkiarmiayi.

⁴⁰ Uchi Jesus tsakaki, kakaram ajaki tura nú nan⁴⁰kaamas nekaki wé⁴⁰miayi. Tura Yus Nin ti shiir awajsamiayi.

Jesus Yusa Uunt Jeen túrunamuri

⁴¹ Jusesha, Jesusa nukur⁴¹isha tuke uwitin paskua nám⁴¹per jeakui Jerusaré⁴¹num weu ár⁴¹miayi.

⁴² Ni tú⁴²rutairi tú⁴²ruiniak, Jerusaré⁴²num weak Jesusan tuse uwi jeam⁴²tai jú⁴²kiarmiayi.

⁴³ Nám⁴³per amuukam⁴³tai ni nukur⁴³isha Jusesha né⁴³kachmanum Jesuska Jerusaré⁴³num juák⁴³miayi.

⁴⁴ Marisha Jusesha “wí⁴⁴ shuarj⁴⁴ai winiawai” tusa, nú⁴⁴naka e⁴⁴atsuk chikichík tsawant wekasarmiayi. Nuyá wá⁴⁴inkiat⁴⁴aj tukamá⁴⁴, ni shuar⁴⁴iin tura ni né⁴⁴kamunam e⁴⁴akarsha,

⁴⁵ wá⁴⁵inkiacharm⁴⁵iai. Nuin⁴⁵kia Jerusaré⁴⁵num ataksha waketrukiarmiayi, e⁴⁵ak⁴⁵tai tusar.

⁴⁶ Tura menaintiú⁴⁶ tsawant e⁴⁶akar Yusa Uunt Jeen Yus akupkamun jintinnian anturak anintrú⁴⁶ pujan wá⁴⁶inkiar⁴⁶miayi.

⁴⁷ Tura nu⁴⁷ ashí Jesusan anturkarmiania nu, niisha ti né⁴⁷kakui tura áim⁴⁷tanash ti pé⁴⁷nker áim⁴⁷kiui, ti enentáim⁴⁷turarmiayi.

⁴⁸ Ni apar⁴⁸isha nukur⁴⁸isha tumá⁴⁸a pujan wá⁴⁸inkiar, ti enentáim⁴⁸prarmiayi. Tura ni nukur⁴⁸ chichaak tí⁴⁸miayi “Uchiru, ¿ausha urukam⁴⁸tai itiurchat enentáim⁴⁸tikrurmam? Ame apasha wisha urukayik tusar ti e⁴⁸ak⁴⁸jame” tí⁴⁸miayi.

⁴⁹ Tutai Jesus tí⁴⁹miayi “¿Urukam⁴⁹tai e⁴⁹atrum? Winia Aparnan tú⁴⁹ratniuitjiana nuka né⁴⁹katsrumek” tí⁴⁹miayi.

⁵⁰ Tura timia nú⁵⁰naka pen⁵⁰ké nekaacharmiayi.

⁵¹ Nuyá Jesus niij⁵¹ia⁵¹ Nasaré⁵¹num waketkimiai. Ninkia tuke umiriarmiayi. Ashí nu tú⁵¹runamun Marikia tuke enentáim⁵¹tu pujumiayi.

⁵² Jesuska tsakaki, tura nekaki wé⁵²miayi. Yussha tura aencha Nin shiir enentáim⁵²tiarmiayi.

3

Imiakratin Juan³ka etserkamuri

(Mateu 3.1-12; Márkus 1.1-8; Juan 1.19-28)

¹ Tipiriu uunt akupin pujamu kin¹se uwi jeam¹tai, Jutía nun¹kanam Punseu Piratu akupin pujumiayi. Tura Kariré¹a nun¹kanam Erutis akupin pujumiayi. Itiurea nun¹kanmasha Trakuniti nun¹kanmasha ni yach¹i Jiripi akupin pujumiayi. Tura Apirinia nun¹kanam Risantias akupin pujumiayi.

² Tura nu uwitin Anassa Kaipiás²sha Israer-patri uuntri² pujuarmiayi. Nu uwitin Sakaríasa uchirí² Juan² atsamunam pujan Yúsai²ya chichaman antukmiayi.

³ Nuyá Jurta³n entsanam supichik matsamarma nuna Juan³ wekaatusar juna tí³miayi “Winia tunaarun Yus tsankurturat tusarum, enentai yapají³arum imiantiarum.” Tu ujakmiayi.

⁴ Nu ujakman Isayas yaunchu juna á⁴armiayi: Atsamunam wekaana nu untsun⁴un á⁴ntuiniawai. Nii untsun⁴muk juna tawai: Atumí enentá⁴i Uunta jinti⁴ iwiarturtarum; naka awajsatarum.

⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiiikmia arti. Tura pujutrin ainia nusha métekrak paka awajsamu arti.

⁶ Túrunamtai ashí nunkanmaya aents Yúsaiya uwempratin aan nekaawartatui.

⁷ Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi.

⁸ “Íikia Apraám weeitji, tuma asakrin Yus shiir enentáimturmají” tu enentáimtumasaírap. Antsu enentáim yapajíamuitkiuinkia péñker wekaamurmijíai paant iniakmatarum. Warí, Yus wakerakka, ju kayan Apraáma shuarin páchitsuk najankainti, tímiayi.

⁹ Aneartarum. Numi ajaktinian kampuwarin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

¹⁰ Tutai aentska enentáimprar “¿Nuinkia itiurkatjik?” tiarmiayi.

¹¹ Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

¹² Uunt akupniu kuítrín juu armia nú shuar imiantiaj tusar Juánkan weriar aniasarmiayi. “Uunta, ¿iisha warí itiurkatjik?” tiarmiayi.

¹³ Tutai Juan tímiayi “Kuit uunt akupin tana nu iniañkasrum achikiairap.”

¹⁴ Suntarsha aniasarmiayi “Uunta, ¿iisha warí itiurkatjik?”

Juañsha tímiayi “Ame kakarmarmijíai chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

¹⁵ “Ju Juan Yusa anaikiamurinchuashit” tu enentáimsar paant nekaataitsar nákarmiayi.

¹⁶ Tumaj Juan tímiayi “Wikia aya ayashmin entsanam imiajrume. Tura wijíai nankaamas ana nu tátatui. Ni sapatrj jinkiamurinkisha atitrachminiaitjai. Niisha taa, imiantinia áanis tura jíiya áanis Yusa Wakanin enketramprattarme.

¹⁷ Shuar aruusan awajtia núnisañ, nusha yajauch ana nuna ajapa aya péñkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

¹⁸ Juan nu arant shiir chichaman áentsun ti núkap ujakarmiayi.

¹⁹ Tura nuyasha akupin Erutisan chicharkamiayi. Ni yachí Jiripi nuarín Jirutíasan kasararak nuatkui tura chíkich yajauchincha túrakui chicharkamiayi.

²⁰ Tura Erutis núnaka ántutsuk chíkich yajauchin túramiayi. Juánkan achik sepunam enkeamiayi.

Jesusa imianmiari

(Mateu 3.13-17; Márkus 1.9-11)

²¹ Nu túruntsain, Juañsha ashí nú nunkanmaya áentsun imiak pujurainaj Jesussha imianmiayi. Niisha Yúsán áujuk pujají nayaimpisha uranmiayi.

²² Tura Yusa Wakaní yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Ámin ti wararjame” tímiayi.

Jesukrístu shuari

(Mateu 1.1-17)

²³ Jesus trainta (30) uwí takaku asa ni takatrín nankamamiayi. “Jusé uchirínti” tiniu armiayi. Jusésha Iría uchiríyayi.

²⁴ Irisha Matata uchiríyayi; Matat Riwí uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi;

²⁵ Jusé Matatías uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakaia uchiríyayi;

²⁶ Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi;

²⁷ Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi;

²⁸ Neri Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi;

²⁹ Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi;

³⁰ Matat Riwi uchiríyayi; Riwi Semeúnka uchiríyayi; Semeún Jutáa uchiríyayi; Jutá Jusé uchiríyayi; Jusé Junanka uchiríyayi; Junan Iriakímia uchiríyayi;

³¹ Iriakím Mirea uchiríyayi; Mirea Mainiánka uchiríyayi; Mainián Matata uchiríyayi; Matata Natanka uchiríyayi;

³² Natan Tawitia uchiríyayi; Tawit Isaí uchiríyayi; Isaí Upitia uchiríyayi; Upit Puusa uchiríyayi; Puus Saramúnka uchiríyayi; Saramún Naasunka uchiríyayi;

³³ Naasun Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi;

³⁴ Jutá Jakupa uchiríyayi; Jakup Isaka uchiríyayi; Isak Apraáma uchiríyayi; Apraám Tarea uchiríyayi; Taré Nakura uchiríyayi;

³⁵ Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi;

³⁶ Sara Kainiánka uchiríyayi; Kainián Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi;

³⁷ Ramik Matusarínkia uchiríyayi; Matusarín Euka uchiríyayi; Euk Jaritia uchiríyayi; Jarit Maararíira uchiríyayi; Maararíir Kainianka uchiríyayi;

³⁸ Kainian Enusa uchiríyayi; Enus Seta uchiríyayi; Set Atanka uchiríyayi; tura Atan Yus najanamuyayi.

4

Jesusa nekapsamuri

(Mateu 4.1-11; Márkus 1.12-13)

¹ Jesusa enentáin Yusa Wakaní pimiutkamiayi. Jesussha Jurtan entsanmaya waketkintai Yusa Wakaní aents atsamunam jukimiayi.

² Tura nuísha kuarenta tsawant pujusmiayi. Tura íwianch Nin tunaanum ajaraintiajtai tusa pujurmiayi. Nu kuarenta tsawantin Jesus yurumtsuk pujá asa ti tsukammiai.

³ Nuínkia íwianch chicharuk “Amesha nekas Yusa Uchiríntkiumka ju kaya apatuk najanata” tímiayi.

⁴ Tutai Jesus tímiayi “Yus-Papí tawai: “Aya apatkujain shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,” tawai” tímiayi.

⁵ Tura nuyá íwianch naint yakí wájakmanum jukí, ashí nunka ainia nuna ju chichamaik iniaktusmiayi.

⁶⁻⁷ Tura chicharuk tímiayi “Ashí ju nunka wáinmena nu wíniaiti. Tura wi wakerajna nú shuaran súsatniuitjai. Tuma asamtai tikishmatrurakminkia ju nunkanam ashí akupkatniun susattajme. Tura nui ni wariri ainia nusha áminiu átatui” tímiayi.

⁸ Tutai Jesus tímiayi “Yus-Papí tawai: “Aya Nínki Yus ame Úuntrum tikishmatram enentáimtustiniaitme.” Tau asamtai, werumta, iwianchi” tímiayi.

⁹ Ataksha íwianch Jesusan Jerusarén péprunam jukimiayi. Tura Yusa Uunt Jee yakiini iwiak tímiayi:

¹⁰ “Yus-Papí tatsuk:

“Yuska ni suntarín wáinkiatá tusa akupturmaktatui.

¹¹ Kayanam ajintraín tusa wenkurmaktatui.”

Tuma asamtai nekas Yusa Uchirínkiumka juyá akaikim iniaata” tímiayi.

¹² Tutai Jesus áimiuk tímiayi “Yus-Papí junasha tawai:

Yus ame Úuntrum nekapsataj tiip.”

¹³ Tuma asamtai íwianch penké tujintiak ishichik tsawant Jesusan iniaisamiayi.

Kariréa nunkanam Jesus ni takatrín nankamamiania nu

(Mateu 4.12-17; Márkus 1.14-15)

¹⁴ Jesus ni enentáin Yusa Wakaní kakarmari pimiutkamu ajas Kariréa nunkanam waketkimiayi. Nu nunkanam nankaamantu túramurín áujmatiarmiayi.

¹⁵ Nu nunkanam ashí péprunam Israer-shuar iruntai jea armia nu unuiniarmiayi. Tura anturkarmia nuka ni náarin shiir awajsarmiayi.

Jesus Nasarétnum pujumiania nu

(Mateu 13.53-58; Márkus 6.1-6)

¹⁶ Ni tsakarmariin Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áujsatat tusa wajakmiayi.

¹⁷ Nuinkia Yúsnan etserin Isayasa áarmarin súsarmiayi. Nuna urak, nu juna áarman wáinkiamiayi:

¹⁸ Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti.

Tura jii kusuruncha ímtiktinian, tura yajauch awajsamu ainia nuna péker awajsatniuncha,

¹⁹ tura Uunt Yus, shuáran yaintin tsawantri jeán etserkatniuncha akuptukuiti.

²⁰ Nu áarman aujsua amik papin nukukmiayi. Tura iruntai jeanam yáimin pujan susa iniais Niinkia etserkataj tusa pujusmiayi. Tura ashí shuar pujuarmia nu émamkes ii pujuarmiayi.

²¹ Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

²² Jesusan ashí péker áujmatiarmiayi. Tura Jesus ti shiir chichaakui ti enentáimprar “Juka Jusé uchirínchukait” tiarmiayi.

²³ Tu enentáimiainiakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juisha túrata tusarum nu turuttiatrume.

²⁴ Túrasha nekas tájarme, Yúsnan etserniun ni nunkenkia nii tana nuna anturainiat-sui.

²⁵ Nuyasha tájarme, Irías pujumia nú tsawantin, menaintiú uwí nankaamas yumi yutukcha asamtai ashí Israer núnkanam ti tsuka amia nu ti untsurí waje irunmiayi.

²⁶ Tuma ain nu wajen yainti tusa Yus Iríasan akuptukchamiayi. Antsu chíchich nunkanmayá wajen Sarepta péprunam pujumia nuna yainti tusa akuptukmiayi. Sarepta pepru Sitiún péprunam tíjiuch pujawai.

²⁷ Núnisan ii nunkesha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmiayi. Antsu chíchich nunka, Sírianmayá Naaman kan tsuármiai” tímiayi Jesus.

²⁸ Israer-shuarsha iruntai jeen pujuarmia nu, nuna antukar ti kajerkarmiayi.

²⁹ Tura wajakar Jesusan jiiki péprunmaya akupkarmiayi. Tura pepru amia nu nui naint yakí nánkatkamunam, nuyá akaki ajuatai tusar júkiarmiayi.

³⁰ Túrasha Jesuska irunar matsatainiamunmañ etempraktak jiinki wémiayi.

Iwianchrukun Jesus tsuármiania nu

(Márkus 1.21-28)

³¹ Nuyá Jesus Kariréa nunkanam Kapernáum pepru amia nu wémiayi. Tura Israer-shuara ayampratin tsawantrijn tuke etserki wémiayi.

³² Yusa kakarmarin takaku asa nujai etserkamiayi. Tuma asamtai “Yusa kakarmarijia unuitiamtsujik” tiar ti enentáimprarmiayi.

³³ Chíkich tsawantai áishmañ iwianchruku Israer-shuar iruntai jeanam pujumia nu untsumuk tímiayi,

³⁴ “Inikiartusta. Iikia Áminkia pachistin nakitiaji. ¿Warí, incha amukratkataj tusam táchamek? Wikia nékajme. Ámeka ti penker Tunaarincha núitme” tímiayi.

³⁵ Tutai Jesus iwianchin kakantar chicharuk “Takamatsata. Ju áishmañ ikiuktia” tímiayi.

Tutai nu chichamaik íwianch áishmañnumia jiinki weak nunká ajuant ikiukmiayi. Túrasha nekas yajauch awajtsuk ikiukmiayi.

³⁶ Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishmañ Yusa kakarmarijia iwianchin jiiki awematsuk” tiarmiayi.

³⁷ Tura ashí nú nunkanam Jesusa túramurin áujmatarmiayi.

Semun Pitru tsatsarín Jesus tsuármiania nu

(Mateu 8.14-15; Márkus 1.29-31)

³⁸ Jesussha Israer-shuara iruntai jeenia jiinki Semunka jeen wémiayi. Semunka tsatsari tsuer ti jáamiayi. Ti jaakui Jesusan “tsuárturtá” tiarmiayi.

³⁹ Jesussha jaa tepan tsuntsumprua tsuemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

Untsurí jaan Jesus tsuármiania nu

(Mateu 8.16-17; Márkus 1.32-34)

⁴⁰ Etsa akaikin aj ni shuari nánkamas sunkurjai jaarmia nuna Jesusan ikiaatkarmiayi. Jesussha jáinian chikichkiniak chikichkiniak uwejéjai antinkiar tsuármarmiayi.

⁴¹ Ti untsurí iwianchruku armia nunasha iwianchrin jírkiarmiayi. Jíinkiar íwianchkia untsumainiak “Ámeka Yusa Uchirínme” Jesusan tiarmiayi. Tura niisha “Jesuska Yusa anaikiamurinti” tu nékainiakui Jesus kakantar chicharak itiatmamtikiarmiayi.

Kariréa nunkanam Jesus etserkamiania nu

(Márkus 1.35-39)

⁴² Kashin káshik tsawaak Jesus péprunmaya jiinki atsamunam Nin ki wémiayi. Tura shuarsha ekiar ni pujamunam jearmiayi. Tura ijia tuke pujusat tusar emetataisar wakeriarmiayi.

⁴³ Túmain Jesus tímiayi “Yus ii enentáin akupkatajtsa wakera nú shiir chichaman chíkich péprunam matsatainia nunasha ujaktiniaitjai. Nu túrata tusa akupkamuitjai” tímiayi.

⁴⁴ Tuma asamtai Kariréa nunkanam Israer-shuar iruntai jeanam Jesus tuke etserki wémiayi.

5

Namakan ti untsurín achikiarmiania nu

(Mateu 4.18-22; Márkus 1.16-20)

¹ Chíkich tsawantaj Jesus Jinisarít antumianka tutainium káanmatkari pujaj ti untsurí shuar, Yusa chichamen antuktai tusar wakeruiniak Jesusaj káunkarmiayi. Antuktai tusar wakeruiniak kaē ajattsarmiayi.

² Tura jimiará kanun antumiankan káanmatkariin tepan wáinkarmiayi. Ni nérenniurinkia jíinkiar ni nekarin nijia pujuihia asamtai kánuka ankant áarmiayi.

³ Tuma asamtai Jesus Semunka kanuríin enkempramiayi. Tura Semunkan chicharuk “Ishichik ajapén juruktía” tímiayi. Nuinkia kanunam enkemas áentsun káanmatkanam pujuinian unuiniamiayi.

⁴ Unuinasua amik Semunkan chicharuk “Kanu kunanam jukim neka aj ajunkatarum” tímiayi.

⁵ Tutai Semun tímiayi “Túrasha, Uuntá, káshisha tuke aju-junkuar tsawarji. Túrasha penké achikchaji. Kame áankisha Ame támajaj ajunkatjai” tímiayi.

⁶ Tura ajunkar namakan ti untsurín achikiarmiayi. Túram nekasha jaanaki wémiayi.

⁷ Tuma asamtai ni írutkamurín chíkich kanunam pujuinian uwejéjaj “winitia, yáintkiamniuram” tusar untsukarmiayi. Niisha táarmiayi. Túrawar jimiará kanunam métej awajsarmiayi. Tura kanusha inít wayastatuk ajamiayi.

⁸ Nuna túramtai Semun Pítur Jesusan tikishmatar tímiayi “Uuntá, wikia ti tunaitjai. ¿Wíjiaisha itiurak pujustam?”

⁹ Semunsha ni írutkamuríjaj namakan timiá untsurín wáinkiar ashamkarmiayi. Tuma asa Semunsha nuní tímiayi.

¹⁰ Tura Sepetéu uchirí Jakupusha Juansha Semunjaj pujuarmia nusha ashamkarmiayi. Tura Jesus Semunkan tímiayi “Ashamkaip. Yamaikia namaka-achinia áintsamek aents-eau ajastatme.”

¹¹ Nuyasha kanurín kukar júkiar, ashí takakmarincha ikiukiar Jesusan nemarki wearmiayi.

Tunamaru áishmankan Jesus tsuármiania nu

(Mateu 8.1-4; Márkus 1.40-45)

¹² Ukunam Jesus chíkich péprunam pujaj tunamaru áishman taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeka páchitsuk tsuáramniaitme.”

¹³ Nuna tutai Jesus antiñ tímiayi “Wakerajai. Tsuaajme.” Tura nú chichamaik tunamarusha péñker ajasmiayi.

¹⁴ Túrasha Jesus chicharuk “Ámeke nu etserkaip, tímiayi. Antsu Israer-shuar Patrij werim ame péñker ajasmanum Muisáis akupkamia núnismek susata. Nujaj ashí shuar ame péñker ajasmarmín nekaawartatui” tímiayi.

¹⁵ Tura Jesusa túramurí ti etsernamiayi. Túmakui untsurí aents anturkataj tusar káutkarmiayi. Tura ni sunkurincha tsuámartaj tusar káutiarmiayi.

¹⁶ Núnisan Jesuska aents atsuiniamunam we ni Aparin áujmiayi.

Emearun Jesus tsuármiania nu

(Mateu 9.1-8; Márkus 2.1-12)

¹⁷ Chíkich tsawantaj Jesus unuiniak pujaj Pariséu aents tura Israer-shuara jintinniurisha Kariréa péprunmayasha, Jutía péprunmayasha tura Jerusarénumiasha káunkarmia nu antúu pujuarmiayi. Jaa tsuártinian Yusa kakarmarin takakuyayi Jesus.

¹⁸ Nuinkia emearun tampumpua kuaru shuar itiararmiayi. Jesus pujamunam inít awayattsar wakeriarmiayi.

¹⁹ Tura shuar ti untsurí piaku asamtai wayamnia atsumiayi. Túmaitkui yakiinj wear jean urakar, aents kaē ajas matsatmanum Jesus pujamunam emearun tampunam nená itiararmiayi.

20 Nin itiarmania nu, Jesus Yusa kakarmarín takakui, tú enentáimtamun Jesus nekáa emearun tímiayi “Ame tunaarum tsankuramuitme.”

21 Nuinkia Israer-shuara jintinniurisha, Pariséusha ni enentáin enentáimsar “¿Jusha yait Yúsa náarin yajauch awajtin? Warí, aya Yúsak tunaan tsankurachminkiait” tu enentáimsarmiayi.

22 Tura Jesus ni enentáimsamurín nekáa tímiayi “¿Urukantai tú enentáimprarum átum?

23 Nuinkia ¿warí imiá yúpichuchit, tsuártiniak, ni tunaari tsankuratniuk?

24 Wats, Aents Ajasu tutai Wissha tunaan tsankuratniun Yusa kakarmarín takak-jai. Jujai nekaatarum tusan wats itiurchat tárumna nuna túrattajai.” Nuyá emearun chicharuk tímiayi “Amesha wajakim, tampuram achikiam ame jeemiin wetá.”

25 Nú chichamaik emearu niisha íimiainiamunman tampurín achik wajaki ni jeen Yúsan wararki wémiayi.

26 Túmakui ashí shuar ti enentáimprar Yusa náarin shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

*Riwin Jesus untsukmiania nu
(Mateu 9.9-13; Márkus 2.13-17)*

27 Ukunam Jesus wekas akupniu kuítrin-juu, naari Riwi, ni chíkich naari Mateu, akupin akitiai jeenam pujan wáinkiamiayi. Wáiniak “nemartusta” tímiayi.

28 Tutai Riwi wajaki takakmarinkia ikiuak Jesusan nemarsamiayi.

29 Nuyá ukunam Riwi namperan Jesusan najatamiayi. Tura untsurí akupniu kuítrin-juu tura chíkich shuarsha káunkar misanam pujuarmiayi.

30 Tura Pariséusha Israer-shuara jintinniurisha Jesusan tsanumpruiniak Jesusa unuiniamurín tiarmiayi “¿Maaj, urukantai atumsha akupniu kuítrin-juu ainia nújaisha tura chíkich yajauch shuarjaisha iruntrarum yurumprum?”

31 Tutai Jesus áinkiamiayi “Shuar jaachu péñker ainiana nu ¿tsuákratniun atsumaini-awak? Antsu jaa ainia nu tsuákratniun atsumainiawai.

32 “Wikia péñkeraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

*Yurumtsuk Yus áujsatniun Jesusan aniasarmiania nu
(Mateu 9.14-17; Márkus 2.18-22)*

33 Nuyá Jesusan aniak tiarmiayi “Juanka unuiniamurisha, Pariséu unuiniamurisha yurumtsuk Yúsan áujainiatsuk. Tura ame unuiniamurmeka ¿urukantai ijiarma Yúsan áujainiatsu?” tiarmiayi.

34 Tutai Jesus tímiayi “Nuatma nampernum, ¿ipiaamu ainia nu ijiarmamniakait, yamá- nuatu pujai?

35 Atsá. Wats Wissha ukunam junaktiatjai; nuinkia ijiarmatin átatui” tímiayi.

36 Tura junasha nujai métek-taku unuiniamiayi: “¿Yamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkam arut pushijiai mai metek yamaram wáinkiachminiaiti.

37 Núnisan nijiamanch yamá nawamu nuap najanam arutnum yaraachminiaiti. Túramka nijiamanch karíak ijiakratniuiti; túmak nijiamanchisha nuap najanamusha mai metek menkainiawai.

38 Tuma asamtai nijiamanch yamá nawamu yamaram nuap najanamunam yaraat-niuiti. Nu túramka mai metek péñker átiniaiti.

39 Yaunchu nawamu úmana nuka yamarman nakitrattui. “Yaunchu nawamu imiá péñkeraiti” tiártatui” tímiayi Jesus.

6

Ayampratin tsawantaj trikiu neren achikiarmiania nu
(Mateu 12.1-8; Márkus 2.23-28)

¹ Ayampratin tsawantaj Jesussha unuiniamurijjai araamunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi.

² Nuna túruiniakui Pariséu tiarmiayi “Maaj, atumsha ayampratin tsawantaj takaschatnua nu, ¿urukantai takaarum?”

³ Takui Jesus ayak tímiayi “Yaunchu uunt akupin Tawitcha tura nemarniusha tsukainiak túrawarmia nu ántichukaitrum.

⁴ Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantanacha aya Israer-shuara Pátriri yúatin ármiai. Tuma ain Tawitcha yajauchin túrutsuk achikmiayi, tímiayi.

⁵ Wisha Aents Ajasuitkiun ayampratin tsawantan Nérenniurintjai” tímiayi Jesus.

Shuara uweje jakaan Jesus tsuármiania nu
(Mateu 12.9-14; Márkus 3.1-6)

⁶ Chíkich ayampratin tsawantaj Israer-shuar iruntai jeenam Jesus wayá unuiniartasa nan kamamiayi. Nu shuar uweje untsuuria nu jakaa pujumiayi.

⁷ Tura Israer-shuara jintinniurisha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuaran tsuartimpiash” tusar ii pujuarmiayi.

⁸ Túrasha Jesuska ni enentáimmiarin nekariarmiayi. Túmayat uweje jakaan chicharuk “Ju ajapén wajasta” tímiayi. Tutai áishman ajapén wajasmiai.

⁹ Nuinkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujai ¿tuá péñkerait? ¿Uwemtikratin, máatniujajisha tuá péñkerait?” tímiayi.

¹⁰ Nuyá téntakarmia nuna iis áishman kan tímiayi “Uwejem takuitia.” Áishmansha uwejen takuimtai nú chichamaik péñker ajasmiai.

¹¹ Tura chíkichkia ti kajer karmiayi. Túrawar “Jesus warí itiurkamniakit” tusar anini-aisarmiayi.

Tuse unuiniamun Jesus anaikiamiania nu
(Mateu 10.1-4; Márkus 3.13-19)

¹² Nuyá Jesus Yúsan áujataj tusa náinnium wakamiayi. Tura nu kashi Yúsan au-aujkua tsawarmiayi.

¹³ Tsawarmatai unuiniamurin ikiankar tuse anaikiamiayi. “Winia akatramuritrume” tímiayi.

¹⁴ Ju ármiai: Emka, Semun chíkich naari Pítiur apujtusmia nu; tura nuyá ni yachi Antres, Jakupusha, Juansha, Jiripisha, Parturumísha,

¹⁵ Mateusha, Tumassha, Arpeu uchiri Jakupusha, Ásump Semunsha,

¹⁶ Jakupu yachi Jútassha, tura Jútas Iskariúti Jesusan ukunam surukmia nu. Nu tuse achikma ármiai.

Untsurí shuaran Jesus yáinkiamiania nu
(Mateu 4.23-25)

¹⁷ Niijjai Jesus náinniumia pakanam taawarmiayi. Nu pujusarmiayi. Nuisha untsurí unuiniamurisha, tura Jutía nun kanmaya, tura Jerusarennumia tura nayaantsanam ayamach Tiru, tura Setun péprunmaya ti untsurí aents antuktait sar pujuarmiayi. Jesus tsuarati tusar káunkarmiayi.

¹⁸ Iwianchrukusha tsuámararmiayi.

¹⁹ Jesus tsuártinian tujinkiachu asantai ashi shuar antintaj tusar wakeriarmiayi.

Náinnium Jesus etserkamu
(Mateu 5.1-12)

²⁰ Ni unuiniamurin Jesus iis juna tímiayi: ““Yusan atsumajai” tárugna nu, Yus akupea-munam páchitkiaitrame; tuma asamtai warasminiaitrame.’

²¹ ‘Yamáí tsukamarmena nu ukunam ejemartatrame. Tuma asamtai warasmini-aitrame. Yamáí útrumna nu, ukunmaṅka wishirtatrame. Tuma asamtai warasmini-aitrame.’

²² ‘Atumin nakitramprarmatai, ajapramawarmataisha, tura Winia Aents Ajasu tu-taiya nú shuar ajasuiti tusar tsanumprutmak katsekkramkarmataisha warasmini-aitrame.’

²³ ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsna etserniun nútiksaraṅ yajauch awajsacharmakia.’

²⁴ ‘Tura kuítrinniutiram atumsha atumí waratairi aya yamaik waintrume. Ukunmaṅka waraschattarme.’

²⁵ ‘Atsumatsjai, tu enentáimprumna nu, ukunmaṅka atsumattarme. Nuiṅkia waraschattarme. Yamáí wishíarmena nu, ukunmaṅka wáitiakrum úttiatrame. Nuiṅkia waraschattarme.’

²⁶ ‘Ashí aents atumin shiir awajtamkurmin aneartarum. Nujai waraschatniuitrame. Warí nuna uuntri ántar-yusnan etserin armia nuna nútiksaraṅ yaunchu shiir awajsarmi-ayi.’

Ii nemasri aneatniun Jesus unuiniamiyi
(Mateu 5.38-48; 7.12)

²⁷ ‘Winia anturtarmena nuna juna tájarme: Ame nemasrum aneata, nakitramainia nusha shiir awajsata;

²⁸ yajauch chichartamainia nusha shiir enentáimtusarta; katsekramainia nusha Yus áujtusarta.

²⁹ Ame yapimin ijiutmamtai áatú yapiruṅsha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata.

³⁰ Seatmana nu susata, tura áminiun jurutramainiakuisha ataksha awaṅturkitia tiip.

³¹ Chikich winia túrutati tusam wakeramna nútiksamek chikichcha túrata.’

³² ‘Iista, aya atumin anenmainia nuke aneakmesha, ¿nusha warí péṅkera túrarum? Yajauch shuarsha nuna túrin áiniawai.

³³ Tura atumniasha péṅker awajtamainia nuke péṅker awajkurmesha ¿nusha warí péṅkera túrarum? Yajauch shuarsha nuna túrin áiniawai.

³⁴ Awaṅturkimniaiti tu enentáimtarum nuke íkiakrumsha ¿nusha warí péṅkera túrarum? Yajauch shuar nuamtak yajauch shuarjai awaṅturkimniaiti tu enentáimsar ikianaini-awai.

³⁵ Tura atumsha nemasrum aneatniuitrame, tura péṅker túratniuitrame, tura awaṅturkittiwai tu enentáimtsuk ikiastiniaitrame. Túrakrumniṅkia Uunt Yus péṅker akirmaktatrame; tura ni uchiríntjai tu iniakmattatrame. Yuska, “yumiṅsajme” ticha nunasha tura yajauch shuarnasha shiir awajeawai.

³⁶ Ii Aparí waitnentrarnia nútiksarmek atumsha waitnentratarum.’

Chikicha túramuri ti enentáimtusairap
(Mateu 7.1-5)

³⁷ ‘Chikicha túramuri ti enentáimtusairap. Núnisaṅ Yuska atumí tunaarín iirtamsashta-tui. Chikicha tunaarín “nuke asutniatniuiti” tiirap. Núnisaṅ Yus atumín sumamtikra-mashtatrame. Tsanṅkurnairatarum. Núnisaṅ Yus tsanṅkurtamprattawai.

³⁸ Chikichcha susata. Núnisaṅ Yus atumín suramsattarme. Niisha péṅker nekapma, tura núkap ati tusa teeka awajas tura patas núkap enkea emetsaj amastatui. Atum chikich túrarmena nútiksana atumniasha túrutmattarme.”

³⁹ Tura nuyasha juna métek-taku chichaman ujakarmiayi: “Jii kusurusha çitiurak chíkich kusuruncha jukimniait. Mai metek waanam iniaashtatuak?

⁴⁰ Unuiniamua nu unuiniana nuna nankaamas áchatniuiti. Túrasha niisha ti unuimatar unuiniana nujai métek nekaamniaiti.’

⁴¹ ‘çItiurtsuk atumi jiiin numi enketna auk ítskesha atumí yachí jiiin tsuat enketusha iiyarum?

⁴² Ame jiiin numi tuke enketaisha çitiurtsuk ame yatsumi jiiya tsuátan jurustajme tame? ¡Ántraitrume! Emka ame jiiin numi enketna nu jusata. Nuiñkia paant wáinkiatame yatsumi jiiin tsuat enketna nu jurustin.’

Nerejai numi nekaainti

(Mateu 7.17-20; 12.34-35)

⁴³ ‘Pénker numi yajauchin nereatsui; tura yajauch numi péñkeran nereatsui.

⁴⁴ Numisha ni neren nékanui. Tsachikniumiasha kushiñkiap júukchamniaiti. Tura naranmaya shuinia júukchamniaiti.

⁴⁵ Núnisan péñker shuar ni enentái péñker asamtai péñkeran chichaawai; tura yajauch shuar, enentái yajauch asamtai yajauchin chichaawai. Páantchakait. Enentáin pimiutkamu ana nuyan ni wenejai chichaawai.’

Jimiará jea ukurtin

(Mateu 7.24-27)

⁴⁶ ‘Wi tájana nu túrachiatrumsha çurukamtai Winia, Uunta, túrutrum?

⁴⁷ Shuar winia chichamprun ántuinia nu jea jeammajai métekete. Winia anturtuk umiana nu jujai métekete:

⁴⁸ Shuar jean jeamuk emka init taur kayanam ukurmai. Tura yumi ti yutuk, entsa nujanakrua tukummaitiat pukukachmai kayanam ukuamu asa.

⁴⁹ Antsu Winia anturtukiat umiatsna nuka jujai métekete: Shuar jean jeamuk aya naikminiam jeammai. Tura entsa nujanakrua tukumpram nu jeaka pukukamai. Tura mash sáantramai.” Tu unuiniamiayi Jesus.

7

Suntara yáintrin Jesus tsuármiania nu

(Mateu 8.5-13)

¹ Jesus áentsun unuiniasua amik Kapernáum péprunam wémiayi.

² Nuí Rúmanmaya suntara kapitiántri pujumiayi. Nu kapitiáni takarniuri, ti aneamuri, jakamnia jaamiayi.

³ Tura Jesusan pachis áujmatainian antuk, ame shuarum Jesusan itiantiti tura winia takarniun tsuárturti tusa Israer-shuara úntrin akupkamiayi.

⁴ Niisha Jesusan weriar, umirtukat tusa ti seainiak tiarmiayi “Ju kapitián nekas yáintin péñkeraiti.

⁵ Niisha yajaya apachitiat in shiir enentáimturmají. Tura iruntai jean jeamtinniasha niñki chicharkaiti, tura yayawai.”

⁶ Nuyá Jesus niijjai wémiayi. Tura ni jeen jeastatuk jatemsamtai kapitiáncha ni amikrin akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ántram wayataj tu enentáimsaip. Ame ti nankaamaku asam winia jearuí wayachminiaitme.

⁷ Tuma asakmin imia wiki Amiin jeatniun arantukjame. Ayatik “pénker ajastí” tákumin winia takarniusha péñker ajatrustatui.

⁸ Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitíá” tutai winiawai. Tura winia takartinian “ju túratá” tutai umíawai.” Tu tímiayi.

⁹ Jesus nuna antuk ti enentáimias ni nemarainian tímiayi “Nekas tájarne Israer-shuar Yúsán tímiatrus enentáimtinian wáinchaitjai.”

¹⁰ Tura kapitiani akatramuri jeá waketkiar, takarniuri péñker ajasun wáinkiarimiayi.

Wajé uchirín Jesus iniantkimiania nu

¹¹ Nuyá ukunam chíkich pepru Naín tutainium ni unuiniamurijjai tura chíkich untsurí aentsjai Jesus wémiayi.

¹² Tura péprunam nuntumas jakaan iwiansatai tusar juńnian wáinkiamiayi. Jakáa nukurí wájeyayi, tura uchirí jakamia núchikiyayi. Tura ti untsurí nu peprunmaya nin nemarsarmiayi.

¹³ Jesus nu wajen wáiniak tura waitnentar “úutip” tímiayi.

¹⁴ Nuńkia Jesus jakaan enkerman tarunt antińmiayi; nuna juńniasha wajasarmiayi. Nuńkia Jesus jakaan chicharuk “Umpa nantaktia, tájame” tímiayi.

¹⁵ Tutai niisha nantaki pujus chichaamiayi. Tura Jesus ni nukurín “Jujú uchiram” tímiayi.

¹⁶ Tura matsamiarmia nu, nuna wáinkiar ashankarmiayi. Tura Yusa náarin shiir awajsarmiayi. Tura chichainiak, “Yúsnan etserniuchukai Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájinya nuna yáinmaktai tusa Yus tarutramji” tiarmiayi.

¹⁷ Tura ashí Jutía nunkanmayasha tura ni írutkamu nunka ármia nuyasha Jesus túramia nuna nekaawarmiayi.

Imiakratin Juan sepunam pujak ni amikrín akatar Jesusan akuptukarmiania nu (Mateu 11.2-19)

¹⁸ Juan ni írutkamuri ujakam Jesus túramun nekaamiayi. Nekáa ni írutkamurín jímiaran untsukmiayi.

¹⁹ Tura Jesusai akupkarmiayi. “Atumsha Jesus aniarstarum. ¿Amesha nekas Kristu Yus akupkamu tátinia nukaitiam. Kame chikichak nákastataj? titiarum. Nu nekáa íkiuutarum’ tímiayi.

²⁰ Tutai niisha Jesusan werí jeariar tiarmiayi “Incha imiakratin Juan akatar akup-tamkaji. ¿Amesha nekas tátinia nukaitiam. Chikichak nákastataj? Nu nekaatai tusar wakeraji” tiarmiayi.

²¹ Wats, nii jeawarmia nu Jesus untsurí jaan tsuártasa pujurmiayi. Iwianchrukuncha iwianchrín jírki akupkatasa pujurmiayi. Tura kusuruncha ímtikmiayi.

²² Tuma asa Jesus akatramun juna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchanumsha uwempratin chicham ujakmaiti. Juan nu ujaktarum.

²³ Yawetsuk Winia tuke shiir enentáimturna nú shuar shiir átatui” tímiayi Jesus.

²⁴ Waketkiarmatai Jesus Juánkan pachis áujmatman antuk shuar matsamarmia nu juna tímiayi: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juan núnischaiti.

²⁵ Nuikia ¿warí werimiarum. Shuar péñker iwiamampra ístai tusarmek wémarum? Warí, péñker iwiamampraka uunt akupniu jeen pujuiniatsuk.

²⁶ Nuńkia ¿warí werimiarum. Yúsnan etserniuk werimiarum? Maa, nú nankaamas wáinkiarne.

²⁷ Yaunchu Yus-Chichamnum ju áarmaiti:

“Winia akatramurun amiini emka akupeajai ame jintimin iwiarat tusan.”

Juan nu akatramuiti.

28 Nekasan tájarme, Yúsnan etserin imiakratin Juanjaj nankaamas uunt atsuwiti. Túmaitiat Yus akupeemunam páchinia nu shuarka nekas imianchaitiat, Juanjaj nankaamas átatui” tímiayi.

29 Penké shuarsha, kuítian-juusha, Juan imiaimiujaj imianiarmia nu, Jesus timian antukar Yusa náarjn shiir awajsarmiayi.

30 Túrasha Pariséusha Israer-shuara jintinniurjsha Yus yáintaj támaitiat Juan imiaamujaj imiancha ásar nakitrarmiayi.

31 Nuiñkia Uunt Jesus tímiayi “Yamaiya áentstiram, warijjaj métek árum nuna paant títiatjarme.

32 Uchijaj métek árume. Ni aijjaj iruntrar nakurustaj tukamá tuñiawai “Námpera áinis nakurustaitsar peem umpuarji, túrasha jantsemáchure. Nuyá iwiarsatniua áinis nakurustaitsar íwiareakur kantamtaí kantamáaji, túrasha átum úutcharme.” Tu tuñiawai.

33 Atumsha núnisaitrume. Kame Juan núkap yurumtsuk úmutsuk wekaimiayi. Túmakui átumka “iwianchrुकuiti” tímiarme.

34 Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuítian-juu amikrinti” túrutrume.

35 Wats, nekas neka ainia nu, Yusa nekatairjn iniakmainiawai.” Tu tímiayi.

Pariséu Semuñ náartin Jesusan ni jeen ipiaamiania nu

36 “Winí yurumáitia” tusa Pariséu Jesusan ipiaamiayi. Tutai Jesus ni jeen werí misanam pujusmiayi.

37 Nuiñkia nu péprunmaya yajauch nuwa, Jesus Pariséu jeen yurumáttsa weyi táman antuk, kayá mutinium kunkuin asuiti áimkiamun takukí jearmiayi.

38 Tura úutki Jesusa nawen pujuras neajkijjaj nijjarmiayi. Tura intiashijjaj japirmiayi; nuyá nawenam mukuta kunkuinian ni nawen ukatramiayi.

39 Pariséu Jesusan ipiaamia nu, nuna wáiniak juna enentáimsamiayi: “Ju nekas Yúsnan etserniuitkiunka, ju yajauch nuwa ántiana nuna nekaawainti. Warí, niisha netse nuwachukait” tu enentáimsamiayi.

40 Nuiñkia Jesus Pariséun chicharuk tímiayi “Semuñká, ámin titiaj tusan wakerajai.”

Tutai Pariséu chichaak “Turuttiá, Uuntá” tímiayi.

41 Tutai Jesus tímiayi “Kuítian ikiamniun jimiará áishman tumashmakarmiayi. Chíkich kiniantus (500) tura chíkichka aya senkuentak tumashmakmiayi.

42 Akiktin tsawant jeamtai máí-metek takakcha ármiai. Tuma asamtaí kuítian ikiamin ni tumashrjn máí-metek asakátrarmiayi. Wats, turuttiá ¿tú áishmanka ikiamniun nekas aneamia?” tímiayi.

43 Tutai Semuñ tímiayi “Enta, núkap tumashrjn tsankuramia nu.”

44 Tutai Jesus tímiayi “Nekas tame.” Nuiñkia nu nuwan iis Semuñkan tímiayi “Ju nuwa wáintsumek. Ame jeemiin wayamtai winia nawer nijjartin entsa suruschamame; antsu ju nuwaka nawerun neajkijjaj nijjarturai, tura intiashijjaj japirturai.

45 Mukutam áujtusamame; antsu niñkia nawerun tuke mukutui.

46 Winia muukaruisha asuiti ikiurtuschamame; antsu niñkia naweruj kunkuin asutin ukatrirai.

47 Nu tuma asamtaí tájame, niisha Winia ti anentu asamtaí ni tunaarij untsurí ana nu tsankuramuiti. Tura tunaar ishichik awai tau tsankuramu ana nuka ishichik anekratniuiti.” Tu tímiayi Jesus.

48 Nuiñkia nuwan tímiayi “Ame tunaarum tsankuramuitme.”

49 Tura chíkich ipiaamu Jesusjaj misanam pujuarmiania nu “¿Jusha ya asan tunaancha tsankurea?” nuamtak tunainiarmiayi.

50 Tura Jesus nuwan chicharuk ““Uwemtikiartiniaiti” tu enentáimtururu asam uwempraitme. Shiir wetá” tímiayi.

8

Nuwa Jesusan yáinkiarmania nu

¹ Nuyá untsurí péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuiniamurí tuse ármia nu nemarsarmiayi.

² Yaunchu untsurí nuwa jaa armia nuna tura iwianchruku armia nunasha Jesus tsuáarmiayi. Nu nuwasha Nin nemarsarmiayi. Nusha ju ármiai: Maktaranmaya Marí, siati íwianch jíirkimiuyania nusha

³ tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takakmarin súsar Jesusan yáinkiarmai.

Atsaamin atsaampramun Jesus unuiniamiania nu

(Mateu 13.1-9; Márkus 4.1-9)

⁴ Untsurí péprunmaya Jesusan iistai tusar jíinkiarmai. Tura untsurí káunkarmatai ju métek-taku chichaman Jesus unuiniamiayi:

⁵ “Atsaamin atsaamprataj tusa jíinkimiayi. Atsaamki wesa jinkiái jintiá iniaararmiayi. Túrunamtai weenak najakarmiayi. Nuyá chiniki tariar yuawarmiayi.

⁶ Chíkich jinkiái kaya írunmanum iniaararmiayi. Nu jinkiái tsapainiar, wárik nantu sukuam káararmiayi.

⁷ Chíkich jinkiái jan kiniam iniaararmiayi. Tura jan kisha jinkiáisha máí-metek tsapainiar, jan ki kan kar ajakramiayi.

⁸ Tura chíkich jinkiáisha pé nker nun kanam iniaararmiayi. Tura tsapainiar, pé nker nerekar chíkichkia sian sha (100) nerekarmai.” Tuasua amik kakantar chichaak Jesus tímiayi “Kuishim ákuinkia antuktaram.”

(Mateu 13.10-17; Márkus 4.10-12)

⁹ Nuyá ni unuiniamurí Jesusan aniak tiarmiayi “Ju métek-taku chicham tamena nu ¿warintkumea tame?”

¹⁰ Tutai Jesus tímiayi “Atumnia Yus ni akuptairin nekaachma ana nuna nekamtikram-prume. Tura chikichnaka, wáiniainiyat kusurua núnin ártí tusan, tura ántuiniyat nekaacharat tusan aya métek-taku chichamjai jintintiatjai,” tímiayi.

Atsaampramu chichaman Jesus paant jintintiamiania nu

(Mateu 13.18-23; Márkus 4.13-20)

¹¹ ‘Wats, ju nekaatarum, tímiayi. Jinkiáisha Yusa chichamen nakumui.

¹² Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáiyán júawai.

¹³ Kayanam iniaaru tana nuka shuar antuk waras umiana nuna nakumui. Tura nú shuar kan kape atsa asamtai, ishichik tsawantiniñ umikiar itiurchatan wáinkiar wárik kanainiawai.

¹⁴ Jan kiniam iniaaru tana nuka tuke enentáijiai umiatsna nuna nakumui. Nu shuarsha ántuiniawai, túrasha ni wakeramurijiai wekainiawai. Ju nun kanman ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin takaatsui. Nujai kan karma ásar nerektinian tujintiainiawai.

¹⁵ Tura jinkiái pé nker nun kanam iniaaru tana nuka shuar antuk umiinia nuna nakumui. Niisha antukarmia nuna pé nker enentáimtusar, yawetsuk umirkar ti pé nker nerenawai.’

Ashí iwaiiniakma átatui

(Márkus 4.21-25)

¹⁶ ‘¿Shiripkin ekeemak nukuktinkiait? Peaknum waaptak ikiuschatniuiti. Antsu jeanam wáiniana nu paant wáinkiarat tusa yakí ekentsatniuiti.

¹⁷ Núnisan ashí nekaachma ana nu paant átatui. Tura úukma ana nu nekanattawai. Tura iwiainiakma átatui.

¹⁸ Tuma asamtai anearum péñker antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiawai.” Tu timiayi.

Jesusa nukurí, Jesusa yachi
(Mateu 12.46-50; Márkus 3.31-35)

¹⁹ Jesus pujamunam nukurí ni yachisha tariarmiayi.

²⁰ Turamtai Jesusan tiarmiayi “Ame nukusha yatsumsha aq wajasar untsurmaini-awai.”

²¹ Tutai Jesus tímiayi “Ee, nukuruiti, yatsuruiti, tura Yus tana nuna antuk umíana nusha winia nukuruiti, winia yatsuruiti.”

Nasesha entsasha Jesusan umirkarmiania nu
(Mateu 8.23-27; Márkus 4.35-41)

²² Chíkich tsawantai Jesus ni unuiniamurijjai kanunam enkemprar “Antumian amaini wetai” tímiayi.

²³ Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun inít awayastatuk awajmiayi.

²⁴ Túram nuiñkia Jesusan ishintiainiak “Uuntá, iisha entsá wayaaji” tiarmiayi. Nuiñkia Jesus nantaki nasencha entsan cha chicharkamiayi. Nú chichamaik nasesha menkakamiayi, tura entsasha miaaku ajasmiai.

²⁵ Nuyá ni unuiniamurin chicharuk “¿Urukantai Winia enentáimtursachuram?” tímiayi.

Tura niisha ashamainiak, ti enentáimprar “¿Ausha warí áishmañkait? Nasesha entsasha Nii chicharkam umirainiatsuk” tiarmiayi.

Jatara nunkanam Jesus iwianchrुकun tsuármiania nu
(Mateu 8.28-34; Márkus 5.1-20)

²⁶ Kariréa nunka amaini Jatara nunkanam jeawarmiayi.

²⁷ Kanunmaya Jesus jiinkimtai nu péprunmaya áishmañ Nin taruntamiayi. Nu áishmañsha yaunchu iwianchrुकuyayi. Misú wekas, jeá pujutsuk aents iwiarsamunam pujuyayi.

²⁸⁻²⁹ Íwianchkia nu aishmañkan ti kakaram nupet wémiayi. Tura emetatai tusar uwejencha nawencha jirujai jinkiá wearmiayi. Túrasha tujinkiarmiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishmañ Jesusan wáiniak tikishmatar kakantar chicharuk “¿Urukantai winiisha tarutnium, Uunt Nankaamaku Yusa Uchiri Jesusa? Winia wáitkiarsaip tusan seajme” tímiayi. Íwianch niin pujurun Jesus jiki akupeam tu tímiayi.

³⁰ Jesus nu áishmañkan anias “¿yáitiam?” tímiayi.

Tútai nii chichaak “Wikia Untsuríntjai” tímiayi. Untsurí íwianch niin pujurma asa nuna tímiayi.

³¹ “In uunt wáanam ii jiinkimaj nuiñ akuptukam amutkaip” íwianch seawarmiayi Jesusan.

³² Nui ishichik arantach náinnium untsurí kuchi shushunmak yujaarmiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

³³ Nuna takui íwianch áishmañnumia jiinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

³⁴ Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi.

³⁵ Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jíintiukiarmia nú áishman̄kan péñker ajas pushí entsar Jesusa nawen pujan wáinkiarmaiya. Tura ashamkarmiayi.

³⁶ Iwianchruku áishman̄ tsuárman wáinkiarmaiya nu yama taan ujakarmiayi.

³⁷ Tura ti ashamainiak Jatara nun̄kanmaya aents ashí Jesusan “Wetá” tiarmiayi. Tutai Jesus kanunam en̄kemar wémiayi.

³⁸ Íwianch jíintiukiarmia nú áishman̄ Jesusan, wisha ame wéamunam winitiaj tusa seamiayi. Tutai Jesus nuna suritiak,

³⁹ “Antsu ame jeem̄iin weme Yus ámin túrutma nu ashí etserkata” tímiayi. Tutai áishman̄ we Jesus nin túramia nuna ashí nu péprunam etserkamiayi.

*Jairu nawantr̄incha tura chíkich nuwan̄cha Jesus tsuármiania nu
(Mateu 9.18-26; Márkus 5.21-43)*

⁴⁰ Tura Jesus katiñki Kariréanam tatí tusar nákas pujuarmiayi. Tuma ásar Nii waketki katiñki támatai nu aencha warasar áujsarmiayi.

⁴¹ Tumaj̄ Israer-shuara iruntai jeá uuntrī Jairu naartin támiayi. Nii taa, Jesusa nawen tikishmatar “Winia jearūi waitneasam winitr̄itiá” tímiayi.

⁴² Ni nawantr̄i chikichik amia nu, tuse uwí takaku, jakatasa pujaku nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar kaē ajas weena ásar chanuawarmiayi.

⁴³ Nūi nuwā páchitkia wémiayi. Niisha tuse uwí numpa ajapeak wáitias pujuyayi. Tsuákratniua nūisha ni kuítr̄in ashí ajapaitiat tsuámarchauyayi.

⁴⁴ Jesusa úkuriinī winiá weantuk ni pushir̄i náñkatramur̄in antiñmiayi. Nuna tura nú chichamaik numpé ajapeamuncha péñker ajasmiayi.

⁴⁵ Nuñkia Jesus chichaak “¿Ya Winia antintkia?” tímiayi.

Tura “pen̄kesha antiñchajme” tuñiakui Pítiur ni tsaniakmar̄ijiāi Jesusan chicharuk “Uuntá, ti untsurí antiñmasha, tura ti untsurí chanunmainiasha ¿itiura “ya Winia antintkia” tame?” tíarmiayi.

⁴⁶ Tútaisha Jesus tímiayi “Nekas Winia antintkiayi. Winia kakarmar̄jāi tsuárájna nuna nékajai” tímiayi.

⁴⁷ Nuyá nu nuwāsha, nekarayapi tusa kurañki taa Jesusa nawen tikishmatramiayi. Tura ashí aents ántuiniamunam urukaku antiñkia tura itiura wárik péñker ajasmia nuna ujakmiayi.

⁴⁸ Nuñkia Jesus nuwan̄n tímiayi “Nawantrú, shiir wetá. Winia nekas enentáimtursa asam péñker ajasume.”

⁴⁹ Jesus tuke chichas pujāi uunt Jairu jeā, ti untsurí antiñmasha, tureniā taa, Jáirun tímiayi “Ame nawantrum jakayi. Unuikiart̄in tuke itit awajipia” tímiayi.

⁵⁰ Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

⁵¹ Jeá jeawar Jesussha Nijiāi untsurí wayat̄niun surimkiamiayi. Antsu aya Pítrun, Jakupun, Juáñnasha tura nuwāchi apar̄in nukur̄incha wayat̄niun tsañkatkamiayi.

⁵² Ashí úutainiak atakka wáinkiashtat̄japi tu úutiarmiayi. Túmainiakui Jesus pen̄ké jakaan nékayat tímiayi “Úutirpa. Nuwāch̄kia jákachai, antsu kanarai” tímiayi.

⁵³ Jakaancha urukaku ta tusar wishikrarmiayi.

⁵⁴ Nuyá Jesus nuwāchi uwejeñ achik, kákantar chicharuk “Nawantru nantaktia” tímiayi.

⁵⁵ Túram niisha jakayat atak iwiaaku ajasmiayi. Tura nú chichamaik nantakmiayi; túrunantai Jesus “ayuratarum” tímiayi.

⁵⁶ Nuwāchi apar̄i nukur̄isha ti enentáimprarmiayi. Tura Jesus “Ju túramu pen̄ké etserkairap” tímiayi.

9

*Jesus ni unuiniamurin etserkati tusa akupkarmiania nu
(Mateu 10.5-15; Márkus 6.7-13)*

¹ Ni tuse unuiniamurin ikiaanak ni chichamejai iwianchrukun enentáiyān iwianchin jjiirki akupkatniun tura sunkurjai jaa tsuártinniasha ni kakarmarin súarmiayi.

² “Yus akupin ajastin ujaktarum, tura jaa tsuártarum” tinia akupkarmiayi Jesus.

³ Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichik pushí jukitiarum.

⁴ Náñkamas jeanam jearum wayarmeka nuin pujustarum. Nuin pujusrumek chikich péprunam wéakrum jiinkitiarum, tímiayi.

⁵ Tura atumin awaintiamatniun nakitiana nú péprunmaya jiinkirum nawemiya nuñka akakekrum ikiuktiarum. Awaintiamachma paant ati tusarum nu túratarum” tímiayi.

⁶ Nuyá jiinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

*Erutis “Jesusan iistaj” tímiania nu
(Mateu 14.1-12; Márkus 6.14-29)*

⁷⁻⁸ Uunt akupin Erutis Jesus túramun antukmiayi. Nu túramun chikich shuarka “Juan jakamunmaya nantaki túrawai” tu wearmiayi. Chikichkia, “yaunchu Yúsnan etserin Erías wantiniak túrawai” tu wearmiayi. Chikichkia, “chikich yaunchu etserin nantaki túrawai” tiarmiayi. Tuma asamtai Erutis penké nekaachmiayi.

⁹ Tura tímiayi “Wiki, Juanka muuke tsupirkatarum, tíchamkaj. Tuma aisha, ¿ju shuar, ni túramuri ashí shuar chichainia nusha yátsukait?” Tu enentáimiuk “iistaj” tímiayi.

*Senku mir áishmankan Jesus ayuramiania nu
(Mateu 14.13-21; Márkus 6.30-44; Juan 6.1-14)*

¹⁰ Atak Jesusa akatramuri waketki taar ni túramurin Jesusan ujakarmiayi. Nuñkia aents atsamunam Petsaitia péprunam tíjiuch weak nu jukiarmiayi.

¹¹ Tura penké shuar nuna nekaawar nemariarmiayi. Túram Jesus nin shiir áuj samiayi. Tura Yusa akuptairi pachis unuiniamiayi. Tura jaa armia nuna tsuáramiayi.

¹² Tura kíakui, tuse unuiniamu Jesusan wériar tiarmiayi “Uuntá, shuar akupkachmini-ashit. Tíjiuch péprunmasha, shúarnumkesha wear ni yurumátniurin sumarmakarti, tura kanartintrin wáinkarti. Ju pujajnia juñkia penké atsawai” tiarmiayi.

¹³ Tutai Jesus tímiayi “Atumsha ayuratarum.”

Tutai chichainiak “Iisha aya senku tanta tura namaksha jímiarchik takakji. Ju shuar ayuratin sumaktai tusar wétinaitji” tiarmiayi.

¹⁴ Áishmansha ti untsuri senku mir (5000) jeeá ámiayi. Tura Jesus ni unuiniamurin chicharainak ““senkuenta senkuenta kanaarum ankant ankant pujustarum,” titiarum” tímiayi.

¹⁵ Túrawarmatai ashí pujusarmiayi.

¹⁶ Nuyá senku tantan tura jimiará namaknasha Jesus achik, yakiini íimias Yúsán yuminsamiayi. Nuyá ajamsarat tusa ni unuiniamurin súarmiayi.

¹⁷ Ashí yurumáwar ejemararmiayi. Tura ampirman tuse chaninnium áimkiarmiayi.

*Jesus Yusa anaikiamurinti ujakma amia nu
(Mateu 16.13-19; Márkus 8.27-29)*

¹⁸ Jesus ni unuiniamurijjai áentsnumia kanaki pujuarmiayi. Jesus Yúsán aujsua umik ni unuiniamurin tiarmiayi “¿Yáiti turutainia Winia?”

¹⁹ Niisha áimkiarmiayi, “Chikich “Imiakratin Juankaiti” turamainiawai; chikichcha “Iríasaiti” tura chikichkia “yaunchu Yúsán etserin nantakniua núiti” turamainiawai” tiarmiayi.

²⁰ Tutai “Tura atumsha ¿yáiti túrutrum?” tiarmiayi.

Takui Pítiur chichaak “Ámeka Yusa Anaikiamurí, Kristu tutai, núitme” tímiayi.

²¹ Tutai Jesus “Peñké etserkairap” tímiayi.

Ni jákatniurín Jesus ujakmiania nu

(Mateu 16.20-28; Márkus 8.30-9.1)

²² Nuyá Jesus tímiayi “Wi Aents Ajasuitjiana ju ti waitsatniuitjai. Wíi shuara uuntri, tura ni Pátriri úuntri^{sha} tura ni jintinniur^{isha} nakitrurar maantuáwartatui. Túrasha iwiartusarmatai menaintiu tsawant jeamtaí nantaktiatjai.”

²³ Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramur^{inkia} iniaisati. Tuke tsawant ni krus^{ri} yanaki nemartusti.

²⁴ Kame shuar ju nun^{kanam} aya pé^{nker} pujustaj tákun^{ka} nu shuar uwemtsuk jakat-tawai. Antsu Winia anentu asa pé^{nker} pujustinniak enentáimtsuna nú shuarka nekas iwiaakman wáinkiat^{tawai}.

²⁵ Iimiata, shuar ashí ju nun^{kanam} ana nuna súmakui tura jinium wétin ákuisha ¿itiurak pé^{nker} pujusat?

²⁶ Wí Aents Ajasuitjiana ju Winiasha tura winia chichampruncha shuar natsantraitku^{inkia}, winia wincharuj^{ai}, winia Aparu wincharij^{ia} tura nayaimpinmaya pé^{nker} suntara wincharij^{ia} atak táakun shuar natsantrurmia nuna natsantrattajai Wí.

²⁷ Tura shuar Yusa akuptairⁱⁿ wáintsuk jákachartatna nu juí pujuiniawai. Nuna nekas tájar^{me}” tímiayi.

Jesus nusháa iira ajasmiania nu

(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsan áujsataj tusa Jesus náinnium wakamiayi. Pítiur, Jakupu, Juan^{jai} nemariarmiayi.

²⁹ Jesus auju pujus nusháa iira ajattsarmiayi. Ni pushir^{isha} ti puju jíitsumir ajasmiayi.

³⁰ Nu^{inkia} jimiara áishman ^{Nii^{jia}} chicháa wajarmiayi. Nuka Muisáis Erías^{jai} ármiai.

³¹ Ní^{ncha} wincha jíitsumir téntakarmiayi. Tura Jesus wáitias Jerusarén^{num} jákatniurⁱⁿ amia nuna áujmatiar^{miayi}.

³² Pítiur ni tsaniakmar^{jia} kari ti pujainiaⁿ iwiáa pujuarmiayi. Tuma ásar Jesusan tura jimiara áishman^{jai} jíitsumir ajas wajainian wáinkiar^{miayi}.

³³ Tura nu áishman ^{Jesusan} ikiuki ween^{ai} Pítiur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisaisnasha, Eríasnasha áakmaktai” tímiayi. Tura Pítrusha enentáimtsuk nuna tímiayi.

³⁴ Nuna chicháa puj^{ai} yuran^{kim} tarí kaput amu^{awarmiai}. Tura yuran^{kim} amu^{am} ti ashamkar^{miayi}.

³⁵ Nu^{inkia} yuran^{minmaya} ju chichaamun antukarmiayi: “Ju^{ka} winia aneamu Uchiruiti. Nii anturkatarum.”

³⁶ Chichaamun antasua amikiar Jesus ni^{nki} wajan wáinkiar^{miayi}. Nu^{inkia} takamtak pujuarmiayi. Tura wáinkiar^{mia} nuna peñké etserkachar^{miayi}.

Uchi iwianchrukun Jesus tsuármiania nu

(Mateu 17.14-21; Márkus 9.14-29)

³⁷ Kashin tsawant^{ai}, náinniumi^a táarmatai, ti untsurⁱ shuar Jesus in^{kiun}tai tusar wear^{miayi}.

³⁸ Nu shuar^{numi} chikichik áishman ^{Jesusan} untsuak tímiayi “Uuntá, waitneasam uchir íirtústá. Uchirsha júchikiiti.

³⁹ Íwianch achik núpeteam niisha nán^{kamas} untsumui. Tura chichichi^{ptu} ajas we-nunmasha saun kaput apaawai. Íwianch nin tuke yajauch awajas an^{kant} awajsatniun nakitiawai.

40 Túmakui ame unuiniamurmin iwianchin júirtukit tusan seamjai. Túrasha tujinkiar-mai” tímiayi.

41 Tutai Jesus tímiayi “Yus enentáimtichutirmin, tutupnik wekaichatirmin ¿urutmá tsawanttsuk atumjai pujustaj. Urutmá katsuntratjatsuk? Uchiram jui itiata” tímiayi.

42 Tura uchi winiaj íwianch nunká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin péñker awajas ni aparin awantuki susamiayi.

43 Tura ashí pujuarmia nu ti enentáimprar “Yuska imiá úuntchakait” tiarmiayi.

Jesus ni jákatniurin ataksha ujakmiania nu
(Mateu 17.22-23; Márkus 9.30-32)

Jesus túramun ti enentáimtu pujuiniaj Jesus ni unuiniamurin tímiayi

44 “Wi tájarmena ju péñker antuktarum. Winia Aents Ajasu tútain surutkartatui.”

45 Tura Nii timia nuna unuiniamuri nekaacharmiayi. Nekaawarin tusa paantcha awajsamuyayi. Tura warinkit tusa anintrustinniasha arantukarmiayi.

“¿Yaki imiá nankaamantuit?”
(Mateu 18.1-5; Márkus 9.33-37)

46 Nuyá ni unuiniamuri, yaki imiá nankaamaku ati tusa, nuamtak mai tunai ajarmi-ayi.

47 Tura ni enentáimsamurin Jesus nekaamiayi. Tuma asa uchin achik ni pujamunam itiamiayi.

48 Itiá tímiayi “Winia anentuk ju uchin shiir awajeana nuka Winiasha shiir awajtawai. Tura Winia shiir awajtana nuka Winia akuptana nunasha shiir awajeawai. Kame átum nankaamantuchu tárugna nu ti nekas nankaamantuiti’ tímiayi.

(Márkus 9.38-40)

49 Nuyá Juanñ tímiayi “Uuntá, shuar ame náarmin pachis iwianchin jiiki akupea nu wáinkiamji. Tura in páchitkiachu asamtai nuka suritkiamji.”

50 Tutai Jesus tímiayi “Antsu suritkairap. Shuar in nakitramachkunka in páchitkiawai.”

Jesus Jakupun Juáñnasha chicharkarmiania nu

51 Jesus, nayaimpiniam waketitniuri jeatemamtai, enentáimmia ímiatrusan Jerusaréñnum we-wémiayi.

52 Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi.

53 Tura Samarianmaya aentska, Jerusaréñnum wéenan nekaawaru ásar itiaatniun nakitrarmiayi.

54 Jesusa unuiniamuri Jakupusha Juanñsha nuna nekaawar, Jesusan tiarmiayi “¿Uuntá, Erías yaunchu túramia núnisrik iisha túrat tusam wakeramek. Nayaimpinmaya ji tara Samarianmaya aentsun amukarti, títiatjik?”

55 Tutai Jesus nin íisar kakantar chicharuk tímiayi “Atumsha atumi enentái urukukit nuka nekamatsrume.

56 Wi Aents Ajasu áentsun emesrattsan táchaitjai. Antsu uwentikratajtsan táwitjai” tímiayi. Nuyá chíkich péprunam wearmiayi.

Jesus nemarsatin
(Mateu 8.19-22)

57 Jintiá weenai, chíkich áishmañ Jesusan chicharuk “Uuntá, tui wétatam nuñsha nemarsatjame” tímiayi.

58 Tutai Jesus tímiayi “Kujanchemasha ni wáarin takaktsuk. Chinkisha pasunken takaktsuk. Tura Wi Yusa Uchirintiatan tepesan ayampratniur atsawai.”

59 Chíkich áishmañkan Jesus “Nemartusta” tímiayi.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsan̄kátrúktá” tímiayi.

⁶⁰ Tutai Jesus tímiayi “Jakaa ainia nu ni shuarin iwiarsatniunka enentáimtusarti. Tura ámeke weme Yus-shuar átin urukukit nu etserkata” tímiayi.

⁶¹ Nuyá chíkich tímiayi “Uuntá, nemarsataj tusan wakerajme. Túrasha wíi shuaran emka áujsan ikiuweartaj tsan̄kátrúktá” tímiayi.

⁶² Tutai Jesus tímiayi “Shuar arayát ukunmaan̄i apajas iimna nu, Yus akupeana nūi takaschamniaiti.”

10

Ni unuiniamur̄in setenta armia nuna Jesus etserkatarum tusa akupkarmiania nu

¹ Nuyá ukunam chíkich unuiniamur̄in setenta anaikiarmiayi Jesus. Tura jímiar jímiar apatak émkitiarum tusa ashí péprunam ashí nun̄kanam ni wétin amia nūi akupkamiayi.

² Akupeak tímiayi “Nekas tájarne, Yus-Chicham étserkum, júuktinia núnisan̄, aents Yus-shuar awajsatin ti awai. Tura zyaki júukat, aya ishichik takainiasha? Tuma asamtai ni takarniur̄i akupkat tusarum Nerentin seatarum.

³ Wetarum. Átumka murikiua núninaitrume. Uunt yawá yujamua núninnium tsumai ámunam akupeajrume.

⁴ Yurumkasha, kuitcha, sapatcha júkiirap; shuarjaj̄i jintiá áujmamsatai tusarum waja-sairap.

⁵ Jeá wayakrum emka jū titiarum: “Jū jeanam pujuinia nuna Yus shiir awajsarti.”

⁶ Nérentin “Ee, nuna wakerajai” tákuin̄kia túrunattawai. Tura “Atsá, wakeratsjai” tákuin̄kia, “nuin̄kia túrunashti” titiarum.

⁷ Jeá wayattarmena nú jeanman̄ pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nūi werum nūi werum ajairap.

⁸ Awaintiamawartatna nú peprunam jearmeka ajampramsartatna nu yuatarum.

⁹ Jaa ainia nu tsuártarum. Túrarum “Yus jū nun̄kanam akupin ajastin ishichik ajatem-sai” nu peprunmayá shuar titiarum.

¹⁰ Íksarmek itiaarmachartatna nú peprunam jearum, jintiá wajasrum jū titiarum,

¹¹ “Yusna nakitra asakrumin, atumi pépruriniá nun̄ka ii nawen peema japirar akakekji. Túrasha jū paant nekaatarum: Yus jū nun̄kanam akupkatin ishichik ajatem-sai.”

¹² Yusa nekapsatin tsawantri jeamtai nu peprunmayá shuaran ti asutiáttawai. Yaunchu Sutumanmayá shuaran asutiámia nujāi nan̄kaamas asutiáttawai. Núnaka paant tájarne tímiayi.

(Mateu 11.20-24)

¹³ Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumí péprur̄in aents tujintiamun ti túraitjai. Warí, yaunchu Tíru péprunmasha, Setun̄ péprunmasha nu tujintiamu túramuitkuin̄kia yaunchu ni enentáin yapajjáwaraaȳi. Túrawar kúntuts pujutai pushin entsarar yun̄kunim ajakiaaraaȳi.

¹⁴ Tura atumsha aents tujintiamu túramu wáiniatrum yapajjachu asakrumin Tirunmayá tura Setun̄numiá aentsjai nan̄kaamas asutniáttarme.

¹⁵ Tura atumsha Kapernáumnumiatirmesha, “ti nan̄kaamantu ajarar nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

¹⁶ Tura Jesus ni unuiniamur̄in junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant,

Winia nakitrakka Winia akuptukua nunasha nakitiawai.” Tú áujas Jesus nin akupkarmiyai.

Setenta unuiniamu waketki táarmiania nu

¹⁷ Ukunam nu setenta unuiniamu warasar waketki táarmiyai. Tura chichainiak “Uuntá, ame náarmijn íwianch jiki akupeam umirtamkamji” tiarmiyai.

¹⁸ Tutai Jesus tímiyai “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai.

¹⁹ Atumniaka winia kakarmarun susamjarme, napi najarmasha titin najarmasha ya-jauch awajtamsairum tusan; tura ii nemasri kakarmari nupetkatniuncha susamjarme.

²⁰ Túrasha íwianch umirtamkui nu enentáimsam warasairap. Antsu atumí naari nayaimpiniam aarma aa asamtai warastarum” tímiyai Jesus.

Jesus warasmiyai

(Mateu 11.25-27; 13.16-17)

²¹ Nuinkia ni enentáin Yusa Wakaní waramtiksam Jesus juna tímiyai: “Aparú, ashí nayaimpijiai nunka Úntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiyai.

²² “Winia Apar ashí surusuiti. Wisha ni Uchiri asamtai Winia nékarui. Tura chikich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiyai Jesus.

²³⁻²⁴ Nuyá ni unuiniamurin iis tímiyai “Wi tájarme, untsurí Yúsnan etserniusha tura uunt akupniusha átum yamáí wáintrum nuna wáinkiatniun wakeruiniayatan wáinkiacharmiyai. Tura átum yamáí ántarme nuna antuktinian wakeruiniayatan antukcharmiyai. Tura Yus achirmaku asakrumin, wáintrumna nu ti péñkeraiti” tímiyai.

Samarianmaya áishman katsumkamun yainmia nuna Jesus unuiniamiania nu

²⁵ Nuyá akupkamun jintinkiertin Jesus warintiak chichakat tusa wajatki werimiyai. Werí iniimiayi “Uuntá, wi tuke iwiaaku átaj takun ¿warinia túratniuitiaj?” tímiyai.

²⁶ Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiyai.

²⁷ Akupkamun jintinkiertin ayak tímiyai “Juna tawai: Ti enentáimsam, tuke enentáimjai Uunt Yus aneeta. Ame kakarmaram, iwiaakmarmesha Yus íktusta. Tura ame ayashim aneamna núnismek ame írutramurmesha aneeta. Núchakait” tímiyai.

²⁸ Tutai Jesus tímiyai “Péñker áimsame. Nu túrakmeke tuke iwiaaku átatme.”

²⁹ Tutai akupkamun jintinkiertin ni aninramun kíishtumaktajtsa wakerak “Winia írutramursha ¿ya ainia?” tímiyai.

³⁰ Takui Jesus tímiyai “Jerusarénumia jintia Jirikiú péprunam jeana nú jintianam áishman wean, kasa áishman tariar ni waririn, pushirincha kasarkarmiyai. Tura katsumkar mayái ashirak ajuantar ikiukiarmiyai.

³¹ Tura Israer-shuar Patri ukunman winis nu áishmankan wáiniak aya íkian iis ikiukiarmiyai.

³² Nuyá ukunam Patri yáintrisha nu jintianam wesa, nu áishmankan wáiniak, áyatik iis ikiuak wémiyai.

³³ Tura nuyá Samaria nunkanmaya áishmansha nu jintianman wesa, nu áishmankan wáiniak ní shuarinchunak wáitnéntramiyai.

³⁴ Nuyá nu áishmankan weantuk ni numpamnamurin asuitijiai tura wíniujai tsuar jaanchjiai penuarmiyai. Tura ni kawairin ekenak jukimiyai. Tura írar kanutainiam jukí ejé nu áishmankan péñker wáinkiamiyai.

³⁵ Tura kashin tsawarmatai Samarianmaya áishman weak jimiará kuítian jusa jeá nérenniurin susamiayi. Susa tímiayi “Ju áishman péñker wáitrukta. Tura wi amaajna ju táasmataisha wi wáketkun akiktajme” tímiayi.

³⁶ Ayu, ámijjaisha, nu menaintiu áiniana nu, ¿tuá imiá nekas katsumkamun waitnentramia?” tímiayi Jesus.

³⁷ Takui akupkamun jintinkiartin chichaak “Entá, katsumkamun wáitnentramia núa” tímiayi.

Tutai Jesus tímiayi “Amesha weme núnismek túrata.”

Marta ni kajijai Marí jeen Jesus pujusmiania nu

³⁸ Nuyá Jesus jintiá wesa chíkich péprunam jeamiayi. Nu péprunmaya nuwá naari Marta ni jeen itiaamiayi.

³⁹ Marta kají ámiayi ni naari Marí. Marisha unuiniamun anturkataj tusa Jesusa nawen pujursamiayi.

⁴⁰ Tura Mártaka ni takatrin ti enentáimtak Jesusan weantuk tímiayi “Uuntá Jesúsá, ¿winia kair takatan winiak íktursainia nuka enentáimsumek? Winia yáintá turuttia” tímiayi.

⁴¹ Tutai Jesus tímiayi “Maaj Martá, untsurí túratin ana nu ti enentáimsam itit awajtamui.

⁴² Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

11

Jesus Yus áujsatniun unuiniamiania nu (Mateu 6.9-15; 7.7-11)

¹ Chíkich tsawantaj Jesus Yúsan áujsatataj tusa atsamunam pujumiayi. Áujtua amikmatai ni unuiniamuri chikichik Nin tímiayi “Uuntá, imiakratin Juan ni unuiniamuri unuiniamia núnismek Yus áujsatin unuitiurta.”

² Tutai Jesus tímiayi “Yus áujkuram ju titiarum:

Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí.

³ Aparú, ii yurumkari ashí tsawant amasta.

⁴ Tura winia nemasrun tsankurajna núnismek, Aparú, winia tunaaru tumashrisha tsankurturta. Tunáa wakeruktin tsankatrukaip. Antsu ashí tunaanumiá uwemtikurta.”

⁵⁻⁶ Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearuí yama tayi. Tura ajamsatniun penké takaktsujai. Tuma asamtai amikru, menaintiu apatuk ajamprustá” tíchatameash.

⁷ Tura nii inít pujusan chichaak “Warí, wáitisha epenmiaiti, tura winia uchirsha wijjai ashí tepeenawai. Itiur nantakniak amastaj. Itit awajtipia” turamchanpiash.

⁸ Wats, paant tájarme, niisha amikrum asa, nantaki ikiatmastinian nakitiayat, itit awajtin tusa nantaki ashí wakeramna nuna suramsattawai.

⁹ Tuma asamtai tájarme: Yus seatarum; túrakrumin suramsattarme. Eakrumka wáinkiatarme. “Winiajai” tákurmin awaintiamattarme.

¹⁰ Seana núnaka suíniatsuk. Eana nuka wáintsuk. “Winiajai” tuinia núnaka awainiatsuk.’

¹¹ ‘Wats, átum uchirtintiram, ame uchiram apatkun seatmakui ¿kayaash súsaintiam? Namakan seatmakui ¿napíash súsaintiam?

¹² Nujintian seatmakuisha ¿titinkiash súsaintiam?

¹³ Warí, átum imiá yajauchitirmesha atumí uchirí péñker ana nu tuke súchakaitrum. Atumí Aparí nayaimpiniam pujana nu, seakrumniñkia nú nan̄kaamas ni Wakan̄in suramsattawai.” Tu unuiniamiayi.

*Jesusan “iwianchi kakarmarijiaí túrawai” tiarmiayi
(Mateu 12.22-30; Márkus 3.19-27)*

¹⁴ Shuar iwianchruku asa chichachu ámiayi. Nuna enentáyan nu iwianchin Jesus jiki akupkamiayi. Íwianch jinkintai chichachu chichasmiayi. Túramtai shuar nuí pujuarmia nu ti enentáimprarmiayi.

¹⁵ Tura chíkich tiarmiayi “Juka iwianchi kapitíantri Satanásan, ni chíkich naari Pirsepún umirniuiti. Tuma asa nuna kakarmarijiaí iwianchin jiki akupeawai.”

¹⁶ Tura chíkichkia, nekas Yúsnumiá taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

¹⁷ Tura Jesus tu enentáimiainian neka asa tímiayi “Núu nun̄kanmayaan shuar nuamtak kajernaiyakuiñkia nú nun̄ka wárik meserchattawak; nuamtak shuarsha ni shuarijiaí kajernaiyaksha amunaikchartatuak.

¹⁸ Wíniaka “Pirsepú iwianchi kakarmarijiaí iwianchin jiki akupeawai” túruttsurmek. Tuma asamtai tájarne, uunt iwianch Satanás naartin, ni suntarijiaí kajernaiyaksha çitiur tuke kakaram átinkí?

¹⁹ Tura Wi Pirsepú kakarmarijiaí iwianchin jiki akupeakuñkia, atumi shuarisha çyana kakarmarijiaí iwianchin jiki akupena? Niisha “iwianchi kakarmarijiaí túrichuitji” tuiniaisha çitiura Winiasha, “iwianchi kakarmarijiaí túraiti” turutmini-atrum?

²⁰ Wikia Yusa kakarmarijiaí iwianchin jikin akupeajai. Nu nekaarum Yus atumi enentáin akupin ajasuana nu nékarme.’

²¹ ‘Kakaram áishman kúishtumaktajtsa iwiarnar wajas jeen wáinkui, ni warirí init ana nusha tímiatrusan ániawai.

²² Antsu nijiaí nan̄kaamas kakaram ana nu winiakka nupetkashtatuak. Tura kúishtumaktinian iwiar takakman jurawai. Tura kasamkámun ni amikrín súawai. Kakaram áishman iwianchin nakumeawai. Tura nujai nan̄kaamas kakaram áishman Winia nakumprawai.

²³ Iista. Winia nemartatsna nu winia nemasruiti. Núnisan Winia yáintsuna nuka aya itiurchat nájateawai.’

*Iwianch jiki akupkamuiat wáketna nuna ujakmiania nu
(Mateu 12.43-45)*

²⁴ Nuyá Jesus juna tímiayi: ‘Shuara enentáiya íwianch jinki ayamprataj tusa yumi pen̄ké yútatsna nuí wéawai. Tura ayampratniun wáincha asa ataksha waketkitniun enentáimui. “Wi jinkimij nuñ waketkitjai” tawai.

²⁵ Tura waketki péñker iwiaramun tura an̄kant aan wáiniui.

²⁶ Nuna wáiniak, ni ain siati iwianchin nijiaí nan̄kaamas yajaunchin itia en̄kemáwartatui. Túrunamtai nu shuar nuiki nuna nan̄kaamas yajauch ajastatui.” Tu tímiayi Jesus.

Nekas warastin

²⁷ Shuar iruniarmia nuí Jesus nuna chichaa pujai, nuwá un̄sumuk “Ame nukun Yus ti yáin̄kiaí. Ni ampujén ame pujuschamkam. Ámin amuntstamachmakam” tímiayi.

²⁸ Tutai Jesus tímiayi “Antsu ni chichamen antukar umirainia nuna, nukurjai nan̄kaamas Yus ti yáin̄kiaru ániawai, tajai” tímiayi.

(Mateu 12.38-42; Márkus 8.12)

²⁹ Shuar untsurí Níin káunkarmatai Jesus tímiayi “Yamaiya shuarka yajauch ániawai. Yajauch ásar, chichartuiniak “Nekas Yúsnumiáitkiumka aents tujintiamua nu túram Yusa kakarmari iniakmasta” turutainiawai. Túrasha áyatik yaunchu Junas túrunamujai iniakmasmia nujai nekaatin ániawai.

³⁰ Kame Junas túrunamujai Níniwi péprunmaya shuaran yaunchu Yus ni kakarmarín iniakmasmia núnisan yamaisha Aents Ajasu tutainjiana nu Wi túrunamujai Yuska ni kakarmarín iniakturmastatrumé.

³¹ Yaunchu Sarumún uunt akupin pujai Sepa núnkanmaya nuwa akupin Sarumúnka chichamen nekaataj tusa ti jeashtanmaya támiayi. Tura yamaikia Sarumunjai nankaamas pujai átumka anturtatsrume. Tuma asamtai Wi tájarme, Yus ashí shuaran nekapsattana nu tsawant jeamtai nu nuwa, akupniun péñker anturka asamtai, Yus ímianum péñker átatui. Antsu atumsha Winia anturtukcha asakrumin Yus ímianum yajauch átatrumé.

³² Tura Yúsnan etserin Junas Níniwi péprunmaya shuarum Yus Chichaman etserkamtai nu shuar ni tunaarín enentáimtusar enentáin yapajíawarmiayi. Tura jui yamá Junasjai nankaamas etserin pujajai. ¡Tuma asamtai nekapsatin tsawant jeamtai Níniwinmaya shuar yamaiya shuar árumna nuna sumamtikramattarme!

Ayashi tsáapnintri
(Mateu 5.15; 6.22-23)

³³ ¿Shirikip ekeemakar úuktinkiait? Pitiaknumsha enkeashtiniaiti. Antsu shuar jeá wayana nu paant ímsat tusar yakí ekensatniuiti.

³⁴ Ame jímijiai wáinkiam nujai wekasatin nekaattame. Tuma asamtai ame jímijiai péñker ana nu wáinkiumka péñker wekasattame; antsu ame jímijiai yajauch ana nu wáinkiumka, kiritniunam wekasatniua núnisan yajauchiniam wekasattame.

³⁵ Anearta. Enentáimin tsáapin ana nu kiritin ajaschati tusam anearam wekasata.

³⁶ Ame ayashmíin kirit ajatsuk aya tsáapninaiatkiuinkia, shirikip paant awajea núnisan ashí paant wáinkiattame” tímiayi.

Pariséuncha, Israer-shuara jintinniurisha “yajauchiitrumé” tímiayi Jesus
(Mateu 23.1-36; Márkus 12.38-40; Rúkas 20.45-47)

³⁷ Jesus chichasua amikmatai Pariséu shuar, winia jearuj yurumáitia tusa untsukmiayi. Tutai Jesus wayá misanam pujusmiayi.

³⁸ Tura Israer-shuar ikijmartin ana nuna túrutsuk aya pujakui Pariséusha nuna wáiniak “maa ¿urukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurumtairi aya pátatek nijiaaktin ti wakeriniaitrumé. Atumsha nu yurumtaijiai méteketrumé. Pátatek péñker túrarme. Tura atumí enentáinkia kasamkatniusha tura yajauchia nusha piakuíti.

⁴⁰ ¡Enentáimcha! Warí, ashí pátatek wáinijai nuna Yus najanachmakia; tura init paantcha ana nunasha Yúsak najanachmakia.

⁴¹⁻⁴² Aneartarum, Pariséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti tátsurmek. Tura antsu nu túratin iniaitsuk péñker wekasatniusha, Yus anenmarmena nusha péñker enentáimsatniuitrumé. Wats init, enentáimin ana nútiksarmek jusam susarta. Nuiñkia ashí chamir átatui.’

⁴³ ‘Tura aneartarum Pariséutirmesha. Yus áujtai jeanam peñkeri pujutainium pujustin wakerarme. Tura jintiá aents ímiainiamunam ti shiir áujtusarat tusarum wakerarme.’

⁴⁴ ‘Jintinniutirmesha, Pariséutirmesha mái-metek aneartarum. ¡Antar shiir chicham-tinia! Iwiarsamu paantcha núniniaitrumé. Shuar nu nankaamaksha nájamiat nékatsui. Núnisan shuar atumí chichame antukar yajauchia nuna nekartamtsurme.”

⁴⁵ Nuikia Israer-shuara jintinniurĭ chikichik Jesusan chicharuk tímiayi “Uuntá, nu takum incha yajauch chichareame.”

⁴⁶ Tutai Jesus tímiayi “Atumsha jintinniutiram aneartarum. Atumĭ akupkamurĭjĭai káarak ti kijin entsakchamnia súarme. Tura átumka yáintaj tusarum atumĭ uwejejaisha penké ántiatsrume.’

⁴⁷ ‘Aneartarum tájarme. Yaunchu atumĭ uuntri Yúsnan étserniun máawarmia nuna iwiarsamurĭ átum jeamniutrum nu etserin ti péñker ásarmatai kajinmatkishtin.

⁴⁸ Nu túrakrum atumĭ uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrum niĭjĭai méteketrum. Warí, Yúsnan etserniun iwiarsamurĭn jeamkuram atumek sumamarme.’

⁴⁹ ‘Atumĭ túramurĭn nekáa Yus ĵuna yaunchu tímiayi: “Winia etserturniun tura winia akatramurnasha niĭn akuptukartatjai. Túramtai chikichnaka máawartatui, tura chikichnaka pataatukartatui.”

⁵⁰ Tuma asantai ashí ni etserniurĭn maamu ainia nuna, yamaiya áentstirmin Yus sumantikramattarme. Nuñka najanamunmaya ĵukĭ

⁵¹ yamáí ímiájai maamu ainia nuna, kame Apir maamunmaya ĵukĭ yamáí Sakarías maamua tímiájai anintrustatui. Namañ maar Yús sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asantai tájarme, ni etserniurĭ maantamawarmia nuna yamáí matsatrumna nútirmin aninmasartatui.’

⁵² ‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

⁵³⁻⁵⁴ Jesus nuna takui Pariséusha, jintinniusha ti kajerkarmiayi. Tura niĭ tana nujai “yajauch túrame” titiai tusar wakeruiniak untsurĭ anintriarmiayi.

12

¹ Nu tumaj shuar ti untsurĭ káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamurĭn tútan juarkimiayi. “Pariséu ántar chichamtin ániawai. Nuka wakaprutaiya núnisaiti. Wakaprutaikia nijiamanch yumirniun yama enkeam páantchaiti. Tura ukunam nekaamniaiti.

² Núnisan ashí paantcha ana nu iwiainiakma átatui. Uukma ana nusha nekaamu átatui.

³ Nu tuma asantai, kiritniunam tímiarmena nusha tsawái tsáapin ajasmanum antunkattawai. Tura jea inĭt pujusrum ishishmasrum tímiarmena nusha áa ti paant etsernaktatui.’

Yusak ashamkatniuiti (Mateu 10.28-31)

⁴ ‘Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui.

⁵ Tura ya nekas ashamkatniutrum, nuna paant jintintiattajrume. Ame ayashmi maa, nuyá ámin jiniun akuptamkatniun tujintiatsna nu ashamkatarum. Ee, Yus ashamkatarum, tájarme.’

⁶ ‘Jimiará chinĭki ishitiúpchich ishichik kuitjai surukchatniukait. Túrasha Yussha nu chinĭkin penké kajinmatkishtatui.

⁷ Wats, ashamkairap. Untsurĭ chinĭkĭjĭai nanĭkaamas Yuska atumin enentáimturmarme. Warí, ame intiashmin mash Yus nekapmaruiti.’

(Mateu 10.32-33; 12.32; 10.19-20)

⁸ ‘Ashí shuar ashí ímiainiamunam Winia Aents Ajasu tutain, Winia natsantruiniatsna núnaka, Wisha Yusa suntariĭ ímiainiamunam natsantrashtatjai;

⁹ antsu shuar ímiainiamunam Winia natsantrana núnaka Wisha Yusa suntariĭ ímiainiamunam natsantrattajai.’

10 ‘Winia, Aents Ajasu tutain, shuar yajauch chichartakuin_{ki} nusha tsan_{ku}ramniaiti, tura Yusa Wakan_{in}cha yajauch chicharkuin_{ki} nuka pen_{ke} tsan_{ku}rachminiaiti.’

11 ‘Wats, Israer-shuar iruntai jean_masha, tura Israer-shuar kapitiánnumsha, uunt-numsha juramainiakui, aninmainiakui_{sha} warintiajak tusam ti enentáimsáip.

12 Ame áimkiatin jeamtai, Yusa Wakan_i ame tíiatmena nuna jintinramattawai,” tu timiayi.

Kuítiak enentáimtuschatniuitji

13 Chíkich áishman_u Jesusan tímiayi “Uuntá, ii apar_i ikiurtamkimiaj nuna yatsur wini-asha nakak surustí, titia” tímiayi.

14 Tutai Jesus tímiayi “Áishman_{ka}, atumin nu túratin anaikiamukaitiaj.”

15 Nuyá tímiayi “Pén_{ker} enentáimsatarum. Nii takakna nújain_u shuar iwiaaku, áchatniuiti. Tuma asamtai kuítrintin ajastin aya nuke enentáimsaip.”

16 Nuyá juna métek-taku chichaman unuiniak tímiayi:

“Kuítrintin áishman_u ni ajariyan_u arakan ti nukap juukmai.

17 Tura “¿Ti nukap asamtai tui_n ikiustaj. Itiurkatjak?” tu enentáimsamiai.

18 Wats, wi nékajai. Winia ikiutái-jea_run ashiran nú nan_{ka}amas úuntan najanatjai. Tura nu_i ashí ikiustajai.

19 Nui_nkia untsur_i uwitin shiir pujustinian ikiusman takustatjai. Tuma asamtai, ayampran, yurumán, umaran shiir pujustatjai” timiai.’

20 ‘Tura Yus nin chicharuk timiai “Netse. Yamái kashi jakattame. Nui_nkia imiá núkap ikiusumna nusha ¿yana átata?” timiai” tímiayi.

21 Nuyá Jesus tímiayi “Shuar ni_nki kuítr_in ikiauntumna nu, núnisaiti. Túrasha Yusjái íismaka kuítrin_{ch}aiti.”

Yus ni uchirín pén_{ker} wáinkiaiti

(Mateu 6.25-34)

22 Nuyá ni unuiniamur_in Jesus juna tímiayi: “Warí yuarik pujustaj_i tura warin_u entsar-taj_i tusarum nuke ti enentáimsairap.

23 Yus iwiaaku átinian amasu asa yurumkancha amastatui. Tura ju_u ayashniasha najana asa entsataincha amastatui.

24 Chin_{ki}sha enentáimsatarum. Niisha arakmainiatsui. Juuk yurumkan ikiuini-atsui. Tuma ain_u Yuska ni yurumátniur_in tuke súawai. Atumsha chin_{ki} nuna nan_{ka}amaschakaitrum.

25 Tura ya shuarak, ti enentáimtana nujai_i nú naya ajasminiait.

26 Kame yúpichuch ana nusha túrachminiaiatrumsha, ¿urukamtai chíkich ainia nusha ti enentáimtarum?”

27 ‘Íistá, kukujsha takaachitiat tura nájanchitiat ti shírmach áiniawai. Yaunchu akupin Sarumú_n ti shiir iwiarmamniuitiat kukujia tímianchayuyai.

28 Iis, nupa yamá tsakaawai tura kashin aents tsupikiar jinium apeánáwai. Tuma ain_u Yus ti shiir awajeatsuk. Nuna tura asa atumniasha nú pén_{ker} wáitmakchattawak. ¿Urukamtai Yus nekas enentáimtatsrum?”

29-30 Ju_u nun_{kan}am ana nu ti pachirap. Chíkich shuar, Yúsan nékainiatsna nu, warin_u yu-ataj_i, warin_u umartaj_i nuna ti pachiniawai. Tura atumsha tu enentáimsairap. Urukatjak, tiirap. Ame Apa nayaimpiniam pujana nu, ashí atsumarmena nuna nékawai.

31 Antsu emka Yusna nu enentáimtustarum. Túrakrumni_nkia atsumamna nuna Yus suramsattawai.’

Kuítian pachis Jesus unuiniamiania nu

(Mateu 6.19-21)

32 ‘Winia murikrutiram ashamkairap. Untsur_ichuitrume. Túrasha atumí Apar_i ni akuptair_in pachitmaktasa ti wakerutmarme.

33-34 Kuítrum tui aa, nuí tuke enentáimtittiarme. Tume asamtai takakrumna nu surukrum atsumainia nu susatarum. Nuka enketai arut ajatsna nuí enkeatniua núniskete. Túrakrum nayaimpinmaya kuit amuatsna nu íkiaúwearme. Nuísha kasa nu kuitian kasamkataj tusa wayachminiaiti, tura kayaasha nu kuitian yúatniun tujintiawai.’

Anearar wekasatniuitji

35-36 ‘Ju enentáimsatarum. Ni uuntri nuatnaikiatin námpernumiá taa, “uraitia” takui, takarniuri jinia ekeemakar wárik urattiai tusar nakáa pujuiniawai. Atumsha núnisrumek Wi atumi Uuntri támatai, shiir itiaatai tusarum anearum wekasatarum.

37 Ni uuntri taak iwiáa pujuinian wáinkiarai nuka shiir pujuiniawai. Nu úuntak iwiar, “misanam pujustarum” ni takarniurin títiatui tura yurumkan sústartatui.

38 Kashi ajapén taaksha tura tsawaana ai taaksha ni takarniurin iwiáa pujuinian wáinkiuinka, nu takarin shiir pujuiniawai.

39 Tura jusha nekaatarum. Jeennia nu, kasa tátinian nékaitkiunka, iwiáa pujusaayi. Kasa wayá kasamkatniun suritkiaayi.

40 Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

Pénker takarin yajauch takarniujai

(Mateu 24.45-51)

41 Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?” tímiayi.

42 Tutai Jesus tímiayi “Atumsha pénker takatan wáinnia núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úuntrin shiir umirna nu, tura pénker enentáimtana nu.

43 Ni uuntri taa, takatrin tímiatrusan túran wáinkiuinkia nu wáinniusa shiir enentáimsamniaiti.

44 Umirin asamtai, ni uuntri ashí ni waririn wáitrukat tusa apujsattawai. Nuna paant tájarne.

45 Tura nu takatan wáinniusa “úuntur wau táchattawai” tu enentáimias, ni uuntri takarniurin yajauch awajeakuinkia tura niniki ti yurumá, ti umar nampeakuinkia,

46 nuinkia ni uuntri ni nákachmanum aya aneachma taa ti asutiáttawai. Umichu pujuinia nuí akupkattawai.’

47 “Takaran ni uuntri wakera nuna nékayat, iwiartsuk umitsuk pujakka ti awatramu átatui.

48 Túrasha takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisan nankaamas seawartatui.’

Jesusjai shuar akannartatui

(Mateu 10.34-36)

49 ‘Jijjai nekapsatniua nútiksanak nuñkanam jinia ikiapartaj tusan tamajai. Tura túrunat tusan ti wakerajai.

50 Imiantinia núnisan itiurchat ukatruktatui. Nusha wárik amuukat tusan ti wakerajai.

51 “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai.

52 Yamái jukimiutak chikichik shuarnum senku ainia nu akannakartatui; menaintiu shuar ni shuarin jímiarar nakitrartatui. Jímiarsha ni shuarin menaintiun nakitrartatui.

53 Apasha ni uchirin nakitrattawai. Núnisan uchisha ni aparin nakitrattawai. Nukusha ni nawantrin nakitrattawai, nawantrisha nukurin nakitrattawai. Tsatsarisha ni najatin nakitrattawai; najatisha tsatsarin nakitrattawai.”

(Mateu 16.1-4; Márkus 8.11-13)

⁵⁴ Jesus áentsun chicharuk junasha tímiayi “Atumsha nantu akaatainmaani k̄iarmatai “yutuktatui” tátsurmek. Nusha nekas tárume.

⁵⁵ Tura anaarania nase násenkamtai “séejik átatui” tárume. Tura nekas tárume.

⁵⁶ Yurañminmasha nuñkanmasha túruna nu nékarme. Túmaitiatrumsha ju tsawantaj túrunattana nusha ¿itiura nékatsrum? ¡Maaj, ántraitrumel!”

Nemasrumjaisha nawamnaikiata

(Mateu 5.25-26)

⁵⁷ “Túrasha péñker ana nusha ¿urukamtai atumek enentáimsarum wáintsuram?”

⁵⁸ Irutramuram úuntnum júramkuñkia jintia wésamek “nuamtak iwiarartai” titiá. Túrachkumñkia akupniunam juramkittieme. Tura niisha suntarnum akuptamkattame. Tura niisha sepunam enketmattawai.

⁵⁹ Tura nekas tajai, nuñ enkemamka ashí rearchisha akikmachkumka jíinkishtatme” tímiayi.

13

Ii enentái yapajíátniuitji

¹ Nu tsawantin chícham ujaktai tusar Jesusan tariarmiayi. Kariréa nuñkanam Israer-shuar ni waakarín máawar Yus susatai tusar pujuiniaj, Piratu nin maa, nuna numpen waaka numpejaj pachimpramun ujakarmiayi.

² Tura Jesus tímiayi “¿Warí enentáimsarum? Kariréanmayá áishman tárumna nu, chíkich Kariréanmayá áishmanjaj nankaamas yajauch ásar túrunawarai ¿tu enentáimprumek?”

³ Atsá; atumí enentái yapajíáchkurmeka núnisrumek atumsha jakattarme. Nuna paant tájarme, tímiayi.

⁴ Tura tiasiúchu áishman yakí jea Seruí kupiniak iniaak nekenkarmiania nu, ¿warí enentáimtarum? Chíkich Jerusarénnumiá shuarjaj nankaamas tunáa ásar túrunawarai ¿tu enentáimprumek?”

⁵ Atsá, tájarme. Atumí enentái yapajíáchkurmeka núnisrumek atumsha jakattarme.”

Ikiu numi nereatsna nu

⁶ Junasha Jesus métek-taku chichaman tímiauyi. Júiti:

Shuar ni ajarín íkiu numin araamun takakuyi. Nerekchiash tusa iyumai. Túrasha nere atsumai.

⁷ Nuñkia ni ajarín wáinniun timiai “Antukta, menaintiú uwitin juna nere átai tusan waketrú pujajaj; túrasha penké wáinkiachjai. Ajakta. ¿Urukamtai ánttrash wajastata?”

⁸ Tutai ajá wáinin timiai “Atsá, uuntá; ju uwitin wajastí. Wajamurín takarsatjai tura péñker nuñkan matsatkatjai.

⁹ Nujaj nerekchampiash. Tura tuke nereachkuñkia nuñkia ajakta” timiai”, tímiayi.

Nuwan punuá kaarun Jesus tsuármiania nu

¹⁰ Ayampratin tsawantaj Israer-shuar iruntai jeanam Jesus unuiniak pujumiayi.

¹¹ Nuñsha nuwá pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pañkái nakuenkataj tukamá penké tujinmiayi.

¹² Jesus nuna wáiniak, chicharuk “Nawantrú, ame jaamurmiyá ankant ajasume” tímiayi.

¹³ Nuna tinia ni uwejejaj antiñmiayi. Tura nú chichamaik nuwasha pañkái nakuenkamiayi. Tura Yusa náarín uunt awajsamiayi.

¹⁴ Tura Jesus ayampratin tsawantaj tsuaru asamtai, iruntai jea uuntri kajek irun-trarmia nuna tímiayi “Sais tsawantin takaschatniukait; ayampratin tsawantaj tsuámartaj tusarum táchatniuitrumel. Sais tsawant ana nuñ tátiniaitrumel.”

15 Tura Jesus tímiayi, “¡Ántar chichamtinia! ¿atumí waakarísha atumí umpuururísha yumi aartai tusarum ayampratin tsawantin atíarum júatsrumek?

16 Tura ju nuwasha, atumí shuarí Apraám shuarnumia akiiniaiti. Nii tiasiúchu uwí Satanás yajauch awajsamujai jinkiamuyayi. Nincha ayampratin tsawant ain yajauch awajsamunmaya atíachminkiait” tímiayi.

17 Jesus nuna takui ni nemasrísha natsaararmiayi. Tura penké shuar ni péñker túramurín wáinkiar warasarmiayi.

Mustasa jínkiái

(Mateu 13.31-32; Márkus 4.30-32)

18 Nuyá Jesus tímiayi “¿Yusa akupeamurí warijiaín métek-takuit?

19 Mustasa jínkiáijiai métek-takuiti. Mustasa jínkiaincha shuar ni ajariín araamiayi. Tsapái, tsakaak, uunt numi ajasmiayi. Ti uunt asantai chiní ni kanawén pasunmarmiayi.”

(Mateu 13.33)

20 Tura junasha tímiayi: “¿Yusa akupeamurí warijiaín métek-takuit?

21 Tanta wakaprutaia métek-takuiti. Arinia núkap ana nui nuwá wakaprutain ishichik enkeámiayi. Túram ashí wakapruamiayi.” Tu tímiayi.

Yupikiach waiti

(Mateu 7.13-14, 21-23)

22 Jesus Jerusarénum jeattsá weak untsurí peprunam wayá unuiniarkutak wémiayi.

23 Weai chíkich shuar aniasmiayi “Uuntá, ¿uwemainia nu ishichkikiai?”

24 Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiartatui, tájarme.

25 Jeá nérenniurí wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarme. ¿Tuyantskaitrum?” turamtatrume.

26 Nuyá átum títiatrume “Túrasha, uuntá, iisha ámijiai yurumámji, ámijiai umarmaji. Tura ii pépruríncha unuiniamame.”

27 Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyanka kanaktiarum.”

28 Nuyá Apraámsha, Isaksha, Jakupsha tura ashí Yúsnan etserin Yus akupeana nui wayawaru wáinkiarum tura aa ajapam pujusrum ti úutkuram naim tásarara ajattarme.

29 Tura Yus akupeana nui, nantu tatainmaaniyasha nantu akaatainmaaniyasha, arakiasha, nunkaaniyasha taar, imia Israer-shuarchaitiat yurumátaí tusar pujusartatui. Tura atumsha, “Apraám shuáraitjai” táyatrum, wayashtatrume.

30 Nuiyasha yamáí ukunmaani ainia nusha emka ártatui; tura yamáí emka ainia nusha nuishá ukunmaani ártatui.”

Jerusarénumaani Jesus wémiayi

(Mateu 23.37-39)

31 Nu tsawantai Paríséu aents Jesusan tariar tiarmiayi “Erutis mantamattsá wakerut-mawai. Tuma asantai juyanka wetá.”

32 Tutai Jesus tímiayi “Werum nu kujancham ju titiarum: “Íistá. Yamaisha ishichik tsawant iwianchin júkin akupkartajai; túran jaancha tsuárartajai. Tura ukunam amuk-tatjai.”

33 Tura Jerusarénumaani ishichik tsawant tuke wétiniaitjai. Yúsnan etserin aya Jerusarénumaani jákatniuiti.

34 ¡Jerusarénumaaniatiram, Yúsnan etserin máiniaitrum; tura Yus akatar akupturmakmania nusha kayajai tukurum máiniaitrum! Tuma ain atash ni shiamprín etektana núnisnak Wisha weaktasan wakerimjarme, túrasha nakitramarme.

³⁵ Iistarum. Atumniasha Yus ajapramaitrume. Tura “Yusa náarijn winiana nu, shiir atí” títiatrumna nú tsawant jeatsain penké wáitkiashtatrume. Nuna tájarne” tímiayi Jesus.

14

Áishman eaak-jaan Jesus tsuármiania nu

¹ Ayampratin tsawantaj Pariséu uuntri jeen Jesus yurumáttsa wémiayi. Tura chíkich Pariséu wariniak túrat tusar ii pujuarmiayi.

² Nuj áishman eaak-jaa Jesus pujamunam naka pujumiayi.

³ Jintinniuncha Pariséuncha Jesus aniasmiayi “¿Warí tárur? ¿Ayampratin tsawantaj jaa tsuárminkiait. Tsuárchamniakait?” tímiayi.

⁴ Tura niisha áimtsuk pujuarmiayi. Nuñkia jaan antin tsuármiai. Tura “shiir wetá” tímiayi.

⁵ Nuyá Pariséun chicharuk, “Atumí umpuurarisha, waakarisha waá táurmanum akaiki iniamtai, ayampratin tsawant ain nu chichamaik júatsrumek” tímiayi.

⁶ Takui áimkiatniun penké tujinkiarmiayi.

Nuátnaikiatin nampernum ipiaamu ármia nu

⁷ Ipiaamusha penkeri pujutainium pujustaisar ti wakeruiniakui, Jesus nuna wáiniak juna jintinramiayi:

⁸ “Nuátnaikiatin nampernum penkeri pujutainium pujusaip. Nuj pujakminkia, chíkich ámijiai nankaamas penkeri táchatpiash.”

⁹ “Tura ipiatmania nu chichartamuk “Chikich iiktusta” turamchatpiash. Nuñkia chíkich nánkatkamu pujutainium wéakum natsartatme.

¹⁰ Antsu ipiatmakmin, nánkatkamu pujutainium pujustá. Nuñkia ipiatmamnia nu chichartamuk “Amikru, ámeke jui penkeri pujutainium pujustá” turamartatui. Nujai chíkich ipiaamu ainia nu, “nekas penkerinti” turamartatui.

¹¹ Iimiata, “penkerintjai” tu enentáimtuma nuka péechach awajnastatui. Tura ímianchach enentáimtúmana nuka waantu ajastiniaiti.”

¹² Nuyá Nin ipiaamua nuna chicharuk tímiayi “Amesha yurumáití tusam untsuktajtsam wakerakmeke, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme.

¹³ Antsu yurumáití tusam untsuktajtsam wakerakmeke, kuítrincha, wekaicha, shutuapsha, kusurusha ipiaawarta.

¹⁴ Niisha akirmaktinian tujintiainiawai. Péñker shuar nantakiartatna nuj akinkiat-tame. Nu tuma asantai warastatme” tímiayi.

Unt namperan Jesus nekapmá chichasmiania nu

¹⁵ Nu misanam pujuarmia nuya, chikichik Jesus chichaamun antuk, Jesusan tímiayi “Yus akupeamunam pachiiniak, yurumkuñka ti shiir ainti.”

¹⁶ Nuna takui Jesus juna jintintiamiayi: “Áishman namperan nájanuk, untsurí shuaran taartí tusa akatar akupkamai.

¹⁷ Yurumáin jeamtai “Winitiarum, yurumáin jeayi” tu tiarta tusa ni takarniurin akupkamai.

¹⁸ Tura winichminiaitji tusar ashí ujakarmai. Chíkich timiai “Nuñkan yamáí sumarmakjai. Iyutaj tusa wéakun winishtatjai. Tsankurturti” timiai.

¹⁹ Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai.

²⁰ Tura chíkich chichaak “Yamáí nuatnaikiajai. Tuma asan winishtatjai” timiai.

21 Takarin waketki ni úuntriñ ashí nuna ujakmai. Nuna antuk niisha kajekmiayi. Tura ni takarniurin timiai “Ju péprunam péñker jintianmasha tura uchich jintiachinmasha weme, kuítríncha tura wekaichasha, shutuapsha, kusurusha itiaarta.”

22 Nuyá ukunam ni takarniuri taa chicharuk “Uuntá, ame turutmiamna nútiksanak túramjai; túrasha tuke ankant awai” timiai.’

23 “Tutai ni uuntri chichaak “Jintianam weme, chíkich jintiachiniam weme, wáinmena nu ashí awayawarta. Winia jearuñ piakat tusan wakerajai.

24 Emka ipiaawarmajnia nuka penké chikichkíksha winiñkia yurumáchartatui, tajarne’ tímiayi.”

Kristu nemarsatin yúpichuchichuiti

25 Untsurí aents Jesusjái irunki wearmiayi. Niisha nuna apajas iis juna tímiayi:

26 “Shuar ni aparíncha, ni nukuríncha, nuaríncha uchiríncha, yachíncha, umaincha Wijjái nankaamas enentáimtakka, tura shiir pujustinian wakerak Winí winitniun naki-tiakka winia unuiniatur ajaschamniaiti.

27 Ni wakeramurin ajakeak ni krusri yanaki nemartatsna nu winia unuiniatur ajaschamniaiti.’

28 ‘Jeá yakí jeamtaj tusan wakerakmeke, kuítian urutmak ajapawaintiaj tusan tura urutmajaink’ amukaintiaj tusan emka enentáimsashtatmek.

29 Túrutsuk aya ukura iniaisam amuktin tujinkiakmiñkia, nuna wáiniainia nu, wishiki-ainiak juna tiartatui:

30 “Iiskua. Nu shuar jeamtinian nankamamiayi. Túrasha amuktinian tujinkiamiayi.” ’

31 “Tura uunt kapitán chíkich kapitánjai mesetan najanatin áchatpiash. Emka, niisha pujus, tias mir (10.000) suntarjai painti mir (20.000) suntar winiana nuna nupetkaint-jash tusa enentáimsashtatuak.

32 Tujintiakka, chíkich kapitán jeachat pujaanak, nawamnaikiatai tusa akatar akup-kashtatuak.

33 Wats, “Kristu unuiniaturí ajastinjái, wi takakjana juna warí winia itiurtawa” tu enentáimsatniuitrume. Túrachkurmeka winia unuiniaturí ajastin tujinkiarne.’

Wee michumarka yajauchiiti

(Mateu 5.13; Márkus 9.50)

34 ‘Weeka jeaku péñkeraiti. Tura michumarka ¿itiurak atak péñker ati?

35 Wee michumarka arakmatniunmasha yayaatsui. Tura tsuatnum ikiusmasha ántraiti. Aya ajapatniukete. Kuishim ákuñkia antuktatum” tímiayi.

15

Jesus murik menkakamu chichaman unuiniamiania nu

(Mateu 18.10-14)

1 Akupniu kuítrin-juu tura yajauch shuarsha Jesusan anturkatai tusar tarú wearmi-ayi.

2 Tuma asamtai Pariséusha, Israer-shuara jintinniurisha Jesusan áujmatainiak “Jusha tunáa shuaran itiaawai tura niijjai yurumáiniawai” tiarmiayi.

3 Nuna tuiniakui Jesus ju métek-taku chichaman jintintiwarmiayi:

4 “Shuar siañ (100) murikiun takuschampiash. Nu siánumiá chikichik menkakamtai nuwintia nuíwinkia ni matsatmariin ikiuak, menkaka nuna ti eakchattawak. Wáintsuk iniaisashtatui.

5 Tura wáiniak yakainium awañkek waras jeen wáketui.

6 Tura jeen jeá ni amikrin, írutramuríncha ikiaanak “Wijjai warastarum. Murikiur menkaka nuna wáinkijai” tawai.

⁷ Wats, nuwintia nuiwi péⁿker shuar akui nayaimpiniam warastin awai. Tura antsu chikichik yajauch shuar ni enentáin yapajjámtainkia, nú nankaamas warastin átatui, tájarme' tímiayi.

Kuit emenⁿakman Jesus unuiniamiania nu

⁸ 'Nuyá chíkich enentáimsatai. Nuwá tias kuítian takakna nuna chikichik menⁿkakamtai, wáinkiataj tusa jinia ekeemak, jeⁿ japimiak émamkes eⁿakchattawak.

⁹ Tura wáiniak ni amikrⁿ, írutramurⁿincha ikiaanak, "Wijⁿai warastarum. Kuit menⁿkakamia nuna wáinkiajai" tawai.

¹⁰ Núnisaⁿ yajauch shuar ni enentáin yapajjámtai, Yusa suntariⁿ matsatmanum ti warastin awai" tímiayi.

Uchi ni aparⁿin waketkitniun Jesus unuiniamiania nu

¹¹ Nuyá Jesus jⁿuna unuiniamiayi:

"Áishmanⁿ jimiará uchin takakuyi.

¹² Tura páatka uchi ni aparⁿin timiai "Apawá, surustiniaitmena nu yamá surusta."

'Tutai ni aparⁿ ni kuítrⁿin jímiapetek nakak mai uchin susamai.

¹³ Ishichik tsawant nankaamasai páatka uchi ni warirⁿin irur jukí jeachat chíkich núnkanam wémai. Nuisha náⁿkkamas yajauchin túrak kuítrⁿin ashí ajapamai.

¹⁴ Ni kuitriⁿ ashí amuuka aⁿin nu nunkanam ti tsuka ámai. Niisha núnisaⁿ tsukariⁿin wáitsamai.

¹⁵ Túmak takatan eⁿaktajtsa nu nunkanmayaⁿ apachiⁿin werimiai. Nu áishmanⁿsha kuchirⁿin wáitrukta tusa akupkamai.

¹⁶ Uchi ti tsukamak kuchi ukatramun niisha yuátajtsa ti wakerimiai. Túrasha penⁿké súcharmai.

¹⁷ Tumáa pujus nuinⁿkia enentáimpramai. "Winia aparⁿuí takau shuar péⁿkeran ti yurumáiniawai. Tura wikia juⁿ tsukaruⁿ wáitiajai.

¹⁸ Wats, aparⁿuí waketkitjai. Tura aparun chicharkun "Apawá Yúsjaⁿisha ámijiaⁿisha tunaan túrajai, titiajai.

¹⁹ Ame uchiram áchamniaitjai yamaikia. Ame takarniurmea áantsanak átaj tusan wakerajai" titiajai" tu enentáimsamai.

²⁰ Tura wajaki ni aparⁿin waketkimiai' tímiayi.

'Tura ni aparⁿisha jeachat winian wáiniak waitnentramai. Aparⁿ tsékeⁿki inⁿkiun miniakak mukunámai.

²¹ Nuinⁿkia uchirⁿisha timiai "Apawá, Yúsjaⁿisha ámijiaⁿisha tunáan túrajai. Ame uchiram áchamniaitjai."

²² 'Túrasha ni aparⁿinkia ni takarniurⁿin chicharuk "Ti penⁿker pushí itiarum áentsratarum, timiai. Tura uwejnum aweetaisha aweemtikiatarum. Tura sapatcha aweemtikiatarum.

²³ Túrarum waaka nueram ana nu maatarum. Námpⁿer nájankur shiir enentáimsar yurumámi.

²⁴ Warí, ju winia uchir jakaapitia tu enentáimsamjai. Túrasha iwiaakui. Menⁿkakama nuna wáinkiajai." Nuinⁿkia ti warasarmai' tímiayi.

²⁵ 'Tumaiⁿ iwiáiⁿ úchikia takatnum pujumai. Tura wáketuk, jeá nuntumas jantsemáiniak túntuiyamun antukmai.

²⁶ Nuinⁿkia yaintrⁿ matsatun chikichkiniak untsuk "¿Warimpait?" timiai.'

²⁷ 'Tura nii chichaak "Ame yátsum tayi. Túramtai ame apa waaka nueram maatai tawai, ame yatsum péⁿker tau asantai" timiai.'

²⁸ 'Tura iwiáiⁿ uchi kajek wayatniun nakitramai.'

'Tuma asantai ni aparⁿí jiintiuki "wayata" timiai.'

29 ‘Tura uchisha aparín chicharuk “Wisha ámin umirkun untsurí uwitin ame takatru-min túraitjai. Nu nékame. Túrasha winia amikrujai námper najanatín chiipiuksha penké surichuitme.

30 Tura ju ame uchiram nuwajai yajauchin túrak ame kuítrumin wasurkania nu támatai, waaka nueram máachumek” timiai.’

31 ‘Takui aparí chicharuk “Uchirú, ámeke wijiai tuke pujame. Tura wi takakjana nusha ashí áminuiti.

32 Tura ame yatsum jákaiti tu enentáimsamaj nu iwiaakuiti. Menkaka nu yamaikia wáinkiaji. Tuma asamtai námper najanar waraschatniukaitiaj” timiai” tímiayi.

16

Takatan wáinin

1 Ju métek-taku chichamnasha Jesus ni unuiniamu7 ‘Tura nii chichaak “Ame yátsrín unuiniamiayi.

“Kuítrintin áishmanka takatrín wáinniurí ámai. Tura nérenniun ujainiak “Ame wáinniuram ame kuítrumin nánkamas ajapeawai” tiarmai.’

2 ‘Nuna antuk ni wáinniurín untsuk “¿Warinia júsha turamainia? timiai. Yamaikia winia wáinniur áchattame. Tuma asamtai winia kuítrujai itiurkamea nu iniaktursata” timiai.’

3 ‘Tutai takatan wáinin enentáimsamai. “Maaj, wisha itiurkatjak, timiai. Nunka táurtinniasha jeatsjai. “Kuit surusta” títinniasha natsamajai.

4 Winia takatur atsakui yurumkan ajamprusarat tusan túratajna nuna nekajai” tu enentáimsamai.

5 Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

6 ‘Niisha ámiuk “Asuitin sian taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya senkuentachik aarta” timiai.’

7 ‘Nuyá chíkich tumashmaku támatai “¿Amesha urutmá tumashiitiam?” timiai.’

‘Tutai nii chichaak “Shana sian taru tumashiitjai” timiai.’

‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

8 ‘Nuyá takata wáinniu uuntri nuna nekáa “Nii yajauch túriniaiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarjai nankaamas Yus-shuarcha aijjai ni túratniuriniak takainiak imiá enentáimkia ániawai.’

9 ‘Ju nunkanam anañkatin átsuk. Tura kuitsha aya ju nunkanmayanquete. Tuma asamtai atumsha kuitrumjai “shuaran yaintaj” tu enentáimsatarum. Kuitjai yaintin amuukamtai atumsha amuicha jeanam ipiaamu átaj tusarum túratarum.”

10 ‘Shuar ishichik takakna nujai péñker túrakka, núkap takakna nujaisha péñker túrattawai. Tura ishichik takakna nujai péñker túrachkunka, núkap takakna nujaisha péñker túrashtatui.

11 Tuma asamtai ju nunkanmaya anañkartin kuitjai péñker túrachkurmeka, tuke átin ana nujai takastincha ¿itiur takastarumek?

12 Takakme nuna Yus ikiatmasuiti. Nujai péñker túrachkurminkia, atumnia átinia nuna ¿itiurak suramsat’?

13 ‘Takarniurí jimiará úuntrintin ajastinian tujintiawai. Warí, chikichnaka aneak chikichnaka nakitrashta túrattawai. Turya senkuentachik aarta” timiaituak. Chikichan umiruk chikichnaka umirkashtatui. Yussha kuitcha máimetek enentáimtusamniaitrumek” tímiayi Jesus.

14 Pariséusha kuítian anen armia nu, ashí ni táman antukar Jesusan wishikrarmiayi.

15 Túmakui Jesus nin tímiayi “Atumsha aents ímmianum pé_nker awajmamprume. Túrasha atumí enentáincha Yus pé_nker nékawai. Kame winia “nañkaamantuiti” turutit tusa wakera nuna Yuska nakitiawai.’

Yaunchu etserkamu, yamá etserkamu

16 ‘Juan étser_sain Muisáis aar akupkama nunasha tura Yúsnan etserin unuiniarmia nunasha antuktin á_rmiayi. Tura yamaisha tímiania_i ti shiir chicham awai. Yus akupeana nu_j urukukit nuka paant etserkamuiti. Tura ashí shuar nu_j pachiinkiataj tusar ni kakarmari_jia_i ti takainiawai.’

17 ‘Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nu_nkasha amukatniuj_ai nañkaamas itiurchataiti.’ *

18 ‘Áishman nu_ar_in ajapa chikichan nuátkun_ka tsanirmawai. Tura nuw_a ajapamu niiniurtakka nusha nú_nisa_n tsanirmawai.’

Kuítrintin áishman Rásaruj_ai

19 ‘Áishman kuítrintin á_mai. Niisha imiá shiir pushin ti kuit ainia nu_ja_i iwiarmamniuyi. Tura tuke tsawant yurumak ti kuit amia nu_ja_i namperan najanniuyi.

20 Tura kuítrincha á_mai ni naar_j Rásaru. Niisha kuchapruku tunamaruyi. Tuke tsawant kuítrinniu wáitir_in pujuyi.

21 Ti tsukamak kuítrinniu misarina_a kakekan yuattsá wakerimia_i. Tura yawasha ni kuchapr_in nukatiarma_i.

22 Kuítrincha jakamai. Jakamta_i jaka shiir pujutainium, Apraám pujumia nu_j nayaimp-inmaya suntar júkiarma_i. Kuítrinnius_ha jakamai. Jakamta_i iwiarsarma_i.

23 Jaka pujutainium wáitias pujus, pañkái ímias, Rásarun Apraám_ai pujuinian wáinkiamai.

24 Wáiniak unsumuk “Apawá Apraamá wáitnentrurta, timiai. Rásaruka tsara uweje_ai entsan uchupir winia iniairun imichturat akupturkata. Wisha ju_j jinium pujusan ti waitia_ai” timiai.’

25 ‘Tutai Apraám timiai “Uchirú enentáimpratá. Ame nu_nká iwiaaku pujusam ti shiir pujumame. Antsu Rásaruka nu_j ti yajauch pujumai. Tura niisha yamaikia ju_j áyamui tura áme_ka wáitiame.

26 Tura nú arant nánata ti uunt awai. Tuma asamta_i ju_yá a_i wétinian wakeruiniayat tujintiainiawai. Tura a_iya ju_j tátinian wakeruinia nusha tujintiainiawai.” ’

27 ‘Nuiñkia kuítrintin timiai “Nuiñkia apawá Apraamá, ju_na seajme. Winia aparú je_n Rasaru akupturkata.

28 Nu_jisha winia yatsur sen_ku matsatainiawai. Niisha ju_j wáitsatniunam tácharat tusa ujá_kartí, tájame” timiai.’

29 ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.” ’

30 ‘Tutai kuítrintin áimkiamai “Túrasha apawa Apraamá, antsu jakamunmaya_a nantaki, shuar we ujakam enentáin yapaj_jáwarainti.” ’

31 ‘Tura Apraám timiai “Muisáis áarman tura Yúsnan etserin áarman anturainiachku_nká jaka nantaki we ujakmasha antukchartatui” timiai.” Tu áujmatsamiayi Jesus.

17

Yajauch túrumtikiatin ti tsúumainti

(Mateu 18.6-7, 21-22; Márkus 9.42)

1 Jesus ni unuiniamur_in ju_na tímiayi, “Aentsun yajauchin túrumtikiattana nu tuke átatui. Tura shuar ni a_in tunaan wakerumtikna nu aneartí.

* 16:17 Mateu 19.1 ya sen_kuentachik aarta” timiai-12; Márkus 10.1-12

² Ju shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsain uunt kayajai kuntujnum jiníkiá nayaantsanam ajunkam maak ainti.

³ Túrasha atumek ímiastarum. Ame yatsum ámin tunáa túrutmamtainkia chicharkata; tura niisha “tsaṅkurturta” túramkuinkia tsaṅkurata.

⁴ Chikichík tsawantiniṅ siati túrutmamtai, tura “tsaṅkurturta, atakka túrashtatjai,” siati túramkuinkia, tuke tsaṅkurata.”

Yus nekas enentáimtakrikia tujinkiashtatji

⁵ Jesusa unuiniamuri Nin chicharuk “Yus enentáimtajnia nú naṅkaamas enentáimtustin yáinmaktá” tiarmiayi.

⁶ Tutai Jesus tímiayi “Mustasa jiníkiái ti ishitiúpchich ana núnisaṅ ishichkisha Yus enentáimtaikurmeka, sikiumuru numi wajana nu, “Wajamurmijaṅka ukuiniakam nayaantsanam wajasta” tákurmin nú numi umirtamkainti.’

Yusa takatri takasar “ti penker túraitji” tíchatniuitji

⁷ ‘Atumí takarniuri arakmasua amik, waakancha iis támatai, ¿nú chichamaik amesha, “Winitíá, yurumáitiá” tíintmek?

⁸ Atsá. Antsu, “yurumak iwiarturata. Wi yurumátin tura umartincha surusminiam iwiarnarta. Nuyá ame yurumátá.” Nu tíchaintmek.

⁹ Nii túratin ana nunak túratsuk. Tuma asamtai yumisashatme.

¹⁰ Atumsha núnisrumek Yus túramna nu ashí umikiam “ti penker túraitjai” tíchatniuitme. Antsu “aya ii túratniuri ana nuke tura asar iikia ántraitji” títiniaitme.” Tu tímiayi Jesus.

Tias áishmaṅkan tunamarun Jesus tsuáarmiania nu

¹¹ Jesus Jerusarénum wesa Kariréa nuṅka ikiuki Samaria nuṅkanam naṅkaamakmiayi.

¹² Tura péprunam jeamtai, tias áishmaṅ ripra suṅkurjai tunamaru armia nu, arant wajasarmiayi.

¹³ Tura untsumainiak “Uunt Jesusá, waitnentrurta” tiarmiayi.

¹⁴ Jesus nin wáiniak, “Pátrij werirum iniaktumastarum” tímiayi.

Tura wésar penker ajasarmiayi.

¹⁵ Nuyá chikichik ni tsuamarman nekáa kakantar chichaki Yusa náarin uunt awajki waketki Jesusan tarimiayi.

¹⁶ Yumisataj tusa Jesusan tikishmatar piniakumar tepesmiayi. Nu áishmaṅka Samarianmayayuyayi.

¹⁷ Nuna wáiniak Jesus tímiayi “Tsuámaru tiáschakait. ¿Chíkich nuiwisha tui pujuinia?

¹⁸ ¿Ju yajaya áishmaṅ nínikik Yusa naari uunt awajsataj tusa waketki tai?”

¹⁹ Nuyá áishmaṅkan tímiayi, “Winia nekas enentáimtursa asam penker ajasume. Wajakim shiir weta” tímiayi Jesus.

¿Yusa akupeamuri urutaik ati?

(Mateu 24.23-28, 36-41)

²⁰ Pariséu aents Jesusan aníak “¿Yusa akupeamuri urutaik ati?” tiarmiayi.

Tutai Jesus tímiayi, “Yusa akupeamuri paant wáinkiachminiaiti. “Yamáí naṅkamnayi” tíchamniaiti.

²¹ “Juí awai, nuisha awai” tíchamniaiti. Warí, Yusa akupeamurinkia atumiin pujawai” tímiayi.

²² Nuyá ni unuiniamuri chicharuk juna tímiayi: “Tsawant jeattawai atumsha Winia Aents Ajasu tutain “aya chikichík tsawantkesha Nii wáinkiarkia mak” turuttiatrume. Túrasha tujinkiattarme.

²³ Aents Ajasu tutai “juí pujawai, nuisha pujawai” tuíniakui weriirap. Tana nu nemariirap.

²⁴ Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisan wi taamu paant átatui.

²⁵ Tura nu túruntsaïn yamai pujuinia nu Winia nakitruiniakui ti wáitsatniuitjai.

²⁶ Winia atak tátiniur jeamtai, yaunchu Nuái pujumia nú tsawantin túrunamia núnisan túrunattawai.

²⁷ Yurumáwarmiayi, umararmiayi, nuatnaikiarmiayi, ni nawantri nuatnakat tusa surukarmiayi. Tumáa pujuinia Nuái uunt kanunam enkemprantai, amarak nu aentsnasha mash amuukarmiayi.

²⁸ Tura Sutuma péprunmasha Rauta írutramurisha núnisan Yusa asutiátniuri enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajarmarmiayi, jeancha jeammarmiayi.

²⁹ Tura Raut Sutuma péprunmaya jiinkintai asupri tutai kaya keek yútana áintsan nayaimpinmaya kakeetuk nu áentsun mash máawarmiayi.

³⁰ Núnisan winia atak tátiniur jeamtai enentáimtsuk pujusartatui.'

³¹ 'Nu tsawant jeamtai jea yakiini pujana nú shuar ni waririn achiktaj tusa akaikishti. Jeá wayashti. Tura kampunniunam wekaana nú shuar ni jeen waketkishti.

³² Rauta nuarí túrunamu enentáimpratarum.

³³ Aya ju nunkanmayaan enentáimias "iwiaaku átaj" tana nu ni iwiaakmarin emenkáttatui. Tura ju nunkanam ni iwiaakmarin emenkana nu nekas iwiaakma ana nuna wáinkiáttawai.

³⁴ Paant tájarme. Nú káshitin jimiará áishman nuu peaknuman kanúu tepeartatui. Chikichik junaktiatui, chikichkia ikiunkittiawai.

³⁵ Jimiará nuwá mái-metek nekée pujuartatui. Chikichik junaktiatui, chikichkia ikiunkittiawai.

³⁶ Jimiará áishman kampuniunam wekainiartatui. Chikichik junaktiatui, chikichkia ikiunkittiawai." Tu tímiayi.

³⁷ Nuna antukar "Uunta ¿tui túrunatta?" tiarmiayi.

Tutai ni chichaak "Jaka tepana nu chuan káutkartatui."

18

Shuar yawetsuk Yúsan tuke áujsatniuiti

¹ Shuar yawetsuk Yúsan tuke áujsatniua nuna unuiniartaj tusa Jesus ju métek-taku chichaman tímiayi:

² "Chikich péprunam shuaran akupin amai. Nú áishman Yúsnasha ashamchauyi; shuárnasha pénger enentáimtichuyi.

³ Tura nú péprunam waje amai. Niisha shuáran akupniun chicharuk "Áishman winia yajauch awajtusmania nu írtusta" tusa tuke waketrú pujuyi.

⁴ Yámankamtaikkia nin anturkatniun nakitmiai. Tura ukunam enentáimias "Wisha Yúsan ashamachiatnak shuárnasha pénger enentáimtichuiatnak ju waje tana nuna túrattajai.

⁵ Warí niisha tuke taa itit awajtatsuk. Tuma asantai nin kajerkaaj tusan wárik túrattajai" timiai" tímiayi.

⁶ Nuyá uunt Jesus tímiayi "Shuaran akupin yajauchiitiat nuna timiai.

⁷ Tura Yus ti pénger asa, ni achikmarin tsawaisha, káshisha untsuamka nú nankaamas anturkashtatuak. ¿Yáitsuk menkakatatuak?

⁸ Atsá, wárik yáinkiertatui, tájarme. Tura Wi Aents Ajasuitjiana ju atak támatai, ¿shuaran tuke Winia nekas enentáimturainia nuna wáinkiatjash?" tímiayi Jesus.

Pariséusha, kuítian-juuncha Yúsan áujsarmia nu

⁹ "Péngeraitjai" tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

10 “Jimiará áishman Yusa Uunt Jeen Yus áuj̄satai tusar wearmai. Chíkichkia Pariséuuyi, chíkichkia kuítian-juuyi.

11 Pariséusha wajaki Yúsan áujuk júnis tímiayi: “Yusrú, chíkich áishman kasa, yajauch, tsanirmau ainia nujai métekcha asan yum̄sajme. Tura ju kuítian-juu wajana jújajsha métekchaitjai.

12 Warí, Ame akupkamna nuna iniankasan wisha chikichík semanatinin jimiará tsawant ijiarman áujeajai; tura wi achiajna nuna tiásnumiá chikichkiniak Yúsnaiti tusan akanan súajai.” Tu tímiayi.

13 ‘Tura kuítian-juusha arant wajas, nayaimpinmaan̄i pankái ímsatniunkesha natsaamak, tsuntsuma, ni netsepen awatí “Yusá, ti tunaitjai. Waitnétrurtá” timiai.’

14 ‘Wats tájarme, nu kuítian-juu shuar Yus ímmianum ni enentái péñker awajnas ni jeen waketkimiai. Tura Pariséuka tamia núnisan̄ waketkimiai. Nekaatarum. Shuar nan̄kaamantu enentáimtumana nuka péejchach awajnastatui. Tura antsu péejchach enentáimtumana nu, nan̄kaamantu awajnastatui” tímiayi Jesus.

Uchisha Jesusna áminiaiti

(Mateu 19.13-15; Márkus 10.13-16)

15 Jesus antin̄kiarat tusar uchin itiararmiayi. Tura Jesusa unuiniamur̄isha nuna wáinkiar suritkiarmiayi.

16 Tura Jesus nin untsukar tímiayi “Uchi Winí winitin tsan̄kamkatarum, surimkiairap. Enentáimsatarum. Uchichia áintsan̄ enentáimtumana nú shuárak Yus ni enentáin akupin ajasminiaiti.

17 Uchi ni úntrin̄ umira núnisan̄ shuar Yúsan umíachkunka Yus ni enentáin akupin ajaschamniaiti.” Tu tímiayi Jesus.

Kuítrintin áishman Jesusjai áuj̄matsamiania nu

(Mateu 19.16-30; Márkus 10.17-31)

18 Shuara uuntrī Jesusan tarí áuj̄samiayi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

19 Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti.

20 Tura Yus akupkamu ana nu péñker nékame. Tsanirmawairap, mankartuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

21 Tutai áishman̄ tímiayi “Uuntá, úchichik mash umiki tsakaruitjai.”

22 Jesus nuna antuk “Chikichik taatram̄sai, tímiayi. Ame takakmena nu ashí surukam kuítrincha ainia nu susarta. Nuin̄kia nayaimpiniam kuítrum átatai. Túram nemartustaj tusam winitia.”

23 Tura nuna antuk, nu áishman̄ ti kuítrintin asa ti kuntuts enentáimpramiayi.

24 Tura kúntuts enentáimpramtai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi.

25 Kamiriuka, uunt ana nu, auja jún wayatin̄ iturchataiti. Tura shuar kuítrin̄ ti enentáimtana nu Yus akupeamunam pachiinkiatin nú nan̄kaamas iturchataiti.” Tu tímiayi.

26 Tura nuna antukarmia nu tiarmiayi “¿Nuin̄kia yaki uwempramniait?”

27 Tutai Jesus tímiayi “Aents tujintiainia nuna Yuska páchitsuk túramniaiti.”

28 Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

29-30 Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnisan̄ ni aparíncha, nukuríncha, yachínkisha, nuwenkesha, uchirínkisha ikiuakka

ju nuṅkanmasha núkap wáinkiatṭawai nu shuar. Tura tuke iwiaaku pujustinniasha wáinkiatṭawai.”

*Ataksha ni jákatniurin Jesus ujakmiania nu
(Mateu 20.17-19; Márkus 10.32-34)*

³¹ Jesus ni tuse unuiniamurin akanki ikiaanak juna tímiayi:

“Jerusarénum jeatemaji. Juisha Jerusarénum Winia, Aents Ajasu tutain, túrunatniurun Yúsnan etserin yaunchu áatrurarmia nu uminkiatṭawai.

³² Apachnium surutkartatui. Túrawar wishikrurar, katsekrukar usukruawartatui.

³³ Awatiar mantuáwartatui. Túramaitatnak menaintiú tsawantaj nantaktiatjai” tímiayi.

³⁴ Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

*Jirikiúnmayá áishmanṅkan Jesus ímtikmiania nu
(Mateu 20.29-34; Márkus 10.46-52)*

³⁵ Jesus Jirikiú péprunam nuntumsaj, nuṅ áishmanṅ jii kusuru, kuítian surusarat tusa jintiá pujumiayi.

³⁶ Untsurí aents naṅkaamainian antuk “¿warinṅkit?” tímiayi.

³⁷ Tutai, “Nasarénumia Jesus naṅkaamawai” tiarmiayi.

³⁸ Kusurusha nuna antuk untsumuk “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant untsumuk “Tawit weeachukaitiam; winiaja waitnentrurta” tímiayi.

⁴⁰ Nuṅkia Jesus wajas “itiatarum” tímiayi. Tura nii támatai,

⁴¹ “¿Warí itiuṅtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

⁴² Tutai Jesus chichaak “ímtia. Winia nekas enentáimtursa asam péṅker ajasume” tímiayi.

⁴³ Nu chichamaik kusuru ímmiayi. Tura Yusa naariṅ uunt awajki Jesusan nemarmiayi. Tura ashí aents nuna wáinkiarṅ nusha Yusa náariṅ uunt awajsarmiayi.

19

Sakíu Jesusjai

¹ Nuyá Jirikiú péprunam wayá nuṅ wekaikini ajamiayi.

² Nuṅ kuítrintin áishmanṅ ni naariṅ Sakíu pujumiayi. Nu Sakíu kuítian-juu úuntriayi.

³ Aents ti káunkámtai, Sakíu ti sútarach asa, Jesusan ístaj tukamá tujinkiamiayi.

⁴ Tuma asa Jesus nuke naṅkaamaktin asamtai, eemki tsékinṅki sikiumuru numi wajamunam wakamiayi iistaj tusa.

⁵ Jesus nuṅ naṅkaamak paṅkáí ímias chicharuk “Sakíu wárik akáikitiá. Ame jeemṅin yamá kanartiniaitjai” tímiayi.

⁶ Tutai Sakíusha wárik akaiki, shiir enentáimias Jesusan itiaamiayi.

⁷ Ashí aents nuna wáinkiar “Maaj, Jesus tunáa áishmanṅka jeen pujawai” tusa mai tunaim ajarmiayi.

⁸ Nuyá Sakíu wajaki Jesusan chicharuk “Ístá Uuntá, wi takakjana juna jímiapetek nakakan kuítrincha ainia nuna susartatjai. Tura wáitruan chikichan kasarkaitkiuncha menaintiu patatsan awaiṅkittiajai” tímiayi.

⁹ Tutai Jesus tímiayi “Ju áishmanṅ Apráama shuarintiat yamá niisha níniujai uwempra asa nekas Apráama shuariṅ ajasuíti.

¹⁰ Wisha Aents Ajasu asan menṅkaru ainia nuna eṅkan uwemtikrartaj tusan táwitjai.” Tu tímiayi.

Kuítian nekapmá chichasmiayi

11 Nu aents Jesusan anturkarmia nu “Jerusarénum jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asantai wésar Jerusarénum nuntumsaraj, nuna enentáimsarain tusa Jesus juna métek-takun chichasmiayi:

12 “Áishman penkerj amai. Nu áishmansha jeachat chíkich núñkanam kapitián náamkan tátaj tusa wemai.

13 Tura wétsuk ni takarniurin tias armia nuna untsukarmai. Tura ankant ankant kuit kurijaj nankaamas penker armia nuna suñiak “Ju kuitjaj wi táatsain takakmá ajatarum” timiai.’

14 “Tura ni nunkenia shuarka nakitiarmai. Túmainiak “nu áishman ii kapitiántri ajasain tusar nakitaji” nu titiá tusar áishman kan akatrar akuptukarmai.’

15 “Tuma ajn kapitián náamak ni nunken waketki tamai. Taa “winia kuítrujaj warí túrarum” titiaj tusa ni takarniurin kuitia súsarmia nuna untsukarmai.’

16 “Ni takarniurj emka chikichik taa “ame kuítrumjaj takakmasan tias patasan achikmajai” timiai.’

17 “Tutai kapitián chichaak “Pénker túrame. Ishichik susamjamna nújaink wi tímiajna tímatrusmek túrame. Tuma asakmin tias péprun akupin awajsattajme” timiai.’

18 “Chíkich taa “Íistá Uuntá, ame kuítrumjaj takakmasan senku patasan achikjai” timiai.’

19 “Nunasha chicharuk “Amincha senku péprun akupin awajsattajme” timiai.’

20 “Nuyá chíkich taa “Uuntá, ame kuítrumin panijijaj ijian ikiusmajai.

21 Amesha kakaram chichau asakmin, ikiuschiatam achin asakmin tura arakmachiatam juu asakmin ashankamjame” timiai.’

22 “Tutai kapitián timiai “Maaj, amesha ti yajauchiitme. Ame támena nuke makur-mawai. Wi kakaram chichau ajsha, ikiuschiatan achin ajsha tura araknasha arakmachiatan juu ajsha,

23 nuinkia ¿urukamtia kuit-ikiutainiam ikiuschamam? Nuinkia wi atak táakun patasan achikiaajna” timiai.

24 Tura nuj wajarmia nuna chicharuk “Kuítian takakmarj juruktiarum; túrarum tias takakna núshar susatarum” timiai.’

25 “Tura niisha chichainiak “túrasha Uuntá, tias takakja” tiarmai.’

26 “Tutai kapitián chichaak “Takakna nujaj takaakuinkia patatnastatui tájarne. Tura takakna nujaj takaachkuinkia ishichik takakkuisha jurunkittiawai.

27 Tura winia nemasur kapitián ajasain tusar nakitrurarmia nu itiatarum. Tura wisha íimian máatarum” timiai.” Tu tímiaiyi Jesus.

Jerusarénum Jesus wayamiayi

(Mateu 21.1-11; Márkus 11.1-11; Juan 12.12-19)

28 Nuna tuasua amik Jesus Jerusarénumaanj wémiayi.

29 Petpajaj pepru tura Petania péprusha Uriwiu náinnium tíjiuchiyy; nuj jeastatuk ajatemas ni unuiniamurj jímieran chicharuk,

30 “Tíjiuch péprunam wetarum. Túrarum nuj umpuuruch ekemtukchamu jinkiamu waja wáinkiattarme. Nu atiarum itiatarum.

31 Tura “¿urukamtai atiarum?” turamainiakkuisha, “ii uuntri wakerawai” titiarum” tímiaiyi.

32 Tutai unuiniamurj wear, Jesus timia ímatrusan wáinkiarumiayi

33 Tura umpuuruchin atiakui nérentin chichainiak “¿Urukamtai umpuuruchsha atiarum?” tiarmiayi.

34 Tutai unuiniamusha “Ii uuntri wakerawai” tiarmiayi.

35 Tura umpuuruchin Jesusan itiarumiayi. Túrawar ni pushirj umpuuruchiniam awantkar Jesusan ekenkarmiayi.

36 Tura Jesus wétinnium ni pushirj jintianam ayaparar áintrarmiayi.

³⁷ Tura Uriwiu naint awaṅkénamunam tíjiuch ajasarmatai untsurí aents Jesusan nemariarmia nu warainiak kakantar untsumainiak aents tujintiamun untsurí túran wáinkiaru ásar Yusa náarin uunt awajsarmiayi.

³⁸ “Yusa náarin winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarin uunt awajsarti” tiarmiayi.

³⁹ Tura Pariséu aents nuí páchitra pujuarmia nu Jesusan chicharainiak “Uuntá, nemarkainia nu “takamatsata” tiarta” tiarmiayi.

⁴⁰ Tutai Jesus tímiayi “Nuiṅkia ju takamatsarmataiṅkia, kayasha untsumkarainti. Nuna paant tájarne” tímiayi.

⁴¹ Jerusarénum tíjiuch ajatemas péprun wáiniak úutuk júnis tímiayi:

⁴² “Jerusarénumia shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nankaamasai.

⁴³ Kame ti itiurchat tsawant jeartamtatrume. Atumí nemasri nunṅkajai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrume.

⁴⁴ Túrutma nunṅká ajunmartatrume. Tura atumiin pujuinia nuna máawartatui. Tura ashí emesarmatai ishichkisha kaya irumpramusha penṅké atsuttawai. Wi Yusa anaiki-amurin tarijrumna nu nekaachu asakrumin túrutmattarme.” Tu tímiayi.

*Yusa Uunt Jeen suruktinian Jesus surimkiamiania nu
(Mateu 21.12-17; Márkus 11.15-19; Juan 2.13-22)*

⁴⁵ Nuyá Jesus Yusa Uunt Jeen wayá suruktasa pujuarmia nuna sumaktasa pujuarmia nunasha jiki awemarmiayi.

⁴⁶ Túrak juna tímiayi:

“Yús-Papinium yaunchu aarma awai: “Winia jearka Yus áujsatin jeaiti” tu áarmaiti. Túrasha átumka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jeen Jesus uwempratin chichaman unuiniak pujai Israer-patri úntrisha, Israer-shuara jintinniurisha, tura pepru úntrisha, itiur máamniakit tusar ti enentáimsarmiayi.

⁴⁸ Túrasha ashí aents émamkes anturainiakui máatniun tujinkiarimiayi.

20

*Yusa kakarmarijiai Jesus takasmiania nu
(Mateu 21.23-27; Márkus 11.27-33)*

¹ Yusa Uunt Jeen Jesus uwempratin chichaman unuiniak pujai Israer-patri úntrisha, Israer-shuara jintinniurisha, Israer-shuara úntrisha táarmiayi.

² Taar Jesusan chicharainiak “¿Yana chichamejai ju túram? ¿Ya ju túratniuncha akup-tamkait?” tiarmiayi.

³ Tutai Jesus tímiayi “Wisha aniaastajrum tusan wakerajrume.

⁴ ¿Ya Juánasha imiakrattia tusa akupkamia? ¿Yusak? ¿Aentsuk? Turuttiarum” tímiayi.

⁵ Tútaisha niisha nuamtak warintiajik mai tunai ajarmiayi. ““Yus akupkaiti” tákurniṅkia, “¿urukantai enentáimtuscharum?” turamtatji.

⁶ Túrasha “aents akupkaiti” tákurnisha ashí aents kayajai tukurmar mantamattaji. Warí “Juan Yúsnan etserniuiti” tuániatsuk” tiarmiayi.

⁷ Nuiṅkia Jesusan áiniak “Iisha nékatsji, Juan imiakratinniasha yátsuk akupkamia” tiarmiayi.

⁸ Tutai Jesus tímiayi “Wisha núnisnak winia akuptukua nuna tíchattajrume” tímiayi.

*Pénker-takachu armia nu
(Mateu 21.33-44; Márkus 12.1-11)*

⁹ Nuyá Jesus ju métek-taku chichamjai aentsun jintintiamiayi:

“Áishman ni ajariin uwa araa amuk, shuaran takartusti tusa ikiukmiai. Tura nin_{ki} wau táchataj tusa jeachat wémai.

¹⁰ Tura júuktin tsawant jeamtai juukman akanak jurumkit tusa takarniur_{in} takau shuari_{in} akuptukmai. Tura takarniur_{in}cha katsumkar áyatik awai_{in}kiarmai.

¹¹ Nuyá nérentin chikich takarniur_{in} akupkamai; tura nunasha núnisa_n katsekkar, awatiar, sútsuk akupkarmai.

¹² Nuyá ataksha chikichan akupkamai. Tura nunasha takau shuar katsumkar akupkarmai.’

¹³ ‘Nuyá ukunam ajá nérenniuri “Itiurkatjak, timiai. Winia aneamu uchirun akupkat-tajai. Nin wáinkiar shiir enentáimtuschartimpiash” timiai.’

¹⁴ ‘Túrasha takau shuar nuna wáinkiar, nuamtak chichainiak “Juka ajá nérenniuri ajastatui. Maatai. Nuikia aja iiniu átatui” tiarmai.

¹⁵ Nuna tu_{ni}niak ajanmaya jiki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniuri itiurkattawa?

¹⁶ Niisha taa, nu takau shuaran máawartatui. Tura núnkanka chikichan susattawai” tímiayi.

Nuna anturkar “Yus núnaka tsankatkashti” tiarmiayi.

¹⁷ Tura Jesus nin émamkes ísar tímiayi “¿Nuikia Yus-Papinium áarma nu warintiua? Ju áarmaiti:

Kayan pé_nkernak jea jeamin “yajauchiiti” tusar ajapawarmia nu ashí kayajai nan_{ka}amas pé_nker apujsamu_{iti}.

¹⁸ Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

Pariséu achiktai tusar wakeriarmiania nu (Mateu 21.45-46; 22.15-22; Márkus 12.12-17)

¹⁹ Israer-patri uuntri tura Israer-shuara jintinniur_{isha} “nu métek-taku chichamj_{ai} in túramji” tu nekaawar nuiki Jesusan achikiar emetatai tusar wakeriarmiayi. Tura untsur_i shuar Jesusan wakeruiniakui, ashamainiak túracharmiayi.

²⁰ Tura Kapitiánnium suruktai tusar wakeruiniak mamikmau shuaran Jesusan akuptukarmiayi. Nu shuar pé_nker shuara núnisa_n jeariar, Jesus nékatsuk yajauch chichakat tusar, ania_{staj} tusar wearmiayi. Ni chichakmar_{ijj}ai uuntnum suruktai tusar túrawarmiayi.

²¹ Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pátatek íiyatsme, antsu nekas Yusa jinti jintintiamé.

²² Wats turuttia, ¿Rúmanmaya uunt akupin ii kuitri akiktin pé_nkerkai? ¿Akiktinkiait? ¿Suritkiatniukai? Nu nekaatai tusar wakeraji” tiarmiayi.

²³ Tura Jesuska ni yajauch enentáimsamur_{in} nekáa chicharainiak,

²⁴ “Kuit itiatarum. ¿Yana yapi tura yana naar_i ju_i áarmait?” tímiayi.

Tutai nii tiarmiayi “uunt akupniunu.”

²⁵ Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

²⁶ Aents ántamunam ni chichakmar_{ijj}ai achiktinian pé_nké tujinkiar_{miayi}. Antsu aya ímprarmiayi tura takamtak pujusarmiayi.

Satuséusha achiktai tusar wakeriarmiania nu (Mateu 22.23-33; Márkus 12.18-27)

²⁷ Nuyá Satuséu “jakamunmaya pé_nké nantakchamniaiti” tuinia nu, Jesusan ania_{stai} tusar tariarmiayi.

²⁸ Aniiniak tiarmiayi “Uuntá, Muisáis juna áartampramiai: “Áishman ni nuar_i júreats_{ai} jakamta_{in}ki ni yach_i nu wajen nuátkatí, yach_{in} yajutmatratsa.” Tu áarmaiti, tiarmiayi.

²⁹ Wats, siati yachi áрмаi, tiarmiayi. Iwia_{iri} nuwan nuatak yajutmatsuk jakamai.

³⁰ Ni yach_i wajen akintiak, nuátak, niisha yajutmatsuk jakamai.

³¹ Nuna yach_isha núnisañ nu wajen nuátkamai; tura núnisañ ashí siati nuna pataiñk_i nuátkarmai. Yajutmatsuk yajutmatsuk kajin_ikarmai.

³² Tura ukunam nuwasha jakamai.

³³ Nantaktin tsawantai, nantakiarmatai, ¿yana nuar_in ati? Ashí siati nuátkacharmaka” tiarmiayi.

³⁴ Tutai Jesus tímiayi “Ju nun_ikanman_i nuatnaikiatin awai.

³⁵ Tura nantakiar atak iwiaaku ámin ainia nuka nuatnaikiachartatui.

³⁶ Warí, jákashtin ániatsuk. Nayaimpinmaya_i suntara áintsañ ajasartatui. Tura nantakiaru ásar Yusa uchir_i ajasartatui.

³⁷ Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus niij_iai chichaamun, Yus-Papinium Muisaiska áarmiayi. Nú áarmanum Uunt Yus Apraáma, Isaka tura Jakupu Yúsr_inti, tímiayi. Nú áishman_i yaunchu jákaru aiñ “ni Yúsr_inti” tímiayi. Nuna taku nantaktin awai tu jintíamiayi.

³⁸ Kame jaka men_ikatniunam pujuinia nuna Yúsr_inchuiti. Tuma asamtai jakáa Yúsr_inti tíchamniaiti. Antsu iwiaaku ainia nuna Yúsr_inti. Ashi Niiniun iwiaarkainiawai” tímiayi.

³⁹ Nuna antukar Israer-shuara jintinniur_i “pén_iker tame, Uuntá” tiarmiayi.

⁴⁰ Tura nuyánka aniastinian arantukarmiayi.

¿Kristu tutai yana uchir_impiait?

(Mateu 22.41-46; Márkus 12.35-37)

⁴¹ Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tár_ium?

⁴² Warí, Sarmu papinium Tawit niñki juna tátsuk:

“Uunt winia Úuntrun “Akupin pujutainium Winia untsuuruin_i pujustá, tímiayi.

⁴³ Ame nemasrumin núpeteatsaiñ nu_i pujustá” tímiayi.” Tú áarmaiti.

⁴⁴ Kame Tawitkia, Krístun chicharuk, “winia Úuntur” tajsha, ¿itiurak Kristu tutai Tawitia pampanmar_i át_iñk_i?” Tú tímiayi Jesus.

Israer-shuaran jintintin ainia nuyá aneartarum

(Mateu 23.1-36; Márkus 12.38-40; Rúkas 11.37-54)

⁴⁵ Ashí aents Nin anturkatasa pujuinia_i ni unuiniamur_in Jesus juna tímiayi:

⁴⁶ “Israer-shuaran jintintin ainia nuyá aneartarum. Niisha esaram pushin entsarar wekasataisar wakeruiniawai. Tura jintiá ti shiir áujtusarat tusar wakeruiniawai; tura iruntai jeanam pen_iker_i pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai.

⁴⁷ Túrasha wajé jeen_icha atantainiawai. Túrawar aents nekaracharat tusar ti esaram chichamj_iai Yúsán áujainiawai. Nincha chíkichj_iai nan_ikaamas Yus asutiáwartatui.”

21

Waje ni kuítrin susamia nu

(Márkus 12.41-44)

¹ Yusa Uunt Jeen kuítrintin kuit enketainiam kuítian en_ikeenan Jesus wáinkiamiayi.

² Tura waje kuítrin_icha jimiará uchich kuítian, reara áaniun, en_ikean wáinkiamiayi.

³ Wáiniak tímiayi “Nekas tájar_ime, ju waje kuítrin_ichaitiat, ashí en_ikeena nú nan_ikaamas núkap en_ikeayi.

⁴ Warí, chikichcha ampirma nuna en_ikeenawai. Tura niisha aya núchiniak takurmakman ampirmatsuk ashí en_ikeayi.”

Yusa Uunt Jeen saanaktinian Jesus ujakmiania nu

(Mateu 24.1-2; Márkus 13.1-2)

5 Yusa Uunt Jeen kaya shírmach armia nuna tura chíkich shírmach susamu armia nunasha chíkich shuar áujmatuk pujuarmiayi. Nuyá Jesus tímiayi:

6 “Átum yamáí shiir wáintrumna nu ashí emesnartatui. Kaya ekenramusha mash yumpuuntrartatui” tímiayi.

Amuukatin tsawantin uruku átata nu nekaatin
(Mateu 24.3-28; Márkus 13.3-23)

7 Nuyá Jesusan chicharainiak “Uuntá, nusha ¿urutaik túrunatí? ¿Kame ju túrunatin jeatemamtaisha warijiaín nekaattají?” tiarmiayi.

8 Tutai Jesus tímiayi “Aneartarum; anañawairap. Nekaatarum. Winia náarun pachisar, “wi Krístuitjai” tau ti untsurí jíintrartatui. “Nuñka amuukatin jeayi” tu etserkartatui. Tuíniakui anturkarum nemariirap.

9 Tura meset chichamsha, kapitíán mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

10 Nuyá tuke chicharuk tímiayi ‘Shuar chíkich nuñkanmaya shuarjai mesetnum ti nekas maaniawartatui.

11 Ti uurkattawai; untsurí nuñkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujai Yus ni kakarmarín iniakmastatui.’

12 ‘Tura ju túruntsaín atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui.

13 Nuiñkia atumin túrutmakrumin wi túramu etserkatin arutmattarme.

14-15 Tura atumí nemasrj nakitramainiak “wáitaiiti” titinian tujinkiarat tusan, winia nekatairjai chichastinian amastatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtajai” titiarum.’

16 ‘Tura imia atumí aparisha surutmakartatui. Atumí yachisha, atumí shuarisha amikrumsha núnisarañ surutmakartatui. Tura máamunka máawartatui.

17 Tura Winia ajasaru asakrumin ashí aents nakitramprartatui.

18 Tura penké ishichkisha yajauch awajtamsachartatui.

19 Katsuntrarmeka iwiaaku átin wáinkiatarme.’

20 ‘Ju pepru Jerusaréñka añ tanishriin suntar téntakar matsatu wáinkiumeka, emes-ratin jeá nekaattarme.

21 Nuikia jui Jutía nuñkanam pujuinia nu, náinnium pisartin áiniawai; tura jui Jerusaréñnum pujuinia nusha juyanka jiinki wétin áiniawai. Tura ajanam pujuinia nusha, péprunam waketkishtin áiniawai.

22 Nu tsawantincha Yus asutiámun wáinkiertatui. Yús-Papinium nu túrunatin yaunchu aarma nu uminkiatawai nu tsawantin.

23 Nuñkanam ti wáitsatin átatui. Tura ju aents ti asutniawartatui. Tuma asamtai nuwa ajamtin áinia nusha, tura uchi kuírchin takakainia nusha imiá itiurchatan wáinkiertatui.

24 Tura juyá aents mesetnum jákartatui. Tura chikichnaka ashí nuñkanam misaawar júkiartatui; tura yajaya apach, Yúsnan enentáimtuiniatsna nu, jui Jerusaréñnum wayawar najakartatui. Nu túratniunka Yus tsankatkana nuññ túrawartatui.’

Aents Ajasu tutai tátintri
(Mateu 24.29-35, 42-44; Márkus 13.24-37)

25 ‘Nuiñkia etsanmasha, nantunmasha, yáanmasha Yuska ni kakarmarín iniakmak nusháa túrattawai. Nuñkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui.

26 Tura túrunatin ana nuna enentáimsar mayáí ashinkiertatui. Warí, nayaimpiniam kakaram áinia nusha peantrartatui.

27 Nuyá Winia, Aents Ajasu tutain, yurañminiam ti shiir ajasan winiaí wáitkiartatui.

28 Nu túrunatin nánkamkui uwempratin jeatemayi tusarum kakaarum shiir enentáimsatarum.'

29 Tura ju chichamnasha nekapmamiayi. 'Ikiu numi tura nánkamas numisha enentáimsatarum.

30 Ju nunkanam ni nuké yama punkakmatai "esat jeatemayi" tátsurmek.

31 Núnisan Wi tájana nu wáinkurmeka, Wi ju nunkanam akupin ajastin jeatema nu nekaatarum.'

32 "Tura aents yamaí pujuinia nu jáatsain nusha ashí túrunattawai. Núnaka paant tájarme.

33 Nayaimpisha nunkasha amuukartatui. Tura winia chichampruka amuukachmini-aiti.

34-35 Nu tsawant aya aneachma jeattawai. Ashí aents ju nunkanam pujuinia nu, nuna enentáimtsuk pujuiniaj jeattawai. Tuma asamtai atumsha anearum wekasatarum. Yajauchiniam emetnarum, aya yurumátniuk, aya umartiniak enentáimtusurum, ju nunkanam ana nu ti wakerakrumniñkia péñker enentáimsatin tujinkiattarme. Nu atsutí tusarum tura nu tsawant aya áwaktamkajj tusarum péñker wekasatarum.

36 Anearum wekasatarum. Túrunattana nuj katsuntrataj tusarum Yus aujsa pujusatarum. Túrarum Aents Ajasu tutai íimmianum péñker átaj tusarum túratarum."

37 Tuke tsawant tsawaisha Yusa Uunt Jeeñ Jesus unuiniamiyai. Tura káshikia Uriwiu náinnium we-wémiayi.

38 Tura tuke tsawant Yusa Uunt Jeeñ Jesus chichaamun anturkatai tusar káshik tariarmiayi.

22

Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

1 Wakaprutai enketaachma tanta yuatin námper, paskua tutai, jeatemamiayi.

2 Israer-shuara Pátririsha Israer-shuara jintinniurisha áentsun ashamainia ásar, itiu-rak máawaintiajⁱ tusar ti enentáimsarmiayi.

3 Nuñkia Iskariúti Jútasan enentáin íwianch wáintiamiayi. Nú Jútaska Jesusa unuiniamurjⁱn páchitkiauyayi.

4 Israer-patri úuntrin tura Yusa Uunt Jee kapitían pujuarmia nuna werimiayi. Tura Jesusan tu surukminiⁱaiti tusa niijⁱai chichasarmiayi.

5 Niisha nuna antukar warasar "kuit amastatji" Jútasan tiarmiayi.

6 Niisha "ayu" tinia, aents nékachmanum suruktaj tu enentáimsamiayi.

Kristu jakamu enentáimtustin námper

(Mateu 26.17-29; Márkus 14.12-25; Juan 13.21-30; 1 Kurintiunam 11.23-26)

7 Wats, wakaprutai enketaachma tanta yúatin námper jeamiayi. Paskua tutainium murikchin máatin ármiayi.

8 Tura Jesus Pitruncha, Juánnasha akupeak "Paskua tutai námper iwiaratarum" tímiayi.

9 Tutai niisha chichainiak "¿Tuí iwiarat tusamea wakeram?" tiarmiayi.

10 Tutai Jesus juna tímiayi "Péprunam wetarum. Jearum áishman yumin takaku wek^aa wáinkiattarme. Nú áishman nemarsatarum. Tura jeá wayaakui,

11 nú jea nérenniurⁱ chichareakrum "Uunt chichartamuk unuiniamurjⁱai paskua yurumátin ¿tⁱ aa? turamui" titiarum, tímiayi.

12 Tákurmin nu nérentin yakí písunam uunt kuártun ashí iwiamun iniakturmastatrume. Nuⁱ ii yurumátin iwiaratarum" tímiayi.

13 Tutai niisha wear Jesus tímiania tímiatrusañ wáinkiarⁱmiayi. Tura paskua namperan nuⁱ iwiararmiayi.

¹⁴ Yurumátin jeamtai ni unuiniamurijjai Jesus misanam pujusarmiayi.

¹⁵ Pujusarmatai, Jesus chichaak “Wisha játsuk atumjai ju paskua najanatniun ti wakerimjai,

¹⁶ atakka ju nunkanam atumjai najanashtin asan. Tura antsu Yus akupeana nu jear atak najanattaji” tímiayi.

¹⁷ Nuyá pinin_kian achik, Yúsan yuminkias, ni unuiniamurin tímiayi “Ju pinin achikrum sunaisatarum.

¹⁸ Atakka ju nunkanam uwa yumirin atumjai umarchattajai, tajarme. Tura antsu Yus akupin ajastin jeamtai atak iijjai umartatji” tímiayi.

¹⁹ Nuyasha yurumkan achik, Yúsan yuminkias puuk susarmiayi. Tura chicharainiak “Juka winia ayashruti. Winia ayashur atum penker pujustinnium surunkattana núiti. Winia enentáimtursarum yuatarum” tímiayi.

²⁰ Tura yurumsua amikiarmatai pinin_kian achik, “Ju pinin winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai’ tímiayi.

²¹ ‘Túrasha winia surutkattana nu Wijjai métek ju misanam pujawai.

²² Kame Wi, Aents Ajasuitjiana ju, Yus iwiamaramua nútiksanak jakattajai. Túrasha Winia surutkana nu nekaatí. Ti asutniattawai” tímiayi.

²³ Nuna antukar “Wíashitiaj, yákit” tunaim ajarmiayi.

Nan_kaamantu ana nu

²⁴ “¿Iijjai yaki imiá nan_kaamantu aint?” tunaim ajarmiayi.

²⁵ Tura Jesus tímiayi “Ju nunkanam akupin ainia nu, waantu enentáimtumasar akupe-nawai. Tura akupenakuí “penker túrin ániawai” tuániawai.

²⁶ Tura atumjainkia nuka atsutí. Antsu nan_kaamantu ana nu, uchichia núnik ajastini-aiti; akupeana nusha takarniua núnik ajastiniaiti.

²⁷ Enentáimsatarum. Misnam pujus yurumna nu, yurumkan ajamana nujai ¿tuá imiá nekas nan_kaamantuit? ¿Yurumna nu nekas nan_kaamantuchukait? Tura Wisha atumin yurumkan ajamna núnisnak pujajai.’

²⁸ ‘Winia itiurchatrun wáinmiaj nu j atumsha Wijjai tuke pujumarme.

²⁹ Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nu j atumsha Wijjai yurumáttarme, tura Wijjai umartatrum, tájarme.

³⁰ Tura akupin pujutainium pujusrum, Israer-shuar tuse írutkamu akupkattarme tajai.” Tu tímiayi.

Pítiur “atsá nékatsjai” títinian Jesus ujakmiania nu (Mateu 26.31-35; Márkus 14.27-31; Juan 13.36-38)

³¹ Nuyá Uunt Jesus tímiayi, “Nekaatá, Semun_ká. Trikiu neré tsatsamátniua áintsan Satanás atumi enentáin páchim enentáimtikramprataj tusa seayi.

³² Tuma ain Yus enentáimtustinian kajinmatkiin tusan Wisha Yúsan seamjai. Tura Yúsnum waketkim ame yatsum ikiakárarta” tímiayi.

³³ Tutai Semun tímiayi “Uuntá, sepunam enketmainiakuisha wisha nemarsatajme. Tura mantamainiakuisha métek jakatjai” tímiayi.

³⁴ Tutai Jesus tímiayi “Pitrú, nekas tájame, yamaik atash shiniatsain ame menaintiú natsantrurtatme” tímiayi.

Itiurchat winiawai

³⁵ Nuyá Jesus tímiayi “Wisha yurumkajainchu, kuítjainchu, sapatjainchu akupkamjar-mena nu j ¿táatramsamkarum?”

Niisha “Atsá penké táatramsachmaji” tiarmiayi.

³⁶ Tutai Nii tímiayi “Antsu yamaikia yurumkan takakkun̄ka takustí, kuítniasha núnisan; tura puniancha takakchakka ni pushir̄in suruk punian sumakti.

³⁷ Nekaatarum. Yus-Papinium yaunchu aarma ana nu wi túrunamuj̄ai uminkiatawai. J̄uiti aarma:

Yajauch shuarnum pachikiarmiayi.

Warí, Yus-Papinium ashí Winia aarma ana nu uminkiatniuiti.”

³⁸ Tutai ni unuiniamur̄i tiarmiayi “Uuntá, j̄uj̄i jimiará puniá awai.”

Tutai Niisha “Asati” tímiayi.

Jitsemaní ajanam Jesus Yúsan áuj samiania nu

(Mateu 26.36-46; Márkus 14.32-42)

³⁹ Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamur̄isha nemariarmiayi.

⁴⁰ Aí jeá nin chicharuk “Itiurchat winiakui iniar̄aj̄i tusarum Yus áuj satarum” tímiayi.

⁴¹ Tuasua amik arantach, kaya nankimiam jeana núnik Jesus wémiayi. Tura Yúsan áuj sataj tusa tikishmarmiayi.

⁴² Tikishmar j̄una tímiayi “Apawá, pinin̄num yapá umartinia ántsañ Wi wáitsattajna nu wakerakmeke jurutkitia. Tura Wi wakerajna nucha antsu Ame wakeramna nu atí, tajai” tímiayi.

⁴³ Nuyá, ikiakártaj tusa Yusa suntarīi nayaimpinmaya tarimiayi.

⁴⁴ Tura Jesus imiá wáitias pujak nú kakaram Yúsan áuj samiayi. Tura ni sear̄mar̄isha numpá ántsañ nun̄ká kitiawarmiayi.

⁴⁵ Yúsan aujsua amik wajaki ni unuiniamur̄in werimiayi. Tura kúntuts enentáimmarij̄ij̄ai ti pimpiki kanúu tepenan tarimiayi.

⁴⁶ Nuiñkia chicharainiak “¿Urukamtai kanúu teparum? Itiurchat winiakui iniar̄aj̄i tusarum nantakrum Yus áuj satarum’ tímiayi.

Jesusan achikiarmiania nu

(Mateu 26.47-56; Márkus 14.43-50; Juan̄ 18.2-11)

⁴⁷ Jesus tuke chichaa pujai, untsur̄i shuar táarmiayi. Tura nuní eemka Jesusa unuiniamur̄i Jútas naartin winimiayi. Tura Jesusan mukunatajtsa tarunmiayi.

⁴⁸ Támatai Jesus chicharuk “Jútasá, ¿Aents Ajasu tutai mukunamek surutkattam?” tímiayi.

⁴⁹ Jesusj̄ai pujuarmia nu, túmamun wáinkiar “¿Uunt puniaj̄ai íjiuartatjik?” tiarmiayi.

⁵⁰ Tura chikichik Patri uuntr̄i takarniur̄i kuish̄in untsuur̄in tsupirkamiayi.

⁵¹ Tura Jesus tímiayi “Iniaisatarum.” Nuna tinia ni kuish̄in antin̄ tsuármiayi.

⁵² Nuyá Israer-patri úuntr̄in, Yus-jea úuntr̄incha, tura pepru úuntr̄incha, Nin achiktaj tusa tariarmia nuna chicharuk “¿Wisha kasakaitiaj. Urukamtai puniajaisha numij̄iaisha tarutniuram?

⁵³ Nuik Yusa Uunt Jeen tuke tsawant atumj̄ai pujumaj nui achirkachmarme. Túrasha átum kiritniumiá kakarmaj̄ai nupetkatin yamá tsawantin tsan̄katkamuitrume” tímiayi Jesus.

Pítiur “Jesusnaka nékatsjai” tímiania nu

(Mateu 26.57-58, 69-75; Márkus 14.53-54, 66-72; Juan̄ 18.12-18, 25-27)

⁵⁴ Nuñkia Jesusan achikiar emetawar Israer-patri uuntr̄i jeen júkiarmiayi. Tura Pítrusha íkian̄ nemarki wémiayi.

⁵⁵ Tura açch jinia ikiapárarmiayi. Túrawar anamuk pujuarmiayi. Pítrusha niij̄ij̄ai pujusmiayi.

⁵⁶ Tura nuwá, Patri takarniur̄i amia nu, Pítiur jinia anamuk pujan wáiniak “Jú áishmansha Niij̄ij̄ai pujumiayi” tímiayi.

⁵⁷ Tutai Pítiur chichaak “Nuwá, Nin nékatsjai” tímiayi.

⁵⁸ Tura árusan chíkich nin wáiniak “Amesha Niin páchitkíaitme” tímiayi.

Tutai Pítiur tímiayi “Atsá. Wikia áin̄kia páchitkiatsjai” tímiayi.

⁵⁹ Chikichik ura nan̄kaasmatai chíkich apach chichaak “Nekas ju áishman̄sha Niijjai pujumiayi. Warí, niisha Kariréanmayan̄chakait” tímiayi.

⁶⁰ Tutai Pítiur chichaak “Ame támena núnaka nékatsjai” tímiayi. Nú chichamaik Pítiur chicháa pujain̄k' atash shiniukmiayi.

⁶¹ Tura nuin̄kia Uunt Jesus Pítrun apajas ísmiayi. Túra “atash shiniatsain̄ ame menaintiu natsantrurtatme” Uunt Jesus timia nuna enentáimpramiayi.

⁶² Nuyá Pítiur jiinki ti úutmiayi.

Jesusan wishikrarmiayi

(Mateu 26.67-68; Márkus 14.65)

⁶³ Áishman̄ Jesusan wáiniarmiania nu ti wishikiainiak awattiararmiayi.

⁶⁴ Jiin̄ epetkar yapiniam awattiar chicharainiak “Nekamata, ya awatama” tiarmiayi.

⁶⁵ Tura katsekainiak ti untsurí chikichnasha nán̄kamas tiarmiayi.

Uunt Iruntainiam Jesusan ejeniarmiania nu

(Mateu 26.59-66; Márkus 14.55-64; Juan̄ 18.19-24)

⁶⁶ Tsawarmatai, Israer-shuara ún̄trisha, Israer-patri ún̄trisha, Israer-shuara jintin̄niurisha iruntrar ni iruntairiin̄ ejeniarmiayi. Nuí chicharainiak

⁶⁷ “Paant titiá. ¿Yus anaikiamu Kristu tutaia núnkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme.

⁶⁸ Tura Wi an̄ámsha áirkashtatume, túrasha akuptukchattarme.

⁶⁹ Tura wárik Wisha Aents Ajasuitjiana nu, ashí nan̄kaamaku ajasan, Yusa untsuurin̄i pujustajai” tímiayi.

⁷⁰ Tutai niisha tiarmiayi “¿Nuin̄kia amesha Yusa Uchirín̄kaitiam?”

Tutai Jesus tímiayi “Ee, Wíitjai, átum Winia túrutrum núnisnak.”

⁷¹ Tutai niisha tiarmiayi “Warí, ¿iisha chíkich ujatkat tusar atsumajik? Imia nin̄ki chichaamu antukchajik” tiarmiayi.

23

Piratuí Jesusan júkiarmiania nu

(Mateu 27.1-2, 11-14; Márkus 15.1-5; Juan̄ 18.28-38)

¹ Nuyá ashí Uunt iruntrarmia nu wajatkiar Rúmanmayá akupin Piratuí Jesusan júkiarmiayi.

² Nuí jeawar, Piratun chicharainiak “Ju áishman̄ íi shuwaran awajimtikiar enentáimtikiaiania nu nekaamji. Rúmanmayá uunt akupin Sésaran kuit akiktinian suritramaji. Tura nu arant Niñki, akupin Kristu tutaintjai, tawai” tiarmiayi.

³ Tutai Piratu Jesusan chicharuk “¿Ame Israer-shuara akupniurín̄káiitiam?” tímiayi.

Tutai Jesus tímiayi “Ee, núitjai, ame támena núnisnak.”

⁴ Nuyá Israer-patri ún̄trin̄cha tura aents nuí iruntrarmia nunasha Piratu chicharainiak “Ju áishman̄ tunaan túran pen̄ké wáinkiachuitjai, tajaí” tímiayi.

⁵ Túrasha niisha nú kakantar chicharainiak “Antsu nekas ashí Jutía nun̄kanmayá aentsun ni unuiniana nujai akajenawai. Kariréa nun̄kanmayá nan̄kaamas ímiajajisha tayi” tímiayi.

⁶ Piratusha nuna antuk “Nu áishman̄ ¿Kariréanmayan̄káiit?” tímiayi.

⁷ “Ee” tuiniakui, Erutisan akuptukarmiayi. Erutiska Kariréanmayá aentsun akupniuyayi. Túmaitiat nu tsawantin Jerusarénum ishichik tsawant pujusmiayi.

⁸ Erutiska Jesusan ístaj tusa ti wakerimiayi. Jesusa túramurín̄ áujmatman ti antukmiayi. Tuma asa, “Wi ímiai aents tujintiamun túrashtimpiash” tusa Jesusan wáiniak warasmiayi.

⁹ Jesusan ti nukap aniasmiayi; túramsha pen̄ké áimkiachmiayi.

¹⁰ Nuisha Israer-patri úuntrisha, tura Israer-shuara jintinniurisha yajauchiiti tusar charaatum awajarmiayi.

¹¹ Tura Erutissha ni suntarjijai Jesusan yajauch enentáimtuiniak Nin wishikiainiak ti penker pushin, akupniu entsatairiya ánniun, áentsrarmiayi. Nuyasha Erutis ataksha Piratuín akupkamiayi.

¹² Túram nu tsawant Piratu Erutisjai nawamnaikiarmiayi. Kame yáunchuka nemas-naikiau áarmiayi.

Jesusan “mantamnati” tiarmiania nu

(Mateu 27.15-26; Márkus 15.6-15; Juan 18.39-19.16)

¹³ Nuyá Israer-patri úuntrin aentsu úuntrijiai tura penké aentsjai Piratu ikiaanank tímiayi

¹⁴ “Ju áishman aentsu awajimtikui tusarum itiartintrume. Túrasha átum ímprumnin anintrusan yajauch átum tárumna nuna penké nekarachjai.

¹⁵ Erutissha núnisan yajauchin nekaachai. Warí, ju awainkichmaka. Nuikia páantchakait jú aishman jakamnia tunaanka túrichuiti” tímiayi.

¹⁶⁻¹⁷ Túraitiat tuke túrutai asamtai, jísat jeakui sepunmaya chikichík áishman kan Piratu ankant akupkatin ámiayi. Tuma asamtai, nii chichaak “juna asutián awematjai” tímiayi.

¹⁸ Tura aencha iruntrar ti unsumainiak “Atsá; júcha. Ju nakitijai. Antsu Parapás akupkata” tiarmiayi.

¹⁹ Nu Parapássha akupniun nakitiak mesetan najana asa tura mankartin asa sepunam enkeamuyayi.

²⁰ Piratuka Jesusan akupkatta wakerak ataksha aentsun áujsarmiayi.

²¹ Túrasha nú arant unsumainiak “Atsá. Krúsnum mantamnati” tiarmiayi.

²² Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachias tusan, aniasan penké nekarachjai. Asutián akupkatjai” tímiayi.

²³ Tura niisha kakaram unsumainiak “Jesus mantamnati” tiarmiayi. Kame aencha tura Patri úuntrisha ti unsumaina ásarmatai ni wakeramuri tsankatnakarmiayi.

²⁴ Nii wakeriarmia nuna Piratu “túratjai” tímiayi.

²⁵ Tuma asa Parapásan, mesetan najanin tura mankartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

Jesusan krúsnum ajintrurarmiania nu

(Mateu 27.32-44; Márkus 15.21-32; Juan 19.17-27)

²⁶ Jesusan jukitiasa pujuiniai Serini nunkanmaya Semun ni pépruriya Jerusarénnum yama jeamiayi. Nin achikiar, Jesusa krusri ayantkar “ni ukuri wetá” tiarmiayi.

²⁷ Untsurí aents Jesusan nemariarmiayi. Tura untsurí nuwasha ti kuntuts enentáimiainiak úutkiar tura wa-wa ajakiar wearmiayi.

²⁸ Túmainiakui Jesus nin iis, “Jerusarénnumia nuwatiram Winia enentáimtursarum úuttiirap. Antsu atumniak tura atumi uchiri enentáimtusrum úuttiarum.

²⁹ Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chikich aentsjai nankaamas penker pujuiniawai” tiartatui.

³⁰ Nu tsawantjai aents chicharainiak “Náint in nekentmak yuturmaartai” tiartatui.

³¹ Warí, numi sameka áinis yajauch aya nánkamna aisha ju itiurchat átsuk. Tura numi kukaru ainkiamtai itiurak nú yajauch túrunachat.” Tu timiayi Jesus.

³² Tura Jesusjai krúsnum maatai tusar jímjar yajauch áishman kan júkiarmiayi.

³³ Karawír nain tutainium jeawar Jesusan krúsnum ajintrurarmiayi. Tura Jesusa untsurini chikichík yajauch áishman kan tura ni menaarini chikich yajauch áishman kan núnisan krúsnum ajintrurarmiayi.

³⁴ Tura Jesus krúsnum ajintraku pujuram, chichaak “Apawá, tsankurarta. Nii áitkiainia nuna nékainiatsui” tímiayi.

Tura suntar pujuarmiania nu, yaki Jesusa pushiri jukit tusar nakurusarmiayi.

³⁵ Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwemtikniuiti. Wats, yamáí nekas Yusa anaikiamuri Kristu tútainkiunka imia Niñki uwémprati” tiarmiayi.

³⁶ Suntarsha Nin wishikrarmiayi. Tariar churuínian aartai tusar awajiarmiayi.

³⁷ Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi.

³⁸ Tura muuknumaani, Kriaku chichamjai, Rúmanmaya apach chichamjaisha tura Israer chichamjaisha ju áarar anujkamu ámiayi: *JÚITI ISRAER-SHUARA UUNT AKUPIN*

³⁹ Chikichík yajauch áishman nuj ajintruamu amia nu kátsekeak chicharuk “Amesha nekas Yusa anaikiamurintkiumka amek uwemprata tura incha uwemtikramprata” tímiayi.

⁴⁰ Tura chíkich ni tsaniakmarin kakantar chicharuk “¿Amesha Niijai métek asutniátasa pujayatam, Yus ashamatsmek? tímiayi.

⁴¹ Iikia yajauch asar wáitsatniuitji; ii tunaari akikmakur wáitiaji. Antsu ju áishmanka yajauchin túrichuiti” tímiayi.

⁴² Nuyá Jesusan chicharuk “Amesha akupin ajasam winiasha enentáimtursata” tímiayi.

⁴³ Tutai Jesus chicharuk “Nekas tájame, jakar shiir pujutainium yamáí tsawant Wijjai pujustatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

⁴⁴ Tutupin aj ashí nunkanam ti kirit ajasmiayi. Tura menaintiú ura nankaamasu ain, nantu nunkaach ajassha tuke kirit ámiayi.

⁴⁵ Tsawái nantusha mushatmarmiayi. Tura Jerusarénum Yusa Uunt Jeencha tarach ajamu aa jímiapetek nakaakamiayi.

⁴⁶ Nuyá Jesus untsukum “Apawá, winia wakantrun Amiin ikiauajai” tímiayi. Nuna tinia jakamiayi.

⁴⁷ Suntara kapitiantri nu túrunamun wáiniak, Yusa náarin shiir awajeak “Jusha imiá nekas péñker áishmankuyi” tímiayi.

⁴⁸ Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi.

⁴⁹ Tura Jesusa amikrishia tura nuwa Kariréanmaya Nin nemariarmia nusha íkian wajasar ii wajarmiayi.

Jesusan iwiarsarmiania nu

(Mateu 27.57-61; Márkus 15.42-47; Juan 19.38-42)

⁵⁰ Naka enentáimin péñker áishman ámiayi ni naari Jusé. Arimatéa pepru Jutía núñkanam ana nuyayuyayi. Israer-shuara Uunt Iruntairin páchitkiauyayi.

⁵¹ Yus ju nunkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi.

⁵² Tuma asamtai Piratuji we Jesusa ayashin seamiayi.

⁵³ Piratu “ayu” takui, Jesusa ayashin krúsnumia jusa tarachjai penuar kaya táurmanum iwiarsamiayi. Nu táurmanum chíkich iwiarsachmauyayi.

⁵⁴ Iwiaratin tsawantai, ayampratin tsawant tsawastatuk ajasmatai túrunamiayi.

⁵⁵ Tura nuwa Kariréanmaya jukiniutak Jesusan nemarsarmia nusha iwiarsamunam weriar, Jesusa ayashi itiur ikiusmait nuna iisarmiayi.

⁵⁶ Iisar ikiuak ni jeen waketkiarmiayi. Tura Jesusa ayashí mejeenin tusar kunkuinian iwiararmiayi. Tura ayampratin tsawantaj, Israer-shuar akupkamun umikiar ayamprarmiayi.

24

Jesus nantakmiania nu

(Mateu 28.1-10; Márkus 16.1-8; Juan 20.1-10)

¹ Tumintin káshik kunkuinian iwiaramun júkiar nu nuwá Jesus iwiarsamunam weriarmiayi. Tura chíkich nuwasha atampriarmiayi.

² Tura iwiarsamu kaya atutkamu urani aan wáinkiararmiayi.

³ Tura wayawar uunt Jesusa ayashin wáinkiacharmiayi.

⁴ Wáinkiachu ásar ashamkarmiayi. Tura “itiurkatjik” tiarmiayi. Tumaj jimiara áishman kan pushin wincharpatniun entsaru nin ayaamach wajainian wáinkiararmiayi.

⁵ Nuna wáinkiar ti sapijmiainiak tsuntsumawarmiayi. Túmakui nu áishman chicharainiak “¿Iwiaakusha urukantai jakaantumsha earam? tiarmiayi.

⁶ Jui pujatsui. Antsu nantakni. Nékatsumek. Niisha Kariréanam tuke pujus

⁷ “Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantaj nantaktiatjai” turamchamkarum” tímiayi.

⁸ Nuna takui Jesus timian enentáimprarmiayi.

⁹ Tura iwiarsamunmaya waketki taar, Jesusa unuiniamurin auntse armia nuna tura chikichnasha ashí nu túrunamun ujakarmiayi.

¹⁰ Jesusa unuiniamurin ujakarmia nu ju áiniawai: Maktaranmaya Marí, Juánasha, Jakupu nukurí Marisha, tura chíkich nuwajaj.

¹¹ Tura Jesusa unuiniamurisha nuwá tuíniakuisha nekasaiti tu enentáimtsuk “wáuruk tuíniawai” tiarmiayi.

¹² Túrasha Pítrusha jiinki Jesus iwiarsamunam tsékenki werimiayi. Jeá, init iis, aya tarachik tepenan wáinkiamiai. Tura túrunamia nuna ti enentáimiar ni jeen waketkimiai.

Emaús wetai jintianmaani túrunamia nu

(Márkus 16.12-13)

¹³ Nu tsawantaik Jesusa nemarniuri jimiari Emaús péprunam wéarmiayi. Emaúska Jerusarénumia auntse kirumitru jeá pujawai.

¹⁴ Túrunamia nuna chichaki wearmiayi.

¹⁵ “Itiurkit” tu aujmatki weenaj imia Jesus taa nuí páchiniak niijjai wearmiayi.

¹⁶ Tura wáinkiarat nekaashtin asamtai yait nekaacharmiayi.

¹⁷ We-wénakua Jesus chicharainiak “Jintiasha ¿warí áujmatkirum wéarum? ¿Urukantai kúntuts enentáimprum?” tímiayi.

¹⁸ Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

¹⁹ Tutai Jesus tímiayi “¿Warí urukait?”

Tutai tiarmiayi “Entá, Nasarénumia Jesusa túrunamuri taji. Niisha Yúsnan etserin asa Yusa kakarmarijiai chichasmiayi tura nuna kakarmarijiai takasmiayi. Núnaka ashí aents nékainiawai.

²⁰ Tura ii Pátriri uuntri tura ii pépruri uuntri “tunáa jakamnia túrayi” tusar “krúsnum mantamnati” tiarmiayi.

²¹ Tura ii Israer-aentstin uwemtikrampratin tu enentáimsamji. Tura ni maamusha menaintiú tsawant nankaamasai.

²²⁻²³ Túrasha ii nuwá ni iwiarsamunam yamaí káshik weriar ni ayashin wáinkiacharmai. Tura “Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji.

24 Nuyá íi shuar iwiarsamun weriar, nuwá tiarmia tímiatrusan wáinkiarmai. Tura Jesusnaka wáinkiacharmai.” Tu ujakarmai Jesusan.

25 Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtatsrume.

26 ¿Yusa anaikiamurí, Kristu tutai, shiir awajnatsuk ti wáitsashtinkiait?” tímiayi.

27 Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurín áararmia nuna jintintiatasa nan̄kamamiayi.

28 Ayu, nii wearmia nú peprunam jeawarmiayi. Tura Jesuska nui nan̄kaamaki wétaj tau ajamiayi.

29 Tura niisha chicharainiak “Weep. Iijjai pujustá. Warí, nantu akaikiyi, kirit ajatemsai” tiarmiayi.

Tutai Jesus niijjai pujustaj tusa wayamiayi.

30 Tura niijjai irunar misanam pujus, yurumkan achik, Yúsan yuminkias nincha puuk súsarmiayi.

31 Nu chichamaik, ni jii uranniuá núnikiarmatai Jesusan nekaawarmiayi. Tura Niisha nú chichamaik men̄kakamiayi.

32 Tura nu shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáimtikramprachmakaji” tiarmiayi.

33 Nuyá, Emaúsnumiá wárik jíinkiar Jerusarénum waketkiarmiayi. Nui Jesusa unuini-amurín auntse armia nuna tura chíkich shuar Jesusan nemariarmia nunasha iruntrar pujuinian wáinkiarmai.

34 Auntse armia nusha tiarmiayi “Uunt Jesus nekas nantakni. Semun̄ Nin wáinkiaiti.”

35 Tutai niisha jintiá túrunamun ujakarmiayi. “Jesus yurumkan ajaamakui nui nekaamji” tiarmiayi.

*Ni unuiniamurín Jesus wantintiukmiania nu
(Mateu 28.16-20; Márkus 16.14-18; Juan̄ 20.19-23)*

36 Nuna áujmatuk pujuiniaj Jesus aya aneachma ajapén wajas “Shiir enentáimsatarum” tímiayi.

37 Nuna antukar, ti sapijmiakar, wakanchashit, enentáimsarmiayi.

38 Tura Jesus chicharainiak “¿Urukamtai sapijmiakrum wakanchashit, tu enentáimsarum?

39 Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

40 Nuna tinia ni uwejéncha nawéncha iniaktusarmiayi.

41 Warainiyat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi.

42 Takui, namaknasha, míshkincha súsarmiayi.

43 Tura Jesus nuna achik niisha ímiainiamunman̄ yuamiayi.

44 Tura nin tiarmiayi “Winia túrutawarma nuna, Wi atumjai nuik pujusan tímiajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

45 Nuyá Yus-Papinium aarman jintintiawarmiayi.

46 Jintintiuk juna tímiayi: “Yusa anaikiamurí Kristu tutai jaka menaintiú tsawantaj jakamunmayá nantaktinia nu yáunchuk áarmauyayi. Tura Wi nú Krístuchukaitiaj.

47 Winia náarun pachisar, Jerusarénumiá nan̄kama ashí nun̄kanam nu chicham etsernaktinia nu áarmauyayi. Shuar ni tunaari tsan̄kurnarat tusar enentáin yapajjítniuiti. Tura tu etserkatniua nusha yaunchu áarmauyayi.

48 Tura wi túrunamu neka asarum etserkatniuitrume, tímiayi.

⁴⁹ Tura winia Apar, winia Wakantrun susartatjai, turammarumna nuna akuptuktatjarme. Tura nayaimpinmaya táatsain̄ jui Jerusaréñ péprunam pujústárum. Taa ni kakarmar̄in suramsattarme.” Tu tímiayi.

Jesus nayaimpiniam wakamiania nu

(Márkus 16.19-20)

⁵⁰ Nuyá Jesus Jerusaréñ péprunmaya júkiar Petania péprunam ejeniarmiayi. Tura nūi ni uweje takuí, “Yus yáinmakarti” tímiayi.

⁵¹ Nuna tu pujus, nīiya kanakmiayi. Tura nayaimpiniam junakmiayi.

⁵² Ni unuiniamur̄isha Nin imiá shiir enentáimtusarmiayi. Tura nuyá ti warasar Jerusaréñnum waketkiarmiayi.

⁵³ Tura Yusa Uunt Jeen pujusar Yusa náar̄in shiir awajú pujuarmiayi. Áukete.

Yúsan Shiir Chichamen JUAN aarmia nu

Chícham aents ajasmiania nu

¹ Ashí nan̄kamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham tíminiaiti. Chichamsha Yusjaj̄ pujuyayi. Chichamsha Yúsauiyayi.

² Yáman̄kamtaik Niisha pujuyayi Yusjaj̄.

³ Ashí najanamu ainia nu Niijjaj̄ najanamuiti. Nii najanachmaka pen̄ké atsawai.

⁴ Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniaiti.

⁵ Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

⁶ Áishman̄ ámiayi, Yus akupkamu, ni naari Juan̄.

⁷ Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi.

⁸ Juan̄sha nu tsáapninchauiyayi. Áyatik akupkamuyayi tsáapnin chichaman etserkat tusa.

⁹ Nu tsáapninkia nekas tsaapniniaiti. Ju nun̄kanam taa ashí shuaran enentáin tsáapniartiniaiti.

¹⁰ Chichamsha taramiayi ju nun̄kanam. Tura nun̄kasha ni najanamu ain̄, nun̄kaya aents Nin nekaacharmiayi.

¹¹ Támiayi ni nun̄kén tura ni shuarsha ni enentáin itiaacharmiayi.

¹² Tuma ain̄ chíkich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi.

¹³ Niisha Yusa uchirí ajarar ataksha númpentin ayashímkiacharmai. Áentsnúmiã aki-iniachu áiniawai niisha. Áishman̄ wakeramujaj̄sha akiiniacharmai. Antsu Yúsnumiã akiiniawaru ásar Yusa uchirí áiniawai.

¹⁴ Nú Chichamsha ayashtin̄ ajas iijjaj̄ núkap tsawant pujumiayi. Yusa anen̄kratairijjaj̄ piakuyi. Aya nekas nunak chichaamiayi. Núnisan̄ ni pen̄kerin̄, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji.

¹⁵ Juan̄sha Nin neka asa, étseruk tímiayi “Júiti wi tímiay nu: “Winia ukuruin̄ winittiana nu wíjiainkia émkaiti. Maa, wi atsaj̄sha tuke pujuyayi” tiniujai.” Tu etserkamiayi.

¹⁶ Chichamsha ti anen̄kartin̄ asa ashí pen̄ker ana nuna iniaitsuk súrampi.

¹⁷ Yusa akupeamurin̄ Muisais yaunchu jintintraiti, antsu aneatniuncha tura ashí nekas ana nunasha Jesukrístu jintintraiti.

¹⁸ Chikichkisha Yúsan pen̄ké wáinkiachuiti. Tura ni Uchirí chikichkia nu tuke Niijjaj̄ tsaníaku asa Yúsan paant awajturmasuitji.

Imiakratin Juan̄ Jesukrístunun etserkamiania nu

(Mateu 3.11-12; Márkus 1.7-8; Rúkas 3.15-17)

¹⁹ Jerusarénnumiã Israer-shuar ni Pátririn̄cha Riwi-shuarjaj̄ Juan̄kaj̄ akupkarmiayi yákit tusar.

²⁰ Inintruiniakui paant ujakmiayi. “Wikia Krístuchuitjai” tímiayi.

²¹ Takui ataksha aniasarmiayi “¿Nuikia yáitiam. Yúsnan etserin yaunchu amia nú Eríaskaitiam?” tiarmiayi.

Juan̄sha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiayi.

22 Takui “¿Nu arantcha yáitiam. In akuptamkajnia nusha warí títiatajⁱ. Warintia enentáimiam?” tiarmiayi.

23 Juansha tímiayi “Yúsnan etserin Isayas yaunchu timia núitjai. Niisha áarmiayi “Aents atsamu nunkanam shuar untsumui “Ii uuntri jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiayi.

24 Juanjai chichainiakka Pariséu akupkarma áarmiayi.

25 Niisha tiarmiayi “Nuikia Krístuchuitiatmesha, Eríaschaitiatmesha, Yúsnan etserin tátinia núchaitiatmesha ¿urukamtai imiakratam?” tiarmiayi.

26 Juansha tímiayi “Wikia entsajain imiakratjai. Tura átum írutramunam shuar átum nékatsrumna nu wajaawai.

27 Niisha winia ukuruinj winiyat wíjiainkia ti nankaamantuiti. Nii ti péñker asamtai wisha ni sapatrj jinkiamuríncha atitrachminiaitjai” tímiayi.

28 Nuka Petapara peprunam túrunamiayi. Petaparasha Juan imiakratmia nuj Jurtan entsa amain amai.

Jesus Yusa Murikrinti

29 Nuyá kashin Juan Jesusan winian wáiniak tímiayi “Iistarum. Núiti Yusa Murikrj ashí aentsu tunaarín júana nu.

30 Núiti wi timiaj nu, “Winia ukuruj winiana nu wíjiainkia nankaamantuiti. Tura wi atsaisha tuke pujuyayi” tímiajai.

31 Wisha Nin nekaachmajai. Tura ashí Israer-shuar Nin nekaawarat tusan imiakin támajai” tímiayi.

32 Nuyá tímiayi “Yusa Wakanin yámpitsa núnin nayaimpinmayan táarun wáinkiamjai. Tura ekemsamai.

33 Nu túruntsain tuke Nin nekaachmajai. Tura Yuska winia imiakrattinian akuptak turutmiai “Chikichik shuarnum Yusa Wakanj tara ekemsa wáinkiam, nujaj nekaattame. Yusa Péñker Wakanjjaj imiakratniua núiti” túrutmiayi. Tura nujaj Nin nekaamjai.

34 Yamaikia wainkia asan ti paant nékajai tí nekas Yusa Uchirinti” tímiayi Juan.

Jesusa unuiniamurj emka armia nu

35 Kashincha ataksha Juan nuj wajasmiayi ni unuiniamurj jímiarjai.

36 Jesussha nuj nankaamakui Juan tímiayi “Iistarum, Yusa Murikrj áuwiti.”

37 Juanka unuiniamurj nuna antukar mai Jesusan pataatukarmiayi.

38 Jesussha úkumur ímias nu jímiaran wininian wáinkiamiai.

Tura tímiayi “¿Ya earum?”

Niisha “Uuntá, ¿tuj pujam?” tiarmiayi.

39 Jesussha tímiayi “Wats, iitiarum.”

Niisha wear ni pujutairin wáinkiarimiayi. Tura áankú ajasmatai nu tsawantaj nuj kintiamprarmiayi.

40 Juanka chichamen antukar Jesusan pataatukaruka jímiar áarmiayi. Chikichik Antresauyayi. Niisha Semun Pitru yachijiyayi.

41 Antressha wárik ni yachj Semunkan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Krístuka Israer-shuaran yainkariat tusa Yus anaikiamuiti.

42 Nuyá Antres ni yachj Semunkan Jesus pujamunam jukimiayi. Jesussha wáiniak tímiayi “Ámetme Semun, Junasa uchirí. Túrasha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

Jesus Jiripijaj tura Natanaérjaj chichasmiania nu

43 Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

44 Jiripisha Petsaitia péprunmayayuyayi. Antressha Pítrusha nu péprunmayayuyayi.

⁴⁵ Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

⁴⁶ Natanaérsha tímiayi “¿Nasarétnumiá péñker shuar áminkiait?”

Jiripisha “Winim ítiá” tímiayi.

⁴⁷ Jesussha Natanaéran tíjiuch winian wáiniak tímiayi “Ju shuar iistarum. Ti péñker Israer-shuaraiti. Penké anankartichuiti.”

⁴⁸ Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkiajme iku numirín ejamkam wajamin.”

⁴⁹ Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

⁵⁰ Tura Jesus tímiayi “¿Aya wi “Iku numirín ajamkam wajamin wáinkiajme” takui Winia enentáimturamek? Antsu nuna nankaamas nekaachmin ana nusha wáinkiaátame” tímiayi.

⁵¹ Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntarí Winin tara waka ajainia wáinkiaátarme.” Tu tímiayi.

2

Nuatnaikiatin jísat Kaná péprunam ámiania nu

¹ Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurísha nu jujumiayi.

² Jesussha ni unuiniamurísha nu nuatnaiyamunam ipiaamu ármiayi.

³ Umutai amuukamtaí Jesusa nukurí tímiayi “Umutai amuukai. Penké takakainiatsui.”

⁴ Tura Jesus tímiayi “Nukuá, ¿urukamtaí Winia túrutam? Iniáitiústá. Winia kakarmar iniakmastin jeaatsui.”

⁵ Nuyá umutain wáinmainia nuna ni nukurí tímiayi “Ashí ni tana nu umiktárum.”

⁶ Nu j kayajai najanamu yumi-yaraatai sais (6) ámiayi. Nu yaraatainmaya Israer-shuar ni ewejéncha ni nawéncha nijiamau ármiayi Yus shiir enentáimtursatí tusar. Chíkich chíkich yaraatainiam uchenta (80) rítrusha, sian (100) rítrusha yumi wayamniauyayi.

⁷ Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiyai.

⁸ Áimprarmataí Jesus tímiayi “Pai, ishichik shikikrum námper chicharu suutarum.” Tutai nútiksañ túrawarmiyai.

⁹ Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwatun untsuk

¹⁰ tímiayi “Jístanmanka péñker umutain emka suíniatsuk. Tura jémararmatainkia tímianchan suiniatsuk. Túrusha ámeke péñker umutai ikiusam yamá jíkchamek” tímiayi.

¹¹ Jesus túramu Kananum Kariréa nunkanam túrunamiayi. Nújainkia Jesus emka ni kakarmarín paant iniaktusmiayi. Nuna ísar ni unuiniamurísha Nin enentáimtusarmiyai.

¹² Nuyá Kapernáum péprunam wémiayi. Ni nukurísha ni yachísha ni unuiniamurísha nemariarmiyai. Nuísha untsurí tsawant pujusarmiyai.

Yusa Uunt Jéen suruktinian Jesus surimkiamiania nu

(Mateu 21.12-13; Márkus 11.15-18; Rúkas 19.45-46)

¹³ Israer-shuara namperí, paskua tutai, ishichik ajasmataí Jesus Jerusarénum wémiayi.

14 Nuj jeá Yusa Uunt Jeen súruinian wáinkíamiayi. Turuncha murikniasha yampit-snasha súrin ármiayi. Chikichcha ni misarín pujusar kuítian yapajíniancha wáinkíamiayi.

15 Nuna wáiniak yarañken chapikmar asutkiartutain najana nujaj ashí waakartiuk murikrintiuk aq jíirmiayi. Kuítian yapajniu misaríncha ayantar ni kuítrin nunká utsankarmiayi.

16 Yampitsan súrinniasha tímiayi “Nuka juyá jíitiarum. Winia Aparu Jeen surutai jea najanawairap” tímiayi.

17 Nuna ísar ni unuiniamurí yaunchu Yus-Papinium áarman enentáimprarmiayi. Ju áarmaiti:

“Ame Jeem shiir atí tusan ti wakerukuitjai.”

18 Nuikia Israer-shuara uuntri Jesús aniasarmiayi “Juna túramniaitjai tusam ¿warí kakarmak iniakmastatam?”

19 Jesussha tímiayi “Ju Jeá sáakiakrumin menaintiú tsawantaí iniantaittiai Wikia.”

20 Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantái jeamtámeash.”

21 Kame Jesus “Jeá” chichayat ni ayashín tímiayi.

22 Tuma asamtai Jesus ukunam jakamunmaya nantakmiatai ni unuiniamurí ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

Jesus ashí shuara enentáin nékawai

23 Paskua námpertin ti untsurí Jerusarénnum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiayi.

24 Tuma aiñ Jesus ashí neka asa ninkia enentáimtuscharmiai.

25 Nínki ashí shuara enentáin neka asa chíkich ujatkat tusa atsumchamiayi.

3

Jesus Nikiutémujaí

1 Shuar ámiayi ni naari Nikiutému. Niisha Pariséu asa nii tuinia áintsan Yúsnan takauyayi. Niisha Israer-shuara uuntriyaí.

2 Niisha kashi Jesús irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinkiaintme’ tímiayi.

3 Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

4 Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkempramniakait atak akiiniatniuna?”

5 Ataksha Jesus tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui.

6 Ayashniumiá akiinia nuka ayashchakait. Núnisan Wakanniúmiá akiinia nuka wakanchakait.

7 Wi “atak yamaram akiiniatniuiti” takui itiurchat enentáimpraip.

8 Nase enentáimpratá. Nase nánkamsan umpúawai. Amesha ántame tura tuyañ winiá túrasha tuiñ weti nékatsme. Núniskete ashí Wakanniúmiá akiinia nu.”

9 Tuma asamtai Nikiutémujaí atak anias “¿Jusha itiurak áminiait?” tímiayi.

10 Jesus áikmiayi “Ame Israer-shuara jintinniuríntiatmesha ¿itiura nékatsmea?”

11 Ti nekasan tájame. Nekas nékakur chichaaji. Íismajnia nusha ujaaji. Tuma aiñ ii chichame ántatsrume.

12 Aya ju nunkanmaya túramu ujaam ántachkurmeka ¿itiurak nayaimpinmaya túramusha antuktaram?’

13 ‘Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wikia nayaimpinmayaitjai.

14 Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijjai ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai.

15 Nújainkia ashí Winia enentáimturna nuka jinium wétsuk Yusaj tuke iwiaaku pujus-tatui.”

Yuska ashí shuaran ti aneawai

16 Yuska ashí shuaran ti anea asa, ni Uchirín chikichik ana nuna shuáran uwentikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiayi.

17 Yus áentsun kakerak jinium surukat tusa ni Uchirín akupkachmiayi. Antsu uwentikrarat tusa akupkamiayi.

18 Yusa Uchirín enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti.

19 Yusa Uchirí tsáapninia áintsan ii tunaari paant awajturmají. Nu tsáapnisha ju nunkanam táraití. Shuar tunáa ti tura ásar tsáapninian nakitrar kiritniun wakeriarmái. Nuna tura ásar jinium surunkaruiti.

20 Ashí tunaan túruinia nuka tsáapninian mujíiainiawai. Túrawar yupitiainiawai ni tunáa túramu paant ajasaj tusa.

21 Antsu ashí nekas túratniun umiiniana nuka tsáapninian weantainiawai. Yus ni enentái pujuram tsáapninium takainiawai. Nuka ti paantaiti.

Imiakratin Juan ataksha Jesusnan chichasmania nu

22 Nuyá Jesussha ni unuiniamurijjaisha Jutía nunkanam wear nuj pujusar imiakra-tiarmiayi.

23 Juansha Enun nunkanam, Sarim tíjiuchia nuj, imiakratuk pujumiayi entsa nuj núkap aa asamtai. Tura aents táarmatai imiainiarmiayi.

24 Nusha Juánkan sepunam enkenatsain túrunamiayi.

25 Tura Juanka unuiniamurí Israer-shuarjai jianaiktinian nankamawarmiayi. “¿Ya imiakratma imiá péñkerait?” tusar áujmatiarimiayi.

26 Juánkai initrustai tusar wéarmiayi. “Uunta, ame nuik Jurtan entsa amain pujakum shuar nuj pujá “núiti Yusa Murikri” tíchamkum. Yamaikia imiakratui tura ashí shuar Nin nemarainiawai” tiarmiayi.

27 Tutai Juan tímiayi “Ashí kakarmaka aya Yúsaiyanchakait.

28 Wisha paant tímiajai “Wikia Krístuchuitjai antsu ni jintin iwiarat tusan emka akup-kamuitjai.” Nusha antukmarme.

29 Kame shuar nuwan nuatna nuna áishrinti. Nuatnaiyak áishman nuwejai áujnainiakui, ni amikrisha nuna antuk ti waraatsuk. Wisha núnisnak aents Jesusaj wénakui ti waraajai.

30 Niisha tuke nankaamaku uunt ajastiniaiti antsu wikia tuke tímiancha ajastiniaitjai.” Juan tu chichasmiayi.

Nayaimpinmaya tara nu

31 Nayaimpinmaya tara nuka ashí nankaamakuiti. Nunkeya nuka, nunkeya asa jú nunkanmayanak áujmatui. Nayaimpinmaya tara nuka ashí nankaamakuiti

32 tura nuj antukmancha íismancha áujmatui. Túrasha ni chichamen ántuiniatsui.

33 Antsu ni chichamen ántana nuka “Yusa chichame imiá nekasaiti” tawai.

34 Yus akupkamuka Yusa chichamen étserui. Yuska ni Wakanin ementutsuk susa asamtai tu étserui.

35 Yus Apa ni Uchirín anea asa ashí ana nuna iistí tusa ataksaiti.

³⁶ Shuar Yusa Uchirín enentáimta nuka yamaram iwiaakmanum akiinia asa tuke Yusaj shiir pujustiniaiti. Antsu Yusa Uchirín enentáimtatsna nuka nu iwiaakmanum akiiniachuiti antsu Yus tuke nin kajerkaiti.

4

Jesus Samaria nunkanmaya nuwajaj chichasmiania nu

¹ “Jesus untsurí shuaran ni nemanin awajeawai; kame Juanjaj nankaamas untsurí imiaawai” taman Pariseu shuar antukarmiayi.

² Nekaska Jesus imiakratchamiayi, antsu ni unuiniamurí túrawarmiayi.

³ Pariséu nu chichaman antukarman Jesussha nekáa Jutía nunkanmaya jiinki Kariréa nunkanam waketkimiayi.

⁴ Wáketuk Samaria nunkanmaaní nankaamaktiniuyayi.

⁵ Samaria nunkanam wéak Sekar péprunam jeamiayi. Nu pepru jeastatuk Jakupa nunke ámiayi. Jakupsha nu nunkan ni uchirín Jusén tí yaunchu susamiayi.

⁶ Nujsha yumirmat ámiayi. Jakup taurma asamtai “Jakupa yumirmatrí” tiarmiayi. Tutupin jeamtai Jesussha pimpiki winis yumirmat ayamach pujusmiayi.

⁷ Nuj pujaj Samarianmaya nuwá yumí shikiktajtsa támiayi. Tura Jesus “Entsa surusta” tímiayi.

⁸ Jesusa unuiniamurísha yurumkan péprunam sumaktajtsa wéaru asamtai aya Jesusak pujumiayi.

⁹ Samarianmaya nuwá Jesusan tímiayi “¿Itiura Israer-shuaraitiatmesha Samarianmaya nuwá aisha entsa seatam?” Kame Israer-shuar Samarianmaya shuarjainkia penké chichachu ásar nuna tímiayi.

¹⁰ Jesussha tímiayi “Yus súamu nékameka tura entsa surusta tájam nusha nékameka ame antsu seattínme tura Wikia iwiaaku entsan amasantjai.”

¹¹ Nuwasha tímiayi “Uunta, entsasha ti initiaiti tura shikiktincha takaktsume. ¿Tuyan iwiaaku entsasha surustam?”

¹² Ii uuntri Jakup ju yumirmatan taur juyanak niisha ni uchirísha ni waakarísha umararmiayi. Nuyá ikiurtamkimiaji. ¿Amesha Jakupjaj nankaamas kakarmakaitiam?”

¹³ Jesussha tímiayi “Ashí shuar ju entsan umarka ataksha kitiamtiatui.

¹⁴ Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujaj tuke iwaaku pujustí tusa.

¹⁵ Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura ju entsan cha shikiktinian táchataj” tímiayi.

¹⁶ Nuyasha Jesus tímiayi “Áishrum untsukam utitia, turam juí tatá.”

¹⁷ Nuwasha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai.

¹⁸ Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

¹⁹ Nuna antuk nuwasha tímiayi “Uunta, ame Yúsna etserniuchukaitiam.

²⁰ Ii uuntrin kía tuke Samarianam pujuarmia nu jú nainnium Yúsna tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

²¹ Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin.

²² Átum tikishmatrum nuka nékatsrume. Iikia tikishmatrajnia nu nékaji. Israer-shuarnumiá Uwemtikkiartin winiakui nékaji.

²³ Tsawant winittiana nu yamá jeayi. Ashí shuar Yus Apan nekas tikishmatainiakka tuke wakanjaj tuke enentáijiaisha awajitsuk tikishmatratatui. Núnisan tikishmatrurat tusa wakerawai Yus Apa.

24 Yuska Wakaniiti tura ashí Nin tikishmatainia nuka tuke wakaníjjai tura tuke enentájjai awajitsuk tikishmatratin áiniawai.”

25 Nuwasha tímiayi “Anaikiamua nu tátiniaiti. Nusha Krístuiti. Niisha taa ashí jintintra-mattaji.”

26 Jesus tímiayi “Wiitjai. Ámin chichaaajmena nú Kristuitjai.”

27 Nuiñ ni unuiniamurí táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajai chichaaam?” títinian arantukarmiayi.

28 Nuyanka nuwa ni yumirín ikiuki péprunam we ashí áentsun tímiayi

29 “Winiirum ítiarum, shuar ashí wi túramun túruta nu. ¿Juka Krístuittiya?”

30 Tutai péprunmaya jíinkiar Jesus pujamunam wearmiayi.

31 Jeainiatsain ni unuiniamurí seak tiarmiayi “Uunta, yurumáta.”

32 Tura Jesus tímiayi “Wi yúatniunka takakjai átum nékachman.”

33 Ni uniuniamurísha nuámtak anniasarmiayi “¿Chíkich shuar yurumak itiarím tátsuash?” tiarmiayi.

34 Tura Jesus tímiayi “Winia akuptukua nuna wakeramurí túrakun tura ni takatrín takaakun Wíjjainkia yurumátniua áintsan ikiakáatui.

35 Átumka “Tuke kuaru nantu árak júuktin taasai” tátsurmek. Túrasha Wi tájarme, shuar wininia nu iistarum. Yus-Chicham ni enentáin araamuiti. Tura júuktin tsawant jeayi.

36 Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui.

37 Tiniu armia nuka nekasaiti: “Chikichik araawai chíkichcha júawai.”

38 Iis, chíkich araakmamu júuktinian akupkaitjarme. Átum araachiatrumek chíkich takasmanum atumsha pachiintiukuitrume” tímiayi.

39 Tura núwaka péprunam jeá “Ashí wi túramun ujat kayi” takui untsurí shuar Jesusan ti shiir enentáimtusarmiayi. Niisha Samarianmaya shuar ármiai.

40 Nu asamtai ashí Jesusai taar níjjai pujusát tusa seawarmiayi. Tutai Jesus jimiará tsawant nuí pujusmiayi.

41 Nú shuar untsurí ni chichamen antukar Jesusan ti shiir enentáimturarmiayi.

42 Nuyá nuwan tiarmiayi “Yamaikia aya ame chichammijjain Jesus enentáimtatsji antsu imia iisha ni chichamen anturkaji. Tura nékaji nekas Krístuiti, ashí shuaran Uwemtikin.”

Jesus akupniu takarniurí uchirín tsuármiania nu

43 Jimiará tsawant nankaamasmatai Jesus Samaria nunkanmaya jiinki Kariréa nunkanam wémiayi.

44 Kariréasha Jesusa nunke asamtai, aínsha Jesus timia áintsan ámiayi: “Yúsnan et-serniun ashí shuar péñker anturainiawai antsu nuna nunkeyanka nin anturainiatsui.”

45 Tuma ain Kariréa nunkanam jeamtai auya shuarsha Jerusarénnum paskua námpernum wearu ásar tura ashí ni túramun nuí wainkia ásar ti shiir awajsarmiayi.

46 Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiayi. Jesussha nuí pujai yajá péprunam Kapernáumnum akupniu takarín ámiayi. Ni uchirísha jaa tepemiayi.

47 Niisha Jesus Jutíanmaya Kariréa nunkanam taman antuk Jesusai wémiayi. Tura ni uchirí jákatin tepakui ni jeen we ni uchirín tsuarat tusa Jesusan seamiayi.

48 Jesussha tímiayi “Aya aents túrachminian túrakui ísrum aya nújjain Winia enentáimtarme.”

49 Tura takarín tímiayi “Uunta, winia uchir jáatsain wari winitia.”

50 Nuiñkia Jesus tímiayi “Jeemiin waketkitia. Yamaikia ame uchiram péñker ajasai.” Tutai nú aishman Jesus táman antuk wémiayi.

⁵¹ Ni jeen jeátemámtai ni takarniurí inkiun tiarmiayi “Yamaikia uchiram péñker ajasai.”

⁵² Apasha inintrusmiayi nantu urukaim péñker ajasma.

Niisha tiarmiayi “Yau, nantu pukuntamtai, tsuemun michatramai” tiarmiayi.

Nuna antuk uchí aparísha enentáimsamai.

⁵³ Nantu pukunta ai Jesus “Ame uchiram péñker ajasai” timia nuní aijn michatraititi. Tuma asamtai niisha ashí ni shuarísha Jesusan nekas enentáimturarmiayi.

⁵⁴ Jesus nu túramujai ni kakarmarín jimiará iniakmasmiayi. Nunasha Jutíanmayá jiinki Kariréa nunkanam jeá túramiayi.

5

Petesta amia nuí tampemarun Jesus tsuármiania nu

¹ Nu nankaasmatai, Israer-shuar namperan najanainiakui Jesus ataksha Jerusarénum waketkiymiayi.

² Jerusarén yama wayamunam murik wayatin waiti tíjiuch amia nuí entsa pajamtai jeammauyayi. Nu pajamtain Petesta tiarmiayi. Nuna wáitirísha senku (5) ármiai.

³ Nuí untsurí jáiniak nunkanam tepeararmiayi. Kusurusha shutuapsha tampemakusha tepesar entsa miartukat tusa nákasarmiayi.

⁴ Kame ni tátaj taku Yusa suntarí táuyayi entsan umuchkiattsa. Nuyanka emka shuar entsá wayá nu ni jáamuriya tsuámarmiayi.

⁵ Áishman traintiúchu (38) uwi jaa tepá nuí ámiayi.

⁶ Jesussha nu shuaran nuí tepan wáinkíamiayi. Tura untsurí uwitin jaa tepan nekáa aniasmiayi “¿Shiir ajastiniak wakeram?”

⁷ Tutai jaasha tímiayi “Uunta, entsa muchitkiui ¿winia yaki enkétát? Kame wi enkemátaj tai chíkich emka enkemáiniawai.”

⁸ Nuyá Jesus tímiayi “Nantaktia. Ame peakrum jukim wetá.”

⁹ Nu chichamtaik áishman shiir ajasmiayi. Tura ni peakrín jukí wémiayi. Nusha ayampratin tsawantaj túrunamiayi.

¹⁰ Tuma asamtai Israer-shuar shiir ajasun tiarmiayi “Yamáí ayampratin tsawantaiti. Peakrum júkishtiniaitme” tiarmiayi.

¹¹ Áishmansha tímiayi “Winia tsuara nu “Peakrum jukim wetá” turutni” tímiayi.

¹² Nuinkia aniasarmiayi “¿Ya “Peakrum jukim wetá” túramam?” tiarmiayi.

¹³ Tura áishmansha Nin tsuárun nékachmiayi. Untsurí shuar nuí aa asamtai tura Jesus weu asamtai nin nekaachmiayi.

¹⁴ Atak Jesus Yusa Uunt Jeen áishmankan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi.

¹⁵ Nuinkia áishman Jesus nin tsuáрман nekáa Israer-shuaran ujakmiayi.

¹⁶ Tuma asamtai ayampratin tsawantaj túramtai Israer-shuar Jesusan maatai tusar áintrarmiayi.

¹⁷ Tura Jesus tímiayi “Wina Apar tuke yamaisha takawiti. Núnisnak Wissha takaajai.”

¹⁸ Tutai Israer-shuar nuna nankaamas maatai tusa wakeriarmiayi. Ayampratin tsawantaj takaakui kajerarmiayi. Tura nu arantcha “Yus winia Aparuiti” takui Yusjai métek enentáimtumawai tusar nu arant kajerarmiayi.

Yusa Uchirí túramnia nu

¹⁹ Nuyá Jesus tímiayi “Ti nekas tájarme, Yusa Uchirínia ni enentáijiai takaatsui. Antsu aya winia Apar takaana nuna íisan métek takaajai. Ashí winia Apar túramun Wissha ni Uchirí asan métek takaajai.

20 Ni Uchirí asamtai winia Apar anentui tura ashí tura nuna iniakturui. Tura nuna nan̄kaamas tujinkiamnian iniaktursattawai Wisha túratniun. Tura nuna túrakui ashamkattarme.

21 Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsámniaitjai.

22 Winia Aparka súmamtiktsui antsu shuar súmamtikiatniun ni Uchirín súsaiti.

23 Tuma asamtai ashí shuar Yus Apan shiir awajainia áintsan̄ ni Uchiríncha métek shiir awajsatin ániawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui' tímiayi.

24 'Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarin̄ tuke amuukashinian takakui. Nu shuarsha ayashí iwiaakuítat jákauyi antsu yamáí nekas iwiaakuíti. Tuma asa sumamashtatui.

25 Ti nekasaiti. Tsawant winittiana nu jeayi. Nu tsawant jaka ainia nu Wi untsumman antukar umirkarka iwiaaku ajasartatui.

26 Iis, winia Apar iwiaaku awajsatniun takakui. Tura Winiasha, ni Uchirí asamtai, iwiaaku awajsatniun surusuiti.

27 Nu arantcha wi Aents Ajasu asamtai, shuaran súmamtikiatniun surusuiti.

28 "Ju chicham iturchataiti" enentáimprairap. Atak tsawantaj̄ wi untsumman ashí jákaru ainia nu antukartatui.

29 Tura ashí iwiansamunmayá jíinkartatui. Pénker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui' tímiayi.

"Jesus nekas Yúsaiyáiti" tu áujmataanu nu

30 'Imia Wíki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai.

31 Aya Wiki "Yúsaiyáitjai" tákunka winia chichamur ántar ainti.

32 Chikichcha awai. Niisha "Yúsaiyáiti" túrutui. Ni chichamesha imiá nekasaiti.

33 Atumsha Juan̄kaj̄ wi túramu inintrusmarme tura nii timia nu nekasaiti.

34 Tuma ain̄ aents táman atsumatsjai. Antsu Juan̄ka chichamē enentáimkiuram uwempratarum tusan tájarme.

35 Juan̄sha jiya núnis keemai. Atumsha ishichik tsawantin nú tsáapninnium warastin enentáimpramarme.

36 Tura Winia "Yúsaiyáiti" túrutna nu, Juan̄jaj̄ nan̄kaamas péñkeran takakjai. Wi takasma núiti. Winia Apar takastinian surusma nuna takaakun nujaj̄ páantaiti Yus Apa akupkamuitjai.

37 Winia Aparsha, akuptuku asa, ayamprutui. Túrasha átumka ni chichamesha antukchaitrume tura wáintiash wáinkiachuitrume.

38 Yus Apa akuptukuíti. Tuma asamtai Winia enentáimturchakrum winia Aparu chichamesha atumi enentáin̄ wayachuiti.

39 Átumka Yus-Chicham yaunchu aarma nūj̄ iwiaaku átinian wáinkiat̄aj̄ tusarum ti unuimiaruitrume. Nu chichamsha Wínian áujmatui.

40 Tuma ain̄ nekas iwiaaku átaj̄ tusarum Winí tátin nakitiarme" tímiayi.

41 "Shuar Winia "shírait̄i" túrutainiakuisha nuna páchiatsjai.

42 Maa, Wi nékajrume. Átumka Yus aneatsrume.

43 Winia Apar akuptukmatai táwitjai túrasha nakitrarme. Antsu chíkichka ní enentáij̄iain̄ jeartamkuin̄kia nuka átum wakerarme.

44 Átumka nuámtak "Shiir enentáimtursat̄i" tu enentáimtunaiyarme. Tura Yus enentáimturma nuka páchiatsrume. Nújain̄kia çitiurak Yus enentáimtustam?

45 “Ii tunaarin Yusaj etserturmaktatji” turutiirap. “Muisais akupkamun umirkan uwemprattajai” táturmek. Antsu Muisais aarma nujaj atumí tunaari etsernaktatui.

46 Iis, Muisais Winia áatrurmiayi. Atumsha ni timia enentáimtakrumka Winiasha enentáimturaintrume.

47 Tura ni aarma enentáimtachkurmeka ¿itiurak wi tama enentáimtustarum?” tímiayi Jesus.

6

*Jesus senku mir (5.000) áishmankan ayurawarmiania nu
(Mateu 14.13-21; Márkus 6.30-44; Rúkas 9.10-17)*

1 Nu nankaasmatai Jesus Kariréa antumiannum amain katinmiayi. Nu antumiansha Tipirias antumian tuiniawai. Jimiará náartiniaiti.

2 Untsurí shuar Jesus ti jáinian timiá wárik tsuan wáinkiaru ásar Nin nemariarmiayi.

3-4 Israer-shuara paskuanamperi ishichik ajasmatai Jesussha ni unuiniamurijajai náinnium waka nuj pujusmiayi.

5 Jesussha untsurí aents wininian wáiniak Jiripin tímiayi “Timiá untsurí shuar ayuratniusha ¿tuyan yurumak sumaktaj?” tímiayi.

6 Kame Jesuska Nii túrattana nuna neka asa Jiripi warittin tusa tímiayi.

7 Jiripisha nuyá tímiayi “Timiá nukap kuitjaj tanta sumakmesha ashí ishichik susamsha jeachaintjia” tímiayi.

8 Nuyá chíkich unuiniamurí Antres, Pitru yachj, tímiayi

9 “Uchi juí senku (5) tantan jimiará namakjaj takakui. Ausha timiá untsurínmasha jeatpiash” tímiayi.

10 Nuyanka ““Ashí pujustarum” titiarum” tímiayi Jesus.

Áishmansha nuwasha uchisha irunmiayi. Tura chírichri núkap aa asamtai nujsa senku mir (5.000) áishman pujusarmiayi.

11 Jesussha nu tantan achik Yúsan yuminkias ni unuiniamurin susamiayi. Niisha ashí nuj pujuinian súsarmiayi. Namaknasha núnisan ashí ni wakeriarmiania nuna súsarmiayi.

12 Jémararmataisha Jesus ni unuiniamurin tímiayi “Ampirma júukrum chaninnium chumpiatarum. Wasúrnákain.”

13 Niisha senku (5) tantanmaya ampirman júukar tuse (12) chaninnium áimkiarmiayi.

14 Nu shuarsha Jesus túramun íisar tiarmiayi “Ju nekas Yúsnan etserin tátinia núchakait.”

15 Shuar Jesusan uunt akupin awajsataj tutai Jesus nekáa Niñki náinnium wémiayi.

*Jesus entsá pátatek nanamas wekasamiania nu
(Mateu 14.22-27; Márkus 6.45-52)*

16 Kíakui Jesusa unuiniamurí antumiannum wearmiayi.

17 Káshisha Jesus tuke táchamtaik uunt kanunam enkemáwar Kapernáum péprunam wéenak jíinkiarimiayi.

18 Tura nase ti umpúakui chíchimi ti wajaimiayi.

19 Ajapén ajarar Jesus entsá pátatek nanamas tíjiuch winian wáinkiar ashamkarmiayi.

20 Tura Jesus “Wiitjai. Ashamprukairap” tímiayi.

21 Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

Shuar Jesusan eak wekainiawai

22 Kashincha chíkich shuar amain ayuramunam kanararu nekaawarmai. Jesusa unuiniamurí Jesusjainchu chikichik kanu amia nujaj wéarun nekaawarmai.

23 Nuj chichak matsatai Tipirias péprunmaya chíkich kanu táarmiayi. Yau Jesus Yúsan yuminkias tantan ayuramunam tíjiuch táarmatai

24 nu shuar, Jesussha ni unuiniamurisha nuĭ atsuiniakui, nu kanunam enĭkemáwar Kapernáum péprunam Jesusan eáktajtsa wearmiayi.

Jesus apatkua áintsankete

25 Entsa amain Jesusan wáinkiar aniasarmiayi “Uunta, ĩurutía juĭsha táمام?”

26 Jesussha tímiayi “Ti nekas tájarme. Aents tujintiamu nekáa asarum eátsurme. Antsu tanta yuarum jémaru asarum eátrume.

27 Juyá yurumak amuukatin asantai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinĭkiartiniaiti” túrutui” tímiayi.

28 Tutai inintrusarmiayi “ĭWarí túratniuitiaĭi Yus wakerana nu umiktin?”

29 Jesussha tímiayi “Yus akupta asa Winia enentáimtursarat tusa wakerawai.”

30 Tutai aniasarmiayi “ĭAentsti tujintiamuka warí túrattam ii ísar Ámin nekas enentáimtustin? Chikichcha túratá.

31 Yaunchu ii uuntri aents atsamunam maná yurumkan nayaimpinmayaĭ susamun yurumáwarmiayi. Yus-Chichamnum núnik áarmaiti: “Nayaimpinmayaĭ yurumkan Yus susamiayi.” Tu áarmaiti” tiarmiayi.

32 Jesussha tímiayi “Wi tájana nu nekasaiti. Muisais atumí úuntriĭn nayaimpinmayaĭ yurumkan súdachmiayi. Antsu winia Apar yamá nekas apatkun nayaimpinmayaĭ súramui.

33 Iis, Yusaiĭyaĭ apatkunka, nayaimpinmayaĭ tára nu súramui tura nekas apatuk asa ashí shuaran nekas iwiaakman súawai.”

34 Tutai “Uunta, nu apatuk tuke amasta” tiarmiayi.

35 Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penĭké tsukamashtatui, tura Winia enentáimturna nusha tuke kitiaarchattawai.

36 Túrasha wi túramu wáinkiumesha winia chichamur enentáimtatsrume.

37 Ashí shuaran winia Apar tsanĭkatrukarmiania nu, Wíi shuar ajasartatui. Winin winiana núnaka penĭké nakitrashtatjai.

38 Wi wakeraj nuna túratniun táchaitjai antsu Winia akuptukmia nuna umirkatniun táwitjai.

39 Winia Apar akuptukuĭti tura juna wakerawai. Ashí winia tsanĭkatrukman emenĭkátsuk amuukatin tsawantajĭ iniantkariat tusa wakerawai.

40 Yus Apa wakerana nu júiti. Ashí shuar Winia “Yusa Uchirĭnti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantajĭ iniantkittiaĭai” tímiayi Jesus.

41 Tura Jesus “Wiitjai, nayaimpinmayaĭ apatuk akupkamu” takui Israer-shuar Jesusan áujmatiararmiayi.

42 Tura tiarmiayi “Ju Jesuschakait, Jusé uchirĭya nu. Iikia ni aparĭsha nukurĭsha nékatsjik. ĭItiurak “Nayaimpinmayaĭ táraitjai” ta?” tiarmiayi.

43 Jesussha tímiayi “Tu áujmatrukairap.

44 Shuáran winia Apar akúpturkachuitkiuĭnkia penĭké weanturkachainti. Tura Winia akupturna nuna amuukatin tsawantajĭ iniántkíttiaĭai.

45 Yúsnan etserniu áarmariĭn tawai “Ashí Yus jintintiamu ártatui”. Núnisán ashí Yusa chichamen antukar unuimiatainiakka Winí táiniawai’ tímiayi.

46 ‘Aya Wiki Yúsaiĭyaĭ tau asan Yúsán wáinkiaitjai. Chikichka penĭké wáinkiachuiti.

47 Ti nekas tájarme. Winia enentáimturna nú shuarka yamaram iwiaakman amuukash-tinian takakui.

48 Wikia iwiaakman súana nú apatkuitjai.

49 Iis, atumí uuntriĭ aents atsamunam maná yurumkan yúawariatcha ashí jákarmiayi.

50 Antsu Wi tájana nú apatkun shuar yúakka jákachartatui.

⁵¹ Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

⁵² Nuyá nuámtak áujmattsar tiarmiayi “¿Itiurak ni ayashinkesha ayurtamattaj?” tiarmiayi.

⁵³ Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume.

⁵⁴ Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantaj iniántkíttijai.

⁵⁵ Winia ayashruka nekas yurumkaiti tura winia numparsha nekas umutainti.

⁵⁶ Winia ayashruncha yúaka tura winia numparnasha úmaka Wijjaj tsaniñ pujawai tura Wisha nu shuarjaj tsaninkian pujajai.

⁵⁷ Yus Apa, Winia akuptukuka, nu iwiaakma nérenniuiti. Tuma asamtai ni iwiaakmariin iwiaaku pujajai. Núnisañ Winia yurakka winia iwiaakmaruj iwiaaku pujustatui.

⁵⁸ Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus.

⁵⁹ Núnaka Jesus Israer-shuar iruntainiam unuiniarmiayi.

Iwiaaku chicham

⁶⁰ Nu chichaman antukar Jesusa unuiniamurj chicharainiak “Nii tana nu ti itiurchat asamtai ¿yaki antukminiait?” tiarmiayi.

⁶¹ Jesussha ni áujmatman nekáa tímiayi “Átum “ju chicham itiurchataiti” tárumek.

⁶² Wátsek, Wi nayaimpiniam pujumiaj nuj waketkimtaisha ¿urukawaintrumek?

⁶³ Warí, aya wakanik iwiaakman súwaiti. Ayashkia penké áantraiti nekas iwiaaku awajsatniun. Wi tájana nujaj imiá nekas wakankia iwiaaku awajsamniaiti” tímiayi Jesus.

⁶⁴ Tura Jesus Nin enentáimtachun tura Nin suruktatna nunasha yaunchu neka asa ni unuiniamurj in tímiayi “Atumíncha winia chichamprun enentáimtachu tuke awai.

⁶⁵ Nu asamtai tímiajrume “Shuáran winia Apar akupturkachmaitkiuinikia penké wean-turkachainti” tímiajai” tímiayi Jesus.

⁶⁶ Nuyasha ni nemarniurj untsurj armia nu Jesusan ikiukiar atakka Nijjaj wekasacharmiayi.

⁶⁷ Nuyá Jesus ni tuse (12) unuiniamurj in chicharainiak “¿Atumsha wétin wakerarmek?” tímiayi.

⁶⁸ Semun Pítrusha áikmiayi “Uunta, ¿yáiniñ wetaj? Ame chichammijjain nekas iwiaaku áminiaiti.

⁶⁹ Ame Kristu asam nekas iwiaaku Yusa Uchirínme. Nuka enentáimtusar ti paant nékaji” tímiayi.

⁷⁰ Jesussha tímiayi “Ashí tuse (12) árumna nu achikiuitjarme nekas Wíi shuar ajastin. Tuma aiñ atumín chikichik iwianchiiti” tímiayi.

⁷¹ Nuna taku Jútas Iskariútin, Semunka uchirín, enentáimtus tímiayi. Jútassha ni unuiniamurj iniat Jesusan ukunam surukmiayi.

7

Jesusa yachisha Nin enentáimtuscharmiaiyi

¹ Nu nankaasmatai Jesus Kariréa nunkanam wekaimiaiyi. Jutía nunkanam wéchamiayi Israer-shuara uuntri nuj máataj tutai.

² Tura Israer-shuar aak aakmatai namperj jeatemamtai

³ Jesusa yachi wishikiainiak tiarmiayi “¿Urukamtai juisha pujam? Jutía nunkanam wetá, aisha ame unuiniamuram túram nuna ísarat.

⁴ Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar ímmianum túratá” tiarmiayi.

⁵ Ni yachisha ishichkisha Nin enentáimtachu ásar tiarmiayi.

⁶ Tura Jesus tímiayi “Winia tsawantur nampernum wétin jeatsui. Atumjainkia nánkamas tsawant wétin péñkeraiti.

⁷ Ju nunkanmayá aents atumniaka kajertamatsrume. Antsu ni tunaarín etsertin asamtai Wíniaka kajertuiniawai.

⁸ Átumka nampernum wetarum. Wikia tsawantur jeachkui wéatsjai.”

⁹ Juna tinia Jesuska Kariréa nunkanam juákmiayi.

Aak aakmatai nampernum Jesus timia nu

¹⁰ Ni yachi wearmatai Jesussha nampernum wémiayi. Tura nekarawarain tusa úumak wémiayi.

¹¹ Israer-shuara úuntrisha námper irunturmanum eakar “Nu aishmansha ¿tuin pujá?” tiarmiayi.

¹² Ashí shuarsha Nin áujmatiarimiayi. Chíkich “péñkeraiti” tiarmiayi. Tura chikichcha “Péñkerchaiti. Aya anañkartawai” tiarmiayi.

¹³ Tura Israer-shuara úuntrin ashamainiak uuk áujmatiarimiayi.

¹⁴ Nampersha ajapén ajasmatai Jesus Yusa Uunt Jeen wayá shuáran unuiniamiayi.

¹⁵ Israer-shuara úuntrisha nuna ísar ti enentáimsar chichaak “Jusha unuimiátrachiatcha ¿itiurak imiá neka?” tiarmiayi.

¹⁶ Jesussha tímiayi “Wi unuiniajna nu winia chichampruchuiti antsu Winia akuptukua Núnan unuiniajai.

¹⁷ Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaikuiñkia, nuna nekaattawai. Aya wi enentáimmiajaiñ chichaakuisha, nuna nekaattawai.

¹⁸ Ni enentáimmiajai chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai.

¹⁹ Muisais Yusa akupkamurin atumí uuntrin amaschamka. Tuma ain nu umitsuk mantuatin wakerutarme” tímiayi Jesus.

²⁰ Nu shuarsha tiarmiayi “Wáurtsmek. ¿Ya mantamataj tusa wakera?”

²¹ Jesussha tímiayi “Ayampratin tsawantaj chikichkí túramtai ti enentáimtsurmek.

²² Muisais ashí tsupirnaktinian akupkachmiayi. Antsu ni uuntrinikia nuna akupka áiniawai. Tuma ain átumka Muisais akupkamu umiktai tusarum ayampratin tsawantajsha uchi áishman tsúpirnaitrume.

²³ Wátsek, Muisais akupkamu uminkiatu tusarum ayampratin tsawantajsha uchi áishman tsúpirkurmekaka ¿urukamtai Wi ayampratin tsawantaj áishmanka ayashí takamt-suk tsuármatai kajertarum?

²⁴ Shuar túrana nu ísam wárik súmamtikiawaip. Antsu inintrúsam paant nekaam, nekasa nu enentáimtusta” tímiayi Jesus.

Jesus Yúsnumia akupkamuiti

²⁵ Nuyá Jerusarénnumia shuar tiarmiayi “Maatai tuinia núchakait.

²⁶ Tura nuñ ashí ántamunam étserei tura suntar páchiniatsui. ¿Ii uuntrisha “Nekas Krístiti” tu enentáimtuiniawash?

²⁷ Antsu nekas Kristu taa tuyañ winiá nekanashtatui tura ju pujamuka ashí nékaji” tiarmiayi.

²⁸ Jesus nuna antuk, Yusa Uunt Jeen waja kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia

enentáirjaj táchaitjai antsu winia Apar akuptukuiti. Niisha ti nekas akupniusha átumka nékatsrume.

²⁹ Antsu Winia akuptukuitkiui aiyá tau asan Wikia nékajai” tímiayi.

³⁰ Nuyá sepunam enkeataj táyat achikcharmiayi ni tsawantrj jeachu asamtai.

³¹ Tura untsurj shuar Nin enentáimtusar “Kristu ta ¿nuna nankaamas aentsti tujintiamun túratpiash?” tiarmiayi.

“Eátkáttarme tura wáitkiashtatrume” tímiayi Jesus

³² Pariséusha Israer-patri úuntrisha Jesusnan timian antukar suntaran akupkarmiayi Jesusan achikiar sepunam enkeawarat tusar.

³³ Nuyá Jesussha tímiayi “Aya ishichik tsawant atumjaj pujustajai. Nuyá ataksha Winia akuptuku pujana nuj waketkittiajai.

³⁴ Átumka eátkáttarme tura Wi wéajna nuj wéchamniaitkiuram wáitkiashtatrume.”

³⁵ Israer-shuarsha nuamtak aniniaisarmiayi “¿Jusha tui wéakuin iisha wáinkiashtataji. Israer-shuar apachnium pujuinia nuj we apachin unuiniartatuak.

³⁶ Nii timia nu itiurkit. “Átumka eátkáttarme tura Wi wéajna nuj wéchamniaitkiuram wáitkiashtatrume” tana nu itiurkit?” tiarmiayi.

Yamaram iwiaakman súana nú entsa

³⁷ Jista amúamunam ti shiir najanawarmia nu tsawantaj Jesus wajaki kakaram chichaak tímiayi “Shuar ni enentáin kitiamakka Winin taa umar kitiakén imíkráti.

³⁸ Winia enentáimturna nuka ni enentáiyá entsa wa áintsan yamaram iwiaakman súana nú entsa jiinkittiwai.”

³⁹ Nuna taku Jesus “Ashí Yúsan enentáimtusarun Yusa Shiir Wakanj súsatniuiti” tímiayi. Tura núnisan Yus-Papiniumsha áarmaiti. Antsu Jesus tuke nayaimpiniam wéatsain Yusa Wakanj shuar súsachmauyayi.

Shuarsha niisháa niisháa enentáimprarmiania nu

⁴⁰ Chíkich shuarsha nuna antukar “Ju nekas Yúsnan etserin tátinia núiti” tiarmiayi.

⁴¹ Chikichcha “Juka nekas Krístuiti” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Wari, ¿Kariréa nunkanmaya Kristu áminkiait?

⁴² Yus-Papinium paant tawai “Krístuka yaunchu uunt akupin Tawit weeanmaya akiiniatniuiti, tawai. Tura Tawitia pépruriya Pirinnumia átiniaiti” tawai” tiarmiayi.

⁴³ Tuma asamtai shuar niisháa niisháa enentáimprar kanakiarmiayi.

⁴⁴ Chíkich aiyá nuka “sepunam enkeatai” tiarmiayi túrasha túracharmiayi.

Israer-shuara uuntri Jesusan enentáimtuscharmiania nu

⁴⁵ Suntarsha waketkiarmiayi. Tura Pariséusha Israer-patri uuntrisha “¿Urukamtai itiachuram?” tiarmiayi.

⁴⁶ Suntarsha tiarmiayi “Chikichkisha ju áishman chichaa áanis chichaschaiti” tiarmiayi.

⁴⁷ Nuyá Pariséu tiarmiayi “Atumsha anañnarume.

⁴⁸ Pariséutisha uuntcha nuna enentáimtuiniawash.

⁴⁹ Penké shuarka yaunchu akupkamun nékachua nuka yajauchiniam yuminkramu áiniawai” tiarmiayi.

⁵⁰ Nikiutémusha, kashi Jesusan tarimia nu, Pariséuitiat tímiayi

⁵¹ “Ii shuartikia, shuar ni túramun etserkamu ántutsuk súmamtikiachminiaiti” tímiayi.

⁵² Nuinkia niisha tiarmiayi “Wats, amesha Kariréanmayanchuashitiam. Yus-Chicham áujsam nekaattame. Kariréanmaya Yúsnan etserin penké táiniatsui” tiarmiayi.

Nuwá wáinmakman Jesusan itiariarmiania nu

⁵³ Nuyá ashí ni jeen waketkiarmiayi.

8

¹ Tura Jesuska Uriwiu náinnium wémiayi.

² Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi.

³ Nuyá Israer-shuara jintinniurisha Pariséusha nuwan wáinmakman Jesusan itiararmiayi. Tura ashí iruntramunam ajapén awajsarmiayi.

⁴ Tura Jesusan tiarmiayi “Uunta, ju nuwa tsanirma pujá achinkiyai.

⁵ Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi.

⁶ Aya mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsuntsumá ni uwejéjai nunká áarmiayi.

⁷ Tura tuke iníam wajaki tímiayi “Ayu, atumiiya tunáa túrichu ákunka kayan achik nin emka tukuti” tímiayi.

⁸ Tura nuna ti, ataksha tsuntsumá nunká áimiayi.

⁹ Tura ni chichamen antukar ni enentáin sumamawar úuntnumiá jukí chikichik chikichik jiinki wéarmiayi.

Ashí wéarmatai Jesus Niñki nuwájai juákmiayi.

¹⁰ Jesussha wajaki aya nuwanak wáiniak tímiayi “¿Ámin súmamtikramainia nusha tuiñ pujuinia. Chikichkisha áwak?” tímiayi.

¹¹ Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

Jesus tsáapnia áintsankete

¹² Ataksha Jesus Yusa Uunt Jeen iruntrarun tímiayi “Ju nunkanam Wi tsáapnia áintsan shuara enentáin tsáapniajai. Ashí Wijiai tsaniñ wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujai wekasattawai.”

¹³ Pariséu nuikia tiarmiayi “Ame péñkerum tau asam táména nu áantraiiti.”

¹⁴ Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia péñkerun táyatnak tájana nu péñkeraiti.

¹⁵ Ju nunkanmaya aents enentáimmiajai enentáimtakrum ti súmamtikrume. Tura Wikia chikichkinkesha súmamtiktsujai.

¹⁶ Tura súmamtikkiunka awajitsuk túrajai. Iis, Wiki shuar túramun péñkerashit tusan enentáimtsujai antsu winia Apar Winia akuptukua nusha Wijiai métek shuar túramun nékawai.

¹⁷ Atumí akupkamuriin áarmaiti: “Jimiará shuar mai nú chichamnak tákuinikia nu chicham nekasaiti.”

¹⁸ Wátsek Wisha winia Aparsha mai métek taji. Winia Aparsha akuptukuiti” tímiayi.

¹⁹ Tutai “¿Ame apasha tui pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.”

²⁰ Nuna Yusa Uunt Jeen Yusa kuítrín suinia nui tímiayi. Tuma ain sepunam enkeatniun achikcharmiayi ni tsawantri jeachu asamtai.

“Wi wéajna nui wéchamniaitrume” tímiayi Jesus

²¹ Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaarijiajn jakattarme.”

²² Israer-shuarsha tiarmiayi “Wi wéamunam wéchamniaitrume” tutai, nuiñkia máamatpiash” tiarmiayi.

²³ Nuiñkia Jesus tímiayi “Átumka nunkayaitrume antsu Wikia nayaimpinmayaitjai. Ju nunkayaitrume tura Wikia juyanchuitjai.

²⁴ Tuma asamtai tájarme “Atumi tunaaríjajai jakattarme.” Nekas Wi tájana núitjai. Tura nu enentáimtachkurmeka atumi tunaaríjajai jakattarme” tímiayi.

²⁵ Niisha aniasarmiayi “¿Amesha yáitiam?”

Jesussha tímiayi “Yaunchu tájarme.

²⁶ Nu arantcha atumin súmantikiatjarum tusan ti tíminiaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi.

²⁷ Tuma aiñ ni Aparin áujmatman penké nekaacharmiayi.

²⁸ Tuma asamtai tímiayi “Aents Ajasuitjiana ju, numiniam ajintruarum yakí takuri-akrumin nújainkia nekarattarme. Wi tájana núitjai tura winia enentáirjain takatsuk aya winia Apar unuitiurmanak tájai.

²⁹ Winia akuptukua nuka tuke Wíjjain pujawai. Winia Apar wakeramun tuke shiir túrakui ikiurkichuiti” tímiayi.

³⁰ Tutai untsurí shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniamur átatrume.

³² Nújajisha timiá nekas ana nu nekaattarme tura nekas ankant ajastatrume” tímiayi.

³³ Niisha tiarmiayi “Iisha Apraám weeitji. Chikicha takarniur átai tusar penké emetachmaitji. ¿Urukamtai “Ankant ajastatrume” tame?” tiarmiayi.

³⁴ Jesus tímiayi “Timiá nekasaiti, ashí shuar tunaan túruinia nuka nu tunaajai emeta-muiti. Tuma asa takarniua núnisan ajasuiti.

³⁵ Takarniusha ajapnamnia asamtai Yus atumin ajapramamniaitrume. Tura Akup-niu Uchirínkia ni Aparíjajai tuke pujawai.

³⁶ Tuma asamtai Akupniu Uchirí ankant awajtamsamtainkia imiá nekas ankant pujustatrume.

³⁷ Átum Apraám weeittrume nékajai. Túmaitiatrum winia chichamur ántachu asarum mantuataj tárume.

³⁸ Winia Apar iniaktursamun áujmatjai. Átumka atumí uuntri timia túrarme” tímiayi.

³⁹ Tutai niisha tiarmiayi “Iikia Israer-shuar asakrin ii uuntrinikia Apraámaiti” tiarmi-ayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume.

⁴⁰ Nekas ana nuna Yus iniaktursamtai nuna ujakjarme, tuma aiñ mantuataj tarume. Apraámka nuní túrachmiayi.

⁴¹ Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntri Yúskete. Niisha ii Aparínti.”

⁴² Tura Jesus tímiayi “Yus nekas atumi Aparíntkiuinikia Winiasha anentíntrume Yúsnumiá tau asamtai. Wisha winia enentáimmiarjai jui táchaitjai antsu Yus akuptukuiti.

⁴³ ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume.

⁴⁴ Atumí aparínkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáitraksha níniunak chichaawai. Iis, waitia uuntri asa tuke wáitriniaiti.

⁴⁵ Tura Wikia nekas takui átum enentáimturtsurme.

⁴⁶ ¿Yaki chikichkí tunaajai súmantikruamniait? Nuikia Wi nekasa nuna tau ajisha ¿urukamtai enentáimturtsuram?

⁴⁷ Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

Apraám akiintsain Jesus pujumiayi

⁴⁸ Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch áiniawai nusha. Nu arantcha iwianchrukuitme amesha” nekas taji” tiarmiayi.

⁴⁹ Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme.

⁵⁰ Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun péñkerashit tusa nekaattawai.

⁵¹ Ti nekasaiti. Wi tájana nuna enentáimta nú shuarka penké jákashtiniaiti” tímiayi.

⁵² Nuinkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek tiarmiayi.

⁵³ ¿Nuinkia ii uuntri Apraám nankaamaskaitiam. Niisha tura Yúsnan etserniusha jákcharuk áinia. Itiurak imiá nankaamantu enentáimtumam?” tiarmiayi.

⁵⁴ Jesussha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuiti. Nusha átumka “winia Yúsruiti” tárugna núiti.

⁵⁵ Nusha táyatrüm Nin nékatsrume. Wikia Nin nékajai. “Nin nékatsjai” tákunka atumjai métek wáitriñ áintjai. Tura Nin neka asan Nii tana nuna tuke túriniaitjai.

⁵⁶ Apraámka, atumí uuntri, imiá yaunchu jákaitiat Wi ju nunkanam tátinian wararas nákasmiayi. Tura wáitriak ti shiir warartusmiayi” tímiayi.

⁵⁷ Nuyá Israer-shuar Jesusan tiarmiayi “Warí, senkuenta (50) uwí takaktsume túmaitatam Apraáman wáinkiamjai tame.”

⁵⁸ Jesussha tímiayi “Ti nekas tájarme, Apraámka pujatsain Wikia pujajai” tímiayi Jesus.

⁵⁹ Nuna takuí kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jeenia jiinki wémiayi.

9

Kusuru akiinian Jesus tsuármiania nu

¹ Jesus ni unuiniamurijjai wesa áishman kan kusuru akiinian wáinkiamiayi.

² Ni unuiniamurisha aniasarmiayi “Uunta, jusha ¿urukamtai kusuru akiiniawit. Yana tunaarijjai kusuru akiiniait. Niiniuujai mpiash, aparíniuujai mpiash túrunawit?” tiarmiayi.

³ Jesus tímiayi “Ni tunaarijjai chusha ni aparíniuujai chusha túrunaiti. Antsu Yus ni ayashín túratniua nu paant atí tusa túrunaiti.

⁴ Tsawajkia takastiniaiti. Yamaikia Winia akuptukua nuna takatrín túratniuitjai. Kashi ajasmatai takastin atsuttawai.

⁵ Jú nunkanam pujakun shuara enentáin tsáapnimitkratniuitjai” tímiayi.

⁶ Nuna chichas nunká usukmi nunkajai pachimiar kusuru jün yakarmiayi.

⁷ Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar péñker íimiar támiayi.

⁸ Nuyá ni írutkamurisha nuik wáinin ármia nusha tiarmiayi “Juka pujus tuke kuítian seamniuya núchakait.”

⁹ Chikich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura niniki “Ee, wiitjai” tímiayi.

¹⁰ Tutai aniiniak “¿Itiurak yamaikia íimiam?” tiarmiayi.

¹¹ Niisha tímiayi “Áishman Jesusa nu tsakusan jürun yakartur “Siruí pajamtai entsanam nijiamauta” turutmiai. Takuí wena nijiamaran paant iimpramjai” tímiayi.

12 Tutai “Nu áishman_ñsha tuin_ñ pujá” tiarmiayi.
Niisha “Cha, nékatsjai” tímiayi.

Pariséu kusuru tsuárman inintrusarmiania nu

13 Nuyá kusuru tsuárman Pariséunam júkiarmiayi.

14 Kame Jesus kusurun tsuarmia nu_ñ ayampratin tsawanta_ñyayi.

15 Tuma asamtai Pariséusha itiurak ím_ñnium tusar aniasarmiayi.

Niisha tímiayi “Ji_ñruin tsakusan yakaarámtai, nijiamaran paant iim_ñjiai.”

16 Nuyá chíkich Pariséu shuarnumia_ñ nuamtak tunaiyar “Ju_ñna tsuáruka Yúsaiyanchuiti.
Kame ayampratin tsawanta_ñ túrait_ñ” tiarmiayi.

Tura chikichcha “Tunáa shuaraitkiuin_ñkia júnisañ túratniun tujinkia_ñyayi” tiarmiayi.
Nujai akannaikiarmiayi.

17 Tsuármancha ataksha aniasarmiayi “Ámin tsuármarua nu ¿warí enentáimtam?”
tiarmiayi.

Tutai “Wikia “Yúsnan etserniuiti” tajai” tímiayi.

18 Tura Israer-shuar nekas kusuruítat yamáí ímiui tu enentáimtuscharmiayi Pariseu.
Tuma ásar ni aparíncha untsukar

19 inintrusarmiayi “¿Ame uchiram kusuru akiinia tárumna nukait. Itiurak yamaikia
iimia?” tiarmiayi.

20 Ni aparísha tiarmiayi “Ii uchirín_ñkia kusuru akiiniama nu nékaji.

21 Tura iisha nékatsji itiurak yamaikia iimia. ¿Yátsuk pé_ñker tsuáruit? Niisha
úuntchakait, nii aniastarum. Niñki ujatmakarti” tiarmiayi.

22 Sapijmiak tiarmiayi. Israer-shuara úntrín_ñkia “Jesus Yus akupkamu asa nekas
Krístuiti” tuinia núnaka Israer-shuara iruntainmaya_ñ jii_ñki akupnakti tiniu ásarmatai
tsuarma aparí ashankarmiayi.

23 Nu asamtai ni aparí “Niisha úuntchakait, nii aniastarum” tiarmiayi.

24 Nuin_ñkia Israer-shuara uuntri_ñ kusuru tsuárman ataksha untsuk tiarmiayi “Yus
ímmianum nekasa nu titiá, ju_ñ áishman_ñkka tunaarinniuiti nékaji” tiarmiayi.

25 Tutai tímiayi “Kame tunaarinchashit. Nékatsjai. Antsu junak nékajai. Yaunchu
kusuruítatan yamaikia íim_ñjiai.”

26 Ataksha aniiniak “¿Itiurtámkama. Itiur ímtikrammia?” tiarmiayi.

27 Niisha tímiayi “Yaunchu tájar_ñme tura anturtatsrume. ¿Urukamtai ataksha titi tusa
wakerarum. Niiniu ajastin enentáimprurmek?” tímiayi.

28 Nuin_ñkia katsekkar “Áme_ñka ní shuarín_ñme. Tura iikia Muisaisa shuárín_ñtji, tiarmiayi.

29 Yus Muisaisan akupkaiti iikia nékaji antsu nu áishman_ñ nékatsji. ¿Tuyantskait?”
tiarmiayi.

30 Áishman_ñ tsuarma tímiayi “¿A_ñusha itiurtsuk áminiait? Winia ímtikrur_ñma nu átumka
nékatsrume tuyan_ñkit.

31 Paant nékaji tunaarinniun Yus anturtsui. Tikishmatar ni wakeramun túruinia
nunak anturui.

32 Yaunchusha kusuru akiinian tsuáruka tuke atsuwaiti.

33 Ju_ñ áishman_ñ Yúsaiyanchuitkiun_ñka pen_ñké túrachay_ñi” tímiayi.

34 Nuin_ñkia tiarmiayi “Áme_ñka tunaarintin akiiniaiatmesha ¿in jintintin átaj tamek?”
Nuna tiar jii_ñki awemarmiayi.

Wakan_ñin kusurua nu

35 Kusuru tsuárman jii_ñki awemarma nuna Jesus nekaamiayi. Tura wáiniak “Yusa
Uchiría nu enentáimtamek” tímiayi.

36 Tsuarma tímiayi “Uunta, turuttia wisha nekaan enentáimtustaj.”

37 Jesussha tímiayi “Wainme. Wiitjai ámijiai_ñ chichaa_ñjna nu.”

38 Tutai, tikishmatar “Uunta, enentáimtajme” Jesusan tímiayi.

³⁹ Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru aín iimtiktinian tura anañmamuk “Yusnan nekaan paant iimjiai” tana nuna ukusturtinian táwitjai” tímiayi.

⁴⁰ Tutai Pariséu shuar nuj pujuarmia nu nuna antukar “¿Nuiñkia iikia kusurukaitiaj?” tiarmiayi.

⁴¹ Jesussha tímiayi “Átum kusuruitkiurmeka atumí tunaari wáinchakrum sumamachu áintrume. Tura “paant iimjiai” tau asarum sumamaitrume” tímiayi.

10

Iikia murikiua áintsar aji

¹ Jesus tímiayi “Wi tájana nu ti nekasaiti. Shuar murikiun takakna nu ni murikrñ wenuimiunam kashi ikiuawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti.

² Antsu murikiu wáinniuka wáitiniam wayawawai.

³ Waiti wáinniuka nekas murikiun wáinniun wáitin uratui. Muriksha ni wáinniuri chichamen nékainiawai. Niisha ashí ni murikrñ chikichik chikichik náarñ anaitius untsúawai. Tura tsawaikia ni murikrñ jiki ayurtainiam yarumui.

⁴ Tura ashí ni murikrñ jir émtuki wéawai. Muriksha ni chichamen ántuiniak untsuam nemarainiawai.

⁵ Chikich shuárnaka nékachu ásar nemarainiatsui. Antsu ni chichamen nékainiachu ásar pisainiawai.”

⁶ Nu métek-taku chichamnaka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

⁷ Nuyá Jesus tímiayi “Ti nekasan tájarme. Wenuimiu wáitiri murik wainia nuka Wiitjai. Shuarsha murikiu áintsar Winí wayamin áiniawai.

⁸ Wi táatsain ashí táaruka kasa áiniak winia shuarun kasamkatai tusa wakeriarmiayi. Tura winia murikiur Wí shuar áiniak nu shuaran anturkacharmiayi.

⁹ Wikia wáititjai. Ashí Winin wayaaka uwemprattawai. Tura murikiua áintsan wenuimiunmaya jiki pénker yurumáttawai tura atak wayá ayamprattawai’ tímiayi.

¹⁰ ‘Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai.

¹¹ Wikia pénker wáinniuitjai. Pénker wáinniuka ni murikrñ uwemtikrartaj tusa jakattawai.

¹² Antsu aya kuitjai takauka ni murikrñchu áiniakui tura nekas wáinniuchu asa pénker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakiñmawai.

¹³ Nu shuarsha akikiam takáa asa murikiun enentáimtatsui. Nu asantai aya pisaawai’ tímiayi.

¹⁴⁻¹⁵ ‘Wikia pénker wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrartaj tusan jakattajai.

¹⁶ Chikich muriknasha takakjai. Nusha ju wenuimiunmayanchu áiniawai. Nunasha itiattajai. Nu muriksha Winia umirtukar ashí métek matsamsar chikichik wenuimiunmaya ajasartatui tura chikichik wáinin átatui’ tímiayi.

¹⁷ ‘Winia murikrun uwemtikrartaj tusan jakattajai turan atak nantaktiatjai. Nu asantai winia Apar anentui.

¹⁸ Wi wakerakun jakattajai. Wi wakerachkuñkia chikichkia mantuachminiaiti. Jákatniuncha tura nantaktinniasha winia Apar surusuiti’ tímiayi Jesus.

¹⁹ Israer-shuarsha nuna antukar niisháa enentáimprar kanakiarmiayi.

²⁰ Untsurí tiarmiayi “¿Urukamtai ántarum wáuruk tausha. Yajauch wakanin takaktsuk?”

²¹ Tura chikichcha tiarmiayi “¿Yajauch wakantrinniusha núnisan chichasminkiait. Yajauch wakantrinniusha kusurun íimtíkrampiashit?” tiarmiayi.

Israer-shuarka Jesusan nakitiarmiania nu

²² Micha nantutin Israer-shuar Jerusarénum namperan najanainiawai. Nu nampernumsha Yusa Uunt Jee atak jeamman enentáimtuiniawai.

²³ Jesussha Yusa Uunt Jee áachiniam wekasamiayi Sarumúnka wáitirja nuí.

²⁴ Israer-shuarsha Nin téntakar tiarmiayi “¿Ame nekas Krístukaitiam? Ju chichamaik etserkata. ¿Urukamtia nekas paant tátsum?” tiarmiayi.

²⁵ Tutai Jesus tímiayi “Yaunchu tiniu aín enentáimturachmarme. Winia Apar akupkamun takaajna nu ti paant awajtai.

²⁶ Tura átumka winia murikruchu asarum enentáimturtsurme.

²⁷ Wisha winia murikrun untsuam anturtuiniak nemartuiniawai. Wisha wínianak mash nékajai.

²⁸ Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit?

²⁹ Winia Apar murikiun surusuiti. Niisha ashí nankaamas kakaram asamtai ¿yaki uwejeýan atankit?

³⁰ Wisha winia Aparjai iisha aya chikichkiitji” tímiayi Jesus.

³¹ Tutai Israer-shuarsha atak kayan achikiar tukutaj tiarmiayi.

³² Jesussha tímiayi “Winia Aparu kakarmarijiai ti untsurí péñkera nuna takasuitjai. ¿Tújaiimpia mantuattarum?”

³³ Israer-shuarsha Nin tiarmiayi “Péñker túra asakmin máataj tátsuji antsu Yus yajauch chicharkumin túrattaji. Ámeka shuáraitatam Yusa nuke enentáimtumame” tiarmiayi.

³⁴ Nuyá Jesussha tímiayi “Atumí akupeamuriin Yus timia nu áarmaiti: “Átum yúsaitrume” tawai.

³⁵ Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait.

³⁶ Niisha yúsaitkiuinikia nuikia Yus Apa anaikia ju nunkanam akupkamu asan ti nekas Yúschakaitaj. Nújaiinkia wi “Yusa Uchiríntjai” takui ¿itiurak “Yusan yajauch chicharui” túrutrum?

³⁷ Winia Apar túramu túrachkuinikia enentáimtursairap.

³⁸ Tura nekas túrakuinikia enentáimtursatarum. Tura Winia nakitrakrumsha nuikia wi túramu enentáimtustarum. Nujaiinkia winia Apar Winin pujamu ashí nekaattarme. Núnisnak Wisha Niin pujajai. Iisha chikichkiitji.”

³⁹ Tutai ataksha sepunam enkeatai tiarmiayi. Túrasha Jesus uwempramiayi.

⁴⁰ Nuyá Jesus Jurtañ entsa amain wé yaunchu Juan imiakrattainium pujusmiayi.

⁴¹ Ti untsurí shuar iyumar tiarmiayi “Nekas Juanka aentsti tujintiamun túrachiat ashí Jesusnan timia nu nekasaiti” tu tiarmiayi.

⁴² Nuisha untsurí Jesusan enentáimtusarmiayi.

11

Rásaru jakamu

¹ Petania péprunam áishman, ni naari Rásaru, jaa pujumiayi. Nu péprunam Marí ni kaijjai Mártajai pujumiayi.

² Niisha Rásaru umai áirmiayi. Nu Marisha ukunmanka kunkuinian sumak Jesusan kuer ni intiashíjjai japirmiayi.

³ Tura Rásaru jaakui ni umai Jesusan chichaman akuptuiniak tiarmiayi “Uunta, ame amikrum jaawai.”

4 Jesussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchirí kakarmarisha jú sunkur tsuármanum paant atí tusa jaawai.”

5 Jesus Mártancha ni kajincha tura ni umaj Rásaruncha nekas aneemiayi.

6 Túmaitiat Rásaru jaawai taman antukiat ni pujamunam jimiará tsawant pujusmiayi.

7 Nuyá ni unuiniamurín “Ataksha Jutía nunkanam wetái” tímiayi.

8 Tura ni unuiniamurisha tiarmiayi “Uunta, nuiksha Israer-shuar kayajaj tukurmar mantamatai tícharmaka. ¿Nui ataksha wétai támek?”

9 Jesussha jú métek-taku chichaman tímiayi “Tsawajkia páantchakait. Tsawaj wekaana nu paant asamtai tukumkashtatui.

10 Tura kashi wekaana nusha kirit asamtai tukumkátawai. Núnisan Wíi tuke pujakun winia takatrun takastiniatjai. Túraknasha itiurchatan wáinkiashtatjai.”

11 Nuyásha Jesus atak tímiayi “Ii amikri Rásaru kanarai. Wi ishintiartatjai.”

12 Tutai ni unuiniamurí tiarmiayi “Uunta, aya kanarka nuinkia péñker ajastatui.”

13 Jesuska Rásaru jakamu nékayat “kanarai” tímiayi. Tura ni unuiniamurí Rásaru kajinmakua áintsan kanarai enentáimprarmiayi.

14 Jesus nuikia ti paant tímiayi “Rásaru yamaikia jakayi.

15 Tura nuí pujuscha asan kúntuts pujatsjai. Jean túrattajna nu íisrum ti nekas enentáimtursattarme. Nuna nekaan shiir enentáimjai. Wátsek, iyutai.”

16 Nuyá Jimiampramu Tumas chíkich unuiniamurí nuí armia nuna “Iisha weri Nijijaj métek jakatai” tímiayi.

Iwiaaku átinniasha jaka nantaktinniasha Jesus nérenniuiti

17 Nui taa, Rásarun kuaru tsawant ikiusman wáinkiamiayi.

18 Petania pépruka Jerusarénnumia menaintiú kirumitru áinis tíjiuchiiti.

19 Tuma asamtai untsurí Israer-shuar Mártasha Marísha, ni umaj jakamtai uutkui atsankrataj tusa weriarmiayi.

20 Mártasha Jesus tíjiuch ajasun nekáa inkiunajtja wémiayi. Antsu Marikia jeá pujumiayi.

21 Tura Marta Jesusan inkiun tímiayi “Uunta, Ame pujakminkia winia umar jákachaayi.

22 Tura tuke nékajaj ashí Yus seamna nuna súramui.”

23 Jesussha tímiayi “Ame umaimisha nantaktiatui.”

24 Mártasha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajaj.”

25 Nuyá Jesus tímiayi “Iwiaaku átinia nérentin asan Wikia iniantkartiniatjai. Winia enentáimturna nuka jakasha nantaktiatui.

26 Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

27 Niisha “Ee, Uunta, ame Yusa Uchirínme. Krístuitme, uwemtikkiartin jú nunkanam tátinia nu” tímiayi.

Jesus Rásaru iwiarsamunam taa úutmiania nu

28 Mártasha nuna ti, ni kai Marin untsuk úukan tímiayi “Uunt juí taa untsurmawai.”

29 Marisha nuna antuk wárik wajaki Jesusa iyuttsa wémiayi.

30 Jesussha péprunam jeatsuk Marta inkiunmanum pujumiayi.

31 Marí wari wajaki wématai Israer-shuar nu jeanam atsankrattsa pujuiniasha nuna íisar weriarmiayi. Iwiarsamunam úuttiasa wéatsuash tusa weriarmiayi.

32 Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

33 Jesussha Maríncha tura nijijaj úutuncha wáiniak wáitnentaimta asa ti kúntuts pujusmiayi.

34 Tura “Tui iwiansamarum” tímiayi.

Niisha “Uunta, iitia” tiarmiayi.

³⁵ Jesussha úutmiayi.

³⁶ Israer-shuarsha “Ti aneatsuk” tiarmiayi.

³⁷ Tura chíkich “Kusuru tsuáruchukait. Nii pujakuisha Rásaru jákaampiash” tiarmiayi.

Rásaru iniantkimiu

³⁸ Jesussha ti kuntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi.

³⁹ Tura Jesus “Kaya jurustarum” tímiayi.

Rásaru umaí Marta tímiayi “Uunta, kuaru tsawant jákaiti. Mejeatsuk’ tímiayi.

⁴⁰ Tura Jesus tímiayi “Yus enentáimtakmeke Yusa kakarmari wáinkiatame tíchamkajam.”

⁴¹ Nuikia kayarin uratiarmatai Jesus nayaimpin iis tímiayi “Aparu, Winia anturtakmin yumınsajme.

⁴² Winiasha tuke anturtame tura ju shuaran péñker enentáimtikrataj tusan tajai. Ame akuptukuitmena nuna nekarmawarti.”

⁴³ Nuna tinia kakaram untsuak “Rásaru jíinkitia” tímiayi.

⁴⁴ Nujainkia penuarmartiuk jíinkimiayi. Yapinmasha jaanchjiaí ijamuyayi. Tura Jesus “Atirtarum. Wéti” tímiayi.

Jesusan achiktin chichaman jurusarmiania nu

(Mateu 26.1-5; Márkus 14.1-2; Rúkas 22.1-2)

⁴⁵ Untsurí Israer-shuar Marin nemariaru Jesus túramun ísar enentáimtusarmiayi.

⁴⁶ Tura chíkichkia Pariséunam wear Jesus túramun ujakarmiayi.

⁴⁷ Nuna antukar Pariséusha Israer-patri úuntriasha ashí naamka uunt armia nujai iruntrar tiarmiayi “¿Warí itiurkamniait? Nu shuarka aentsti tujintiamun ti túratsuk.

⁴⁸ Aya júnik iniaiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrar-tatui.”

⁴⁹ Nu uwitin Kaipias Israer-patri uuntriayi. Niisha tímiayi “Átumka nékatsrume.

⁵⁰ ¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” tímiayi.

⁵¹ Kaipiaska aya ni enentáimmiájain tíchamiayi. Antsu nu uwitin Israer-patri uuntri asamtai Yus nuna enentáimtikramiayi. Nújainkia Israer-shuar Jesus jaruktinian ujakmiayi.

⁵² Tura aya Israer-shuarnakcha antsu níijjaisha ashí nunkanam Yus-shuar ajasarun irurtajtsa jákatniuyi.

⁵³ Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jíinki atsamu nunkanam Eprain pepru tíjiuch wémiayi. Tura nui pujusmiayi ni unuiniamurijjai.

⁵⁵ Israer-shuara namperi paskua ishichik jatemsamtai untsurí shuar yajá péprunmaya Jerusarénum káunkarmiayi. Kame paskua jeatsain Muisais timia núnisan ní ayashísha enentáisha iwiarnarat tusa wakeriarmiayi.

⁵⁶ Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi.

⁵⁷ Pariséusha Israer-patri uuntriasha akupainiak “Jesus pujá nekaamka ujatkata” tiarmiayi. Jesusan sepunam enkeatai tusar tiarmiayi.

12

Marí Jesusan kun̄kuinian kuérmiania nu (Mateu 26.6-13; Márkus 14.3-9)

¹ Paskua jísat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuin̄ pujumiayi.

² Jesus jeamtai ayurawarmiayi. Rásarusha niij̄iāi yurumámiayi. Márta sha yurumkan iwiasmakmiayi.

³ Tura Marikia kun̄kuinian ti kuit̄j̄ai ritru ajapén sumak itiamiayi. Tura Jesusa nawen kuer ni intiash̄ij̄iāi japirmiayi. Jeasha nu kun̄kuinj̄ai ti shiir kun̄kun̄miayi.

⁴ Jútas Iskariúti, Semun̄ka uchirí, nūi pujumiayi. Niisha Jesusa unuiniamur̄ntiat ukunam Jesusan surukmiayi máawarat tusa. Niisha tímiayi

⁵ “¿Urukamtai nu kun̄kuinian ti kuit̄j̄ai surukchama kuítrinch̄an súsatniun?”

⁶ Kame kuítrinch̄an enentáimtak tíchamiayi. Antsu unuiniamu kuítr̄in̄ wainkia asa yúpichuch kasamkamniuyayi. Tuma asa nuna tímiayi.

⁷ Tura Jesus tímiayi “Iniaisata. Wi iwiarnakui kuératniun sumak ikiurtusuiti.

⁸ Kuítrinch̄a tuke atum̄j̄ai íruntsuk. Antsu Wikia atum̄j̄ai tuke pujuschattajai” tímiayi.

Rásaruncha máataj tiarmiania nu

⁹ Israer-shuarsha Jesus Petania péprunam pujan antukar Jesus ístaitisar weriarmiayi. Rásaruncha Jesus jakamunmaya iniantkimia nusha iyutai tusar wearmiayi.

¹⁰ Túramtai Israer-patri uuntrīnkia chichaman jurusarmiayi Rásaru maatai tusar.

¹¹ Untsurí Israer-shuar Rásaru iniantkimiun nekaawar Israer-patrin̄ ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

Jesus Jerusaré̄num shiir wayamiania nu

(Mateu 21.1-11; Márkus 11.1-11; Rúkas 19.28-40)

¹² Paskua namperan pach̄iintiuktajtsa ti untsurí shuar Jerusaré̄num wearmiayi. Kashin tsawar Jesus nú peprunam tátinian nekaawarmiayi.

¹³ Niisha tintiuki nuké áinis nukan júurar Jesusan in̄kiun̄tai tusar jíinkiar̄miayi. Túrawar untsumainiak “Shiir tati, tiarmiayi. Yusa kakarmarij̄iāi winiana nu tí pé̄nkeraiti. Israer-shuara uuntrī asa shiir atí” tu untsumiarmiayi.

¹⁴ Jesussha umpuurun wáiniak entsamkamai. Núnisan̄ áarmaiti Yus-Chichamnum:

¹⁵ “Seun̄ péprunmaya shuara, ashamkairap. Atumí Akupniur̄i umpuurunam entsamak winiawai.”

¹⁶ Nu chichamaik Jesusa unuiniamur̄i nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan̄ túrunamiayi.

¹⁷ Jesus Rásarun iwiansamunmaya iniantkimiun wáinkiarua nú shuar nuna áujmatiar̄miayi.

¹⁸ Tuma asamtai shuar Jesus nu tujintiamun túramtai nekaawar Jesusan in̄kiun̄ktaj tusar jíinkiar̄miayi.

¹⁹ Tura Pariséusha nuamtak tiarmiayi “Iis, pen̄ké tujinkiaji. Maa iista, ashí shuar Nin nemarainiatsuk.”

Kriaku apach Jesusj̄ai chichastinian wakeriarmiania nu

²⁰ Paskua nampernum Yus shiir awajsatniun Jerusaré̄num weriaruka untsurí nun̄kanmaya shuar ármiayi. Kriaku apachcha ármiayi.

²¹ Niisha Jiripin weantukarmiayi. Kame nu Jiripi Petsaitia péprunmaya uyayi. Petsaitia péprusha Kariréa nun̄kanam awai. Nincha Kriaku apach seainiak “Uunta, Jesusj̄ai chichastaitisar wakeraji” tiarmiayi.

²² Jiripisha Antresan werí ujakmiayi. Nuyá niij̄iāi métek tsan̄inkiar Jesusan weriar ujakarmiayi.

23 Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástatjai.

24 Wi tájana nu ti nekasaiti. Jínkiaia ántsanketjai. Araachmaka níñki pujatsuk. Antsu araamka tsapain jinkiaichirí kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui.

25 Shuarsha jinkiaia nuke aya ju nuñkanam péñker pujustinian enentáimkiunka ántar pujak nekas iwiaakmarin emenakattatui. Tura ju nuñkanam péñker pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui.

26 Shuar winia átaj takunka nemartusti. Túranka Wi pujajna nuí Wíi shuar tuke átatui. Núnisan Wíi shuar winia takatrun takáa nuna winia Aparsha shiir enentáimtustatui’ tímiayi.

Jesus ni jákatniun étserei

27 ‘Yamaikia enentáiruí ti itiurchat pujajai. ¿Warittiajak. “Aparu, ju túrunatniunmaya uwentikrurta” titiajash? Antsu jú túrunatniun táwitjai.

28 Aparu, wi túramujai ashí shuar ame náarmin shiir enentáimturarti” tímiayi Jesus.

Tutai nayaimpinmaya chichaman antukarmiayi. “Winia náarun shiir awajsattajai tura ataksha shiir awajsattajai” tímiayi.

29 Shuarsha nui pujuinia “ipiamtachuashit” tiarmiayi. Tura chikichcha “Nayaimpinmaya suntar Nin chichasai” tiarmiayi.

30 Jesussha tímiayi “Wi antuktinian chichaschayi antsu átum nekaatarum tusa chichasai.

31 Yamaikia nuñkanam makumatin jeayi. Tura íwianch ju nuñkanam akupniua nu nupetnak ajapnattawai.

32 Tura numiniam awajnaintai ashí nuñkanmayanka shuar enentáimturartatui” tímiayi.

33 Juna taku krúsnum jákatniun ujakmiayi.

34 Shuarsha awajirar tiarmiayi “Yaunchu Yus akupkamu papiniumia áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnaitniuiti” tame? Aents Ajasuka Krístuchukait, Yus anaikiamu. Núchaitkiuinikia Aents Ajasuka yait?” tiarmiayi.

35 Nuñkia Jesus tímiayi “Wi tsáapninia áintsanketjai. Tsáapnisha atumín aya ishichik tsawantin tsáapniartatui. Tsáapin ana juik wekasatarum kirit ajatsain. Kame kiritniunam wekaana nusha nékatsui itiuranimpia wea.

36 Tsáapnin wáinkiuam nin enentáimtustarum. Túrakrum winia tsáapnintruí wekasatarme.” Jesussha nuna ti wémiayi uumak pujustaj tusa.

Untsurí Israer-shuar Jesusan enentáimtuscharmiania nu

37 Jesus aentsti tujintiamun ti untsurí túramtaisha Nin enentáimtuscharmiai.

38 Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?” tu áarmaiti.

39 Nuna uminiak Jesusan enentáimtuscharmiai. Tura nu arantcha Isayas áarmiayi:

40 “Yus nin kusuru awajsaiti tura ni enentáincha kátsuram awajsaiti. Ni jiiijiai íimsain tusa tura ni enentáijiai nekaawain tusa túrait. Kame ni tunaari iisar enentáimtuiniakui Yus nin tsuáraini” tu áarmaiti.

41 Isayas yaunchu Jesusan nayaimpiniam ti shiir pujan wáiniak nuna tímiayi.

42 Tuma ain untsurí Israer-shuarsha tura ni uuntrinmayasha Jesusan nekas enentáimtusarmiayi. Tura niisha Pariséun ashamainiak paant tícharmiai. Israer-shuara iruntairiya jiki awetamaj tusa ashammarmiayi.

43 Yus shiir enentáimtursati tutsuk antsu shuar shiir enentáimtursati tusar túrawarmiayi.

Shuaran sumamtikiatniun táchaitjai antsu uwentikratniun táwitjai, timiania nu

⁴⁴ Jesus kakantar untsumuk tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai.

⁴⁵ Winia wáitkiusha Winia Aparnasha wáinui.

⁴⁶ Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai.

⁴⁷ Shuaran sumamtikiatniun táchaitjai antsu uwentikratniun táwitjai. Tuma asantai shuar winia chichamprun antuk umíachkunka sumamaiti. Tura Wikia sumamtikiachuitjai.

⁴⁸ Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantaj nin sumamtikiattawai.

⁴⁹ Wi enentáimmiajain chichaatsjai. Winia Apar akattur akuptukuiti. Tura chichastinia nuna surusuiti.

⁵⁰ Wisha nékajai, ashí winia Apar akupeamuka yamaram iwiaakman tuke amuukashinian súawai. Tuma asantai winia Apar túrutmia núnisnak tajai” tímiayi Jesus.

13

Jesus ni unuiniamuri nawen nijiatramiania nu

¹ Paskua jísat jeatin chikichík tsawant ajasmatai Jesusa tsawantri jeatemayi. Túramtai ju nunkan ikiuki ni Aparin wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajítsuk tuke aneemiayi.

² Nu tsawantaisha murikiun yúatin ármiai. Tura yurumáin jeatsain, uunt iwianch Semunka uchirí Jútas Iskariúti enentáin Jesusan surukat tusa enentáimtikramiai.

³ Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa

⁴ chíkich yurumuk pujuiniaj wajakmiayi. Tura pushirin ámiak awankéman emenmamamiayi.

⁵ Nuyá nijiaamatainiam entsan yará ni unuiniamuri nawen nijiatramiai. Tura awankémjai japirmiayi.

⁶ Semun Pítrunam jeamtai Pítiur tímiayi “Uunta, ¿Winia nawer nijiertaj tamek?”

⁷ Jesussha tímiayi “Wi túrajna nu yamáí nékatsme tura ukunam nekaattame.”

⁸ Tura Pítiur tímiayi “Penké winia nawer nijiarhattame.”

Jesussha tímiayi “Wi nijiaachkuinkia Wijiaj tsaninkia pujuschamniaitme.”

⁹ Tutai Semun Pítiur tímiayi “Nuinkia, Uunta, aya nawerkechu antsu uwejrusha tura muukarsha nijiatrurta.”

¹⁰ Tura Jesus tímiayi “Yamáí mainkia ayashí shiir asantai aya nawenin nijiamártiniaiti. Atumí enentáin ashí penkeraitrume. Túrasha ashí shuarcha” tímiayi.

¹¹ Kame Jútas Nin suruktinian nekáa “ashí shuarcha” tímiayi.

¹² Jesussha nijiar umik ni pushirin entsarmiai. Tura atak pujus tímiayi “¿Atumsha Wi túrajna nu nekaarmek?”

¹³ Wi atumí Uuntri asantai nekas “Uunta” túrutrume. Nusha penkeraiti.

¹⁴ Tura Jintinniuitiatan tura Úuntaitiatan atumí nawen nijiarhajak. Atumsha núnisrumek nuamtak náwem nijiatnairatarum.

¹⁵ Atumin nekapruatsan túramjai. Atumsha núnisrumek túratarum.

¹⁶ Ti nekasan tajai. Takarniuka ni uuntri nankaamaschaiti. Akupkamusha akupea nuna nankaamaschaiti.

¹⁷ Nu nekaarum túrakrumka shiir átatrume.

¹⁸ Tura tájana nuna ashí tátsujrume. Anaikiaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijiaj yurumna nu winia nemasur ajasai.”

19 Nuka túmatsain ujaajrume. Nuyá túrunamtai Yusa Uchiríntjai nusha paant nekaat-tarme.

20 Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

Jesus Jútas Nin suruktinian étserui

(Mateu 26.20-25; Márkus 14.17-21; Rúkas 22.21-23)

21 Nuna ti, Jesus ni enentáin ti itiurchat enentáimpramiayi. Tura paant tímiayi “Nekas tajai, chikichik juí atumjai pujana nu Winia surutkattawai.”

22 Tutai ni unuiniamuri nuamtak íniaisar “¿Yanak ta?” tiarmiayi.

23 Chikichik unuiniamuri, Jesus ti aneamu, Nijjai tsanin yurumuk pujumiayi.

24 Tuma asantai Semuñ Pítiur ni uwejéjai iniakmas “Aniasta, ¿yanak áujmata?” tímiayi.

25 Tutai Jesusan áyanmatsan aniasmiayi. “¿Yait, Uunta?” tímiayi.

26 Jesussha ayak “Tantan túumnium ajunkan susattaj núiti” tímiayi. Nújain tantan túumnium ajun Semuñka uchirín Jútas Iskariútin susamiayi.

27 Tura wárik Jútas tantan achikmatai íwianch ni enentáin wayamiayi. Nuyá Jesus tímiayi “Túráttamna nu wárik túrata.”

28 Tura ashí nuí yurumainiak pujuarmia nusha wariniak ta tusa nekaacharmiayi.

29 “Kuítrincha kuit súserta” tátsuash tu enentáimprarmiayi. Tura chikichcha “namper-num yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asantai tu enentáimprarmiayi.

30 Jútas tantan yua kashi ajasmanum jíinkimiayi.

Yamaram akupkamu

31 Jútas jíinkimtai Jesus tímiayi “Wi Aents Ajasu asantai winia kakarmar yamaikia paant átatui. Tura wi túramujai Yusa kakarmarisha ti paant átatui.

32 Wi Yusa kakarmarín paant awajeakui Wisha ni Uchirí asantai winia kakarmar-nasha Yuska wárik paant awajsattawai.

33 Uchichiru, atumjai ti untsurí tsawant pujuschattajai yamaikia. Wi Israer-shuaran tímiaj nútiksanak atumin tájarme. Atumsha Winia eátkáttarme tura wi wéamunam winish-tatrume.

34 Ju yamaram akupeamun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitrume.

35 Anenaiyakrumninkia nujai ashí shuar “Kristu unuiniamuri áiniawai” túramartatui.

Pítiur Nin natsantratniun Jesus ujakmiania nu

(Mateu 26.31-35; Márkus 14.27-31; Rúkas 22.33-34)

36 Semuñ Pítiur Jesusan aniasmiayi “Uunta, ¿tua wéam?”

Jesussha tímiayi “Wi wéajna nuí yamaikia winichminiaitrame. Tura ukunam winit-tiarme.”

37 Nuyá Pítiur tímiayi “Uunta, ¿urukamtai yamaikia winichminiaitiaj? Ámin yáintajtsan jakataj tajai.”

38 Jesussha tímiayi “¿Nekasmek táme? Ti nekas tájame, atash shiniatsain Winia menáintiú natsantrurtatme” tímiayi.

14

Jesus Yus-jintiaiti

1 “Kúntuts pujusairap. Yus enentáimtustarum, Winiasha enentáimtursatarum.

2 Winia Aparuí átum pujustin ti ankant awai. Tura nuna iwiarataj tusan Aparuí wéajai, nekasaiti. Nekaschaitkiuinikia ¿itiurak ujakaajrum?

3 Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan.

⁴ Wi wéaj nu nékarme tura jintiasha nékarme” tímiayi Jesus.

⁵ Tumas tímiayi “Uunta, Ame weam nu nékatsji. ¿Jintiasha itiurak nekaattaj?”

⁶ Jesussha tímiayi “Wi nekas jintiaitjai. Wíjiaínchu wekaana nuka winia Aparuí jeatniun penké tujintiawai. Tura Wissha tuke nekas tiniu asan nekas ana nuna shuáran nékamtikiajai. Wissha shuáran yamaram iwiaakman tuke amuukashtinian súwitjai.

⁷ Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

⁸ Nuínkia Jiripisha tímiayi “Uunta, Apasha wáinkiarca maak.”

⁹ Jesussha tímiayi “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarca maak” tame?

¹⁰ Winia Aparjai tsanínkian pujakun tura winia Aparsha Wijiaí pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai.

¹¹ Nekaatarum. Wissha winia Aparjai tsanínkia pujakur nekas chikichkiitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujai chikichik ájinya nu páantchakait.

¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuí wéakui nuna nankaamas tujintiamun túrattawai.

¹³ Ashí Winia enentáimtursarum seatrumna nuna amastatjai. Nújainkia winia Apar shiir awajnastatui.

¹⁴ Winia enentáimtursarum seakrumnínkia ashí túrattajai’ tímiayi.

Jesus Yusa Wakanín akupkattawai

¹⁵ ‘Atumsha anentkurmeka winia chichamur umiktarum.

¹⁶ Tura wéakun winia Aparun chikichan akupturmakti tusan seattajai. Niisha atumjai tuke pujak atsanamprartatui.

¹⁷ Nusha Yusa Wakanínti. Yus-shuarcha Nin nekaachmin ániawai. Tuma asantai ni enentáin wayachminiáiti. Antsu átumka atumi enentáin pujakui Nii nékarme. Niisha atumí enentáin tuke pujustatui.

¹⁸ Mitiaikia áitkiasnak ikiukchattajrume. Atumín atak tátatjai.

¹⁹ Ishichik tsawant nankaasmatai chikich shuar irunna nu wáitkiachartatui. Tura Wi iwiaaku asantai átumka nu iwiaakmajai pujustatrume. Tuma asarum wáitkiattarme.

²⁰ Tura nu tsawantaj ju nekaattarme. Wissha winia Aparjai tsanínkia pujakur chikichkiitji. Núnisnak Wissha atumjai tsanínkian pujajai. Tura atumsha Wijiaí tsanínkia pujarme.

²¹ Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wissha nin aneajai tura nekarati tusan iniaktustatjai.” Jesus nuna tímiayi.

²² Chikich Jútas, Iskariútichu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

²³ Jesus tímiayi “Winia anentuka tájana nuna enentáimtawai. Winia Aparsha nu shuaran aneattawai. Tura Wissha winia Aparnum nu shuarjai tsanínkia pujustatji.

²⁴ Antsu Winia anentchaka tájana nuna enentáimtatsui. Átum ántarmena nú chichamka wíniachuiti, antsu Yus Apa Winia akuptukua Núnaiti’ tímiayi.

²⁵ ‘Atumjai tuke pujakun nuna tájarme.

²⁶ Yus Apa ni Shiir Wakanín atumin yáinmak atsanamprarat tusa akupturmaktatrume. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui’ tímiayi.

27 'Imiatkinchanum pujustarum. Imiatkinchanum pujajna núnisrumek pujustarum tusan amaajai. Jú nunkanmaṅka warastin wáinkiashtatrum. Antsu itiurchatnum pujay-atrumkesha Wijjaj imiatkinchanum pujustatrum. Ashamtsuk pujustarum. Itiurchat enentáimprairap.

28 Nuik timiaj nu antukmarme. Aparuḡ wena atak atumiḡn tátatjai. Winia Aparka Wijjaj nankaamas úuntaiti. Tuma asamtai ti nekas anentkurmeka "Aparuḡ wéajai" takui ashí warasaarme.

29 Nuka túmatsaḡn ujaajrume. Túrunamtai nuyá Winia enentáimtursattarme" tímiayi.

30 'Jú nunkanmayan akupin winiakui atumjaj núkap chichaschattajai yamaikia. Wíniaka nupettukchamniaiti.

31 Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái' tímiayi.

15

Numi arakma áintsanḡketjai

1 'Winia iwiaakmarun amaakun numi arakma áintsanḡketjai. Wikia kampuintjai atumsha kanawentrume. Winia Aparsha arakan wáiniua núnisaiti.

2 Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa.

3 Wi ujakjarmena nujaj puruarmaitrume.

4 Numi kanawesha kampuin áchitkiachkuṅka niṅki nerechamniaiti. Núnisrumek atumsha Winí áchitkiachkurmeka nerechamniaitrum. Wi atumjaj áchitkaj núnisrumek atumsha Winí tuke áchitkia atarum' tímiayi.

5 'Wikia kampuintjai atumsha kanawentrume. Kampuḡkia kanawen áchitkia núnisnak achiakjarme. Tura kanawe ni kampuinḡ áchitkia núnisrum Winí áchitkia atarum. Túrakrumka núkap nerektatrum. Antsu Wíjjaḡchuka pḡnker túratin pḡké tujintiarume.

6 Winí áchitkiachuka ajapam kukartatui. Kanawesha kukarmatai shuar irumkar áesawartatui' tímiayi.

7 "Tuke Winí áchitkaiatkurmeka tura winia chichamprusha kajinmattsuk emetarmeka átum wakerarmena nu seakrumin amastatjai.

8 Átum núkap nereakrumniṅkia ashí shuar "Nekas Jesusa unuiniamurḡnti" túramartatui tura winia Aparnasha shiir awajsartatui.

9 Winia Apar anenna nútiksanak Wisha atumin aneajrume. Winia aneamur tuke atarum.

10 Winia Aparu akupkamurḡn umiakun tuke ni aneamurḡntjai. Núnisrumek winia akupkamur umiakrumka tuke winia aneamur átatrum' tímiayi.

11 'Wi waraajna áintsarmek warastarum tusan nuna tájarme. Tura ti shiir warastatrum.

12 Wi akupkamu júiti: "Wi aneajrumna nútiksarmek ashí anenaitiarum."

13 Shuar ni amikrḡn yáḡntaj tusa jakaṅka ti anenḡkartichukait.

14 Wi akupeamu takaakrumka atumsha winia amikruitrum.

15 Takarniuka ni uuntrḡ takaana nuna nékatsui. Tuma asamtai "winia takarniuruitrum" tátsujrume. Antsu ashí winia Apar táman ujaku asan "winia amikruitrum" tájarme.

16 Aya atumí enentáimsamurḡjaḡn Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrum. Túrarum pḡnker túratniuitrum nerektinia áintsarmek. Tura nu nere amuutsuk tuke átiniaiti. Tuma asamtai winia Apar searmena nuna amastatui.

17 Júnaka akupeajrume: Nuamtak mai anenai ajatarum' tímiayi.

Yus-shuarcha Jesusnasha Níniuncha nakitiainiawai

¹⁸ Jū nuṅkanmaya shuar Winia emka nakitrurar atumniasha nakitramarme.

¹⁹ Atumsha jū nuṅkanmaya shuaraitkiurminkia niiniua nútiksaṅ anenmaintrume. Antsu Wíi shuar ajastarum tusan jū nuṅkanmaya achikmajrume. Túramtai nekas jū nuṅkanmayanchuitrume yamaikia. Nu asamtai nu shuar nakitramainiawai.

²⁰ “Takarniuka ni uuntri naṅkaamaschaiti” tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui.

²¹ Winia Akuptukun nékachu ásar Winia enentáimturkurmin yajauch awajtamsartatui’ tímiayi.

²² ‘Wi tana Yus-Chichaman nin ujakchamtaiṅkia tunaanum sumamacharaṅayi. Antsu ujakma ásar “Nékachkun túraitjai” tíchamin ániawai.

²³ Winia nakitruinia nuka winia Aparnasha nakitiainiawai.

²⁴ Aents penké túrachman túrachuitkiuṅkia tunaanum sumamacharainti. Antsu wi túramun wáinkiaru ániayat Winiasha tura winia Aparnasha nakitiainiawai.

²⁵ Yaunchu Yus akupkamunam áarmaiti:

“Penké ántar nakitrurarmai.”

Nu chicham uminkiatu tusa túrunaiti’ tímiayi.

²⁶ ‘Tura atsaṅtamprattsa yáinmana nuna winia Aparuṅya akuptuktatjarme. Niisha tuke nekas tiniu Wakaniiti. Niisha Yusajya taa atumin nekamtikramprattarme.

²⁷ Atumsha yaunchu Wijjai pujusu asarum nekamtikiattarme’ tímiayi.

16

¹ ‘Átum kanartukairum tusan júnaka tájarme.

² Israer-shuar iruntainiumia jiki akuptamkattarme. Nu arantcha mantamainiaksha “Yúsan shiir awajsattsan túrajai” tiártatui.

³ Nu shuar Winiasha tura winia Aparnasha nékachu ásar túrutmawartatui.

⁴ Núnaka yamá tájame. Tura túrunamtai “núnisā átiniaiti” timiaj nu nekaarum itiurchat enentáimprairap’ tímiayi.

Yusa Wakaní túrana nu

‘Atumjai tuke pujá asan núnaka yaunchu ujakchamajrume.

⁵ Antsu yamaikia wáketjai winia Akuptukmia nujai pujustaj tusan. Tuma áin wéajna nu inintratsrume.

⁶ Antsu nuna takui ti kuntuts enentáimprarme.

⁷ Tura Wi wématai atumjaiṅkia nuna naṅkaamas penker átatui. Iis, Wi wéaknaka atumin yainmaktinia nuna akupkattajai tura wéachkuṅkia táchattawai. Nuka ti nekasaiti.

⁸ Yusa Wakaní taa ashí jū nuṅkanmaya aentsun jū menaintiun nekamtikiattawai. Ni tunaari aan nekamtikiattawai. Penker tunaajainchu wekasamniana nunasha nekamtikiattawai. Tura Yus tunaanum súmamtikiamniana nunasha nekamtikiattawai.

⁹ Winia enentáimturainiachu tunáarintin ániawai.

¹⁰ Winia Aparuṅ wáketkui wáitkiashtatrume. Tuma asamtai ashí shuar wi penker tunaajainchu wekaamun nekaawartatui.

¹¹ Tura jū nuṅkanam akupniunka Yus tunaanum súmamtikia asa shuarnasha súmamtikiamniaiti. Nuna paant nekaawartatui’ tímiayi.

¹² ‘Nu arantcha núkap tíntjarme túrasha átumka nekaachaintrume.

¹³ Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiājai tíchattawai antsu winia Aparuṅ antukma nuna ujatmaktatui. Ukunam átatna nunasha ujatmaktatui.

¹⁴ Ashí Wínian ujatmak Winia shiir awajtustatui.

¹⁵ Ashí winia Apar takakna nusha Wíniaiti. Nu asamtai “ashí Wínian ujatmaktatui” tajai’ tímiayi.

Kúntuts pujuiniayat ukunam warasartatui

¹⁶ ‘Ishichik pujusrum Winia wáitkiashtatume. Nuyá ataksha ishichik pujusrum ataksha wáitkiattarme. Wisha winia Aparuḡ wéajai” tímiayi.

¹⁷ Nuyá ni unuiniamurḡ nuamtak aniniaisarmiayi “¿Jú chichamsha warimpait? “Ishichik pujusrum wáitkiashtatume tura ataksha ishichik pujusrum wáitkiattarme tura Aparuḡ wéajai” tátsuk.

¹⁸ “Ishichik pujusrum” tana nusha ¿warimpait? Nii tana nu ántatsji” tiarmiayi.

¹⁹ Jesussha nin aniaštai táman nekáa tímiayi “Ishichik pujusrum wáitkiashtatume nuyá ataksha ishichik pujusrum wáitkiattarme” tímiajai. ¿Núchakait átum inintrustin wakerarmena nu?

²⁰ Ti nekas tájarme: Átumka kúntuts pujusrum úttiatrume tura Yus-shuarcha warásártatui. Tuma aḡnk’ átum kúntuts pujayatrume ukunam warastatume.

²¹ Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui.

²² Atumsha núnisrumek yamaik kúntuts pujarme. Tura atak íitjarum tusan winiakui ti shiir atumí enentáin warastatume. Nu warastinian jurutramkichminia áiniawai.’

²³ ‘Nu tsawantinkia penké ininsashtatume. Ti nekas tájarme Winia enentáimtursarum winia Apar searum nuna ashí amastatui.

²⁴ Yamaisha Winia enentáimtursarum winia Apar seachurme. Seakrumniḡkia amastatui ti shiir warasaruk tusa’ tímiayi.

Jesus jú nunkanmayan nupetkaiti

²⁵ ‘Métek-taku chichamjai nakumkan nuna tímiajai. Tura ukunmanka nujai chichatsuk winia Aparnan paant ujaktatjarme.

²⁶⁻²⁷ Nu tsawantai átumka Winia enentáimtursarum winia Apar seattarme. Winia Aparsha atumin anea asamtai Wi Nin áujšatin atsumashtatume. Winia anentu asarum tura winia Aparuḡya taman enentáimtakrumin Niisha anenmawai.

²⁸ Winia Aparuḡya jíinkin jú nunkanam táwitjai. Yamaikia jú nunkanmaya jíinkin ataksha Aparuḡ wáketjai” tímiayi.

²⁹ Nuyá ni unuiniamurḡ tiarmiayi “Yamaikia métek-taku chichamjainchu chichaame.

³⁰ Mash nékaitme. Shuar Ámin ininmatsaiḡ penker áimkiatin nékame. Nu nekaar Ame nekas Yúsnumiḡitme tu enentáimtaji” tiarmiayi.

³¹ Tura Jesus tímiayi “¿Nekasash enentáimtarum?

³² Ti warik átumka ašhamkarum niisháa tsakiḡmaktatume tura Winiak ikiurkitiarme. Antsu winia Apar pujakui Wiki pujatsjai.

³³ Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asamtai warastarum” tímiayi Jesus.

17

Jesus ni unuiniamurḡn Yúsan áujšawai

¹ Nuna ti Jesus nayaimpinmaanḡ íimias tímiayi “Aparu, yamáí jeayi ame Uchiram shiir awajšatin. Núnisaḡ ame Uchirmisha penker awajtamsattawai.

² Ashí shuara Akupniurḡ najataitme. Nujaiḡkia Winia surusumna nú shuaran yamaram iwiaakman tuke amuukashtinian súsaitjai.

³ Aparu, chíkich atsawai. Amek nekas Yúsaitme. Wisha Jesuskrístuitjai Ame akup-tukmamna nu. Nu asamtai ashí shuar nuna enentáimtak yamaram iwiaakman tuke amuukashtinian takakui.’

⁴ ‘Ashí túratniun akuptukmamna nuna amukuitjai. Túran ju nunkanam shiir awajsaitjame.

⁵ Nuna túramtai, Aparu, ti yaunchu jú nunka atsaisha Ámijjai pujakui shiir awajtusmamna núnismek yamaisha shiir awajtusta.’

⁶ ‘Ashí jú nunkanmaya surusmamna nú shuaran Ámin nekamtikiamjai. Áminiu ániakui surusmame. Niisha ame chichammin umirtámkaruiti.

⁷ Ashí Wi takaajna nu Amek surusuitme. Niisha nuna nékainiawai.

⁸ Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.’

⁹ ‘Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme.

¹⁰ Ashí Winia ainia nuka Áminiuiti. Tura ashí Áminiu ainia nuka Winia ániawai. Winia péñkerusha ni túramunam paant awajsaiti.’

¹¹ ‘Wikia yamaikia jú nunkanam pujuschattajai. Tura nu shuarka juí pujuartatui. Antsu Ámijjai pujustajtsan winiakui ashí surusumna nuka, Aparu, ti shiir asam ame kakarmarmijjai wáinkiata. Wisha Ámijjai chikichik ájinia núnisan niisha ashí iruntrar chikichik ajasarti.

¹² Juí niijjai pujakun ame kakarmarmijjai ti péñker wáinkiamjai. Antsu Yus-Chichamnum aarma uminkiatu tusa aya chikichik menkakaiti. Niisha tuke emesnar-tinia núiti.’

¹³ ‘Yamaikia Amijini winiajai. Tura juí tuke pujakun júna tájame. Niisha Wi waraajna núnisar ti shiir warasarat tusan tajai.

¹⁴ Wi jú nunkanmayanchuitjai. Niisha núnisan jú nunkanmayanchu ániawai. Tuma asamtai ame chichammin Wi susamtaí jú nunkanmaya shuarka nin nakitiainiawai.

¹⁵ Jú nunkanmaya júiki tusan seatsjame. Antsu íwianch nin nupetkain tusan seajme.

¹⁶ Wi juyanchuitiaj áintsan niisha juyanchu ániawai.

¹⁷ Ame chichammin ti nekasa nuna ántuiniakui péñker awajsata.

¹⁸ Juyá shuarnum akuptukmam áintsan Wisha nin chikich shuarnum akupeajai.

¹⁹ Aya Áminiunak takastaj tusan enentáimtimjai. Túra asamtaí niisha aya Áminiunak takastinian enentáimpratin ániawai’ áujtak tímiayi.

²⁰ ‘Aya níniunkeka seatsjame antsu ashí ni chichamen antukar Winia enentáimtusartatna nusha ame yainkiarta tusan seajme.

²¹ Ashí niisha chikichiniak enentáimtusarti tusan seajme. Wisha Amesha, Aparu, chikichik ájinia núnisan niisha Iijjai iruntrar chikichik ajastai tusar seajme. Wíi shuar chikichik najanata tusan seajme. Nuyá ju nunkanmaya shuar akuptukuitmena nuna nekaawartatui.

²² Ame shiir awajtusmamna núnisnak Wisha nin shiir awajsaitjai. Iikia chikichik ájinia núnisan niisha chikichik ajasarti tusan túraitjai.

²³ Wi ni enentáin pujakui Amesha Winin pujakmin penké chikichik ajasarti. Túramtai ashí shuar júna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.’

²⁴ ‘Aparu, shuar surusmam nu, Wi pujustatjana nuí pujusarti tusan seajme. Tura ti shiir awajtusmamna nuna ísarti tusan nuna seajme. Ju nunka najanchamunman tuke anentin asam ti shiir awajtusuitme.

²⁵ Aparu, ti péñker áminin ju nunkanmaya shuar nekarmainiatsui. Antsu Wi nékajme. Ju shuarsha ame akuptukman nékainiawai.

²⁶ Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújainkia Wisha ni enentáin pujurkui Winia anenmena áintsan niisha anenkratin ajasartatui” áujtak tímiayi Jesus.

18

Suntar Jesusan achikiarmiania nu

(Mateu 26.47-56; Márkus 14.43-50; Rúkas 22.47-53)

¹ Jesussha nuna tinia amuk ni unuiniamurijjai Setrun entsá katin numi arakmanum wémiayi.

² Jútassha Nin suruktajtsa pujumia nuka nu ajan nekaamiayi. Untsurí tsawant Jesus ni unuiniamurijjai nu iruntramtai Jútas Jesusan nu wáinkiatniun enentáimpramiayi.

³ Tura untsurí suntarjaisha Jesusan tariarmiayi. Pariséusha Israer-shuar Patri uuntrisha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi.

⁴ Jesussha ashí átinia nuna neka asa jiintiuki “¿Ya eaarum?” tímiayi.

⁵ Niisha “Nasarénumia Jesus” tiarmiayi.

Jesussha “Wiitjai” tímiayi.

Jútassha Jesusan surukua nu nijjai pujuarmiayi.

⁶ Tura Jesus “Wiitjai” takui ti ashamkar úkumur waketainiak iniaararmiayi.

⁷ Ataksha Jesus “¿Ya eaarum?” tímiayi.

Niisha “Nasarénumia Jesus” tiarmiayi.

⁸ Nuinkia Jesus tímiayi “Wiitjai, tájarme. Winia eatkurmeka Wíi shuar ainia júka waketkiarti” tímiayi.

⁹ Jesus nuik aujuk “Winia Apar surusma nu menkakacharai” timia nu uminkiat tusa Jesus “waketkiarti” tímiayi.

¹⁰ Nuyá Semun Pítiur machitian jusa Marku kuíshin untsuurnumaani tsupirkamiayi. Markusha Israer-patri uuntri takarniuriyayi.

¹¹ Túramtai Jesus Pítrun tímiayi “Machitrumka awainki ikiusta. Winia Apar wáitsatniun surakuinkia ¿wáitsashtinkaitaj?”

Israer-patri úuntriniam júkiarmiania nu

(Mateu 26.57-58; Márkus 14.53-54; Rúkas 22.54)

¹² Nuinkia apach suntarsha ni kapitiantrisha Yusa Jeen wainniusha Jesusan achikiar jinkiwarmiayi.

¹³ Nuyá Anasa jeen júkiarmiayi. Anassha Kaipiasa weariyayi. Tura Kaipias nu uwitin Israer-patri uuntriya.

¹⁴ Kaipiasa nuik “¿Ashí Israer-shuar mesertin pénerkait. Antsu aya chikichik shuar jákatin pénerchakait?” timia núiti.

Pítiur Jesusan natsantramiania nu

(Mateu 26.69-70; Márkus 14.66-68; Rúkas 22.55-57)

¹⁵ Semun Pítiur chích unuiniamujai Jesusa uku weriarmiayi. Israer-patri uuntri nú unuiniamunka nékayayi. Tuma asamtai ni jeen jeawar, suntar Jesusjai aa tanishnum wáiniakui niisha wayamiayi.

¹⁶ Tura Pítiur aa wáitiniam wajaamiayi. Túramtai chích unuiniamu jiinki wáitin wáinia nú nuwajai chichas Pítrun awayamiayi. Nu nékanu asa yúpichuch awayamiayi.

¹⁷ Waiti wainniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi.

¹⁸ Tsetsek asamtai suntarsha tura nu takarniusha jinia ikiapárar ni nawen anaak pujuarmiayi. Pítrusha nu pachiiniak anamuk pujumiayi.

*Kaipias Jesusan aniasmiania nu**(Mateu 26.59-66; Márkus 14.55-64; Rúkas 22.66-71)*

¹⁹ Israer-patri uuntri Jesusan aniasmiaiyi “Ame unuiniamurmasha ¿ya ainia. Tura warí nin jintintiaitiam?”

²⁰ Jesussha tímiayi “Ashí íimiainiajn tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuí arantutsuk tuke etserkaitjai.

²¹ ¿Urukamtai Winia inintiam? Winia chichamprun antukua nu aniastarum. Wi timian nii ujatmakarti. Wi timiancha niisha nékainiatsuk.”

²² Jesus nuna takui Yusa Jeen wáiniua nu nuí pujá Jesusan yapiniam awati tímiayi “¿Núnisañ nekas úuntnum chichastinkait?”

²³ Jesussha tímiayi “¿Warinmampa yajauch aa? Turuttia. Tura tájana nu péñkeraitkiuinikia ¿urukamtai awattiniam?”

²⁴ Nuyá Anas Jesusan jinkiá Kaipias takaamunam akupkamiayi Kaipias Patri uuntri asamtai.

*Pítiur ataksha Jesusan natsantramiania nu**(Mateu 26.71-75; Márkus 14.69-72; Rúkas 22.58-62)*

²⁵ Tuke Anasa jeen chichainiaí Pítiur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

²⁶ Chíkich takarin, Marku shuari, nuí pujumiayi. Pítiur Marku kuíshin tsupirkamia nuna shuari asa tímiayi “¿Ajanam Jesusjai wekaamin wáinkiachmakajam?”

²⁷ Pítrusha ataksha “atsá” taiñ atash shiniukmiayi.

*Piratu Jesusan aniasmiania nu**(Mateu 27.1-2, 11-14; Márkus 15.1-5; Rúkas 23.1-5)*

²⁸ Nuyá Kaipiasaiya Jesusan júkiar tsawant tsawaamunam apach kapitían Piratu takatai jeenam ejeniarmiayi. Israer-shuarsha ni uuntri akupkama nunisar wapik ajasajj tusar nu jeenam wayacharmiayi. Wayawarka paskua nampernum yurumáchmin ármiayi.

²⁹ Nu asamtai Piratu niijiaí chichastaj tusa jíinki tímiayi “¿Jú áishmansha warí tunáa túrait?”

³⁰ Niisha “Tunaarinchaitkiuinikia amijini itiachaaji” tiarmiayi.

³¹ Tutai Piratu tímiayi “Atumek júkirum atumí akuptammarijiaí ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.”

³² Yaunchu Jesus ni jákatniurin enentáimtus “Wi awajnaitniuitjai” tímiayi. Niisha krúsnum awajnain asamtai apach máataijiaí Nii timia nu uminkiamiayi.

³³ Piratusha atak jeá wayá Jesusan untsuk “¿Ámeke Israera Uunt Akupniurinkaitiam?” tímiayi.

³⁴ Jesussha tímiayi “¿Amekek nu inintram. Kame chíkich túramainiatsuash?”

³⁵ Piratusha tímiayi “¿Wi Israer-shuarkaitiaj? Ameer shuarak Israer-patri uuntrijiaí winin itiarmai. ¿Warí tunáa túraitiam?”

³⁶ Nuñkia Jesus tímiayi “Wi jú nuñkanam akupniuchuitjai. Juyaitkiuinikia Winia nemartuiniana nu máanaikaraayi. Túrawarmatai Israer-shuarnum surutkacharaayi. Antsu juyan akupniuchuitjai.”

³⁷ Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nuñkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

*Piratu Jesusan mantamnatniun tímiania nu
(Mateu 27.15-31; Márkus 15.6-20; Rúkas 23.13-25)*

Piratusha nuna t̄i, atak Israer-shuarj̄ai chichastajtsa jiinki tímiayi “J̄ú aishmaṅka tunaar̄in penké wáittsujai.

³⁹ Tura ashí uwitin paskua nampernum sepunmaya shuar aṅkant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniur̄in aṅkant akupkattajak?” tímiayi.

⁴⁰ Nuin̄kia ashí kakantar untsumainiak “J̄u akupkaip; antsu Parapás akupkatá” tiarmiayi. Nu Parapássha kásauyayi.

19

¹ Nuyá Piratu suntaran akupkamiayi Jesusan asutiáwarat tusa.

² Suntarsha Jesusan wishikrar tawasap jaṅki najanamun etsenkrumtikiarmiayi. Yamakai pushincha uunt akupniua áintsan áentsrarmiayi.

³ Nuyá “Israera Uuntr̄ia, kakaram ajasta” tiar yapiniam awatiarmiayi.

⁴ Nuyá Piratu atak jiinki tímiayi “Átum wáinkiarum nekaatarum tusan Jesusan j̄iikt̄iatjai. Wikia tunaar̄inkia penké wáittsujai.”

⁵ Tímiatai Jesussha jaṅkin etsenkruku tura pushin yamakairman entsaru jíinkimiayi. Tura Piratu nūi káunkarun tiarmiayi “Pai j̄uiti, íistarum.”

⁶ Israer-patri uuntr̄isha suntarsha Jesusan íisar ataksha ataksha kakantar untsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaar̄in penké wáittsujai” tímiayi.

⁷ Tura Israer-shuar tiarmiayi “Nu shuar “Yusa Uchir̄int̄jai” takui jákatniuiti. Iiniu akupeamu aarma nūi núniskete” tiarmiayi.

⁸ Nuna antuk Piratusha nu nan̄kaamas ashamkamiayi.

⁹ Ataksha init wayá Jesusan aniasmiayi “¿Tuyampaitiam?” Tura Jesussha penké áikchamiayi.

¹⁰ Nuyá Piratu tímiayi “¿Urukamtia winia airtsum. Wi jeajna nu nékatsmek? Wakerak-naka krúsnum máatniuncha tura aṅkant akupkatniuncha jeajai.”

¹¹ Tutai Jesussha tímiayi “Yus nuna amaschaitkiuin̄kia penké tujinkiaintme. Nu asamtai amiin surutka nu ámin nan̄kaamas tunaar̄inniuiti.”

¹² Piratusha nú chichamtaik Jesusan aṅkant akupkattsa wakerimiayi. Antsu Israer-shuar untsumainiak tiarmiayi “J̄u aṅkant iníakmeka ame úunt akupniu amikr̄inchuitme. J̄uka “úunt akupniuitjai” taku atumí uunt akupniur̄i nemasrinti” tu untsumkarmiayi.

¹³ Piratusha taman antuk akupin pujutainium pujus Jesusan untsukmiayi. Nūi kaya ukatkamu asamtai Israer-shuara chichamen Kapata anaikiarmiayi.

¹⁴ Paskua jisat jeatsain̄ nantu tutupin ajatsain̄ Piratu Israer-shuaran tímiayi “Uunt akupniuram íistarum.”

¹⁵ Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniur̄in krúsnum máattajak?” tímiayi.

Tura Israer-patri uuntr̄i tiarmiayi “Atumí uunt kapit̄iántrumek in akuptamji. Chíkichka atsawai.”

¹⁶ Tutai Piratu Jesusan krusnum mantamnat̄i tusa tsankatkarmiayi. Tutai niisha Jesusan júkiar wearmiayi.

*Jesusan krúsnum máawarmiania nu
(Mateu 27.32-34; Márkus 15.21-32; Rúkas 23.26-43)*

¹⁷ Jesussha ni krusr̄i yanaki Kúrkuta náinnium wémiayi. Kúrkuta naar̄isha Israer-shuara chichamen “muuka ukunch” tawai.

¹⁸ Nūi krúsnum ajintrurar awajainiarmiayi. Tura mai pae jimiará shuaran chikichik chikichik awajainiarmiayi. Tura Jesus ajapén ámiayi.

19 Piratusha Jesusa krúsriṅ uunt áarman anujkamiayi. *NASARETNUMIA JESUS, IS-RAERA UUNT AKUPNIURI*

Tu áarmauyayi.

20 Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén pepru tjiuch asamtai Israer-shuar ti untsurí áujiarmiayi.

21 Nu asamtai Israer-patri uuntri Piratun jeariar “Israera Uunt Akupniuri” áaraip. Antsu “Israera Uunt Akupniurintjai tawai” tu aarta” tiarmiayi.

22 Tura Piratu nincha áikiar “Wi áaraj nuke átatui” tímiayi.

23 Suntarsha Jesusan krúsnum awajainiar ni entsarmarṅ kuátru akankar ankant ankant júkiarmiayi. Tura ni pushirṅ apatsuk najanamu asamtai jáaktinian nakitrarmiayi. Kame yakíya nunkaanṅ apaiyiachma takamtsukuyi.

24 Tuma asamtai suntar tiarmiayi “Juḱa jáakchatai. Antsu nakurakrin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súarmiayi” áarmaiti.

25 Krúsnumsha Jesusa nukurísha Kriúpasa nuarṅ Marisha tura Máktaranmaya Marisha wajaarmiayi.

26 Jesus ni nukurṅincha tura ni ti aneamu unuiniamurṅincha nuṅ wajan wáiniak ni nukurṅin tímiayi “Nukuru, juḱ ame uchirmea áintsanṅ atí.”

27 Nuyá ni unuiniamurṅincha tímiayi “Juḱ ame nukua áintsanṅ atí.” Nu tsawantaik nu unuiniamurṅi ni jeḱen jukí awayámiayi.

Jesusa jakamuri

(Mateu 27.45-56; Márkus 15.33-41; Rúkas 23.44-49)

28 Nuyá ashí uminkiamtai Jesus nuna nekáa yaunchu Yus-Papinium aarma uminkiatitusa “kitiamajai” tímiayi.

29 Nuisha pininnum churuṅin ámiayi. Tura shuar nuna uruchjai ejampar sapapjai ijiu mukunaati tusa susamiayi.

30 Jesussha churuṅinian najekaa “ashí túrunatniua nu mash uminkiai” tímiayi. Nuna ti, muuken nená jakamiayi.

Suntar Jesusan paenam nanḱijjai ijiumiania nu

31 Nu tsawantai, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nuṅ paant aṅ tusa nakitrarmiayi. Nu asamtai Piratun seainiak “Krúsnum ajintrurma ainia nuna kanḱajin suntar kupirkarti. Nuyá wari jákarmatai krúsnumia júkiarti” tiarmiayi.

32 Nuyá suntarsha weriar emka krúsnum amia nuna kanḱajin kupirkarmiayi. Nuyá chikichnasha Jesusjai atsankiar ajintrurma nuna kanḱajincha kupirkarmiayi.

33 Tura Jesusan weantuk yaunchu jákaiti tusa kanḱajin kupirtsuk

34 suntar aya paenam ijiumiayi. Ijiumtaisha nu chichamtaik numpa yumijjai puarmiayi.

35 Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nekajai.

36 Yaunchu Yus-Chichamnum aarma uminkiatitusa túrunaiti: “Ni ukunchṅin kupirkachartatui” tu áarmaiti.

37 Tura chikichcha:

“Ijiuarmiania nuna wáinkiertatui” tu áarmaiti.

Jesus iwiarsamu amiania nu

(Mateu 27.57-61; Márkus 15.42-47; Rúkas 23.50-56)

³⁸ Nuyá Arimatéanmaya Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaiat Israer-shuara úuntrin ashamak paant nemarsachmiayi. Niisha seantai Piratu “Jukitia” tímiayi. Tutai Jusé Jesusa ayashín jukimiayi.

³⁹ Nikiuté musha Jesusjaj chichastaj tusa kashi tarimia nu jimiará kun̄kuin pachimpramun ti nukap sumak itiamiayi. Mira kun̄kuinniasha aruí kun̄kuinniasha sumakmiayi.

⁴⁰ Nuyá Jusé Nikiuté mujaj Jesusa ayashín júkiar kun̄kuinian kuérar jaanch esarmajaj penuararmiayi. Israer-shuar tuke nunisar ikiúu ármiayi.

⁴¹ Jesus krúsnum maamua nū aja tíjiuch ámiayi. Nu ajanmasha wā náinnium paka taurma ámiayi. Nusha yama taurma asamtai jaka nū ikiuschamuyayi.

⁴² Nu wāasha tíjiuch asamtai tura Israer-shuara ayampratin tsawantri jeatemamtai Jesusa ayashín nū iwiarsarmiayi.

20

Jesus nantakmiania nu

(Mateu 28.1-10; Márkus 16.1-8; Rúkas 24.1-12)

¹ Tumintincha káshik kirit āin Máktaranmaya Marí Jesus iwiarsamunam ístajtsa wémiayi. Jesusan iwiarsar kaya uuntjaj wāan atutkarmiayi. Tura Marí nū jeá nu kaya uraimiun wáinkiamiayi.

² Nuna wáiniak Semun̄ Pítiur pujamunam tséken̄ki wémiayi. Chíkich unuiniamur̄i Jesus ti anemia nusha nūsha pujumiayi. Tura Marí tímiayi “Iwiarsamunmaya ii Úuntrin júkiarai. Tura ¿tuínsuk ikiusara?”

³ Pítrusha chíkich unuiniamur̄ijaj jíinkiar iwiarsamunam iyuwarmiayi.

⁴ Mai métek tséken̄kiar Pítiur jeatsāin chíkich unuiniamur̄i iwiarsamunam emka jeamiayi.

⁵ Niisha wayatsuk tsunsumá iis penuarmar̄inkia nū tepan wáinkiamiayi.

⁶ Nuyá Semun̄ Pítiur ukunam jeá iwiarsamunam wayá penuarmari nū tepan wáinkiamiayi.

⁷ Chíkich jaanchcha Jesusa muuken̄ penuarma nusha nanerma niisháa tepan wáinkiamiayi.

⁸ Nuyá chíkich unuiniamur̄i emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi.

⁹ Nuna wáintsuk Yus-Chichamnum “Jesus jakamunmaya nantaktiniaiti” áarman áujariat nekaacharmiayi.

¹⁰ Nuyá mai ni jēen waketkiarmiayi.

Máktaranmaya Maríncha Jesus wantintiukmiania nu

(Márkus 16.9-11)

¹¹ Tura Marikia iwiarsamunam juak úutu pujumiayi. Niisha úutiatān tsunsumá iwiarsamunam ímsamiayi.

¹² Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chikichik múuknumaani tura chíkichka nawenmaani pujumiayi.

¹³ Nayaimpinmaya suntarsha “¿Urukamtai úutam?” tiarmiayi.

Marísha tímiayi “Winia Úuntrun jurutkiarai tura ¿tuínsuk ikiusara?”

¹⁴ Nuna t̄i ayanmar Jesusan wáiniak Nin nekaachmiayi.

¹⁵ Jesus aniak “¿Urukamtai úutam. Ya ēaam?” tímiayi.

Marisha ajan wáinnia nui tusa tímiayi “Uunta, ame ni ayashí jukimkia, tui ikiusmam ujatkata wi jurumkitiaj” tímiayi.

¹⁶ Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

¹⁷ Jesussha tímiayi “Emetruawaip. Winia Aparuḡ wáatsjai. Antsu weme Wíi shuar titiá “Winia Aparuḡ nayaimpiniam wéajai. Niisha atumí Aparḡnti. Winia Yúsruiti tura atumí Yúsrinti” tawai titiá” tímiayi.

¹⁸ Nuyá Máktaranmaya Marisha Jesusa unuiniamurḡn wáiniak “Wi Úuntan wáinkiajai, tímiayi. Niisha juna mash túrutui” tu ujakarmiayi.

Jesus ni unuiniamurḡn wantintiukmiania nu
(Mateu 28.16-20; Márkus 16.14-18; Rúkas 24.36-49)

¹⁹ Nu tsawantai, tumḡntin, ni unuiniamurḡ Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shiiir pujustarum” tímiayi.

²⁰ Nuna ti, nuyá ni uwejen ajintruamuncha ni paen ijiununcha iniakmasmiayi. Ni unuiniamurḡsha Úuntrin wáinkiar shiiir warasarmiayi.

²¹ Ataksha Jesus “Shiiir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi.

²² Nuyá ni matsatmanumaani umpuḡ tímiayi “Yusa Shiiir Wakanḡ atumí enentáin wayati.

²³ Shuara tunaarḡnkia átum “asakárti” tákurminkia tsanḡkurnartatui. Tura nu shuar “sumamati” tákurminkia tuke sumama pujawai” tímiayi Jesus.

Tumas Jesus nantakniun wáinkiamiania nu

²⁴ Tura chikichik unuiniamu, Jímiampramu Tumas, Jesus tamia nuḡ pujuchmiayi.

²⁵ Tura ukunam chikich unuiniamurḡ ujainiak “Ii Uuntri wáinkiaji” tiarmiayi.

Tura Tumas tímiayi “Ajintruamurḡ wáinkian uwejrūn awaintiuatniuitjai. Tura paenumsha awaintiuatniuitjai. Penḡké jaka asamtai aya nujai iniantkimiun enentáimtustatjai” tímiayi.

²⁶ Chikich tumḡntin ataksha Jesusa unuiniamurḡ iruntrarmiayi. Nuḡnkia Tumassha niijjai pujuarmiayi. Tura waiti epenmianumanḡ Jesus wayá ajapén wajas “Shiiir pujustarum” tímiayi.

²⁷ Nuyá Tumasán tímiayi “Winia uwejur ísam ame uwejem awaintiuata. Núnismek winia paerui uwejem awaintiuam ístá. Tura arantutsuk nekas enentáimtursata.”

²⁸ Nuyá Tumas “Winia Úuntruá, nekas winia Yúsruitme” tímiayi.

²⁹ Jesussha tímiayi “Winia wáitkiam nuḡ enentáimtursame. Antsu Winia wáittsuk enentáimturaru nekas shiiir áiniawai” tímiayi.

Shuar Yusa Uchirḡn enentáimtusarti tusa ju papí áarmaiti

³⁰ Aentsti tujintiamuncha Jesus túramu ti untsurḡ ju papinium áarchamu áiniawai. Tura ni unuiniamurḡ mash wáinkiarmai.

³¹ Antsu Jesuska Kristu asa Yusa Uchirḡnti tu enentáimtustarum tusan júnaka áarmajai. Tura enentáimtakmin Jesus ni iwiaakmarḡn yamarma nuna amastatui.

21

Entsá yantamnum Jesus siati (7) unuiniamurḡn wantintiukmiania nu

¹ Tipirias antumianḡka káanmatkarḡin Jesus ni unuiniamurḡn wantintiukmiayi. Júnisan ámiayi.

² Semuḡ Pítrusha Jímiampramu Tumassha Kananmaya Natanaérsha Sepetéu uchirḡsha tura chikich jímiair unuiniamurḡsha métek iruntrar pujuarmiayi.

³ Semuḡ Pítrusha “Namakan nekajai nanḡkiattsan wéajai” tímiayi.

Chikich mash “Iisha winittiaji” tiarmiayi.

Wéar uunt kanunam enḡkemprar nu kashi achitsuk tsawararmiayi.

⁴ Káshik aṅ̄ Jesus entsá káanmatkar̄in wantinkiamiayi tura ni unuiniamur̄isha Jesusan nekaacharmiayi.

⁵ Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

⁶ Tutai Jesus tímiayi “Neka untsuurnumaan̄i ajunkatarum. Nuṅ̄ achiktatrume.”

Nii timia núnisaṅ̄ túrawar namakan ti achikiar nekan júsatniun tujinkiararmiayi.

⁷ Nújain̄kia Jesusa unuiniamur̄i Jesus ti aneemia nu Pítrun tímiayi “Ii Úuntr̄inti.” Takui Pítrusha ámiaku asa ni pushir̄in entsar entsá inian̄miayi yukuak jeataj tusa.

⁸ Chíkich unuiniamur̄isha jeachat pujuiniachuk nekan japiki kanuj̄ai káanmatkanam jeawarmiayi.

⁹ Káanmatkanam jeawar ji kaj̄ir ámanum namakan jiámun wáinkiararmiayi. Tantanha wáinkiararmiayi.

¹⁰ Jesussha “Átum achikiurmena nuyá jiátin itiatarum” tímiayi.

¹¹ Tutai Semuṅ̄ Pítur kanunam we nekan nekartiuk káanmatak japiki itiamiayi. Itiar namaknasha sian̄tu sen̄kuenta nuyá tres (153) nekapmararmiayi. Ti untsur̄i áyat nekasha jáankachmiayi.

¹² Nuyá Jesussha “Yurumáitiarum” tímiayi. Ni unuiniamur̄isha “aya ii Uuntr̄i áminiaiti” tusar inintrustinian natsantiarmiayi.

¹³ Nuyá Jesus wajaki tantan jukí súsarmiayi. Núnisaṅ̄ namaknasha súsarmiayi.

¹⁴ Jesus jakamunmaȳa nantaki juj̄ai menaintiu ni unuiniamur̄in wantintiukarmiayi.

Jesus Semuṅ̄ Pítruj̄ai chichasmiania nu

¹⁵ Nuyá yurumáwar Jesus Semuṅ̄ Pítrun aniasmiayi “Junasa uchir̄i Semuṅ̄ka, ¿ju shuar nan̄kaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuiṅ̄kia winia murikiur ayuratniua áintsam Winia enentáimturainia nu yain̄tá” tímiayi.

¹⁶ Ataksha aniasmiayi “Junasa uchir̄i Semuṅ̄ka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi.

¹⁷ Nú ataksha aniasmiayi “Junasa uchir̄i Semuṅ̄ka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata.

¹⁸ Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeka ame kunturam ayaparakmin chíkich aentstamprattawai tura ame wétin nakítiam nuṅ̄ juramkiartatui.”

¹⁹ Jesus nújain̄kia Pítur máatniun ujakmiayi. Tura núnisaṅ̄ jakamtai shuar Yúsan shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pítur Jesusan aniasmiania nu

²⁰ Pítrusha ayanmar chíkich unuiniamur̄in Jesus ti anea nuna némarun wáinkiamiayi. Kame nu unuiniamuka nuik Jesus jáatsain̄ yurumáiniakui “Uunta, ¿ya surutmaktata?” timia núiti.

²¹ Nincha Pítur wáiniak Jesusan aniasmiayi “Uunta, ¿ju sha warí urukatniuit?”

²² Jesussha ayak “Wi wakeraknaka iwiaaku pujain̄ tátatjai tíminiaitjai. Nuna tákuisha ¿warí itiurtama? Ámeka nemartusta” tímiayi.

²³ Nújain̄kia “Nu unuiniamur̄i jákashtatui’ tusa Yus-shuarnum áujmatiararmiayi. Túrasha Jesus “jákashtatui’ tíchiamiayi antsu áyatik “Wi wakeraknaka iwiaaku pujain̄ tátatjai takuisha ¿warí itiurtama?” tímiayi.

²⁴ Wikia nú unuiniamurintjai. Ju papincha aaru asan “mash nekasaiti’ tajai. Ashí shuarsha núnisaraṅ tuíniawai.

²⁵ Nu arantcha juí áarchamusha ti awai. Kame ashí áamka ti untsurí papí asa ashí nuṅkanam ikiuschamnia ainti. Nuke atí.

Jesusa Akatramurĭ Yusa Wakanĭjjai

TÚRAMU

Yusa Wakanĭn nákasarmiania nu

¹ Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuiti-ampramaj nunasha áatramiajme. Yámankamtaiknumia,

² nayaimpiniam wétsuk, ashí Nii túramia nuna tímiajme. Jesuska, nayaimpiniam wakettsuk Yusa Wakanĭ kakarmarijjai túratniua nuna ni akatramurĭn jintintiawarmi-ayi.

³ Tura jaka nantaki, Jesus tímiajaik wantintiukmiayi ni akatramurĭn. Tura kuarenta (40) tsawant nin wantintiukarmiayi. Nuna tura nekas iwiaakjai tusa iniakmasmiayi, nekaawarat tusa. Tura Yusa akupeamurĭ urukukit nuna mash ujakmiayi.

⁴ Jesuska ni akatramurĭjjai tuke pujus, nin chicharuk “Jerusarénumia wéerap, tímiayi. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiayi.

⁵ Tuke enentáimsatarum. Juanĭ entsajai atumí ayashĭn imiatmimiarme. Túrasha wárik Yusa Wakanĭsha atumniasha tarutmar, atumí enentáin enkemprutmattarme. Nusha enentái imiantin áintsankete” tímiayi.

Jesus nayaimpiniam wakamiania nu

⁶ Tura Jesusjai irunar matsamas anintriarmiayi “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiayi.

⁷ Jesus áimiuk tímiayi “Winia Apar túrattana nu warí tsawantinik túrunatí nu nekaatniusha atumniachuiti. Apar Niŋki neka asa ni kakarmarijjaiĭn túrattawai.

⁸ Tura atumsha Yusa Wakanĭ kakarmarĭn sunastatrum. Nii taa enkemprutmantai kakaram ajasrum, Wíi túramu etserkattarme. Emka juĭ Jerusaréĭn péprunam etserkattarme. Nuyá ashí Jutía núŋkanam, tura arant Samaria nuŋkanmasha, tura nú arant ashí núŋkanam werum, Wíi túramu etserkattarme” tímiayi Jesus.

⁹ Nuyá chichas amir, ashí ni akatramurĭ ii wajainiaĭ, Jesus nayaimpinmaani junakmi-ayi. Wéa-wéakuĭ yurankim mash Nin amuámiayi. Tuma asamtai ni akatramurĭ Nin wáinkiacharmiaĭ.

¹⁰ Tura Jesus waakkui ni akatramurĭsha yakí ii wajainiaĭ, jimiará áishmanĭ puju entsaru nuĭ wantintiukarmiayi. Tura ayamach wajattsarmiayi.

¹¹ Nu áishmansha Jesusa akatramurĭn tiarmiayi “Kariréanmaya áishmanĭka, ħurukamtai nayaimpinmaani imiá ímprum? Juĭ Jesusak atumíyaĭ nayaimpiniam wea wáinkiarumna núnisanĭ ataksha winittiwai” tiarmiayi.

Matíasan anaikiarmiania nu

¹² Tuasua amikmatai Jesusa akatramurĭ Uriwiu náinniumia akaikiar Jerusarénum wakеткиarmiayi. Uriwiu naincha Jerusarénumsha tíjiuchiiti, chikichík kirumitrua núnisanĭ.

¹³ Tura Jerusarénum jeawarmiayi. Nuĭ jeawar, jeá wayawar yakí wákararmiayi. Nuĭ Pítrusha, Jakupusha, Juanĭsha, Antressha, Jiripisha, Tumassha, Parturumísha, Mateusha, tura Arpeu uchirĭ Jakupusha, nuyá ásump Semunĭsha, Jakupu yachi Jútassha, tímian wayawarmiayi.

¹⁴ Jusha mash tuke iruniarmiayi Jesusa yachjjai. Tura Jesusa nukurĭ Marijjai, nuyá chíkich nuwajajasha tuke iruniarmiayi, Yus áujсатаi tusar.

¹⁵ Nuĭ siántu painti (120) aents iruntrarmia nuĭ Pítur chichastaj tusa wajakmiayi.

16 Pítiur juna tímiayi “Yatsurtírmesha, umarutírmesha antuktarum. Yuska yaunchu ni Papiriin Jutasnan áamtikramiayi. Jútas akiintsain Tawitkia, Yusa Wakaní jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmari Yus-Chicham asa tímianak uminkiatniuyi.

17 Nú Jutaska ii írutramuitiat, ii takaamurin páchitkaiiat,

18 tunáa tura nujai kuítian achik nunkan sumakmiayi. Tura piniakum iniaaṅ tantane páttimiayi.

19 Tuma asamtai ashí Jerusarénum pujuarmia nu, nuna nekaawar nú nunkan “Numpa Nunka” anaikiarmiayi.

20 Kame Sarmu papinium Tawitkia juna áarchamkia:
“Ni jeesha itiarak atí.

Nu jeanmanka penké pujuschartí.” Tura

“Ni takatri chíkich atankiti.”

Tu aarmaiti’ tímiayi.

21 “Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus iijiai pujumia nuí tuke Nin nemarsamia nu atí.

22 Juan Jesusan imiaimiania nú tsawantnumia júkí, Jesus nayaimpiniam wémiania nú tsawantan tímianu ejé tuke Niijiai wekaimia nu atí. Nu shuar enentáimtusar, chikichik achiktai. Iisha iruntrar Jesusa nantakmiari etserkamí tusar túramí” tímiayi Pítiur.

23 Tura nuyá jimiará shuaran anaikiarmiayi. Matíasan anaikiarmiayi. Tura chikich-nasha Jusen, ni chíkich naari Parsapas, tura apach náarinkia Justu, nunasha anaikiarmi-ayi.

24-25 Tura nuyá Yus-shuar Yúsan áujainiak juna tiarmiayi “Ii Uuntri, Amesha ashí shuara enentái nékame. Jui awai jimiará áishman. Jútas tunáa túrak jákatniunam wéak akatramu takatan ikiukmiayi. Yamaikia Jútas takatri achikiat tusam, ¿tuá achikium, Uunta? Paant iniakmasta.” Tu aujsarmiayi.

26 Tura Israer-shuara túrutairi núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

2

Yusa Wakaní taramiania nu

1 Pintikiustís náartin jísat jeamtai, chikichík jeanman nuiñ Yus-shuar tuakarmiayi.

2 Tumaj aya aneachma nayaimpinmaya nasea áintsan téter ajaki winian antukarmi-ayi. Ashí mash jeá pujuarmia nuka antukarmiayi.

3 Tura nuí pujuiniaí ji wajaí kea áaniun wáinkarmiayi. Túruna ankant ankant puunak tarurarmiayi.

4 Tuma asamtai Yusa Wakaní ashí ni enentáin pimiutkarmiayi. Túram chichasarat tusa Yusa Wakaní ni nekatairi súsarmiayi. Tuma asamtai nujai niisha chíkich chichaman chichasarmiayi.

5 Nui Jerusarénum Yus táman umirin Israer-aents áarmiayi. Ashí nunkanmaya Jerusarénum taar matsamarmiayi.

6 Tura túrunamia nuna antukar káunkarmiayi. Tura ashí shuar ni chichamejain chichaamun antukarmiayi. Tuma ásar, warinkit, tu enentáimsarmiayi.

7 Nekaachar ashamkarmiayi. “Warinkit, tunaim ajararmiayi. Ju aents chíkich chíkich chichaman chichainia nu, ashí Kariréanmayanchukait, tiarmiayi.

8 Tura iisha ankant ankant ii chichameñka ántatsjik. Ausha urukainiakua, nunak chichainiawa, tiarmiayi.

9 Jui ashí nunkanmaya aents pujuiniatsjik. Partianmaya, Eramnumiasha, Misi-uputámianmayasha, Puntanmayasha, tura Asia nunkanmayasha,

¹⁰ Príjianmayasha, Pampirianmayasha, Ejiptunmaya tura Áprikanmaya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar juí matsatainiawai. Chikichcha tuke Israer-shuar áiniawai. Tura chikichcha Israer-shuar ajastaj tusa Israer túrutairin mash túruiniawai.

¹¹ Kritianmayasha Arapianmaya pujuiniaji. Tura ashí mash ii chichamejaisha Yusa pénker túramuri ántaji” tiarmiayi.

¹² Ashí aents nuna nékachu ásar ashankarmiayi. Tura nuámtak aniniaisarmiayi “¿Warinminiait ju?”

¹³ Tura chikichcha wishikiarmiayi. “Nampeku ániatsuash” tiarmiayi.

Pítiur ujakmia nu

¹⁴ Nuinkia Pítiur, chíkich áuntse Jesusa akatramurijjai wajaki, kakantar chichasmiayi. Chichaak tímiayi “Jutíanmaya shuartiram, Jerusarénumiatiamesha antuktaram. Wi títiatjana nu antukrum pénker enentáimpratarum.

¹⁵ Ju áishman, nampekarai, tárumna nu, nampekcharai. Warí, nantu imiá ishichik takuni. ¿Aisha itiurak?

¹⁶ Antsu Yúsnan etserin, ni naari Juér, yaunchu áarmia nu, yamá túrunayi, tímiayi.

¹⁷ Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmariatatui. Tura nátsaka ímiarartatui. Tura uuntka mesekramiartatui.

¹⁸ Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmariatatui.

¹⁹ Yakí nayaimpiniam, aents túrachminian iniakmastatjai. Tura nunkanmasha winia kakarmarun iniakmastaj tusan numpancha, jiniasha, mukuintiuncha yuranmia áintsan akupkattajai.

²⁰ Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui.

²¹ Nuinkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítiur.

²² Tuke chichaak: ‘Israernumia shuartiram, wi títiatjana nu antuktaram. Nasarénumia Jesusnan tajai. Nú Jesusan Yus shiir enentáimtawai. Yuska, átum ti enentáimprarum ni kakarmarin paant nekaatarum tusa, nú Jesusan ti ikiakarmiayi. Tura Jesusjai aentsti túrachminian Yuska túramiayi, átum íimmianum. Nuka ti paant nékarme, tímiayi.

²³ Tura Jesus surunkamia nuna Yuska yaunchu, túruntsain, paant nekaamiayi. Túrasha Yus enentáimmia nujai métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme.

²⁴ Túramunak Yus Jesusan jákatniun nupetmamtik iniantkimiayi, tuke jákachmin asamtai.

²⁵ Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamú áhattajai.

²⁶ Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

²⁷ Winia wakaniur, Yusru, jákatniunam ikiurtuschattame. Wi ame Uchirmetjai, Tunaar-incha. Túmaitkui anentu asam ayashur káurtin tsankatrukchattame.

²⁸ Tura iwiaaku átin jintia jintintrutamame. Tura tuke pujurtakum waramtikrustatme. Tu áarmiayi Tawit’ tímiayi.

29 Pítiur tuke chichaak: ‘Páantchakait. Ii uuntri Tawit yaunchu jákai. Tura iwiarsamuiti. Ni iwiarsamuri iini pujatsuk.

30 Túrasha Tawitkia Yúsna etserniuyayi. Tuma asa Yus tímia nuna nekaamiayi. Yus Tawitian chicharuk tímiayi “Ame akupniuitme. Nekas tájame, ukunam ame iniannamurminian Kristu akiiniattawai. Niisha Akupin anainiaktatui, amea áintsan.” Nuna Yus táman Tawit nekaamiayi.

31 Neka asa, túruntsain Tawit, wainkia nútiksan, Kristu nantaktintri áarmiayi. Kristu túrunatniuri chicharuk tímiayi “ni wakanincha jákatniunam ikiukchatniuyi. Ayashincha káurtinian tsankatkashtiniuyi.”

32 Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étseraji.

33 Yuska, Jesus nankaamantuiti tusa ni untsuuri apujsaiti. Tura ni Wakanin Jesusan súsaiti, Nii yaunchu tímia nútiksan. Tuma asamtai jusha átum antukurmena nuna, tura ísurmena nunasha Yus suramsaiti.

34 Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

“Uunt Yus winia Úuntru tímiayi “akupin pujutainium, winia untsuuri pujustá.

35 Ame nemasrumin nupetkattajai. Nu túruntsain jui pujustá’ tímiayi.”

Nuní áarmaiti Jesusnan, tímiayi.

36 Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwemtikkiartin Krístuiti. Ashí áentstíram nu pénger nekaatarum” tímiayi Pítiur.

37 Nuna antukar wake mesekarmiayi. Tura Pitruncha chích akatramuncha anisarmiayi “Yatsuru, ¿nuiñkia itiurkatjik?” tiarmiayi.

38 Tutai Pítrusha chichaak “Atumí tunaari ikiuktiaj tusarum Yus nekas enentáimtustarum. Tura ashí shuartiram Jesukrístu naari pachisrum imiantiarum. Nuiñkia atumí tunaarin Yus tsankurtamprattarme. Túrunawakrumin Yuska ni Wakanin suramsattarme, tímiayi.

39 Yus tímia nuka atumin túramprume. Atumí uchirincha tura ashí arant matsatainia nunasha tawai. Kame ii Yusrí áentsun untsuktaj tusa wakerana nuna tawai” tímiayi.

40 Nú chichamjai tura nuyasha Pítiur tuke jintintiuk tímiayi “Yajauch shuara asutiátniuri átatna nuyá uwempratarum” tímiayi.

41 Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi.

42 Ashí nu shuar Jesusa akatramuri jintintiarum nuna tímiatrusan antukarmiayi. Tura irunar shiir enentáimtunaisar yurumin áarmiayi. Túrawar, Kristu enentáimtustin namperin najanin áarmiayi. Túrawar Yúsan áujiarmiayi.

Yus-shuar pampararmiania nu

43 Tura Yuska aentsti túrachminian Jesusa akatramurijiaj túramiayi ni kakarmarin iniakmastaj tusa. Tuma asamtai ashí aents nuna wáinkiar ashankarmiayi.

44 Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi.

45 Ni nunken surukar, ni takakmarincha surukar, atsumainia nuna súarmiayi.

46 Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáimtustin námper najanin áarmiayi. Tura nankaamantu enentáimtumatsuk, yurumkan ajamnainiarmiayi.

47 Túrawar, Yuska ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwemtikiar Yus-shuar írunmanum íkiaunki wémiayi.

3

Wekaicha wekasamiania nu

¹ Chíkich tsawantaj, nantu nunkaach ajasmatai, Pítiur Juanjaj, Yusa Uunt Jeen Yus áujstatai tusar wearmiayi, Israer-shuar tuke turin armia nútiksaran.

² Tura áishman, ni akiiniamuriniá wekaicha amia nu, nuí aa wáitiniam tuke tsawant pujumiayi. Nu áishmanasha ni shuarí entsakí júkiar nú wáitiniam apujin ármiayi, nuí shuar wayan kuítian seat tusar. Nú wáitisha, Shiir Waiti, tutaiyayi.

³ Tura nú shutuapsha Pitrun Juanjaj wayan wáinkiamiayi. Wáiniak kuítian seamiayi.

⁴ Tura Pítiur Juanjaj apajas ísarmiayi. Tura nú áishmanasha chicharuk “Íirsata” tímiayi.

⁵ Aishmansha, surustatuapi, tu enentáimias, íimsamiayi.

⁶ Nuyá Pítiur chichaak “Kuítrusha atsawai, tímiayi. Kurisha atsawai. Antsu kuítjai nankaamas takakjana nuna amastajai. Wats, Nasarétnumiá Jesukrístu kakarmarijjaj wajakim wekasata” tímiayi.

⁷ Tinia iniais, Pítiur ni untsuuriní achik awajkimiai. Túram ni nawesha, wanusesha kakaram ajasmiai.

⁸ Tura niisha wajaki nantent ajakmiayi. Nuyasha wekasamiayi. Tura Pítrujajsha Juánjajsha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin shiir pachimiayi.

⁹ Ashí aents pujuarmia nu, nin wekaan wáinkiarimiayi. Tura ni chichamen anturkarmiayi.

¹⁰ Tura chichainiak “Nuik Yusa Uunt Jeen wáitirin, Shiir Waiti tutainium, nu áishman tuke pujuuya núchakait” tiarmiayi. Tura ni túrunamurin nekaawar, ti ashamkar nusháa enentáimsarmiayi.

Pítiur ujakmiania nu

¹¹ Shutuapka péñker ajasu asa Pítrujaj Juánjajsha penké tsurachmiayi. Tura aents nuí pujuarmia nu, warinkit tusar, jeáshkirí tsékenki wearmiayi. Nuka Sarumúnna tiniu ármiayi.

¹² Aents káunkarun Pítiur wáiniak, chicharuk “Israer-shuartiram, ¿urukamtai winiasha imiá írum? tiarmiayi. ¿Isha péñker asarikí tsuarmají? ¿Ii kakarmarijjajnikí ewekam-samají?”

¹³ Atsá. Antsu Yuska ni Uchirin Jesusan ashí nankaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitíán Piratuí surukmarme. Tura Piratu akupkataj tau atumsha suritkiarmarme.

¹⁴ Jesus péñker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme.

¹⁵ Túrarum iwiaaku átinian Amaana nu maamarme. Tuma aiñ Yuska Nin jakamun-maya iniantkimiayi. Nuka iisha neka asar étsereaji.

¹⁶ Tura ju aishman jui wajaana ju tura nékarmena ju, Yusa Uchiri naari enentáimta asa kakaram ajasuiti. Jesus enentáimtususa nekas péñker ajasuiti. Nusha wáinniu asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úntrijaj Jesusan túramarmena nu nékatsuk túramarme.

¹⁸ Tura nu túramurmijaj Yus yaunchu tímia nu tímianak umikiurme. Ni Krísturi wáitsatniuya nuna Yuska ashí ni etserniurín áamtikramiai.

¹⁹⁻²⁰ Wats, yamaikia tunaaruminiá kanaktiarum. Túrarum Yúsnumaaní ayantártarum, tunaarun asakárat tusarum. Túrunawakrumniñkia, atumin uwemtikramprarat tusa Yus yaunchu anaikiamia nuna akupturmaktatrume. Nusha Jesukristuítí. Tura Niijaj enentáimin ayampratin átatui.

²¹ Tura yamaikia Jesukrístu nayaimpiniam pujustiniaiti, ashí iwiarnatsain. Yuska ukunam ataksha nunkan shiir awajsattawai. Nuna ni etserniurín tsáapin enentái takaku armia nuna yaunchu áamtikramiayi.

²² Tuma asa Muisais ii aparín tímiayi:

“Atumi Uunt Yusri ukunam etserniun akupturmaktatrome, winia akuptukmia núnisan. Nuámtaktirminiá achik akupturmaktatrome. Tura nii títiatna nu umirkatarum” tímiayi.

²³ Náñkamas aents nu etserniun chichamen umíachkuñka emesnartatui. Tura Israer-shuarnum páchitkia áhattawai.

Núnisan áarmiayi Muisaissha’ tímiayi.

²⁴ Pítiur tuke chichaak ‘iimiata, Yúsnan etserin Samuer ju tsawantin túratniuri etserkamiayi. Nuyá ashí Yúsnan etserniusha tuke nuna etseriarmiayi.

²⁵ Etseriarmia nuka atumin túramprume. Tuma asa átum péñker pujustinian Yuska ii uuntri Apraáman ju chichaman susamiayi. “Nekas tájame, ame shuarum akiiniattana nujai ashí áentsnasha shiir awajsattajai’ tímiayi. Tura ii úuntriñ tímia núnaka incha túramji, tímiayi.

²⁶ Iimiata, Yus ni Uchirín iniantkimia nuji, atumin emka akupturmakmiarme. Atumsha, atumí tunaariya kanaktiarum tusa, tura atumin shiir awajtamsatniun wak-erak túramiayi.” Nunak tímiayi Pítiur.

4

Pitruncha Juáñnasha kajerkarmiania nu

¹⁻² Pítrusha Juanjai Yusa chichamen áentsun jintintiainiak pujuarmiayi. Jesus nantakin asamtai aencha nantaktin áiniawai, tiarmiayi. Tura chichaak pujuiniái Israer-patri táarmiayi. Tura Yusa Uunt Jeen wainniu úuntrisha Satuséu aentcha táarmiayi. Taar Pitruncha Juáñnasha kajerkarmiayi, niisha Jesusa nantakmiari chichaman jintintinia asamtai.

³ Yamaikia kíawai, kashin iismí tusar achik sepunam enkea iniaisarmiayi.

⁴ Tura Pitrun nuik anturkarmia nú aents untsurí Yus-shuar ajasarmiayi. Nuik Yus-shuaraim tura yamaiyaim iruram ti untsurí ajasarmiayi. Aya áishmankak, senku mir (5000) aents áarmiayi.

⁵ Kashin tsawarmatai Israer-shuara akupniuri, ni úuntrisha, tura ni jintinniurisha Jerusaréñnum iruntrarmiayi.

⁶ Nuisha Anassha, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitíantri shuarisha tímian iruntrarmiayi.

⁷ Iruntrar Pitruncha Juáñnasha utitiarum tusar akupkarmiayi. Tura itiarmatai, ajapén awajsarmiayi. Tura aniasarmiayi “Kame ¿yana kakarmarijiai, yana chichamejai túrarum?” tiarmiayi.

⁸ Tutai nuyá Pítiur, ni enentáin Yusa Wakaní pimiutkamu asa tímiayi “Akupniutiram, tura úuntirmesha antuktaram.

⁹ Ju áishman nuik shutuap amia nu péñker ajasari anintrarme. Kame itiurak péñker ajasuit tátsurmek.

¹⁰ Urukamtia úuktataj. Anintrakrumin iisha paant títiatji, Israernumiá shuar ashí nekaawarat tusar. Ju áishman Jesukrístu kakarmarijiai péñker ajasuiti. Nasarénumiá Jesukrístun, átum máamurmena nuna, tura Yus jakamunmaya iniantkimiania nuna tajai, tímiayi.

¹¹ Nú Jesuska kayaa áintsankete. Atumsha jeamniutiram, nú kaya yajauchiiti, tímiarme Jesusna. Túrusha túramaitatan Niisha jeanam emka apujsamua núnisan ajasuiti, tímiayi.

12 Tura chíkichjaj uwempratin penké atsawai. Ju nunkanam ii chikicha naari pachisar uwempratin atsaji. Jesuskete ii uwentikrampratniun Yus suramsamaj nu” tímiayi Pítiur.

13 Pítrusha Juansha nánkamas shuara áintsan ármiai. Núkap unuimiarcharu ármiai. Tura unuimiarchaitiat, arantutsuk etseriarmiayi. Aentsu uuntri núnaka nekaawar “Nékachuitiat, itiura sapijmiatskesha chichainia” tiarmiayi. Tura, jusha Jesusa nemarin ármia núiti tiar nekaawarmiayi.

14 Nuyasha áishman péñker ajasmia nu niijjai nu wajamiayi. Tuma asamtai, niisha aj wajakuí, Israer-shuara úuntriñkia, péñker ajaschaiti titiai tukamá tujinkiararmiayi.

15 Tuma ásar, iik nuamtak áujmatsatai tusar, Pítrusha Juansha shutuapsha aa awemartai, tiarmiayi.

16 Tura áujmatainiak tiarmiayi “Ju Pítrusha ju Juansha itiurkatjik. Ju uunt túrunamun Jerusarénnum matsatainia nu ashí nékainiatsuk. Wáitai titin tujintiaji, tiarmiayi.

17 Tura, ashí aents nekaawarajin tusar yamaik jiaktai. “Ju Jesusa naari pachisrum penké jintintiawarairap,” titiai” tiarmiayi.

18 Tura árusan Pitruncha Juánasha shutuapnasha ataksha untsukarmiayi. Tura chicharkarmiayi. “Jesusa naari penké áujmatsairap. Tura Jesusa túramuri penké jintintiarap” tiarmiayi.

19 Tutai Pítiur Juanjai áimkiarmiayi “Enentáimpratarum. ¿Yus warinia wakera? ¿Iikia Yus umirtsuk atumí chichamen umirkatniukaitiaji?” tiarmiayi.

20 Nekaatarum. Iisha íisjinia nu, tura antukjinia nusha ii etsertsuk pujustin tujintiaji.” Tu áimkiarmiayi.

21-22 Shutuáp péñker ajasmia nu kuarenta (40) uwí nankaamas takakuyayi. Ni péñker ajasmarin aents nekaawar, “juka aentsti túrachminiatji” tusar Yusa naarin uunt awajsarmiayi. Tuma asamtai aentsu uuntri Pitruncha, Juannasha asutiátai tukamá aentsun ashamainiak áyatik chicharkar iniaisarmiayi.

Yus-shuar Yusa kakarmarin seawarmiania nu

23 Pítiur Juanjai ankant ajarar ni írutramurijn waketkiarmiayi. Tura jeawar Israer-patri uuntri tura aentsu úuntrisha nin tiarmia nuna mash etserkarmiayi.

24 Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nunkaasha najanaitme. Nayaantsasha tura juí írunna nusha najanamiamé, tiarmiayi.

25 Tura Tawit ámin umirtamin amia nu ju áamtikramiamé:

“¿Urukantai ashí nunkanmaya aents charaatum ajainia? ¿Tura Israer-shuarsha urukantai ántar chichaman enentáimiainia?

26 Uunt kapitían ármia nuka chichaman jurusarmiayi Uunt Yúsan.

Tura pepru úuntrisha iruntrar Uunt Yúsan kajerarmiayi. Ni anaikiamurijn Krístun nútiksaj kajerarmiayi.”

27 Tu áarmaiti, Uunta, tura nekasaiti. Erutis apachi kapitíantri Punsu Piratujai jú péprunam iruntrararmiayi. Niisha yajaya shuarjai tura Israernumiá shuaraim nuim iruntrararmiayi. Ame Uchirmin Jesusan tunaarinchán kajerarmiayi. Jesuska Ame anaikiamiamé, winia takatrun túrat tusam.

28 Tura ame enentáimjai iwiararamna nu uminkiatniuiti. Tura apachcha Jesusan kajerainia ásar, Ame iwiararamna tímianak umikiarmiayi.

29 Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem ii ashamsuk etserkatin ame kakarmaram amasta.

30 Tura ame kakarmarmijjai jaasha tsuártin amasta. Ame Uchiram Jesus tunaarinchá nujai ii aentsti túrachmin túratniusha amasta. Aents Yusa kakarmarin nekaawarat tusam túrata” tiarmiayi.

³¹ Tura Yúsán tú áujas umikmatai nuin irunar pujuiniain úurkamiayi. Túrunamtai ashí shuara enentáin Yusa Wakaní pimiutkarmiayi. Túmaitkiui ashamtsuk Yusa chichamen etserkarmiayi.

Wíniakete, tícharmiania nu

³² Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wíniakete tútsuk, jusha ashí iiniu ainiawai, tiarmiayi.

³³ Tura Jesusa akatramurisha, Yus ti yayamu ásar, Yusa kakarmaríjiaí Uunt Jesusa nantakmiarín tuke etseras pujuarmiayi.

³⁴ Tura ashí Yus-shuarka nunkan takakusha jean takaku armia nusha, núnaka surukar kuítian itiararmiayi.

³⁵ Tura itiaar Jesusa akatramurín súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi.

³⁶ Chikichík shuar, ni naari Jusé, nunkan takakuyayi. Jesusa akatramurisha Jusén chíkich náarin apujtusarmiayi, Pirnapín. Nu náarisha, shiir enentáimtikkiartin tawai. Tura Pirnapísha Riwí áentsuyayi. Tura ni akiiniamurí núnkenka Chípriiyayi.

³⁷ Niisha ni nunken surukmiayi. Tura nu kuítian itiaí Jesusa akatramurín súarmiayi.

5

Ananíasa tunaari

¹ Tura chíkich áishman, ni naari Ananías, ni nuwe Sapirjai ni nunken surukarmiayi.

² Niisha nunkan suruk kuítian emeenak akanak júki Jesusa akatramurín werí takamt-sukea nútikias susamiayi. Ni nuweshá, Sapir, nuna túran nekaamiayi.

³ Túramtai Pítiur chichaak “Ananíasa, ¿urukamtai uunt iwianch enentáimin enkemturmatai, Yusa Wakanín anañkataj tusam nunka surukam kuit achikumna nu akankam ikiurmasam? tímiayi.

⁴ Entá, nuinikia nunka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímprom? Amesha aya áentsnum wáitruachume. Antsu Yus-numsha wáitruame” tímiayi Pítiur.

⁵ Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashankarmiayi.

⁶ Nú turunamtai áishman tariar Ananías jakan penuararmiayi. Túrawar iwiansatai tusar júkiarmiayi.

⁷ Tura Ananíasa nuwe arur, menaintiú ura nankaamasai támiayi. Túrasha ni áishri jakanka nekaachmiayi.

⁸ Támatai Pítiur nuwan tímiayi “Turuttia. Átum nunka surukurmena nuí, ¿kuit itiarumna núnikik surukuram?” tímiayi. Tutai nuwa tímiayi “Ee, núnik surukji.”

⁹ Tutai Pítiur tímiayi “¿Urukamtai atumsha Uunt Yusa Wakaní nekapkamsatai tusarum imiá enentáimpraram? Pai, iisiá. Ame áishrumin iwiansatai tusar júkaria nu wininiawai. Tura yamaikia amincha juramkiartatui” tímiayi.

¹⁰ Tutai nu chichamaik niisha imia Pitru wajamunam jaka iniaantmiayi. Aishman wayaj tukamá jaka tepan wáinkarmiayi. Túramtai júkiar ni áishriñin ayamach iwiansarmiayi.

¹¹ Tura ashí Yus-shuar armia nu tura ashí aencha nuna antukarmia nu ti ashankarmiayi.

Yusa kakarmaríjiaí túrawarmiania nu

¹²⁻¹⁴ Tura ashí Yus-shuar Yusa Uunt Jeen shikirijn irunin áarmiayi. Nu shikirisha, Sarumúnna, tu anaikiamuiti. Tura chíkichmamtinkia nuim iruntratniun ashamiarmiayi. Túmainiyatan, ti penker áiniawai, tu wearmiayi. Tura Yus-shuar Yusa kakarmarín iniakmasarmiayi. Túra asamtai imiá untsurí aents Yus-shuar ajasarmiayi.

15 Tura chíkich aents ni shuari jainia nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítiur nankaamak ni wakanínsha enkemprutmawainti tusar nu shuar túrawarmiayi.

16 Núnisañ arantiá shuarsha ti untsurí ni shuari jáinian tura iwianchrukuncha nuí Jerusarénum itiarmiayi. Tura ashí nuí táaruka tsuámararmiayi.

17 Israer-patri uuntri, tura Satuséu aencha niijjai pujuarmia nu suiir iiniak

18 Jesusa akatramurín achikiar enkeawarmiayi.

19 Túrasha kashi Uunt Yusa suntari nayaimpinmaya tara sepú wáitirín uraimiayi. Tura Jesusa akatramurín aa júkiarmiayi.

20 Tura tímiayi “Wetarum. Tura Yusa Uunt Jēen wajasrum Yusjai tuke iwiaaku átinia nu etserkatarum” tímiayi.

21 Nuna antukar kashin tsawar káshik Yusa Uunt Jēen wayawar jintintiawarmiayi.

Nu túmainiai Israer-patri uuntri, tura niijjai pujuarmia nusha iruntrarmiayi. Tura Israer-shuara uuntri, naamka armia nuna iruntramí tusa untsukarmiayi. Ashí iruntrar akatar akupkarmiayi, Jesusa akatramurí sepunmaya itiatarum tusar.

22 Tura suntarsha sepunam jeariar Jesusa akatramurín wáinkiacharmiayi. Atsawai tukam táarmiayi.

23 Taar chichainiak “Sepú waiti asakamua tímianisañ aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaji tukamar atsá wáinkiaji” tiarmiayi.

24 Israer-patri uuntri, tura Yusa Uunt Jēen wainniu úuntrisha, nu chichaman antukar, “tsej ausha žurutiak nunasha iniaisarar?” tiarmiayi.

25 Nu chichamaik áishmañ taa tímiayi “Aishmañ átum sepunam enkeamarmena nu, Yusa Uunt Jēen wajasar áentsun jintintiuk pujuiniawai” tímiayi.

26 Túrunamtai Yusa Uunt Jēen wainniu uuntri ni suntariijiai wear achik itiarmiayi. Túrasha penké aents kayajai tukurmarajj tusar, yajauch awajtsuk itiarmiayi.

27 Tura achik itiaar Israer-shuar naamka pujamunam naka awajsarmiayi.

28 Tura Israer-patri uuntri tímiayi “Isha atumin chicháa chicharu awajsar, Jesusa naari pachisrum etserkairap tusar akupkachmakajrum. Túrasha, žantukurmek? Atsá. Mash Jerusarénum átum etserkamu pampankai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

29 Nuyá tutai Pítiur chíkich Jesusa akatramurijiai chichainiak “Iikia aentsjainkia iniañkasar Yus emka umirkatniuitji, tiarmiayi.

30 Jesus atumek krúsnum máamurmena nuna ii iwiaaku Yusri Nin iniantkimiayi.

31 Yus ni kakarmariijiai Nin nankaamantu awajsamiayi. Tura nekas Akupniuiti tusa ni untsuurini apujsamaiayi. Tura áentsun Uwentikniuiti. Israer-shuar enentái yapajiáwar tunaariniá uwemprarat tusa Yus túraiti.

32 Nu tuma asamtai iisha nu nekaar étsereaji. Tura Yusa Wakanísha nuna étsereawai. Túrasha aya Yusa umirkarua nunak ni Wakanín súsaruiti” tímiayi Pítiur.

33 Tutai nuna antukar ti kakerkarmiayi. Túrawar, maatai tusar wakeriarmiayi.

34 Tura nuí Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin árimiayi. Tura niisha wajaki tímiayi “Ju áishmañ aa ishichik wajasarti” tímiayi.

35 Nuyásha irunar matsamarmia nuna chicharuk “Israer shuartiram, ju áishmañ tú túratai tu enentáimsarumna nu aneartarum.

36 Enentáimsatarum. Nuik áishmañ Tiútas wantinkiachmakia. Niisha kapitániitjai takui, kuaru siántu (400) shuar nemarkarmiayi. Tura ukunam nin maawarmatai, ni némarkamurísha pisararmiayi. Túrunawar nuní amuukamiayi.

³⁷ Ukunmasha, iruntrar nekapmartin tsawantincha Kariréanmaya Jútas wantinkia achmaka. Tura nincha nútiksañ ti untsurí nemarkarmiayi. Túman máawarmiayi. Nu túrunamtai nútiksañ ni némarkamurisha pisararmiayi.

³⁸ Jes, tuma asamtai nu áishmañ aa wajainia nu iniaisatarum. Auka pachisairap. Au tumainia nu aya áentsnaketkuñkia amuukattawai.

³⁹ Tura antsu Yúsnaikkuñkia atumsha amuktai tukamarum tujinkiattarme. An-eartarum. Iniaiyachkurmeka nu tumá pujusrum Yusjají máanikchattarmeash” tímiayi Kamarír.

⁴⁰ Tú tutai tímianak umikiarmiayi. Túrasha Jesusa akatramurin untsukar asutiáwarmiayi. Tura chicharuk “Jesusa naari pachisrum penké ishichkisha etserkairap” tiarmiayi. Tú tiar akupkarmiayi.

⁴¹ Jesusa akatramurisha Israer-shuara uuntri pujamunmaya jíinkarmiayi. Tura wáitsamniaitrome tusa Yuska Jesusa naari pachia asakrin ii natsantin wáitsatniun tsankatramkaitji tusar ti shiir enentáimsar wearmiayi.

⁴² Tura Jesukristunun áujmatsatniun penké iniaisacharmiayi. Antsu tuke tsawant Yusa Uunt Jeencha tura chíkich jeanmasha páchitsuk etseriarmiayi.

6

Yus-shuaran yainian siati anaikiarmiania nu

¹ Nú tsawantin Yusan umirkaru ti kawenkar áarmiayi. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yurumak súarmena nuí atumí waje ti nukap súarme. Tura íniuka ishichik súarme” tiarmiayi.

² Túruinia Jesusa tuse akatramurí ashí Yus-shuaran irurar tiarmiayi “Iisha Yus-Chicham etserkatin iniaisar yurumak súasachminiaitji.

³ Tuma asamtai yatsurtiram, atumínia siati áishmañ eáktárum yurumkan súarat tusarum. Péñker wekainia nu, tura neka shuar, Yusa Wakaní pimiutkamu ainia nu achiktarum.

⁴ Iikia antsu Yus áujkir unuiniakratkir Yusa chichame etserkir wétatji” tiarmiayi.

⁵ Akatramu tiarmia nuna ashí aents enentáimsar pujuarmiayi. Túmainiak Estepañkan anaikiarmiayi. Estepañsha Yusan tuke enentáimtiniuyayi. Tura Yusa Wakanísha pimiutkamuyayi. Chíkich áishmañkan anaikiarmiayi, niisha Jiripi, tura nuyá Pुरूkuru, Nikiánúrsha, nuyá Temuñ, Parmenassha, Nikiurássha. Nikiurássha Antiukía nunkanmayaitiat Israernancha ashí umirniuyayi.

⁶ Tura nu siati áishmañkan Jesusa akatramurin itiararmiayi. Táarmatai, akatramusha, Yus áujtusar, anaikiaji tusar múuknumsha ni uwejen awantsarmiayi.

⁷ Túrasha Yusa chichamenka tuke pampanki wémiayi. Nuí Jerusarénumsha Yus-shuar ti kawenkararmiayi. Tura imia Israer-patrisha untsurí Yus-Chichaman umiriarmiayi.

Estepañkan Israer-shuara uuntriin júkiarmiania nu

⁸ Estepañsha Yusa waitnenkartutairi pimiutkamuyayi. Tura Yusa kakarmarisha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarin nekaawarat tusa túramiayi.

⁹ Israer-shuar iruntai jea, ni naari Ankantín, ámiayi. Nuyá áishmañsha tura Serini nunkanmaya áishmañsha, tura chíkich nunka Arijiantrianmayasha, Serisianmayasha, Ásianmayasha, tímian Estepañjají áujmatsatai tusar káutkarmiayi.

¹⁰ Estepañ Yusa Wakaní nekatairijijají tímianak chicháa asamtai, nu áishmañ Estepañjají inkiunaikiar nupetkataj tukamá tujinkiarmiayi.

11 Tuma asamtai suiir enentáimtuiniak chíkich áentsun Estepañkan tsanumprurarar tusar eákarmiayi. Estepañ Muisaisnasha Yúsnasha yajauch áujmatui, titiarum tusar akikiarmiayi.

12 Peñké áentsun, tura uunt ainia nunasha, jintintin ármia nujajsha chichaman júsar yajauch enentáimtikrarmiayi. Tura Estepañkan jintiá akirtuawar achikiarmiayi. Túrawar Israer-shuar naamka matsamarmia nuí júkiarmiayi.

13 Tura wait chichamtinian itiarmiayi. Niisha taar chicharainiak “Yusa Uunt Jeen ti péñker ana nu, tura Yusa akupkamuríncha ju Estepañ tuke yajauch chicharui, tiarmiayi.

14 Nú arantcha ju Estepañ tímia nu antukji, tiarmiayi. Estepañ chichaak “Nasarétnumia Jesuska Yusa Uunt Jeen sáaktiatui, tura nuyá Muisais in ikiurtamkimiaj nunasha yapajiáttawai” tímiaiyi. Nusha Estepañ tímia nu antukji” tiarmiayi. Tura nunasha peñké ántar tsanumprurarmiayi.

15 Nuyasha ashí Israer-shuar naamka iruntramunam pujuarmia nu Estepañkan iiyaj tukamá ni yapin nayaimpinmaya suntara yapiya nuní íran wáinkarmiayi.

7

Estepañ etserkamiania nu

1 Tuma wáiniak Israer-patri uuntri Estepañkan aniasmiayi “¿Ju tuinia nu nekaskait?” tímiaiyi.

2 Tutai niisha áimkiamiayi “Winia úuntrutirmesha, yatsurtirmesha anturtuktarum. Ii Waantu Yusri ii úuntrin Apraáman wantintiuksiayi. Apraámka Misiuputámia-Kartea nunkanam pujaj, Aran nunkanam wéatsain, nuí wantintiuksiayi.

3 Tura wantintiuksi tímiaiyi “Ame nunkemsha áminiurmesha ikiukim nunka Wi iniaktus-tatjamena nuí wetá” tímiaiyi Yus.

4 Tutai Apraám Misiuputámia-Kartea nunkan ikiuki Aran nunkanam pujustaj tusa wémiayi. Nuyá ni aparí jakamtai “Arant wetá” tímiaiyi Yus. Nuna taku ju nunkan ii pujajnia juí pujamiayi.

5 Túrayat nunkan ishichkisha súsachmiayi ju nunkanam. Antsu “Ukunam amastatjai. Ame jakakmin ame uchirmin susattajai” tímiaiyi. Tura Apraama uchirí peñké atsan nuní tímiaiyi Yus.

6 Nuyasha Yus tímiaiyi “Ame uchirmesha írara núnisarañ chíkich nunkanam pujusartatui. Nuísha emetamu itit awajtai pujuartatui. Kuaru siántu (400) uwí, tímianu uwí wáitsartatui, tímiaiyi.

7 Túrasha, Wi asutiáttajai ame shuárumin wáitkia núnaka, tímiaiyi. Túram nuyá nú nunkanmaya shiákartatui. Tura Winia enentáimtursartatui jú nunkanam’ tímiaiyi.

8 Yus tuke Apraámnasha chicharuk ‘Yamaikia Wíi-shuar asarum tsupirnaktiniaitrome. Tuma asam amesha uchiram áishmankach akiiniamtai, Wi tímiajna núnismek, sirkun-sisiún tutai, shunichirí nuape tsupirkata, tímiaiyi. Tura chícham Wi yamaikia ámijjai najanañ nu nekas uminkatniuiti tusam nusha túrata” tímiaiyi Yus. Tuma asamtai ni uchirí Isak akiiniamtai, uchu tsawant nankaasmatai, Apraám nin tsupirkamiayi. Tura Isaksha ukunam ni tuse (12) uchirín ii uuntri armia nunasha nútiksañ túramiaiyi.

9 Tura niisha ni yachín Jusén suiir íyarmiayi. Túmainiak Ejiptu nunkanam júkiarat tusar surukarmiayi. Túrasha Yus némarkauyayi.

10 Tuma asa, ashí ni itiurchatriñia uwemtikramiaiyi. Tura waitnenkartutairíncha nekatairíncha susamiayi. Tuma asamtai Ejiptunam uunt akupin Paraún Ejiptu nunkaa akupniurí ajasat tura ni jeen wáinniurí ajasat tusa anaikiamiayi.”

11 “Tímiatam tsuka tura itiurchatcha ámiayi Ejiptu núnkanam. Tura juí Kanaan nunkanmasha núnisarañ ámiayi. Tuma asamtai ii uuntri yurumkan peñké wáincharmiayi.

¹² Tura Jakup, Ejiptunam yurumak ikiusma awai taman antuk ni uchirín akupkarmi-ayi. Túrasha wekaicha wearmiayi. Wats, ii úuntriñiun ujaajrume.

¹³ Tura ii uuntri atak Ejiptunam wéenak Jusesha, wíitjai takui ni yachj Jusen nekaawarmiayi. Tura Jusé “Yatsur áiniawai” takui Paraun, antuk “au shuarapitia” tímiayi.

¹⁴ Nuyanka Jusé ni yachin chicharuk “Apar itiatarum uchirtuk” tímiayi. Nu shuarsha untsurí, setenta senku (75) matsarmiamiayi.

¹⁵ Nuní tutai Jakupsha ni shuarijjaí Ejiptunam pujustai tusar wearmiayi. Tura ukunam nú nunkanman jakamiayi. Tura ni uchirisha ii uuntri ainia nu, núnisaran nú nunkanman jákarmiayi.

¹⁶ Tura atak ukunam ni shuari Sikiam nunkanam ni ukunchin júkiar iwiarsarmiayi. Kame Sikiam nunkanam Apraámka yaunchu játsuk Amura uchirí nunken sumakmiayi. Túramtai nuj iwiarsarmiayi’ tímiayi.

¹⁷ ‘Yus, Apraáman chicharuk “Nekas wi susattajme” tímiania nú tsawant jeatemamtai, Ejiptu nunkanam Israer-aents pampanki ti kawenkarmiayi.

¹⁸ Nu tsawantincha Ejiptunam chíchich akupin naamka ámiayi, tura Jusen nekaachmi-ayi nii.

¹⁹ Nu akupin ii yaunchu úuntrin anañkawar yajauch awajiarmiayi. “Atumí uchirí kuírchich ana nu ajapa ikiuktiarum” tu wémiayi. Pampankarain tusa tímiayi.

²⁰ Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi.

²¹ Tura nuyá ajapa ikiuktin jeamtai entsá apujsamiayi. Uunt Paraunka nawantri Muisaisan wainiak jukimiayi. Achik, ni uchirinia tímiatrusan júki tsakatmarmiayi.

²² Tuma asa Muisais unuimiátrauyayi ashí Ejiptu aents nékarmia nuna. Túramurisha chichamesha kakarmauyayi.’

²³ Estepan tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuari asamtai.

²⁴ Nuyá we Ejiptunmaya áishman ni shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishman kan máamiayi.

²⁵ Wíi turamujai Yuska Israer-aentsun uwentikrattawai, tu nekaamiayi Muisais, Yus timia asamtai. Tura Israer-aencha áintsaran nékainiawai tu enentáimsamiayi. Túrasha niñkia nekaacharmiayi.

²⁶ Kashin tsawar Muisais ni shuari jímjar maani pujuinian wáinkiamiayi. Tura nawamnaikiarat tusa “¿Urukamtai nuamtak yatsumjaisha yajauch awajniarum?” tímiayi.

²⁷ Tutai emka nankaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam?

²⁸ ¿Winiasha maantuátaj tusam wakeramek, yaú Ejiptunmaya áishman máamamna nútiksamkea?” tímiayi.

²⁹ Nuna antuk Muisaiska Matian nunkanam pisar, nú nunkanam kuarenta (40) uwí yajaya áintsan pujumiayi. Nú nunkanam pujus, nuatak, jimiará uchin yajutmarmiayi.’

³⁰ ‘Kuarenta uwí nankaamas, nu atsamu nunkanam Senai náinnium tíjjuuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi.

³¹ Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi.

³² Yus tímiayi “Wíitjai Yus. Ame úuntrumj Apraáma Isaka, Jakupa Yúsrintjai” tímiayi. Tutai antuk Muisaiska ti kuraimiayi sapijin. Tura íistinian tujinmiayi.

³³ Nuyá Uunt Yus tímiayi “Úuntrun shiir awajsataj tusam, ame sapatrum ukuinkiam ikiuktia, wajamna nuj Wí pujakui.

³⁴ Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwentikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

³⁵ Estepañ tuke étseruk: ‘Jú Muisaisan ni shuari “¿Ya amincha ii akuptamin tura ii chichartamin átinniasha anaitiamkamam?” tiarmia nuna Yuska akupniun anaik uwentikrarat tusa awainki akupkamiayi. Numiniam ni suntari wantintiukmia nuna chichamejai Yuska Muisaisan akupkamiayi, tímiayi.

³⁶ Muisaisaiti Israer-aentsun Ejiptunmayan uwentikramia nu. Yusa kakarmarın nekaawarat tusa, aentsti túrachminian untsurın túramiayi Ejiptu nunkanam. Nuyá Kapaantin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi.

³⁷ Jú Muisaisak Israer-shuaran chicharuk “Atumíniānak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi.

³⁸ Jú Muisais Israer-aentsjai atsamunam pujumiayi. Senái nainnium Yusa suntari níjiaisha pujumiayi. Tura Muisaiska ii úntrijjai pujumiayi. Níyaiti iwiaaku pujustin chichaman sunasmia nu. In ujatmaktinian sunasmiai.’

³⁹ ‘Túrasha ii yaunchu uuntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi.

⁴⁰ Túmainiak Muisais Yusjai chichastajtsa murá wématai nu shuar Muisaisa yachın Arunkan tiarmiayi “Ii yusrı najanató, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi.

⁴¹ Nuyá wáakachia áaniun najanawarmiayi. Túrawar, júiti ii yusrı tusar, kuntinian maantuawarmiayi, nu susatai tusar. Tura ni uwejejai najanamun ísar ti wararsarmiayi.

⁴² Nuna túruinian wáiniak Yus, iniaisajai taku, niya kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniurı junı áarmiayi:

“‘Israer-aentsu, kuarenta (40) uwitin atsamunam wekaimiarmena nuı, ¿Winiak kuntin maanturtuamarum? Winia surustai tusarum penké túrachurme, tímiayi Yus.

⁴³ Antsu, Muruk naartin ántar-yusa pujamurın jukimiarme. Tura chíkich ántar-yussha, ni naari Rempañ, yaa áanin najanarum nusha jukimiarme. Júkin asakrumin atumı nunkeya jukin, tímiaı Papirúnia nunkan nankaiki akupkatjarme” tímiayi Yus.” Nunı áarmaiti’ tímiayi.

⁴⁴ Estepañ tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánató” tímiayi. Tutai Muisais Yus tímianak umikmiayi. Nu jeān ii uuntri yaunchu takaku áarmiayi.

⁴⁵ Nu jeān ni uchirı akintkiar akintkiar wearmiayi. Ukunam, jú nunka achiktin jeamtai, Yuska kapitián Jusuejai jú nunkanmaya aentsun jiiıki akupkarmiayi. Tura ii uuntri kapitián Jusuejai winiarmia nu, nu jeāncha jú nunkanam itiarimiayi. Tura Tawit uunt akupin náamtsaiın, ii úntrisha nu jeān takaku áarmiayi.

⁴⁶ Kame Yus Tawitian yájau enentáimtichmiayi. Tuma asamtai Tawit Yus shiir pujustinian jeān jeamtinian seamiai.

⁴⁷ Túrasha antsu Tawitia uchirı Sarumún Yusa jeān jeammiayi.

⁴⁸ Túrasha aents jeammanuman Uunt Yus pujuschamniaiti. Jes, yaunchu Yusa etserniurı Yus tímia nuna áarchamkia.

⁴⁹ Juna áarmiayi:

“Nayaimpikia winia pujutairuiti. Nunkanmasha nawer tarimiui.

¿Warı jeā najatruatai tusarme tarum? tímiayi Uunt Yus.

Tura Wi ayampratniusha, ¿tui aa?

⁵⁰ Wiki winia uwejrujain ashı najanachmakiaı” tímiayi.’

⁵¹ Estepañ tuke étseruk: ‘Tura átumka Israer-shuartirmeka atumí enentájjai tuke umichuitrume. Atumí kuishisha weaktsui tura Yus nékachua núniniaitrame. Yusa Wakaníjjai sha tuke nemasnaikiatrame. Tura atumí yaunchu úuntríjjai métek túrarme’ tímiayi.

⁵² ‘Íisia, atumí úuntrísha Yusa etserniurín tuke kajerin ármiai, tímiayi. Tura nú arant atumí úuntrísha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anañkarum máachmakuram, tímiayi.

⁵³ Tura Yusa suntari nayaimpinmaya Yusa chichamen susamuitatrum atumsha penké umikchamarme” tímiayi Estepañ.

Estepañka jakamuri

⁵⁴ Israer-aencha Estepañ tu chichaamu antukar imiá kajerkar nain kátetete awajarmiayi.

⁵⁵ Tura Estepañsha imiá Yusa Wakaní pimiutkamuyayi. Tuma asa nayaimpinmaani ímias, Yusa wincharín, tura Yusa untsuuríniní Jesusan wajan wáinkiamiayi.

⁵⁶ Tumá wáiniak Israer-áentsun tímiayi “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuuríniní wajan wáinjai” tímiayi.

⁵⁷ Támaítat niisha kuishín akiriarmiayi, tura achiktai tusar charáa tiar ashí wajakarmiayi.

⁵⁸ Túrawar, péprunmaya arant júkarmiayi. Tura antuk etserkarmia nu pushirín ákiar, natsa Sauru wajamunam au iisti tusar áeprusarmiayi. Tura máawartai tusar kayajai tukurarmiayi Estepañkan.

⁵⁹ Tura Estepañka tukamaitat Yúsan áuj samiayi. Tura áujuk “Uuntru Jesusá, winia wakantrusha jurutkitia” tímiayi.

⁶⁰ Tura tikishmar áujuk “Uunta, ju winia túrutainiana ju makuip” tímiayi. Tura nuna tí iniais, jakamiayi.

8

Sauru Yus-shuaran kajerkarmiania nu

¹⁻² Estepañkan máawarmatai Sauru, péñkeraiti, tímiayi. Tura áishman Yúsan péñker enentáimta armiania nu, Estepañka ayashíncha iwíarsarmiayi, tura aneentak ti uutiarmiayi. Tura nú tsawantai Yus-shuaran Jerusarénum pujuarmia nuna ti kajerkatin nan kamnamiayi.

³ Sáuruka Yus-shuaran kajerak ti pataat wémiayi. Túmak nuí jeá wayá, nuí wayá áishmannasha nuwancha wáinkianka japiki jukí sepunam enkeataj tusa túrimiayi. Tumakui Yus-shuar Jerusarénumia pisarar Jutía nunkanam, tura Samaria nunkanmasha jeawarmiayi. Jesusa akatramurínkia antsu Jerusarénuman juakarmiayi.

Samaria nunkanam etserkarmiania nu

⁴ Túrasha Jerusarénumia aents pisararmia nu, arant wénaksha tuke Yusa chichamen etserkini yujarmiayi.

⁵ Tura Jiripi Jerusarénumia we tura chíkich péprunam Samaria núkanam ámiania nuí jeá, chichaak “Yus anaikiamu ana nu Jesusaiti” tu etsermiayi.

⁶ Túrakui aents iruntrar chikichík enentájjai Jiripi étserreamun titiú pujusar antukarmiayi. Yusa kakarmarín nekaawarat tusa aentsti túrachminian túrimia nunasha wáiniarmiayi.

⁷ Ti untsurí aents iwianchruku ármia nuna Jiripi nu iwianchin jírki akuptiarmiayi. Tura íwianch jíiniainiak kakantar charáa tiar jíiniarmiayi. Tura ti untsurí emearusha shutuapsha péñker ajasarmiayi.

⁸ Tuma asantai nú péprunmayan ka ashí shuar ti warasar pujuarmiayi.

⁹ Tura nú nunkanam uwishin Semun pujumiayi. Nuikkia wi ímianaitjai tusa Samarianmaya aentsun ananniuyayi.

¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semunsha Yusa kakarmarijjai áitkiawai.”

¹¹ Tura ti untsurí uwí wawekratmarijjai anankarta asamtai, umirkarmiayi nu aents.

¹² Túrasha Jiripi Yusa akupeamurin, tura Jesukrístununcha shiir chichaman etserkamiayi. Tura, nuna antukar nuwasha áishmansha umikiar imian wearmiayi.

¹³ Semunsha imia uwishniuitiat Yus-Chichaman enentáimtus imianmiayi. Tura Jiripijjai tsaniñ wekaimiayi. Yusa kakarmarin shuar nekaawarat tusa Jiripikia aentsti túrachminian túrimiayi. Nuna wáiniak Semun ti enentáimsamiayi.

¹⁴ Tura Jesusa akatramurisha Jerusarénum pujuarmia nu Samarianmaya aents Yusa chichamen umirainiawai taman nekaawarmiayi. Tuma asamtai Pitruncha Juánnasha nekáa ikiuutarum tusa akupkarmiayi.

¹⁵⁻¹⁶ Tura Samarianmaya Yus-shuarsha aya Uunt Jesusa náariin imianiarmiayi. Yusa Wakanínia tárachmiayi. Tuma asamtai Pítrusha Juanjai nu jeawar Samarianmaya Yushuara enentáin Yusa Wakaní pimiutkarat tusan Yusan áujtusarmiayi.

¹⁷ Tura áujtua umikiar Pítiur Juanjai ni uwejen nú Yus-shuaran awantsarmiayi. Nuiñkia Yusa Wakaní taramiayi.

¹⁸ Jesusa akatramuri uweje awasmanum Yusa Wakaní taramtai, Semunsha nuna wáiniak, kuitjai nu kakarman sumaktaj, tímiayi.

¹⁹ Tura Jesusa akatramurin chicharuk tímiayi “Winiasha kuitjai surustarum nu kakaram. Wisha nútiksanak nánkamas aentsnum winia uwejur awantsam Yusa Wakaní tarurat tusan tajai” tímiayi.

²⁰ Tutai Pítiur tímiayi Semunkan “Ámeka kuítrumjai métek menkakatniuitme. Warí, Yus amaana nu ¿kuitjai sumaktinkiait?

²¹ Yus esetram enentáimtachu asam nu túramu pachistincha penké tujinkiamé, tímiayi.

²² Enentáimprata. Túram Yus seata. Enentáimtamna nuna Yus tsankurtamprashtimpiash.

²³ Nékaime, tsaankeá áintsan yapá enentáimin pimiutramkaiti. Tura tunaarmiin jinkiámua núninaitme” tímiayi.

²⁴ Tutai Semun áimkiamiayi “Uunt Yus aujtursatarum. Túrutrumna nuna túrunawajj tusan tajai” tímiayi.

²⁵ Nuyasha Jesusa akatramuri Jesusa túramurin nú áentsun ujakarmiayi. Tura wésar Samaria nunkanam pepru ámunmanka Yus-Chichaman nu etserkiar, nu etserkiar Jerusarénum waketkiarmiayi.

Jiripi Yus-Chichaman etserkamiania nu

²⁶ Tura Yus ni suntarin nayaimpinmayan Jiripincha akuptukmiayi. Niisha chicharuk tímiayi “Wátskea. Juyá jiinkim Jerusarénumia jintia Enkasa péprunam wea nuní weme, anaraaní wetá. Nú jintiaka atsamu nunkanam nankaamawai” tímiayi.

²⁷ Tutai Jiripisha wémiayi. Jintiá wesa Itiupianmaya áishmankan wáinkiamiayi. Nú áishmansha Itiupia nunka akupniurin, ni naari Kantasen takarniuyayi. Kantaseka núwauyayi. Tura nu áishman ti neka asa nuna kuítrin írniuyayi. Nú áishmansha Yusan áujsatat tusa Jerusarénum wéu wáketmiayi.

²⁸ Karetanam enkemar wesa, Yusa etserniuri Isayas aarmia nuna aujki wémiayi.

²⁹ Wats, Jiripi nú jintianam wéakui, Yusa Wakaní nin tímiayi “Nú kareta amayánta.”

³⁰ Tura Jiripisha amayán, Yusa etserniuri Isayasa áarmarin áujun antuk, chicharuk “¿Aujeamna nu nékamek?” tímiayi.

³¹ Tutai nú áishman tímiayi “¿Itiurak nekaataj? ¿Yaki jintintruat?” tímiayi. Tura antsu ijjai wetái tusa, Jiripincha enker jukimiayi karetanam.

³² Nu papí áarman áujmia nu júuyayi: “Murikiua áitkiasañ jákatniunam júkiarmiayi. Tura uchich murik, ure tsúpiram chichaatsna núnisanñ niisha chichakchamiayi.

³³ Nincha iniatsáramiayi. Túrasha penké chichamnaka tútsuk tsañkamakmiayi. Niisha nunkanam iwiaaku pujá maamu asamtai, ¿yaki nuna áujmatkat’?” Nuní aarma ámiayi.

³⁴ Kantase takarniurí Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurí níñkik túmama? ¿Chikichnash ta?” tímiayi.

³⁵ Nuyá Jiripi nu aarman áujtus “Júka Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa ámanum nankaamak áishman Jiripin chicharuk “Jui entsá jeaji. Wikia jui imianchamniakaitiaj” tímiayi.

³⁷ Tutai Jiripisha tímiayi “Tuke enentáimjai Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi.

³⁸ Tura, karetan awajas mai jíinkiar entsá wearmiayi. Nui Jiripikia Kantase takarniurín imiaimiayi.

³⁹ Tura kukar jíinkiar matai Uunt Yusa Wakaní Jiripinkia jukimiayi. Tuma asamtai Kantase takarniurisha Jiripin wáinkiachmiayi. Túrasha níñkia waras wémiayi.

⁴⁰ Jiripisha jeachat Asutu péprunam wantinkiamiayi. Tura nuyá jíinki péprunam nuí wayá, nuí wayá Yus-Chichaman etserki we, Sesaria peprunam jeamiayi.

9

Sauru Jesusan umirkamiayi

(Túramurí 22.6-16; 26.12-18)

¹ Nuna tumaj, Jerusarénum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi.

² Tura jeari tímiayi “Papí ame naarmijiai áaram surusta. Wi nuna papí jukin timiaj Tamasku péprunam jean, Israer-shuar iruntainiam wayattajai. Túran nú papijiai Jesusan umirkaru ainia nuna, nánkamsan achikiartatjai. Túran áishman nasha nuwancha achikian jinkian, jui Jerusarénum enkeataj tusan ikiaankattajai” tímiayi.

³ Tura papí susam Sauru jintiá wéaj, Tamasku péprunam nuntumsaj nuí aya aneachma nayaimpinmaya tsáapin jíitsumir téntakmiayi nin.

⁴ Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuí, amek enentáimin yajauch awajmamsame, waaka sankanmiak numin ijiuma núnismek” tímiayi.

⁶ Nuyanka Sauru sapijin kuranki tímiayi “Nuñkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nui jeawakmin ame túratamna nuna turamiartatui” tímiayi.

⁷ Tura Sáurujai irunar wearmia nu, chichaamun antukarmiayi. Tura áentsnaka penké wáinkiacharmiayi. Tuma ásar ti ashamkarmiayi.

⁸ Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uwejnem enkekiar júkiarmiayi Tamaskunam.

⁹ Nuí jeá menaintiu tsawant íimtsuk tura yurumtsuk penké úmutsuk pujumiayi.

¹⁰ Nuí Tamaskunam Yus-shuar Ananíasa ámiayi. Nin mesekranam Uunt Jesus tímiayi “Ananíasa.”

Tutai “¿Warí wakeram, Uunta?” tímiayi.

11 Nuyá Uunt Jesus tímiayi “Wajakim jintia, Naka tutaiya nuí wetá. Nuísha Jutasa jeen jeam, Társunmaya Sáurun eáktaj tusan winijiai, titiá, tímiayi. Niísha Yúsan áujuk pujawai.

12 Tura juna mesekranam ipiatkamjai Sáurun. Aishman wayá ni uwejéjaj ántiawai, ataksha ímit tusa. Nú áishmanka ámetme, Ananíasa” tímiayi Jesus.

13 Táman antuk Ananías chichaak “Túrasha Uunta, ju áishman ame áentsrumin Jerusarénum ti yajauch awajchakait. Ni yajauch túramurín ti untsurí aents ujatainiawai, tímiayi.

14 Tura yamaisha Israer-patri chicharniun papirín takakui. Tura nujaj ame náarmin páchiaj nuna achik jukitiaj tusa tímiajajsha tarutramji” tímiayi Ananías.

15 Tutai Uunt Jesus tímiayi “Áankisha wetá. Ju áishman kan winia etserniur atí tusan achikjai Wi. Niísha Israer-shuarchancha tura kapitíánniasha tura Israer-shuarnasha winian etserin átatui, tímiayi.

16 Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

17 Tura Jesus táman umirak Ananías Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantintiumakmamna nusha ame ataksha ímiat tusa, tura Yusa Wakanísha enentáimin pimiutramkat tusa winia akuptukai” tímiayi.

18 Nu chichamaik ni jiiya namaká saepeya áanin iniaarmiayi. Túrunamtai ataksha ímmiayi. Túruna wajaki we ímianmiayi.

19 Nuyasha yurumámiayi. Tura yurumásha kakaram ajasmiayi. Tura Yus-shuarjaj Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkamiania nu

20 Nuyanka Sauru Israer-shuara iruntairín wayá Jesusa túramurín etserkamiayi. Etseruk tímiayi “Nekasaiti, ju Jesus Yusa Uchirínti” tímiayi.

21 Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímiajajsha nuna achik Israer-patri akupniurín jukitiaj tusa tamia núchakait” tiarmiayi.

22 Tura Sáurusha sapijmiatsuk etsermiayi. “Ju Jesus nekas áentsun Uwemtikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarmiayi.

23 Tura ukunam, Israer-aents Sáurun maatai tusar chichaman jurusarmiayi.

24 Tura Sáurusha nu chicham jurusman nekamamiayi. Israer-aents pepru jínmanum tuke tsawaisha, káshisha achikiar maatai tusar jintian akirtiarmiayi.

25 Nuna antukar Yus-shuar Sáurun chiiknium kashi enkeawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusarénum wémiania nu

26 Tura Sauru Jerusarénum jeá Yus-shuarjaj iruntrattsá wakerimiayi túrasha nínkia ashamiarmiayi. Sáurusha nekas Yus-shuar ajaschaiti tusar ashamiarmiayi.

27 Túmainiaín Pirnapí Jesusa akatramurí matsatmanum jukimiayi Sáurun. Tura nuí ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarín etserkaiti” tímiayi.

28 Tura Sauru Jerusarénum juákmiayi. Tura Yus-shuarjaj irunar pujumiayi.

29 Nuyasha Yus, etserkata tutai, sapijmiatsuk Jesusa túramurín etsermiayi. Tura Israer-shuar Kriaku chichaman chichau ármia nu, nuí pujuarmiayi. Sáurusha nu shuarjaj áujmatsarmiayi. Túrasha nu shuar Sáurun itieur máatjik tusar chichaman juriarmiayi.

30 Tura Yusaj yachi ármia nu, chicham jurusman nekaawarmiayi. Neka ásar Sáurun Sesaria péprunam júkiarmiayi. Tura nuyasha Tarsu péprunam akupkarmiayi.

³¹ Tura Jutíanmaya, Kariréanmayasha, Samarianmayasha Yus-shuar shiir tímiájnisán ajasar kakaram ajasarmiayi. Yúsan ashamainia ásar, tura Yusa Wakaní yayamu ásar kawenki kawenki wearmiayi.

Pítiur Eneasan yáimiania nu

³² Tura Pítiur Yusaj yachi armiania nu iráa wekaimiayi. Wekaak Yus-shuar Rítianam matsamarmia nuisha iraumiayi.

³³ Nuisha Rítianam jeá áishmankan Eneas náartinian wáinkiamiayi. Niisha emearu asa wekaicha uchu uwí aya tépenuyayi.

³⁴ Tura Pítiur chicharuk “Eneasa, Jesukrístu tsuármawai. Nantaktia. Tura esek-matairam iwiarata” tímiayi. Tutai Eneas nu chichamaik nantakmiayi.

³⁵ Nuna túman wáinkiar Rítianmaya aents tura Sarunmaya aencha enentáimprar Uunt Yusan nemarsarmiayi.

Nuwa Túrkas nantakmiania nu

³⁶ Túrasha Jupe péprunam nuwa Yus-shuar pujuyayi, ni naari Tapitia. Tura nusha Kriaku chichamjainkia Túrkas tuiniawai. Nu nuwasha nu pujus tuke péñker túriniuyayi. Tura niisha nútiksán yai wémiayi.

³⁷ Nu tsawantinik Túrkas sunkuran jateemak jakamiayi. Túrunamtai ayashin nijjarar yakí tesaamunam áepsarmiayi.

³⁸ Jupe péprusha Rítianmaya tíjiuch ámiayi. Júpenmaya Yus-shuar Rítianam Pítiur pujan nekaawar jimiará áishmankan akatrar akupkarmiayi, Júpenam wari winití tusar.

³⁹ Nu tutai Pítiur niijiai wémiayi. Tura támatai jaka tepemia nu awayáwarmiayi. Nu wayamtai waje pujuarmia nu útkiar Pítrun téntakarmiayi. Túrawar pushirin, Túrkas iwiaaku pujus najankamia nuna iniaktusarmiayi.

⁴⁰ Nuyanka Pítiur aa akupkarmiayi ashí. Tura niisha niñki tikishmar Yúsan áujsamiai. Nuyasha nuwan jaka tepaan iis tímiayi “Tapitia nantaktia.” Tutai niisha ími Pítiur wajaan wáiniak nantaki pujusmiayi.

⁴¹ Tura Pítrusha nuwan uwejnun achik awajkimiai. Tura iniais Yus-shuar ármia nuna tura wajencha untsukar Túrkas iwiaaku ajasun iniaktusarmiayi.

⁴² Nu túrunamun ashí aents Jupe péprunmaya nekaawarmiayi. Túrawar untsurí aents Uunt Jesusan umirkarmiayi.

⁴³ Tura Pítruka Jupe péprunam untsurí tsawant nuapen-iwiarin Semunka jeen pujusmiayi.

10

Pítiur Kurniriujai

¹ Sesaria péprunam Kurniriu naartin suntara kapitiantri pujumiayi. Ni suntari Itiaria nunkanmaya ármiai.

² Nu kapitian Kurniriu ni shuarijiai, Yuska nankaamantuiti, tu enentáimtiarmiayi. Tuma ásar Yúsan enentáimtin ármiai. Tura nútiksán kuítniasha takakchan yáintaj tusa Israer-shuaran súuyayi. Tura tuke tsawant Yúsan áujtiniuyayi.

³ Chíkich tsawantai, nantu aanku ajasaj Kurniriu ímiarmiayi. Yusa suntari Yus nayaimpinmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarin ashamak ímia pujumiayi. Tura “¿Warimpiait, Uunta?” tímiayi.

Tutai Yusa suntari tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai” tímiayi.

⁵ Tura Yusa suntari Kurniriuun tuke chicharuk “Wats, áminiuram Júpenam akupkata. Semun, chíkich naari Pítiur, tatí tusam akuptukta, tímiayi.

6 Nu Semunsha chíkich Semunjai pujawai. Nuka nuapen-iwiarin Semunkaiti. Tura ni jeesha nayaantsanam ayaamach pujawai, tímiayi. Nui jeawakmin, ame túratamna nuna Semun Pítur turamtatui” tinia ikiukmiayi.

7 Tura Yusa suntari waketkimtai, Kurniriuka ni takarniurin jímiaran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi.

8 Kurniriusha ni túrunamurin ashí ujáa-já awajas Jupe péprunam akupkarmiayi.

9 Kashin tsawantaj Kurniriu suntari Júpenam nuntumsaraj, tutupin aj Pítur jea yakí wáakunam Yúsan áujсатаjtsa wakamiayi.

10 Pítrusha ti tsukamak yurumátaj tusa wakerimiayi. Túrasha yurumkan iniarainiaj Pítur íkiajtiusmak,

11 nayaimp uranmianum wan̄karam tarachia áanin tura nuna tsakar̄in jin̄kiakman tár̄un wáinkiamiayi.

12 Nu tarachnium yajasma irunmiayi. Wekainiusha, nanamtincha, tura napisha en̄kemiarmiayi.

13 Tumaj Yus Pitrun chicharuk “Pitru, wajakim maam yuata” tímiayi.

14 Tutai Pítur tímiayi “Atsá Uunta. Ii Israer-shuartikia yajauch yajasma áinia nu tura yúatin surimkiamu ana nuka pen̄ké yúchaitji. Tuma asantai júnaka wikia yuashtatjai” tímiayi.

15 Túrasha Pitrun atak Yus chicharuk “Wi, pen̄keraiti, tájana nu, yajauchiiti, tiip” tímiayi.

16 Nuka menaintiú túrunamiayi. Tura nuyasha tarach ataksha nayaimpiniam wakamiayi.

17 Nuna túrunan wáiniak Pítur wariniak áaniuncha wáinkiaj tusa enentáimia pujaj kapitián Kurniriu ayakma armia nu, anintruiniak jeawariayi.

18 Tura jeawar kakantar untsummiar “¿Semun, Pítur, juin̄ pujá?” tiarmiayi.

19 Tura Pítruka ímiarmarin̄ tuke enentáimia pujaj Yusa Wakaní chichaak “Menaintiu áishman̄ untsurmainiawai, tímiayi.

20 Wajakim akaikim arantutsuk au nemariarta, Wi akupkamu asantai” tímiayi.

21 Nuna antuk Pítur taramiayi. Tura áishman̄kan Kurniriu akupkama nuna wajainian wáiniak “Wiitjai Pítur. Átum eátrumna núitjai. ¿Warí tarintrum?” tímiayi.

22 Tutai niisha tiarmiayi “Iisha kapitián Kurniriu akupkamu taji. Kurniriuka áishman̄ pen̄keraiti. Yúsan enentáimtuiniawai. Tura Israer-aencha nin shiir enentáimtuiniawai. Níīya winiaji, tiarmiayi. Kame nuik, Yusa suntari, nayaimpinmaya akupkamu, ii kapitiántr̄in̄ tímiayi “Pitrun untsukát akupkata. Nii tatí. Tura nii títiatna nu pen̄ker anturkata” tímiayi. Nuna ii kapitiántr̄in̄ takui iisha winiji” tiarmiayi.

23 Tutai Pítur jeá awayámiayi. Tura nu kashi nui kanararmiayi.

Kashin tsawarar Pítur níijiaj wearmiayi. Túrasha Júpenmaya Yus-shuarsha nin nemariarmiayi.

24 Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuar̄in̄ tura ni nekas amikr̄in̄, nekaatarum tusa untsuk ikiaankamiayi.

25 Tura Pítrusha jeantai Kurniriu āā j̄iintiuki Pitrun tikishmatramiayi.

26 Túrasha Pítur awajki tímiayi “Wajaktia. Wisha aya áentsketjai. Ámea núnisketjai” tímiayi.

27 Tura chichasar jeá wayawarmiayi. Tura wayá, untsur̄i aents matsatun wáinkiamiayi.

28 Nuyá Pítur chichaak tímiayi “Amikrua, atumsha nékarme. In Israer áentstinkia, chíkich áentsjaj pachiniarchatniuitrume, tura ni jeencha wayashtiniaitrome in jintin-tramin turamainiaji, tímiayi. Túrasha Yuska ni enentáimsamur̄in̄ wíniaka paant iniaktur-sayi. Túmaitkiui wikia nán̄kamas áentsun yajauchiiti, tura auka wapikiaiti, tíchamniaitjai, tímiayi.

29 Tuma asamtai, untsurkurmin, páchitsuk winimjai. Túmaitkiui nekaataj tusan wak-erajai. ¿Urukamtai untsurkamarum?” tímiayi.

30 Tutai Kurniriu tímiayi “Kuatru tsawant nankaamasaj tura nantusha juni aj, wikia yurumtsuk Yúsan áujсамjai, kjaraj áujsatín ana nuna. Túran chichaj, áishman, ni entsatairi wincharpatniun, naka wajatran wáinkiamjai, tímiayi.

31 Niisha chichartak turutmiaiyi “Kurniriu, Yus ame áujman anturtamkayi. Tura shuar atsumainia yáinmamna nunasha nekarmayi, turutmiai, tímiayi.

32 Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjaj pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi.

33 Túrutkui, wi umikian áentsun wárikmasan ámin akuptukjame utitia tusan. Tura nékasen taume. Tuma asamtai iisha juí Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

Kurniriu jeen Pítur etserkamia nu

34 Nuyá Pítur chichaak “Ayu. Yus ímmianum ashí aents métekrak áiniawai nekas nékajai, tímiayi.

35 Antsu ashí nunkanam nánkamas aents Yúsan umirak péñker tura nuna, Yus nú aentsun shiir enentáimtawai, tímiayi.

36 Yuska shiir chichaman Israer-aentsun akuptukmiayi. Nui chichaak “shuar Jesukrístu naarin páchiakka, Yusjaj nawamnaikiatin átiniaiti, tímiayi. Nú Jesukrístu ashí shuara Úntrinti’ tímiayi Yus.

37 Túrasha Kariréa nunkanam nankamak ashí Israer nunkanam túrunamia nu paant nékarme. Imiakratin Juan imiaak etserak amukmia nú tsawantin nankamamiayi.

38 Tura jusha nékatsrumek, tímiayi. Nasarétnumia Jesus, Yus Anaikiamu asa, Yusa Wakaní kakarmarijjaj péñker túriniuyayi. Iwianchruku wáitias pujuarmia nuna péñker awajsamiayi. Yus Niin pujurma asa ashí nuna túriniuyayi.

39 Tura Israer-aents matsatkamunam tura imia Jerusarén péprunmasha Jesus túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi.

40 Tura menainti tsawant jeamtai Yus Nin iniantkimiayi. Tura ataksha iwiaintiur-tamkachmakají, tímiayi.

41 Ashí áentsnumka wantinkiachmiayi. Antsu íniak nuik, etserin atarum tusa Yus achirmakmij nú áentstiniak wantintiurmakmij, tímiayi. Au nekas jakamunmaya nantakmiatai iisha Niijjaj tsaninkiar yurumámji, tímiayi.

42 Tura Jessusha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki títiniaitjai. Kame ashí áentsun, jáka áinia nuna tura iwiaaku áinia nunasha, Wikiitjai nuna títinian” tímiayi Jesus. Nusha átum werum ujatruktarum, Jesus turammaji, tímiayi.

43 Ya shuarak Jesusa náarin pachia nú shuarnaka tunaarin tsankurattawai, nuna ashí Yúsnan etserniusha yaunchu etseriarmiayi” tímiayi.

Israer-shuarchan Yusa Wakaní tarurarmiania nu

44 Tura Pítur tuke chichaak pujaj, tura chikichcha antúu pujuiniaji Yusa Wakaní tarurarmiayi.

45-46 Tuma ásar ankant ankant chíkich chichamjai chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujaj táarmia nu, nuna antukar ti enentáimsarmiayi. Maa, Yusa Wakanísha Israer-shuarcha áinia nunasha tarurcharaik, tu enentáimsarmiayi

47 Túmakui Pítur chichaak “¿Yaki surimkiat ju aents imiantinian? Warí nincha ínia áintsan Yusa Wakaní tarurcharaik” tímiayi.

⁴⁸ Nuyá Pítiur, Jesukrístu náarijn imiantiarum tusa akupkarmiyai. Tura nuyasha Pitrunka, niijjai ishichik tsawant pujustinian seawarmiyai.

11

Ni túrunamurjn Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurisha tura Jutíanmaja Yus-shuarsha antukarmiyai.

² Túmainiak Pítiur Jerusarennum jeamtai, Israer-shuar Yus-shuar ármia nu chichainiak

³ “¿Urukamtia Israer-aents ániachusha iyumam? ¿Tura aujai tsaninkiam urukamtai yurumámum?” tiarmiayi.

⁴ Tutai Pítiur ashí yámankamtaiknumia túrunamun ujakmiayi.

⁵ Chichaak tímiayi “Wikia Jupe péprunam pujumjai. Tura nuj Yusan auju pujusan ímiarmajai. Tura wan̄karam tarachia áanin kuaru tsakarjn jin̄kiakma, nayaimpinmaja táarun wáinkiamjai. Tura wi pujamunam jeartimiai, tímiayi.

⁶ Tura nuj iijaj tukaman init yajasman, napincha, nanamtinnisha en̄ketainian wáinkiamjai, tímiayi.

⁷ Tura chichaman antukmajai “Pitru wajakim maam yuata” túrutun antukmajai, tímiayi.

⁸ Túrutkui “Atsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai” tímiyai, tímiayi.

⁹ Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiai, tímiayi.

¹⁰ Nunasha menaintiú túrunan wáinkiamjai. Túruna nayaimpiniam mash waketkimiai, tímiayi.

¹¹ Nuj túruna pujai menaintiú áishman̄ Sesarianmaja akupkamu, winia ēataniak wi pujamunam tarutiarmiai, tímiayi.

¹² Tura nuj Yusa Wakaní chichartak “Arantutsuk aujai wetá” túrutkui, wémajai. Tura ju sais Yus-shuarjai wi wémajai. Túrunar ashin̄kiar Kurniriu jeen wayam̄ji, tímiayi.

¹³ Niisha chichaak “Jearu Yusa suntarī nayaimpinmaja taa wajan wáinkiamjai, tímiayi. Tura niisha chichartak “Jupe péprunam Semun̄ Pítiur tatí tusam áishman̄ akatram akupkata.

¹⁴ Pítrusha taa, itiura amesha tura áminiurmesha tunaarminiã uwemprattam nuna turamtatui.” Yusa suntarī nuní turutmiai” tu ujakmiayi Kurniriu’ tímiayi.

¹⁵ ‘Wi chichastasan júaraj, Yusa Wakaní tarurarmiyai, yámankamtaik in tarutram-pramij nútiksaj, tímiayi.

¹⁶ Nuin̄kia Uunt Jesus timian enentáimpramjai. Niisha tíchamka “Juan̄ entsajain̄ imiakratmiayi. Tura antsu Yusa Wakanin̄kia imiantinia áintsaj̄ atumí enentáin̄ en̄kemprutmattarme.” Nu timian enentáimpramjai, tímiayi.

¹⁷ Atumsha enentáimpratarum. Uunt Jesukrístu umirkamij nuj, incha Yuska ni Wakanin̄ suramsamijai. Tura in suramsamij núnisan̄ Yus nincha ni Wakanin̄ súsarmiyai. Nuna tura asamtai, wikia, túrashtiniaiti, Yúsán títinkiaitij” tímiayi Pítiur.

¹⁸ Tura Pítiur taman antukar mitiat wáinkiar “Nekasaiti, Israer-shuarchancha ni enentáin̄ yapajjáwarmatai tuke iwiaaku átinian Yuska nin súsaruiti” tiarmiayi. Tusar Yusa náarijn ti shiir awajsarmiyai.

Yus-Shuar Antiukía péprunam wearmiania nu

¹⁹ Estepañkan máawarmia nuj, chikich Yus-shuarnasha maatai tusar pataatiarmiayi. Túram chikichkia pisarar Pinisia nun̄kanam, Chipri nun̄kanmasha, tura Antiukía péprunmasha wearmiayi. Tura nuj jeawar Yus-Chichaman chikichnaka ujatsuk aya Israer-aentsnak ujakarmiyai.

²⁰ Tura niijjaj Chipri nunkanmaya pisararmia nu Serini nunkanmayasha Yus-shuar ármiai. Nuka Antiukíanam jeawar Israer-shuarchan Uunt Jesusa túramurín ujakarmiayi.

²¹ Tura Uunt Jesus ikiakárma ásar, nú nunkanmaya aents ti untsurí yaunchu túrutairín iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusarénumiá Yus-shuar, ame iyutá tusar, Pirnapín Antiukíanam akupkarmiayi.

²³⁻²⁴ Pirnapísha jeá, Yus nú shuaran uwentikrarma nuna wáiniak warasmiayi. Pirnapísha péñker áishmankauyayi. Yusa Wakanísha pimiutkamuyayi. Tura Yúsan nekas umirkauyayi. Tuma asamtai nu shuaran mash jintintiainiak chicharuk “Tuke enentáimjaj umirkarum Yus nemarsatarum.” Tu chicharak ikiukmiayi. Tura nuísha nú arant untsurí aents Yusaj kawenkarumiayi.

²⁵ Nuna turasua amik Pirnapí Tarsu péprunam wémiayi Sáurun wáinkiatat tusa. Tura wáiniak Antiukía péprunam jukimiayi.

²⁶ Tura nuí jeawar, nú péprunmaya Yus-shuarjaj iruntrar chikichík uwí pujusarmiayi. Yus-Chichaman untsurí shuáran ujaak pujuarmiayi. Tura nuí Antiukía péprunmanka Yus-shuaran émkaka, Kristu shuari, tiarmiayi.

²⁷ Nuyá Yusnan etserin Jerusarénumiá táarmiayi Antiukíanam.

²⁸⁻³⁰ Túmainiaj chikichík etserin, ni naari Akaapu, Yus-shuar matsatmanum ajapén wajak chichasmiayi. Tura Yusa Wakaní nekatairijjaj chichaak “Ti tsuka ashí núñkanam átatui” tímiayi. Tuma asamtai Antiukíanmaya Yus-shuar chichainiak “Jutía nunkanmaya Yus-shuar ainia nu yáintai” tiarmiayi. Ankant ankant ni wakeriarmia núnik súsarmiayi. Tura nú kuítniasha Jutíanmaya Yus-shuara úuntriñ akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisan túrunamiayi, akupin Krautiu pujaj.

12

Pitrun sepunam enkeawarmiania nu

¹ Nu tsawantaj akupin Erutis Yus-shuaran máataj tusa chichaman jurus áentsrín ishiakmiayi.

² Tura Juanka yachin Jakupun suen tsupirkar máawarmiayi.

³ Nuna tura máawarmatai Israer-aents wáinkiar “juka péñkeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmiayi.

⁴ Pítruncha achik itiarmatai, Erutis sepunam enkeata tusa akupkamiayi. Tura sepunam suntarsha ankant ankant, kuaru kuaru, ashikia tiasisáis (16) irunar Pitrun téntakarmiayi. Tura, ju jisat nankaasmatai, mantamnatí tusan jiiaktiatjai aents iruntramunam, tu enentáimsamiayi Erutis.

⁵ Túramu asa Pítruka sepunam pujumiayi. Tura suntarsha mijiatrutsuk iiyarmiayi. Túramunak Yus-shuarka, Pitrun yáinkiat tusar iniaitsuk Yúsan ti áujiarmiayi.

Yusa suntari Pitrun uwentikramiania nu

⁶ Wats, Erutis, kashin jiiaktiajai takui, nú kashi Pítruka jimiará suntar wajamunam etema tepes kanarmiayi. Tura jimiará jirujaj jinksamuyayi. Tura chikich suntarka jinmanum ii wajarmiayi.

⁷ Tumaj aya aneachma Yusa suntari nayaimpinmaya taa ajapén wajasmiayi. Túrunamtaí jeanmanka tsáapin ajasmiayi. Tura Yusa suntarisha Pitrun páenum antiñ ishintiarmiayi. Tura jirusha Pitru uweyéya sayat atiniamiayi.

⁸ Tura Yusa suntari tímiayi “Kaki emenmamata. Túram sapatrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi.

9 Tutai Pítiur nemarsamiayi. Túrasha Pítruka, mesekranmaapi júniája, tu enentáimsamiayi.

10 Túrasha emka suntar íimia wajan nan̄kaikiarmiayi. Tura nuyasha chíkich suntar íimia wajan nunasha nan̄kaikiarmiayi. Tura nuyasha jíintiainium jiru waiti ámanum jeawarmatai, nú wáitisha íimia-nin̄ki kuat uranmiayi. Túrunamtai jíinkiarimiayi. Tura jintiá ishichik wésan, Yusa suntari Pitrun níiniak ikiukmiayi.

11 Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntarín nekas akupturkayi. Erutis mantuataj tusan pujurtana nuyá Yusa suntari winia uwemtikrurai. Tura Israer-aents túrutatajtsa wakeriarmia nuyasha uwemtikrurai” tímiayi.

12 Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeanam untsurí aents irunar Yúsan auju matsatainiái Pítiur jeamiayi.

13 Tura jeá aa wáitin tuntuimiayi, wayataj tusa. Túmakui nuwá uchich, ni naari Ruti, yákit tusa iyumiayi.

14 Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tímiayi.

15 Tutai “Wáurtsumek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níchuiti. Antsu ni wakaní túratsuash” tiarmiayi.

16 Tu chichainiajn Pítruka tuke tuntuí wajamiayi. Tura wáitin uraj tukamá Pitrun wáinkiar ashamkarmiayi.

17 Ashamak chichainiakui Pítiur, uweje takuí itiatmamtikiarmiayi. Tura nuyá Uunt Yus sepunmayan uwemtikramun ujakmiayi. Tura “Ju chicham Jakupu tura chíkich Yushuarsha ujaktarum” tímiayi. Nuna ti iniais jíinki arant wémiayi.

18 Kashin tsawar suntarsha Pitrun atsá wáinkiar “Chuwa urukakua men̄kaka. Áyawa urukattajia” tiarmiayi. Pítiur túrunamun nékachu ásar nuna tiarmiayi.

19-20 Túrunamtai Erutis chichaak Pítiur eaktarum tusa akupkarmiayi, túrasha wáinkiacharmiayi. Túrunamtai Erutis suntaran untsukar, Pítrun íisarmia nuna aniasarmiayi “¿Pítiur itiura men̄kakama?” tímiayi. Niisha áimiainiachkui, nu suntaran mantámnatí tusa akupkamiayi.

Erutis jakamiania nu

Erutissha Tirunmaya tura Setúnmaya áentsjaisha nemasnaikiarmiayi. Túmayatan Jutiá nun̄kan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmaya aents Tirunmaya áentsjai Erutisa nun̄keyan yurumkan súmainia ásar, Erutisjai nawamnaikiatniun wakeriarmiayi. Tuma asamtai métekrak enentáimsar, Erutisa takarniurí pen̄kerí, ni naari Parastu, níijjai emka amikmawar nuyá Erutisan weriar shiir matsamsatniun seawarmiayi.

21 Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaanak áujmatmiayi.

22 Nuí pujus chichaakui aents untsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi.

23 Tumaj nuyajk Yusa suntari nayaimpinmaya tarí Erutisan jaa awajsamiayi. Tuma asamtai nusha aka yuam jakamiayi. Erutissha Yusan waantu awajtsuk nin̄ki waantu enentáimtuma asa túruna jakamiayi.

24 Túrunamtaisha Yusa chichamenka nú arant pampan̄ki wémiayi. Túmakí ashí núnkanam anturamiayi.

25 Tura Pirnapísha Sáurusha ni takatrín amukar Jerusarénumiá Antiukíanam wake-tainiak Juan Márkusan júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

¹ Antiukíanmaya Yus-shuarnum Yusnan etserin páchitra ármiai. Nútiksañ Yus-Chichaman jintinniurisha ármiai. Pirnapísha tura Mukusa Semunsha, nuyá chíkich, Serinianmaya Rúsiusha tura akupin Erutisa tsakatkesha, ni naari Manaen, Sáurusha tímianu ármiai.

² Tura chíkich tsawantaj niisha yurumtsuk Yúsán áujeak pujuiniaj Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túratarum” tímiayi.

³ Tutai ijarma Yusán aujsua amikiar, shiir wetarum tusar ni uwejen Sáurun Pirnapíncha awantkarmiai. Túrawar Antiukíanmaya akupkarmiai.

Chipri nunkanam jeawarmiai

⁴ Tura nuyanka Yusa Wakaní akupkam Pirnapísha Sáurusha jíinkiar Serusia péprunam jeawarmiai. Tura nuyá uunt kanunam enkemprar Chipri nunkanam jeawarmiai.

⁵ Juansha yáintaj tusa némarkauyayi. Nuñ Saraminia péprunam jeawar Israer-shuar iruntai jeanam wayawar Yus-Chichaman etseriarmiai.

⁶ Tura Chipri nunkanam pepru ainia nuñ wáirkutak Papus péprunam jeawarmiai. Nuñ jeawar Israer-aents uwishin ni naari Parjesúsan wáinkiarmai. Ni chíkich náarinkia Erimiasauyayi. Niisha uwishniuitiat, Yúsán étsereajai, tíniuyayi.

⁷ Akupin Serjiu Páurujaj pujuyayi. Nu akupniusha ti péñker enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi.

⁸ Tura uwishin Erimias nuna nakitiak “Auka péñkerchaiti” tímiayi. Akupniusha Yúsán umirkajin tusa nuna tímiayi.

⁹ Nuyanka Sauru, ni chíkich naari Papru, Yusa Wakaní pimiutkamu asa, nu uwishniun úmamkemas iis tímiayi

¹⁰ “Ámeke wáitaitme. Anañkartiniaitme. Yajauchiitme. Maaj, iwianchiitme. Tura ashí péñker ana nuka imiá nakitniuitme. Tsej, ¿urukamtai Yusa jinti naka ana nu emeskim weam?”

¹¹ Paij, yamaikia Uunt Yus asutiámattawai. Yamaikia amesha jimi kusurmatai untsurí tsawant tsáapnin penké íschattame” tímiayi. Tura nú chichamaik jii kusurmatai kirit ímiuk chikichan eamiayi enkeki jurukit tusa.

¹² Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

Chíkich Antiukíanam etserkarmiania nu

¹³ Nuyá Juan waketki Jerusarénum wémiayi. Tura antsu Pápruka ni tsaniakmarijjai kanunam enkemprar Pápus péprunka ikiukiar Pirji péprunam jeawarmiai. Nusha amaini Pampiria nunkanam pujawai.

¹⁴ Nuyá Pirji péprun nankaikiar Antiukía péprunam jeawarmiai. Nú Antiukíasha Pisitia nunkanam pujawai. Nuñ jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiai.

¹⁵ Tura nuñ Yus-Papinium yaunchu áarman áujas aminkiamtai, Israer-shuar iruntai jeanam írniuri Páprun tiarmiayi “Yatsuru, jintiatin chicham takakkurmeka yamaik titiarum. Antukarmi” tiarmiayi.

¹⁶ Tutai Papru wajaki uweje takuimiayi. Tura chichaak “Israer-shuartiram, tura Yúsán umirkataj tusa wakerarmena nu antuktatum, tímiayi.

¹⁷ Ii Yusri ii yaunchu uuntrin Israer-shuartin achikmiayi. Tura niisha írara núnik Ejiptunam matsatainai Yuska nin páchiniak uunt awajsarmiai. Yus ni kakarmarijjai nú nunkanmaja ii yaunchu uuntrin uwemtikrarmiayi.

¹⁸ Túrasha atsamu nunkanam ii uuntrin kuarenta (40) uwitin Yuska aya kátsuntramiayi.

¹⁹ Tura nuyanka siati áentsun mátsatkainian, Kanaan nunkanam matsamarmia nuna amukarmiayi. Nú nunkan ii yaunchu úuntrin susataj tusa Yus túramiayi.

²⁰ Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuatru siántu senkuenta (450) uwí ejemiayi. Samuersha Yúsnan etserin náamtsáin nuna túrimiayi Yus.

²¹ Tura nuyanka áencha juísan nakitiainiak, uunt akupin náamkat tusar Yúsan seawarmiayi. Tuíniakui Yuska Sesa uchirín Saúran anaikiamiayi. Nú Saúra úuntrin kua Pinjamínkiauyayi. Tura Saúrsha kuarenta (40) uwí nú áentsun akupkat tusa Yus tsankatkamiayi.

²² Tura Saúr náamkan ataksha Yus awainkimiayi. Tura nuyá iiksan nú nunkanam uunt akupin atí tusa Tawitian anaikiamiayi. Tura Yuska juna Tawitnian tímiayi “Isaí uchirín Tawitian winia enentáir jeamtai achirmakjai. Tura Winia umirtin átatui” tímiayi.

²³ Wats, Tawit weeanmaya Jesusaiti. Tura Yuska Israer-aentsun Uwemtikrartinian Jesusan anaitiukmiayi, yaunchu timiarin uminkiát tusa.

²⁴ Jesuska táatsain Juan ashí Israer-shuaran tunaariniá enentáimtumar imiantinian ujakmiayi.

²⁵ Tura Juansha ni jákatniuri jeatemamtai, chichaak “Átum enentáimtarmena núchaitjai. Wikia Yusa anaikiamuri, Kristu tutai, nákarmena núchaitjai. Antsu Nin kua winia ukunmaru winittiawai. Tura Niisha wíjain kua ti nan kaamantu asamtai wikia sapatrincha atitrataj tíchamniaitjai” tímiayi.

²⁶ ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktaram. Ju uwempratin chichamka íniuiti, tímiayi.

²⁷ Iis, Jesusa túrunatniurin Yuska yaunchu ni etserniurin áamtikrachimakia. Tura ukunam Jerusarénnumiá shuar ni akupniurijjai tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirinti tícharmiai. Tura, jakatí, tiarmia nu, Jesusa túrunatniurin, Yus yaunchu chichakmia nuna, tímiatrusaran umikiarmiayi, tímiayi.

²⁸ Jesuska penké tunaamkachunak yamaikia mantamnatí tusar Piratun seawarmiayi, tímiayi.

²⁹ Tura Yusa Papiriin ashí Jesusnan tímia nuna tímiannak umikiarmiayi. Tura nuyá krúsnumiá itiarar iwiarsarmiayi.

³⁰ Túramunak Yus jakamunmayan iniantkimiayi.

³¹ Jesuska jakamunmaya nantaki, yaunchu Kariréanmaya Jerusarénnum Nijjai irutka wéarmia nuna núkap tsawantin pujus wantintiukmiayi. Nú shuaraiti yamaikia Jesusa túrunamurin etserainia nu’ tímiayi.

³² ‘Iisha núnisrik shiir chichaman Yus yaunchu ii apachrín tiarmia nu étsereaji.

³³ Iisha Israer-weeá asakrin, Yuska Jesusan iniantkimia nujai ii apachrín anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

³⁴ Tura Yuska Jesusa nantakmiarín jintintiak, tura ni ayashí káurchatniun jintintiak, chíkich Sarmu papinium juna áamtikramiayi:

“Nekas penkeran Tawitian anajmatramaj nuna atumin amastatjai.”

³⁵ Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashí káurтинcha tsankatkashtatme.”

³⁶ ‘Nekaatarum, yatsurtiram, Yuska Tawitia ayashin tíchamiayi nuna. Tawitkia Yus tímian amuk jakamiayi. Túrasha ni ayashin kua káurmiayi.

³⁷ Tura antsu Yus iniantkimia nuna ayashin kua penké káurchamiayi.

³⁸ Tuma asamtai, yatsurtiram nekaatarum. Jesusjainkete tunáa asakártin.

³⁹ Tura Muisais yaunchu akupkamia nujai tunáa tsan̄kurnarchamnia nu, yamaikia Jesusjai tsan̄kurnartiniaiti.

⁴⁰⁻⁴¹ Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum men̄katumpratarum. Wi Yus asan, átum pujarmena nui, aents túrachminian túratajna nusha pen̄kesh nekaashtatrume, chíkich ujatmainiakuisha.” Tu áarmaiti.

Tuma asamtai yatsurtiram, aneartarum atumin nuna túrutmawairum, Yusnan etserin aarma tana nútiksan̄. Nuna chichaak amukmiayi Papru.

⁴² Tura nuyá Papru Pirnapíjiai jiīnki wéenakui aents chichainiak “Chíkich sáwartincha jútiksarmek etserkatarum” tiarmiayi.

⁴³ Tura nuyá iruntsua tsen̄keenak Israer-shuarsha, tura chíkichkia Israer ajasarusha, Yúsán umirkatajtsa wakeriarmia nuka, Páprun Pirnapíncha nemarsarmiayi. Niisha nu áentsun chicharuk “Yusa anen̄krattairī enentáimtusrum kakartarum” tiarmiayi.

⁴⁴ Tura chíkich sáwartinchia nu péprunmayā ti untsurí aents Yus-Chicham antuktai tusar tuakarmiayi.

⁴⁵ Tura Israer-shuarka ti untsurí áentsun tuakarun wáinkiar, suir iiniak, ti kajerkarmiayi. Tuma asamtai Páprun katsekkar “Ju chichaana jūka ántar tawai” tiarmiayi.

⁴⁶ Támaitiat Pápruka Pirnapíjiai arantutsuk chichainiak tiarmiayi “Israer-aentstirmin, atumin emka Yus-Chicham ujaktiniūji. Túrasha átum támaitiatrum nakitramarme. Tura atumsha nakitia asarum, Yúsnum tuke iwiaaku pujuschamnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi.

⁴⁷ Nu túratarum tusa, Uunt Yus akuptamtsujik. Jes, ni Papirīin juna tawai: “Israer-shuarcha Winia nekarawarat tusan anaitiukjame. Tura ashí nun̄kanmaya aents uwemprarat tusan akuptajme.”

Tu áarmaiti” tímiayi.

⁴⁸ Nú chichaman antukar Israer-shuarcha ti wararsar “Uunt Yus tana nuka imiá pen̄keraiti” tiarmiayi. Tura, tuke iwiaaku pujusmin armia nu Yus-shuar ajasarmiayi.

⁴⁹ Tú tumakí Yus-Chicham nú nun̄kanam ashí jamarmiayi.

⁵⁰ Túrasha nuwan̄, Yúsán pen̄ker enentáimtuinian tura pen̄ker wekainian, Israer-shuarka yajauch enentáimtikrarmiayi. Áishman̄ pen̄kerī ármia nunasha, yajauch enentáimtikrarmiayi. Túram Páprun Pirnapíncha katsekkar, chichaman irunturar najatawarmiayi. Tú-turukiar ni nun̄keyā jiīnki awemarmiayi.

⁵¹ Túram Papru Pirnapíjiai, jū aentska yajauchiiti tusar, wéenak naweyan nun̄kan akakekiar ikiukiarmiayi. Túrawar Ikiuniu péprunam wearmiayi.

⁵² Yusa Wakanísha pimiútkamu ásar Yus-shuarka ti warasarmiayi.

14

Ikiuniu Péprunam túrunamia nu

¹ Ikiuniu péprunam Papru Pirnapíjiai jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurí Israer-shuar ármia nu, Israer-shuarcha ármia nusha Yúsán umirkarmiayi.

² Tura chíkich Israer-shuar, Yúsán umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiayi.

³ Tuma asamtai Papru Pirnapíjiai nú nún̄kanam ti nukap tsawant pujusarmiayi. Tura Uunt Yúsán enentáimtuinia ásar, arantutsuk Yusa waitnen̄kratairīn etserkarmiayi. Tura, etserinia nu winia kakarmarjainti tusa, Yuska aents túrachminian najanmamtiki-awarmiayi.

⁴ Tura Ikiuniunmayā aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurí tuinia nu nekasaiti, tiarmiayi.

5 Tura nuyá Israer-shuarchajai Israer-shuarka chichasar pepru uuntrijjai chichasarmiayi. Tura Papru Pirnapíjjai katsekkar tura kayajai tukurar, yajauch awajsatniun nanċkamawarmiayi.

6 Túrasha Papru Pirnapíjjai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunċkanam pujuiniawai.

7 Tura Yus-Chichaman etserkarmiayi.

Ristra péprunam Páprun kayajai tukurarmiania nu

8 Ristra péprunam tunamaru áishmañ pujumiayi. Ni akiiniamuriya tuke wekaichauyayi.

9 Nú áishmañ Papru chichaamun antúu pujumiayi. Túman Papru úmamkemas nin íismiayi. Niisha, Yusa kakarmaríjjai tsuamartatjai, tu enentáimium Papru nekaamiayi.

10 Tura Pápruka kakantar chicharuk “Wajakim wewe ajasam wajasta” tímiayi. Tutai áishmañ wiut kutsuqar wajaki wekaimiayi.

11 Papru túramia nuna aents wáinkiar Rikiaunia chichamjai untsumainiak “Yuska áishmañka áanin ajasaru in tarutramarji” tiarmiayi.

12 Pirnapíñkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi.

13 Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujin iwiarkamun, wáakajai itiamiayi. Tura niisha ni áentsrijjai wáakan maatai tusar pujuarmiayi. Tura tikishmatrar ajamsatai, tiarmiayi.

14 Tura Jesusa akatramuri Pirnapísha Páprusha nuna nekaawar, auka nakitiaji tusar, ni pushirin jaararmiayi. Túrawar aents írunmanum pachiniawarmiayi.

15 Tura tiarmiayi “Shuara, ċurukamtai áitkiarum? Iisha yúschaitji. Atumea áankiitji, tiarmiayi. Penké ántrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunċkancha, nayaantsancha, tura ashí nuí írunna nunasha najanaiti, tiarmiayi.

16 Jes, aents ni enentáimmiaríjjain wekasarat tusa Yuska yaunchu tsanċkatiarmiayi.

17 Tuma ain shuaran péñker awajsamujai Wiitjai Nekas Yus tusa paant awajmam-samiayi. Kame yumi yutuktinian nayaimpinmaya akupturmaji. Tura ejemamar warasarmí tusa yurumak nerektinniasha súramji” tímiayi.

18 Túrasha Pápruka tímianu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

19 Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajai tukurarmiayi. Tura jakayi tiar péprunmaya japiki júkiar arant áepsarmiayi.

20 Túrasha Yus-shuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawarar Papru Pirnapíjjai Tirpi péprunam wearmiayi.

21 Tírpinium pujusar uwempratin chichaman etserkarmatai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi.

22 Waketainiak “ashí Yus tana nu tímiatrusrumek tuke umirkatarum” tuíniak Yus-shuaran ikiakárarmiayi. Tura nin tiarmiayi, “Yusa akupeamuriin pachiinkiatat takurkia ti wáitsatniuitji.”

23 Tura Yus-shuar írunmanum Yus-shuaran wáinniun anaikiarmiayi. Yurumtsuk Yúsan áujsar chicharainiak, “umirkarumna nú Yus iirmasarti” tiar ikiukiarmiayi.

Yaunchu jínkiarmia nú Antiukíanam waketkiarmiayi

24 Nuyá Pisitia nunċkanam nanċkaamakiar Pampiria nunċkanam jeawarmiayi.

²⁵ Nui jeawar Pirji péprunam Yus-Chichaman etserkar nuyá Ataria péprunam wearmi-ayi.

²⁶ Nui kanunam enkemprar, yaunchu jíinkiarmla nú Antiukía péprunam waketkiarmi-ayi. Páprusha Pirnapísha tuke jíintsajin nú Antiukíanmayá Yus-shuar chichainiak, Yusa takatři túrattarmena nuna Yus waitnentramak yáinmakarti, tiar akupkarmiayi nuikⁱ.

²⁷ Nú Antiukíanam jeawar, Yus-shuaran irurar, ashí Yus nin yáinkiarmla nuna ujakarmiayi. Tura nútiksaj Israel-shuarchan Uunt Yus uwentikrataj tusa untsukmla nunasha ujakarmiayi.

²⁸ Tura nuyá Yus-shuarjaj Papru Pirnapíjjaj núkap tsawant pujusarmiayi.

15

Jerusarénum Yus-shuara úuntrijaj iruntrarmiana nu

¹ Nu tsawantin áishman Israel nunkanmayá wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprash-tatrumé” tiarmiayi.

² Tuma asamtai Papru Pirnapíjjaj, núchaiti tusar, nú áishmanjaj ti kakaram chichar-naikarmiayi. Túrasha nuu enentáiniak enentáimsatniun tujinkiarmla. Tuma asamtai Antiukíanmayá Yus-shuar Páprun Pirnapíncha, atumsha chíkich áentsjaj Jerusarénum wétarum tusar akupkarmiayi. “Tura nuí Jesusa akatramurísha Yus-shuaran wáinniusha iniasrum iturmainkit tusarum pénger nekaatarum” tiarmiayi.

³ Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israel-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

⁴ Tura Páprusha Pirnapísha Jerusarénum jeawarmatai Jesusa akatramurísha Yus-shuara wáinniurísha tura penké Yus-shuarsha itiwarmiayi. Tura niisha túrunamia nuna mash etserkarmiayi.

⁵ Túrasha Pariséu aencha, Yus-shuar ajasarmiana nu, wajakiar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israel-shuarchasha umirkatin áiniawai” tiarmiayi.

⁶ Nuyasha Jesusa akatramurísha Yus-shuaran wáinniusha nu chichaman nekaatai tusar iruntrarmiayi.

⁷ Chichasua umikiarmatai Pítur wajaki tímiayi, “Yatsurtiram, Yus nuik winia chichar-tak “Israel-shuarchasha winia chichamprun antukar umikiarat ujakarta” tu anaitiukmla nu nékarme.

⁸ Tura Yus Nínki ashí aentsu enentáin neka asa, Wíi shuar ajasmin áiniawai tusa, ni Wakanin Israel-shuarchan susamiayi, in suramsamaj nútiksaj.

⁹ Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáiyaj ni tunaarın japirarmaj, tímiayi.

¹⁰⁻¹¹ Tura iikia nékaji niya áantsarik Jesukrístu waitnenkartutairíjjaj uwempraitji. Nuinkia çurukamtia Yus uwempraru áiniawai tajsha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsajchakait. Warí, ii úuntrísha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israel-shuarchasha áentskatin wakerarum?” tímiayi Pítur.

¹² Pítur nuna tutai Pirnapísha Páprusha chichainiak, “Israel-shuarchasha ni kakarmarın nekaawarat tusa aentsti túrachminian túratniun Yuska ti yáinmakmaji” tú ujuam mitiat wáinkiar antúu pujuarmiayi.

¹³ Nuna ujasua amikmatai, Jakupusha tímiayi “Yatsurú, antuktarum.

¹⁴ Nuik túrachman Yus túramia nuna ii yachi Semun Pítur ujatmakji. Júiti: Yuska Israel-shuarcha waitnentak Winia ajasarat tusa chikishtarchiniak achikiuítí” tímiayi.

15 Jusha Yúsnan etserin yaunchu áarmia nu tímiatrusan túrunayi. Júiti aarma:

16 “Israer-aents meserar, jea sáanakniua áintsan áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai.

17 Ashí nunkanmaya aents, Israer-shuarcha ainia nu, winia náarun pachinia nu, Winia eakkarat tusan túrattajai.

18 Uunt Yus nuna yaunchu ujakmiayi.”

Tu áarmaiti’ tímiayi.

19 ‘Tuma asamtai, yatsurtiram, wi tájarme: Israer-shuarcha Yus-shuar ajasaru áiniana nu, imiatik awajsachmi.

20-21 Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarin jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umarairap.” Tu áatratai’ tímiayi Jakupu.

22 Nuyá Jesusa akatramurisha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiaí wéakui, shuar niijiaí nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar árimiayi.

23 Tura niijiaí ju papin áarman akupkarmiayi:

“Iisha Jesusa akatramuri tura Yus-shuara wainniuri tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji.

24 Juyá aents ii chichamejainchu atumiin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itiurkatjik” tárume.

25 Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachi Páprujai Pirnapíjiaísha atumin írmasarat tusar akupeaji.

26 Papru tura Pirnapísha ii Uuntri Jesukrístunam surumakarmiayi, ni takatrishu tsuumai ain túrami tusar.

27 Niijiaí Jútassha tura Sérassha akupeaji. Ii chichaaania nuna niisha ni wenejai atumin ujatmakartatui.

28-29 Kame túratin asamtai iisha Yusa Wakaníjiaí ju áartin enentáimsaji. Naman ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chíkichia nú nankaamas tíhattaji. Tura antsu nu iniaisarmeka, pénger áatrume. Ayu, Yus wáitmakarti.” Tu áarman akupkarmiayi.

30 Tura Antiukíanam akupkam wearmiayi. Nui jeawar Yus-shuaran irurar, papin súsarmiayi.

31 Tura Antiukíanmaya Yus-shuarsha nu papin áujсар, pénger jintíamu chichaman áarman wáinkiar, ti shiir enentáimsarmiayi.

32 Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi.

33 Tura nui ishichik tsawant pujusarmatai, Yus-shuarka, pénger waketkitiarum, tiar akupkarmiayi.

34 Tura Séras juáktinian wakerukmiayi.

35 Páprusha Pirnapíjiaí juakarmiayi Antiukíanam. Niisha chíkich aentsjai Yus-Chichaman étseruk pujuarmiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nuí Yusaj̄ ii yach̄i ainia nusha urukák pujuinia iyutai” tímiayi.

³⁷ Pirnapíkia Juan Márkusan iij̄ij̄ai winiti tusa wakerimiayi.

³⁸ Tura Pampiria nunkanam Juan Márkussa niisháa weu asamtai tura Yusa takatr̄in iniaisa asamtai, Pápruka ayatniun nakitramiayi.

³⁹ Papru Pirnapíj̄ij̄ai ti kakannairar kanakarmiayi. Tura Pirnapíkia Márkusan ayaki Chípriniam wémiayi.

⁴⁰ Pápruka Sérasan ayaki wéakui Yús-shuar Yus yáinmakarti tinia akupkarmiayi.

⁴¹ Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

16*Páprusha Sérasaj̄i Timiutéun júkiarmiania nu*

¹ Papru Sérasaj̄i Tirpi pepru ír̄ikutak Ristra péprunam jeawarmiayi. Tura nuí Rístranam Yus-shuaran wáinkarmiayi, ni naar̄i Timiutéu. Ni nukur̄ín̄kia Israer-shuar Yus-shuarauyayi. Tura ni apar̄ín̄kia Kriaku áentsuyayi.

² Tura Ristra péprunmayā Ikiuniu péprunmayasha Yus-shuar ármia nu, Timiutéu péñker wekaawai, tiarmiayi.

³ Kame Pápruka Timiutéun uyuuntusat tusa wakera asa, Timiutéu apar̄i Kriaku-apachin nekaawarmatai Israer-shuar nuí pujuarmia nu yajauch enentáimprar̄in̄ tusa tsupirmamtikiamiayi.

⁴ Tura nuyá Papru Timiutéuj̄ai ashí péprunam nuí sétur nuí sétur wéenak Jesusa akatramurisha Yus-shuaran wáinniusha Jerusar̄éñnum nuik jintintian umiktarum tusa ujarkutak wearmiayi.

⁵ Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawen̄ki wearmiayi.

Papru iimiarmia nu

⁶ Tura Yusa Wakan̄kia Páprun Yus-Chichaman Asia nunkanam ujaktinian tsan̄katkachmiayi. Tuma asamtai Pirijia nunkanam tura Karasea nunkanam āirkutak,

⁷ Misia nunka jeatniunam jeawarmiayi. Túrunawar “Pitinia nunkanam wetai” tiarmiayi. Túrasha Yusa Wakan̄ nuisha wétinian suritkiarmiayi.

⁸ Tuma asamtai Misia nunkanam menantki Truas péprunam pachiniawarmiayi.

⁹ Nuí jeawar Papru kash̄i iimiarmiayi. Masetúnia nunkanmayā áishman̄kan wajan wáinmiayi. Nu áishman̄ Páprun chicharuk “Winitritia. Yáin̄tkiamnium” tímiayi.

¹⁰ Nuyañka tu iimiarmatai, wisha Pápruj̄ai wetai tusar iwiarnarmiaji. Tura Yus incha nú nunkanam ni chichamē etserkat tusa ti nekas untsurmakrin wéaji, tímiaji.

Jiripius Péprunam túrunamia nu

¹¹ Tura nuyañka kanunam en̄kemprar Truas péprunmayā jíinkir Samutrásia nunkanam jeamiaji. Tura kashin tsawar nuyañka kat̄iarar Niápuris péprunam jeamiaji.

¹² Tura Niápurisnumiã náwek Jiripiusnum jeamiaji. Nuí Jiripius péprunmanka Rúmanmayā aents matsamsa ármiaji. Tura nú péprusha Masetúnia nunkanam nekas uunt pepuyayi. Tura nuisha seturmaji.

¹³ Nuyá sáwartin tsawarmatai pepru ikiukir entsá supichik wémiayi. Yus áuj̄satniun iruntrarmia nuí pujasar, nuw̄a iruntrarmia nu Yus-Chicham ujakarmiayi.

¹⁴ Nuí Tiatira péprunmayā nuw̄a, ni naar̄i Ritia wáinkiamiayi. Niisha tarach yamakain péñkeran súriniuyayi. Yúsnasha shiir awajniuyayi. Yus-Chichaman Papru etserkamia nuna niisha péñker anturkamiayi. Túman, Uunt Yus Papru chichaamun umirkat tusa ni enentáin takasmiayi.

15 Túruna nú nuwá níniurijjiaí imianmiayi. Tura nuyasha chichaak “Yus-shuar nekas ajasai túrutkurmeka winia jearuí winitiarum” tímiayi. Tura nuí jeawakrin setumtikram-pramiaji.

16 Tura nuyá ukunam Yus aujsatai tusar wekaamar nuwach nekaamin-iwianch enkemtuamu inkiunmakmiaji. Nu nuwachikia misatkauyayi. Niisha nékamkui nérenniurisha ti kuitriniawarmiaji.

17 Tura nú nuwach incha Pápruncha pataaturmamiaji. Tura kakantar untsumuk “Ju áishmansha nekas Uunt Yúsan umirkaru áiniawai. Tuma asa niisha atumin uwempratin chichaman ujatmarme” tímiayi.

18 Tura nú nuwachisha ti núkap tsawant tu wekaimiaji. Titmakui, Papru ayanmar iwianchin chicharuk “Jesukristu naarijjiaí tájame: jíinkitiá ni enentáiya” tímiayi. Tutai íwianchkia nú chichamaik jíinkimiaji.

19 Tura nuwachi nérenniurisha, íwianch jíiki awematniun nekaawar, Páprun Sérasnasha kajerak achikiar pepu uuntri ísarat tusar ajapén júkiarmiaji.

20 Tura pepu úuntriin ejeniar tiarmiaji “Ju áishman Israer-shuar áiniawai. Tura in páchim enentáimtikramainiaji.

21 Tura iisha Rúmanmayá aents árin, ii túrachminian, iikia asumprachman jintintra-mainiaji” tiarmiaji.

22 Tura nuyanka ashí aents Páprun Sérasnasha kajerkarmiaji. Túramtai pepu uuntri chichainiak “Pushirií áitkiarum numijjiaí asutiátarum” tiarmiaji.

23 Tura nuyá ti asutsua amikiar sepunam enkeawarmiaji. Tura sepú-iinian chicharuk “Ti péñker iistá pisararain” tiarmiaji.

24 Nu chichaman antuk, sepú-iin ti init awayámiayi, tura nawen numi najanamujají tee chanuntamiayi. Tú tura ikiukmiayi.

25 Tura kashi ajapén Papru Sérasjají Yusan áujainiak kantampriarmiaji. Tura chíkich enkeamusha nuna antúu pujuarmiaji.

26 Tu pujuiniaí aya aneachma ti kakantar uurkamiaji. Tura sepusha muchitramiaji. Túrunamtai sepú wáitirisha ashí urantrarmiaji. Tura aents jirujají enkekar jíinkiamusha mash atiniakarmiaji.

27 Túrunamtai sepú-iin shintiarmiaji. Tura wáitisha mash uranar aan wáiniak, enkeamusha jíiniar shiákchariash tusa ni puniariniak ukuiniak máamattsa pujumiayi.

28 Tura Papru untsuak “Amek yajauch awajmamsaip. Ashí pujuiniaji” tímiayi.

29 Tutai sepú-iincha jinia ekeemak tsékenki wayamiayi. Tura Papru Sérasjají pujamunam kuranki jearmiayi.

30 Tura aa jíiki aniasmiayi “Uunta, ¿warí itiurkattaj uwemprataj tusana?” tímiayi.

31 Tutai niisha tiarmiaji “Uunt Jesukristu nekas enentáimtustá. Túrakmeka amesha, tura áminiurmesha uwemprattarme” tiarmiaji.

32 Tura nuyá ashí ni jeen pujuarmia nunasha Yus-Chichaman ujakarmiaji.

33 Tura tsawant irankají sepú-iincha Páprun Sérasjají numpamnamurín níjjararmiaji. Túramtai nuyasha sepú-iincha nuarijjiaí uchirijjiaí imianarmiaji.

34 Túramtai nuyasha ni jeen júkiarmiaji. Tura nuísha ayurawarmiaji. Tura sepú-iincha níniurijjiaí Yus-shuar ajasu ásar ti shiir warasarmiaji.

35 Kashin tsawar pepu uuntri, Páprun Sérasjají akupkata tusar suntaran sepú-iinian akuptukarmiaji.

36 Tura nuyanka sepú-iin Páprun tímiayi “Yamaikia pepu uuntri chichaman akupturmakai, átum wétinian. Tuma asantai yamaikia péñkerak jíinkitiarum” tímiayi.

37 Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar íimiainiaín asutiámamji. Túrawar sepunam enketmamji. Tura ¿urukamtai yamaikia uuik akuptamkataj tusa wakeruinia? Atsá. Antsu uuntcha niniki taar jíirmaktiai” tímiayi.

³⁸ Tutai suntarsha waketkiar nuna ujakarmiayi pepru úuntriñ. Tutai niisha ti ashamkarmiayi Ruma aentsun nekaawar.

³⁹ Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmaya jíikiar “Yamaikia wáitneasrum wetarum” tiarmiayi.

⁴⁰ Papru Sérasjai nuyá jíinkiar Ritia jeen wearmiayi. Tura Yus-shuaran ikiakárar ikiukiarmiayi.

17

Tisarúnikianam charaatum ajarmia nu

¹ Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nui Israer-shuara iruntai jeé ámiayi.

² Tura Pápruka nuna tuke túrin asa nu jeanam wémiayi. Tura nuisha menaintiu sáwartin Yus-Chichaman paant etsermiayi.

³ Tura Páprusha Yus-Chicham tana tímatrusañ jintintiarmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarme” tímiayi Papru.

⁴ Nuna takui Israer-aents chikishtarchik umikiarmiayi. Túrawar Paprujai Sérasjaisha tsaniñkiarmiayi. Tura Kriaku aencha ti untsurí Yúsan umirkarmiayi. Tura nuwa penkeri armia nusha nútiksarañ umikiarmiayi.

⁵ Tura Israer-shuarka Yus-shuar ajascharmia nu, Páprun Sérasnasha suiir ísarmiayi. Túrawar chíkich yajauch áishman naki yujáu armia nujai chichasar nu peprunam charáa charáa ajarmiayi. Tura Páprun Sérasnasha achikiar aentsu úuntriñ suruktai tusar Jasunka jeen árenkarmiayi.

⁶ Túrasha Páprun Sérasnasha awetrar, Jasunkan tura chíkich Yus-shuarnasha achikiar japirkutak júkiarmiayi. Tura pepru úuntriñ juñiak tiarmiayi “Ju áishmansha ashí nunkanam charaatum ajá wekarmia nu yamaikia tímiajai tarutramarji.

⁷ Tura ju Jasun ni jeen itiaarmiayi. Tura niisha ashí mash Rúmanmaya uunt akupniu chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi.

⁸ Nu chichaman antukar, aents nuí pujuarmia nu, úuntriñmiak charaatum ajarmiayi.

⁹ Tura Jasun chíkich Yus-shuarjai Papru nekas awemattaji tusar, paij, kuit ikiuaji, tiarmiayi. Nuna takui pepru uuntriñ nin akupkarmiayi.

Piríanam

¹⁰ Nuiñkia nú kashi Yus-shuar Páprun Sérasnasha Piría péprunam akupkarmiayi. Tura nuí jeawar Israer-shuar iruntai jeenam wearmiayi.

¹¹ Piríanmaya aentska Tisarúnikianmaya áentsjaiñkia nankaamas péñker enentáimkia ármiayi. Tuke enentáijjai Yus-Chichaman ántiarmiayi. Túrawar tuke tsawant imia niñkisha Papru tana nuna nekasashit tusar Yusa papirin ii wearmiayi.

¹² Tuma ásar untsurí shuar Yus-shuar ajasarmiayi. Tura Kriaku aents nuwa penkeri armia nusha áishmansha umikiarmiayi.

¹³ Túrasha Tisarúnikianmaya Israer-shuarka Papru Yus-Chichaman Piría péprunam étserun antukar nuí weriar charaatum awajiarmiayi.

¹⁴ Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujai nuin Piríanam juakarmiayi.

¹⁵ Tura Páprun nemariarmia nu Atenas péprunam nin ejeyarmiayi. Tura niisha wake-tainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

16 Tura Papru Atenas péprunam pujus Sérasnasha Timiutéuncha nákamiayi. Nui nú péprunam ántar-yus ti írunkui Páprusha kúntuts enentáimmiayi.

17 Tuma asa Israer-shuar iruntai jeanam Israer-shuarjai tura chíkich aents Yúsan enentáimtiarmia nujai chichasmiayi. Tura tuke tsawant pepru ajapén aentsjai inkiunaikiar chichasarmiayi.

18 Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamurin tura aents jakamunmaya nantaktinian étserkui nuna tiarmiayi.

19 Nuyanka aents iruntainiam, naari Ariupaku támanum Páprun júkiarmiayi. Nuisha tuke irunin ármiai. Nui Páprun aniasarmiayi “Tisha ame yamaram támena nu nekaatai tusar wakeraji, tiarmiayi.

20 Amesha nushaa chicham jintiniaitme. Túmaitkiui ju chichamsha warintiuak tusar nekaatai tusar wakeraji” tiarmiayi.

21 (Atenasnumia aencha tura chíkich nunkanmaya shuar nui pujuarmia nusha aya yamaram chicham amia nunak ántiarmiayi. Tura aya nunak áujmatiararmiayi.)

22 Nuyanka Papru Ariupakunam ajapén wajaki tímiayi “Atenasnumia áishmanṭiram, wi nékajai, atumsha atumi yusrí ainia nuyá tsurakchamniaitrome, tímiayi.

23 Kame wi nuik atumí yusrí enentáimtutainiam ístaj tukaman nui jeachin iwiamun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrum tikishmatrumna nuna ujaktajrume’ tímai.

24 ‘Nekaatarum, nu Uunt Yuska ashí nunkan tura nui írunka nuna najanaiti. Tura Niisha nayaimpin nunkancha nérenniurinti. Tura aents najanamu jeanam nú Yuska pujuchuiti.

25 Niisha aents yáinkiat tusa atsumatsui. Warí, imia-ninṭi Niisha ii iwiaakmarin, ii mayattairincha tura ashí írunka nunasha súramtsujik, tímiayi.

26 Nekaatarum. Nuu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantrin nekapmaiti; ii pujustinniasha nútiksān nakakmiayi.

27 Winia eátkar wáitkiarat tusa Yus nuna túrayi. Túrasha Yus jeashtaka pujurtamtsuji, tímiayi.

28 Jes, iisha Yusjai iwiaakji. Yusjai muchitiaji. Tura Yusjai ii kakarmari takakji. Nútiksān atumí papí-aintri tíchamka “Ashí incha Yus najatmaitji.”

29 Tura iisha Yus najatma asakrin kuri najanamusha, yúsaiti, tu enentáimsashtiniaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniaitji, tímiayi.

30 Aents Yúsan nékainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk “Tunaaruminiā enentáimpratarum” túramji, tímiayi.

31 Yuska áishmanṭan anaikiaiti. Nú áishmanṭ ashí aentsti, yáki pénkeran túriniait, yáki yajauchin túriniait núnaka nekarmattaji. Nú áishmanṭ Yus akupkamun tuke enentáimtakui Yus nin anaikiaiti. Tura tsawant nú túrunatin átatna nuna Yus Ninṭi achikiuiti. Túrasha nekas anaikajai tusa, tura ashí áentstiram nekaatarum tusa nú áishmanṭan jakamunmaya iniantkimiayi” tímiayi Papru.

32 Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi.

33 Tutai Papru iniaisamiayi.

³⁴ Tura chíkich aentska Papru táman umikiar nin nemarsarmiayi. Nuisha Tiuníseu páchitkiauyayi. Niisha Ariupaku áentsuyayi. Tura nuyasha nuwa, ni naari Tamaris, tura chíkich aencha nútiksaraṅ nemariarmiayi Páprun.

18

Kurintiu péprunam

¹ Nuyanka Papru Atenas péprun ikiuki Kurintiu péprunam wémiayi.

² Tura nuḡ Israer-shuaran ni naari Akiran wáinkiamiayi. Akiraka Puntu nunkanam akiiniauyayi. Tura ukunam Itiaria nunkanam pujai uunt akupin Krautiu ashí Israer-shuaran Ruma péprunmaya awemarmiayi. Rúmaka Itiaria nunkanmaiti. Nuḡ awemamu ásar Akira Kurintiunam nuik támiayi nuwe Pirisírajai. Tura Pápruka Akiran chichastaj tusa werimiayi.

³ Akirasha Páprusha mai juna takau ármiai, tarach ti núparman jea najantain najanin ármiai. Tuma asamtai Papru Akirai seturmiayi nu takat túrawartai tusa.

⁴ Tura tuke sáwartin Papru Israer-shuar iruntai jean wéuyayi. Nuisha Israer-aentsun Kriaku-aentsnasha nútiksaraṅ Yus-Chichaman ujakar enentáimtikrarmiayi.

⁵ Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman étseruk “Yusa anaikiamuri Kristu, atum nákarmenta nu Jesusaiti” tímiayi.

⁶ Tura támaitiat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuinkia ikiuajrume tusa, ni pushirin pear tímiayi “Atumek makuumarme. Tura wikia Yusai makuumatsjai. Yamaikia Israer-shuaracha ainia nuna Yus-Chichaman ujakartaj tusan werajai” tímiayi.

⁷ Tura nuyanka Israer-shuar iruntai jeanmaya jiinki, Yúsan enentáimtin áishmaṅ Justu jeen wémiayi. Ni jeenka Israer-shuara iruntai jeen ayamach pujumiayi.

⁸ Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuarjijai uchirijijajisha Yúsan umirkamiayi. Tura chíkich aencha Kurintiunmaya armia nu nútiksaraṅ Yus-Chichaman antukar, Jesusan enentáimtusar imianiarmiayi.

⁹⁻¹⁰ Nuyá Uunt Yus Páprun mesekran ipiatkamiayi. Chicharuk “Peṅké ímiatik awaj-tamsachartatui Wi ámijiai pujakui. Ju péprunmasha untsurí aents Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

¹¹ Tura nuḡ Kurintiu peprunam jimiará uwí ejesattuk Yus-Chichaman étseruk pujumiayi.

¹² Tura Kariun, Akaya nunka akupniuri anaikiamu ai, Israer-aents Páprun kakerkarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi.

¹³ Tu túrawar akupniun chicharainiak “Ju áishmaṅ Yúsan umirkatniun Muisais akupkamia núnaka íkias ausháa jintíawai” tiarmiayi.

¹⁴ Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuinkia, tura akupniun umirchakuinkia, tárugna nuna anturkaintjarne.

¹⁵ Túrasha aya chichamnak tura aya náariniak atumí uuntri akupkamia nunak tau asamtai, atumek nuámtak ístarum tájarne. Wikia nu chichamnum pachinkiatniun nakitiajai” tímiayi.

¹⁶ Taku aa jíkmiayi.

¹⁷ Tura nuyanka Kriaku aents Israer-shuar iruntai jea úuntrin Sústinisian achikiar awatiarmiayi akupniusha ímmianumaṅ. Túrasha akupin Kariunka túranak peṅké pachischamiayi.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸ Tura ni jeen waketkiarmatai, Papru nu péprunam untsurí tsawant pujusmiayi. Tura nuyasha ukunam Yusai yachi ármiania nuna áujas ikiuak Pirisírajai ni aishri

Akirajaj Senkrea péprunam wearmiayi. Nuí Israer-shuar túrutain umíak Papru ni intiashin awampramiayi, nuik Yúsan tímiaj nuna yamá umíajai tusa. Nuin_̄kia kanunam en_̄kemprarmiayi Siria nun_̄kanam waketkitiai tusar.

¹⁹ Tura nuyá Ipisiu péprunam jeawar Pápruka Pirisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujaj chichasmiayi.

²⁰ Tura niisha Páprun juin_̄ pujustá tusar seawarmiayi. Túrasha támaitiat, tujintiajai, tímiayi.

²¹ Nuyanka áujas ikiuak “Wisha Jerusarénum námper átatna nuna pachiintiuktini-aitjai. Tura Yus akuptakuin_̄kia atak tatajai atumin ístaj tusan” tímiayi. Tura kanunam en_̄kemar Ipisiunmaya jíinkimiayi.

²² Nuyá Pápruka Sesaria péprunam jeá, nuyanka Jerusarénum wémiayi, Yus-shuaran nuí áujataj tusa. Tura nuyá Antiukíanam wémiayi.

²³ Tura Antiukíanam ishichik pujus ataksha weak Karasea nun_̄kanam tura Piri-jia nun_̄kanmaani wekaráktak wémiayi. Tura weak Yus-shuar matsamarmia nuna chicharak ikiakáarmiayi.

²⁴ Tumáa pujaj Arijiántria péprunmaya Israer-aents Apurus Ipisiu péprunam jeamiayi. Niisha Yusa yaunchu papirin ti pé_̄nker nekaamiayi. Etserkatniuncha ti nékauyayi.

²⁵ Uunt Yus tímia nunasha unuimiátrauyayi. Tura tuke enentáijjaj chichasmiayi. Jesusa túramurin pé_̄nker jintinniuyayi. Túrasha aya Juan imiakratmanak nekaamiayi.

²⁶ Ju Apurus arantutsuk Israer-shuar iruntai jeanam chichamiayi. Tura Pirisíra Akirajaj ni étserman anturkar, nincha akanki júkiar Yusa chichamen ni nekaachmia nuna núkap jintintrarmiayi.

²⁷ Nuyá ukunam Apurus, Akaya nun_̄kanam wétaj takui, Ipisiunmaya Yus-shuar yáin_̄kiar papí áarar atakas akupkarmiayi. Nú áentsnum pé_̄nkerak jeat tusar túrawarmiayi. Tura Akayanam jeá, nú áentsun Yusa waitnenkratairijjaj uwempraru ármia nuna ti yáin_̄kiarmiayi.

²⁸ Tura Apurus Israer-aentsjaj paant chichasmiayi. Túrasha Yusa Papirijjaj, Jesussha nekas Yusa anaikiamurinti tusa paant jintiak nincha nupetkamiayi.

19

Papru Ipisiunam jeamiayi

¹ Tura Apuruska Kurintiunam pujaj Pápruka náinniumaani wekaráktak, Ipisiunam jeamiayi. Tura nuísha Yus-shuaran wáinkiamiayi.

² Tura aniasmiayi “Atumsha Yus-shuar ajasmarmena nuí, ¿Yusa Wakaní atumí enentáin en_̄kemturmakaitrum?”

Tutai niisha tiarmiayi “Atsá. Iikia nuka pen_̄ke áyatkisha ántichuitji Yusa Wakaní awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarme imianmiarum?” tímiayi.

Tutai niisha tiarmiayi “Juan jintintramamaj nu iisha enentáimsar imianmiaji” tiarmiayi.

⁴ Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukuruí winittiana nu nekas enentáimtustarum. Niisha Jesus Yusa anaikiamurinti, tu ujatmakchamka” tímiayi Papru.

⁵ Nuna antukar niisha Uunt Jesusa náarin enentáimtusar ataksháa imianiarmiayi.

⁶ Tura Papru ni uwejejaj nin anti_̄nmatai Yusa Wakaní tarurarmiayi. Túram chíkich chichamjaj chichasarmiayi. Túrunawar Yus-Chichaman etseriarmiayi.

⁷ Nusha tuse (12) áishman ármiai.

8 Tura nuisha menaintiu nantutin Papru Israer-shuar iruntai jeanam werí Yusa akupeamurin pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi.

9 Tura chíkichka ni enentáin ti ikiatsuárarmiayi. Túrunawar umiktinian penké nakitiainia ásar aents ántamunam Yusa jintin penké yajauch chicharkarmiayi. Tuma asamtai Papru Yus-shuarnaka akanki yaruak Tiranu iskuirariin tuke tsawant Yus-Chichaman ujaarmiayi.

10 Nuna túruki jimiará uwí etserkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramurin antukarmiayi.

11 Tura aentsti túrachminian túrat tusa Yuska ni kakarmarin Páprun susamiayi.

12 Jáanchniasha pushincha Papru antinman júkiar, nánkamas jaa shuaran ejetim, nú jaa shuarsha nuna antinkiar pénger ajaarmiayi. Iwianchrusha nuna antinkiar, iwianch jíinkimtai ankant ajaarmiayi.

13 Tura chíkich Israer-aents uwishin ármiai. Tura niisha chíkich chíkich péprunam wear iwianchrुकun iwianchrin jíirki akuptin ármiai. Tuma asa niisha Jesusa náaríjiaí iwianchin jíiktiaí tusar, iwianchin chichartuiniak “Nu Jesus Papru ujaana nuna náaríjiaí jíinkitiarum tájarne” tiarmiayi.

14 Tura Israer Patri uuntrí Esewia náartin, siati uchirí ármia nu, nuna túriarmiayi.

15 Túrasha Jesusa náaríjiaí jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, ¿yátsukaitrum?” tímiayi.

16 Nuna tinia iwianchrुku áishman tsékenki nú áishman kan kakaram katsumak nupetkarmiayi. Túram ti katsumam niisha misú tura numpamnawar jíinkiar pisararmiayi.

17 Nusha Ipisiu péprunam túrunamiayi. Túrunamtaí Ipisiu péprunmaya Israer-shuarsha tura Israer-shuarchasha nuna túrunamun nekaawar ti ashankarmiayi. Tura Uunt Jesusa náarin shiir awajsarmiayi.

18 Túmainiai untsurí shuar Yúsán umirkaru Yus-shuar ajatsuk tunáa túrawarmia nuna paant ujakarmiayi.

19 Tura untsurí uwishniumawarmia nu, waweokrataí papí ármia nuna itiararmiayi. Itiar, júka iniaiyaji tusar, ashí íimiainiaín áesawarmiai. Nú papí áesawarmia nuna kuítrisha senkuenta mir (50.000) nankaamasauyayi.

20 Tu túrunamtaí Uunt Yusa chichame pampanki tura nupetmaki wémiayi.

21 Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénnum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi.

22 Masetúnia wétin asa Papru ni tsaniakmarin Masetúnia nunkanam emka akupkamiayi. Timiutéun Erastujai akupkarmiayi. Tura ninkia Asia nunkanam seturmiayi.

Ipisiunam ti charaatum ámiania nu

23 Pápruka tuke Ipisiunam pujai, nuyá aents Yus-Chichaman nakitiainiak charaatum ajarmiayi.

24 Iis, nuí Ipisiunam kaya-yusa jee ámiayi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najanniuuyayi kuitjai. Tura niisha nú takatjai ti kuítrintin ajasmiai. Tura chíkich áishman nú takatan takarmia nunasha ti kuítrintin awajsarmiayi.

25 Timitriusha níijiaí takarmia nuna ikiaanak, chikichnasha níijiaí métek-taku takarmia nunasha ikiaanak níijiaí charaatum ajarmiayi. Timitriusha tímiayi “Winia írutramutiram antuktarum. Isha jú takat takaajnia jujai ti kuit achíatsjik.

26 Tura atumsha jú Papru wáintrumna nu tura ántarmena nu chichaak “Ashí aents najanam yuska ántar áiniawai” tatsuk. Nuna tau asa, júí Ipisiunam, tura arant ashí Asia

nunkanam, ni yúsrin iniaisarat tusa enentáimtikrarai. Tuma asamtai untsurí aents, ii yusrí Tiánan ikiuiniak, Papru tana nuna umirainiatsuk.

²⁷ Papru tu étserkui, iisha itiurchat pujuschattajik. Kuit ii achiaj nuka menkakashtatuak. Tura nú arantcha ii yusrí Tiana jeen shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusrí Tiana shiir awajainia nuna yapajiáwar aun nakitrachartatuak” tímiayi Timitriu.

²⁸ Nuna antukar aencha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu untsunmiarmiayi.

²⁹ Nuinkia aents páchim enentáimprarmiayi. Túmainiak Masetúnianmaya Kayuncha Aristárkuncha Páprun nemanin ármia nuna achikiar japirkutak iruntai jeanam júkiarmiayi.

³⁰ Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi.

³¹ Tura Asia nunkanmaya uuntri, Páprun amikri ásar, ainikia wayawain tusar chichaman akuptukarmiayi.

³² Túrasha irunar pujuarmia nu, páchim enentáimprar, chíchicka nusháa untsunmiarmiayi. Tura chíchicka nútiksaran ausháa untsunmiarmiayi. Tura chíchicka ti untsurí, nekaachar “wariniak irunturara” tiarmiayi.

³³ Chíchich nuí wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwejeñ takuimiayi.

³⁴ Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímia-imiatainiakua tí nukap pujursarmiayi.

³⁵ Ipisiu pepru papí-aintrisha áentsun itiatmamtik tímiayi “Ipisiu shuártiram antuktarum. Ii uunt yusrí Tiana jee ístinia íchukaitiaj¹. Tura ni nakumkamurisha nayaimpinmaya iniarmiania nusha íschatniukaitiaj¹. Tura nunasha ashí aents paant nékainiatsuk, tímiayi.

³⁶ Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi.

³⁷ Ímiatarum. Ju áishman átum itiarumna nu, ii yúsrin yajauch chicharkacharai. Tura ni jeen yajauch awajsacharai.

³⁸ Wats, Timitriu tura niijiai takainiana nu tunáa túramun ujaktai tusar wakeruiniakka pepru penkerin werishtinkiait. Nuinkia máimtek iwiainiakartí.

³⁹ Tura chíchich chicham ákuinkia penker iruntrarum iwiaratarum.

⁴⁰ Kame ju yamá túrunamun nekaawar Rúmanmaya kapitían “Ii uunt kapitíantri yajauch awajsatai tusarum túrachurmeash” turamchatjiash. Warí, niisha “¿Urukamtai charaatum ajarum?” takuisha, áimkiatin penké tujinkiattaji” tímiayi.

⁴¹ Tura papí-aint nuna tuasua amik “Áukete. Wétarum” tímiayi.

20

Papru Masetúnia nunkanam Krisia nunkanmasha wémiania nu

¹ Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi.

² Nú nunkanam wekaráktak, Yus-shuaran jintintrar ikiakárarmiayi. Tura nuyasha Krisia nunkanam jeamiayi.

³ Nuí menaintiu nántuk pujusmiayi. Tura nuyanka kanujai Siria nunkanam wétasa pujus Israer-shuar chícham jurusman anturmamak “antsu nunkan Masetúnianmaani wetajai” tímiayi.

⁴Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpínmaya Kayusha Timiutéusha Asianmaya Tíkikiusha, Trújimiusha ashí nu shuar Jiripius peprunam Páprun atampriarmiayi.

⁵Túrawar niisha emki wear Trúas péprunam jeawarmiayi.

⁶Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyañkarmiaji Trúasnum. Tura nuisha siati tsawant pujusarmiaji.

Trúas péprunam túrunamia nu

⁷Tura tumiñtin kíarai Jesukrístu enentáimtusar yurumátai tusar iruntrarmiaji. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén ejemiayi.

⁸Tura yakí menaintiu pátaranam, tesaamu ámia nuí iruntrarmiaji. Nuisha ji eke-marma untsurí irunmiayi.

⁹Tura nuisha natsa Eutikiu, áañkamunam ayamas pujusmiayi. Tura Papru ti esaram chichaakui nu nátsasha karí pujumiayi. Tumáa pujus kanaki yakí pátanmaya akaiki iniaamiayi. Tura penké jakan júsarmiayi.

¹⁰Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi.

¹¹Nuyá ataksha Papru wakamiayi. Tura tañtan puukar yurumáwarmatai, tuke chichaa-chichaakua tsawantmarmiayi Papru.

¹²Eutikiuncha iwiaakun ni jeen júkiarmiayi. Tura ashí aents shiir enentáimsarmiayi.

Miritiunam wearmiayi

¹³Wats, Papru Asun péprunam nunkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asunnum.

¹⁴Nuí Asunnum inkiunaikiar, Páprusha kanunam enkemprantai, Mitiríniniam jeamji.

¹⁵Tura nuyá jíinkir, kashin tsawarar Sámus péprunam jeamji. Tura nuyanka Trujiriu-nam jear ayampramji. Nuyasha kashin tsawarar Miritiunam jeamji.

¹⁶Pápruka Jerusarénum wari wétajtsa wakerimiayi, pintikiustís naartin jístatin pachinkiatat tusa. Tuma asamtai, Asia nunkanam ti núkap pujustinian nakitiak “Ipisiunam wéhattajai” tímai.

Papru Ipisiunmaya úuntrin áujsamiania nu

¹⁷Túrasha Papru tuke Miritiunam pujus, Ipisiunmaya Yus-shuara úuntrin winitiarum tusa untsukarmiayi.

¹⁸Ni taarmatai Papru tímiayi “Atumsha wi Asia nunkanam pujusan itiura túraj nu nékarme.

¹⁹Atumjai tuke tsawant pujumaj nuí, nankaamantuchu enentáimtumasan, úutchim winia Úuntrun takatrin takasmiajai. Tura Israer-shuar yajauch awajtustinian wakerutainiajn tuke takasmiajai.

²⁰Ashí péñker ana nu nekaatarum tusan mijiatrutsuk jintintiamjarme. Iruntrarmena nuí tura añkant añkant atumí jeen pujumarmena nuisha Yus-Chichaman ujakmajrume, tímiayi.

²¹Tura Israer-shuarnasha Israer-shuarchancha nútiksanak, enentai yapajjárurum Uunt Jesukrístu umirkatarum, tímiajrume.

²²Tura yamáí Jerusarénum wéajai, Yusa Wakaní túrutkui. Nuisha túrunatana nunasha nekamatsuk wéajai.

²³Tura Yusa Wakaní iniakturkui juna nékajai, ashí pepru wi jeattajna nuí enketátai tusar nákarainiawai. Tura ti wáitsatniun nekapsattajai.

²⁴ Kame wikia jákashtajash. Túrasha warí winia itiurtawa. Wikia Yusa jintiin warasan wekasataj tusan wakerajai. Yusaj wea-wéakuan jáakun iniaisataj tajai. Tura nuyá takatan Uunt Jesus surusmia nuna péñker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

²⁵ ‘Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatrume.

²⁶⁻²⁷ Nekaatarum, ashí Yusa wakeramurín wisha penké úurtsuk ujakjarme. Tuma asamtai atumin títiatsan wakerajrume, chikichík shuara wakaní jinium wéakuisha wikia penké makuumashtatjai.

²⁸ Tuma asamtai emka atumek ímiastarum. Túrarum nuyá chíkich Yus-shuar ístarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait.

²⁹ Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan.

³⁰ Túrasha nemartusarat tusar wakeruiniak atumjinian wait chichaman unuikiartin wantinkiertatui.

³¹ Tuma asamtai yatsurtiram, aneartarum. Wisha menaintiú uwitin tsawajsha káshisha úutchim ankant ankant unuiniamajrumna nu kajinmatkiirap’ tímiayi.

³² ‘Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuarar kakaram wekasatniun yainmakarti. Kame nú chicham atumj enentáin pujakuí, Yus ni shuarin matsamsatniun anajmatramia nuj pachiinkiatarme.

³³ Wats, wisha chikichík shuara kuítrín wariríncha wakerutkachuitjai.

³⁴ Antsu winia uwejrujai takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme.

³⁵ Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáimsami. “Achiana nujainkia nankaamas, súana nuka shiir waraawai” tíchamka” tímiayi.

³⁶ Nuna tuasua amik Papru tikishmarmiyai. Tura ashí niijjai iruntrarmia nú shuar Yúsan áujsarmiyai.

³⁷⁻³⁸ Tura Papru nuik chichaak “Atakka wáitkiashtatrume” tiniu asamtai, ti kúntuts pujuiniak, úutchim Páprun miniaksarmiyai. Túrawar kanunam ejeniarmiyai.

21

Papru Jerusarénum wémiania nu

¹ Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji.

² Tura nuj Pataranam pujusar, chíkich kanu Pinisia péprunam wea wáinkiamji. Túmakui nuj enkemprar wémaji.

³ Nu wésar Chipri nunakaka wáinkiamji. Chíprikia menanmaaní aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmaya jíinkir péprunam wayamji.

⁴ Nu Yus-shuar wáinkiar nuin siati tsawant pujusmaji. Tura Yus-shuaran Yusa Wakaní ujakam Páprun chicharainiak “Jerusarénumka wéchatniuitme” tiarmiayi.

⁵ Tura siati tsawant nankaasmatai jíinkimji. Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jear tikishmarar Yus áujsamji.

⁶ Tura nu amikiar nuinkia áujnaisar ikiukiarmaji. Tura iikia kanunam enkemprakrin ninikia ni jeen wakеткиarmiyai.

⁷ Iisha Tirunmaya entsak wea-wéakuar Turumáitianam nuin jíntramji. Tura nu jearsha Yusai yachi ármia nu chichasar nuin chikichkí tsawant pujusmaji.

⁸ Kashin tsawarar nuyá jínkir nunkan weri Sesaria péprunam jeamji. Nu jiripi jeen jear pujusmaji. Jiripikia Yus-Chichaman etserniuyayi. Nuik Jerusarénum siati áishmankan Yusa takatrin wáinkiarat tusar anaikiarmia nú Jiripiiti.

⁹ Jiripisha kuaru nawantrin yarumkauyayi nuatnakchan. Niisha Yusa chichamen etserin ármiai.

¹⁰ Tura iisha Jiripi jeen wárum tsawantak pujarin Jutía nunkanmaya aents Yusa etserniurj, Akapu náartin támiayi.

¹¹ Niisha taa Papru emenmamkarin achikmiayi. Tura achik niniki ni nawen tura uwejéncha jinkiamamiayi. Nuna tura tímiayi “Yusa Wakaní tawai, juna emenmamka nérenniurin Israer-aents jútikia jínkiáwar Israer-shuarchanum surukartatui, tawai” tímiayi.

¹² Iisha nu antukar Papru tímiayi “Jerusarénumka weep.” Sesarianmaya Yus-shuarsha núnisau Páprun tiarmiayi.

¹³ Tutai Papru tímiayi “¿Urukantai útkuram winia enentáiruj kúntuts awajtarum? tímiayi. Wi Jesusna asamtai Jerusarénum jínkiatainiakuisha mántuiniakuisha ashamat-sjai” tímiayi.

¹⁴ Tura iisha Papru emetatai tukamar tujinkiar “wats, nuinkia Uunt Yus wakera nu tímianak atí” tiarmaji.

¹⁵ Nu tiri iniaisar iwiarnarar Jerusarénum wémaji.

¹⁶ Chíprinmaya yaunchu Yus-shuar Manasun ni jeen Jerusarénum takakuya nuna ikiatmastinian wakerimiayi. Tuma asamtai Sesarianmaya ishichik Yus-shuar nemar-tamainiak Manasunnasha júkiarmiayi.

Papru Jakupu jeen irastajtsa wémiania nu

¹⁷ Tura iisha Jerusarénum jeawakrin, nu warasar Yus-shuar ti shiir áujtamsarmiaji.

¹⁸ Tura kashin tsawar Papru ímiak Jakupu jeen wémiaji. Nuisha Yus-shuara uuntri matsamarmiayi.

¹⁹ Páprusha áujas amik, Israer-shuarchanum ni étsermajai Yus túramia nuna yámankamtaikniumia júki chikichkimias ujakar ujakar awajsamiaji.

²⁰ Papru taman antukar “Yus ti pénerchakait” tiarmiayi. Tura Páprun ju chichaman tiarmiayi “Támena nu pénerkaiti, yatsurú, túrasha Israer-shuar timiá untsurí Yus-shuar ajasu ániayat, “ashí Muisais akupkamia nu umiktiniaitji” tuiniawai.

²¹ Nú arant yajaya aents taar, chichartamainiak “Pápruka nusháa jintintiu, turamainiawai. Israer-shuar chikich nunkanam pujuinia nuna Muisais akupkamurj umirkashtin Pápruka jintintiu, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.”

²² Wátsek, yatsuru, nuinkia iturmainkit. Ame tátintrumin aents nekaawarka ju kajertamainiak káutramkachartatuak.

²³ Wats, antsu nuinkia, ju túrata yatsuru. Ju kuaru áishman Yusan yaunchu tiarmia nuna umiktasa pujuiniawai.

²⁴ Nii júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnismek kuítinasha ni susatin ana nu amesha akikmatkarta. Niisha ashí umikiarmatai, ni intiashin awampratin áhattawak. Nu áishmanka intiashin awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui.

²⁵ Túrasha yatsuru, nekaata, Israer-shuarcha Yus-shuarka papí yaunchu akuptuk-miaji. Israer-shuarti túratin ana nu ashí mash túratarum tátsuji, tu áatramji. Tura

antsu namañken máawar ántar-yusan susamu yúashtiniaitrome, tímiayi. Tura numpasha umarchatniuitrome, kajemtikramusha yúashtiniaitrome. Tura tsanirmashtiniaitrome. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuaru áishmañkan júkiarmiayi. Tura kashin tsawarar nímiak nijiamararmiayi, Muisais timia nútiksarañ. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi.

²⁷ Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi.

²⁸ Achikiar unsumainiak “Israer-shuártiram in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nú achikji, tiarmiayi. Warí, Kriaku áentsun awayáshtinia nuna awayá nujaj yamá ju Jeencha yajauch awajturmají” tiarmiayi.

²⁹ Jes, nuik Ipsiunmaya Trúpimiu Páprujaj péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi.

³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya júkiarmiayi. Túrawar wáitíncha nú chichamaik epentrarmiayi.

³¹ Tura maatai tusar matsamtuiniáj suntara kapitiántri Jerusaréñnumiá aents ashí charaatum ajainian antukmiayi.

³² Kapitiáncha ni suntarin tura sarjentuncha irur tseke weriarmiayi aents pujuarmia nu. Aencha suntaran tura kapitiánin wáinkiar, Páprun asutíniayat iniaisarmiayi.

³³ Kapitiánka Páprun jeari achikmiayi. Tura jimiará jirujaj jínkiarmiayi. Nuyasha aniasmiayi “¿Niisha yait? ¿Warinia túrait?” tímiayi.

³⁴ Túrasha aencha untsurí chichaman unsummiarmiayi. Túmainiakui kapitiáncha penké nekaachmiayi. Tuma asamtai Páprunka suntar pujamunam júkiarmiayi.

³⁵ Tura suntar pujamunam wáitíniam jeawar Páprun entsaki júkiarmiayi aents imiá kajerainia asamtai.

³⁶ Tura aencha ukunmaan j pataakar, mantamnatí, tu unsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitiánin Kriaku chichamjaj chichaak “Wi ishichik chichasaintjame” tímiayi.

Tutai kapitián chichaak “Warí, ¿amesha Kriaku chicham chichastin nékamek? tímiayi.

³⁸ Nuínkia amesha ¿Ejiptunmaya shuárchakaitiam? ¿Nuik kuaru mir (4000) aents, mañkartin tutai atsamunam yaruakchamkam? ¿Kapitiánjaj meset najanataj tusa túrachmakum?” tímiayi.

³⁹ Tutai Papru tímiayi “Núchaitjai. Antsu wikia Israer áentsuitjai. Sirisia nunkanam uunt pepru Tarsu náartin ana nu akiiniaitjai. Tura waitneasam ju aents chichastin tsankatrukta” tímiayi.

⁴⁰ Tura kapitián, ayu, tutai, Papru watainium wajas, mitiat pujustarum tusa uwejen takuimiayi. Tura aents itiatkarmatai Israer-chichamjaj chichasmiayi.

22

Papru áentsun timia nu

¹ Papru chichaak juna tímiayi: “Yatsurtiram, tura úuntur árumna nu antuktarum. Wikia Pápruitjai. Kíishtumaktaj tusan títiatjana nu waitneasrum anturtuktarum” tímiayi.

² Tura Papru Israer chichaman chichaakui, aents nuna antukar nú nañkaamas itiatkarmiayi.

³ Nuj Papru chichaak “Wikia Israer-shuaraitjai. Tarsu pepru Sirisia nunkanam ana nuj akiiniaitjai. Túmaitiatnak juj Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentájjai wakerukuitjai.

⁴ Tura Jesusan umirkaru ármia nuna máataj tusan pataatukni wekaimiajai. Túran áishman kan nuwancha achikian sepunam enkeataj tusan túrimiajai.

⁵ Israer-patri uuntrisha Israer-shuara uuntrisha Tamaskunam íi-shuar susatá tusar papin ataktusar akuptukarmia nuna niñkia nekainiawai. Jesusan umirkarun achikia íkiaankan juj Jerusarénum asutniáwarat tusan werimjai’ tímiayi.

(Túramuri 9.1-19; 26.12-18)

⁶ “Tura wi jintiá wéai Tamaskunam jeastatuk ajasai nantu tutupin ai aya aneachma nayaimpinmaya newaat wajantruntmiayi.

⁷ Túrunam tai wisha nunká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imiá pataaturam?” turutmiayi.

⁸ Takui wi aniasmajai “¿Amesha yáitiam, Uunta?”

Tutai “Wikia Nasarénumia Jesusaitjai. Ame pataaturmena nútjai” turutmiayi.

⁹ Wijjai pujuarmia nu, newaat wajan tun wáinkiar ti ashankarmai. Túrasha niñkia túrutun antukcharmai.

¹⁰ Tura wi tímiyai “¿Nuñkia, Uunta, warí itiurkattaj?” tímiyai.

Tutai Uunt chichartak “Wajakim Tamaskunam wetá. Nuisha ame túrattamna nuna ujamkartatui” turutmiayi, tímiayi.

¹¹ Kame wikia nú newaat ajakun íisan jiru kusurmai. Tuma asam tai winia tsaniakmar enkeki jurukiar Tamaskunam ejetiarmai’ tímiayi.

¹² Papru tuke aujmatki wéawai. “Tura nuj Tamaskunam áishman Ananías pujumai. Niisha Yúsan aneak, Muisais akupkarmia nuna umirkauyi. Tura nú péprunmaya Israer-shuar ármia nu nin péñker enentáimtiarmiai.

¹³ Nú Ananías winia írsataj tusa támai. Taa turutmai “Yatsuru Sauru, péñker iimtia.” Túrutkui nú chichamaik péñker íimmiyai. Túrunan Ananíasnasha wáinkiamjai.

¹⁴ Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarinchaa nuna, ísat tusa, winia chichampruncha antukat tusa ámin yaunchu Yus anaitiamkaiti.

¹⁵ Amesha Papru, Yusna ana nu ísumna nusha antukumna nusha ashí aents ujakartatme.

¹⁶ Tuma asam tai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia” turutmai.’

¹⁷ “Tura Jerusarénum waketkin Yusa Uunt Jeen wémajai Yúsan áujsataj tusan. Nuj ímiarmajai.

¹⁸ Nuj Jesus chichartak “Juj Jesusarénum Wíi túramur etserkattamna nuna antukchartatui. Tuma asam tai wari jínkim wetá” turutmiayi.’

¹⁹ “Túrutkui wi tímiyai “Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nuj matsatun achikian awatin sepunam enkeawarmia nuna nekainiawai.

²⁰ Tura nuyá Áminiu etserniun Estepankan máiniakuisha wisha wajamjai. Túruiniakui, “péñkeraiti” tímiyai. Nú arantcha ni pushirín írsamjai” tímiyai.’

²¹ “Túrasha Uunt Jesus winia turutmai “Wetá. Israer-shuarcha matsatainia nuj akupkatjame” turutmai” tímiayi Papru.

Suntara kapitántriin túrunamia nu

²² Nui matsamarmia nu, núnaka antukarka untsumtan juáriarmiayi. “Juka mantamnatí. ¿Urukamtaik iwiaakusha pujusat?” tiarmiayi.

²³ Tura aentska Paprun kajerainiak, ti untsumainiak pushirín tujaat ajapawar nunkancha nan̄kimkiamaikia ajarmiayi.

²⁴ Tura kapitián nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi.

²⁵ Tura Páprun asutiátai tusar jin̄kiárar awajsam Pápruka kapitiánin chicharuk “¿Rúmanmayá aents áyatik asutiámniakait, ni túramurí nekartsuk?” tímiayi.

²⁶ Nuna táman antuk kapitiáncha uunt kapitiánin ujaktaj tusa werí chichaak “Maaj, túrataj tamena nu anearta. Ju áishman̄ Rúmanam pachitkaiti” tímiayi.

²⁷ Nuna antuk uunt kapitián Páprun werí aniasmiayi “¿Amesha nekasmek Rumanam pachitkaitiam?” tímiayi.

Tutai Papru “Ee” tímiayi.

²⁸ Tutai “Wikia ti kuítian akikmakmiajai Rúmanam pachiinkiatniun” uunt kapitián tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiinkian akiinaitjai” tímiayi.

²⁹ Nuna takui Páprun asutiátaj tiarmia nuna wárik iniaisar jíiniar wearmiayi. Tura imia uunt kapitiáncha Rúmanam pachitkian jin̄kiá asa ashamkamiayi.

³⁰ Tuma asa kashin tsawar uunt kapitián, urukamtaik Páprun imiá kajerainia, nekaataj tusa wakerak Paprun werí jin̄kiámun atirmiayi. Tura Israer-patrí uuntrin̄ chíkich naamka armia nújaisha ikiaankamiayi. Tura nuin̄kia ni matsatmanum Páprun itiar ajapén awajsamiayi.

23

Israer-aentsu Úuntrin̄ Papru timiania nu

¹ Papru Israer-patrí naamkarin̄ úmamkes iis “Wíi shuartiram antuktarum. Úchichik tuke yamaisha Yus íimmianum péñker wekainuitjai” tímiayi.

² Papru nuna takui Israer-patrí uuntrin̄ Ananíás, ni suntarin̄ Papruí ayamas pujuarmia nuna “Wenunam awatiarum” tímiayi.

³ Tutai Papru tímiayi “Tsej, jimiará chichamtinia íimiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuiñkia urukamtia Muisais tímia nuka iniaisam ame suntarum winia asutiátarum tame?” tímiayi.

⁴ Tura nuna takui nuí wajarmia nu Páprun tiarmiayi “¿Maaj, amesha Patri uuntrin̄ imiá yajauchisha chichaream?”

⁵ Tutai Papru tímiayi “Yatsuru, wisha Patri uuntrin̄ áutskaitia tíchamjai. Nékaitkiunka núnaka tíchaajjai. Kame wisha nékajai, Yus-Chichamnum tawai “Atumí uuntrin̄ yajauch chicharkairap” tawai” tímiayi.

⁶⁻⁸ Israer-aentsu úuntriya jimiará írutka ármiai. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmayá nantaktincha Yusa suntarisha aentsu wakanisha tura iwianchcha atsawai, tiniu ármiai. Antsu Pariséu aentska, nuka ashí awai, tiniu ármiai. Nuna nekáa Papru kakantar chichaak “Wikia Pariséu áentsuitjai. Wíi shuarsha Pariséu áiniawai. Wikia ashí shuar jakamunmayá ukunam nantaktin átatui tu jintiamun, nekaatai tusar itiararmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasarañ nusháa nusháa enentáimprarmiayi.

⁹ Nuínkia ashí aents charaatum ajarmiayi. Tura Israer-shuara jintinniurj Pariséunam írutka armia nu wajakiar tiarmiayi “Jū áishman tunaan penké túrichuiti. Yusa suntari chíkich wakanha nin nekas chichaschamashi. ¿Ya neka?” tiarmiayi.

¹⁰ Ti charaatum ajainiakui suntara kapitíántrj Páprun achiarchartimpiash tusa sun-taran untsuk, “Jiiktiarum, túrarum suntar pujamunam awayátarum” tímiayi.

¹¹ Nuyá kashi Papru Uuntrj mesekra ipiatuk “Kakaram ajasta, Papru. Jui Jerusarénum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarmatai Israer-aents Páprun maatai tusar chichaman jurusarmi-ayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yumiñkramu atai” tiarmiayi.

¹³ Nuna tiarmia nuka kuarenta (40) nankaamas ármiayi.

¹⁴ Tura Israer-patri úuntrin tura Israer-aentsu úuntrincha weriar “Papru máachkurkia penké yurumtsuk pujustatji. Máachrikia yajauchiniam yumiñkramu atai” taji.

¹⁵ Tuma asamtai ashí Israer-patrj naamkarijjai suntara kapitíántrj seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar ninikia táatsain náaktatji” tiarmiayi.

¹⁶ Tura Papru awe nú chichaman antuk suntar pujamunam taa Páprun ujakmiayi.

¹⁷ Tuma asamtai Pápruka suntara kapitíántrin untsuk “Jū uchi uunt kapitíánnum jukitia. Niisha chichaman takakui” tímiayi.

¹⁸ Kapitíáncha uchin uunt kapitíánnum ejé tímiayi “Papru enkeamu pujana nu winia untsurak “Jū uchi uunt kapitíánnum jukitia. Chichaman takakui” túrutui” tímiayi.

¹⁹ Uunt kapitíáncha nú uchin enkeki arantach jukí chicharuk “¿Warí turuttiaj tame?” tímiayi.

²⁰ Tutai uchi tímiayi “Israer-aents Páprun chichaman jurusarai. “Papru túramurj ti paant nekaatai tusar kashin Israer-shuara uuntriin ejetarum” turamartatui.

²¹ Tura amesha nuna takui anturkaip. Kuarenta (40) nankaamas jintiá akirtua pujurainiawai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtai yamaisha ámin tití tusa nákarainiawai” tímiayi uchi.

²² Tura uunt kapitíáncha uchin chicharuk “Ame túrutmena nu chíkich aents penké ujakaraip’ tímiayi. Nuna ti, uchin akupkamiayi.

Akupin Piriksaj ejetiarmiania nu

²³ Nuyanka uunt kapitíáncha chíkich kapitíánin jímiarán itia chichaak “Urum, kashi ajapén ajastatuk aj, untsurj suntar ikiaankarta. Jimiará sián (200) aya náwek, setenta (70) kawainium eketka, nuyá chíkich jimiará sián (200) nanjikijain Sesaria nunkanam wétin iwiarata.

²⁴ Páprusha kawainium ekemkatin iwiarturta. Túrarum péñkerak ejetarum akupin Piriksaj” tímiayi.

²⁵ Tura niijjai jū chichaman áatrar akuptukmiayi:

²⁶ “Ti péñker akupin Píriks, wikia Krautiu Rísias jū papin áatjame.

²⁷ Israer-aents jū áishman kan maatai tusar wakeruiniak achikiarmiayi. Tura niisha Rúmanmaya áentsuitkui wikia nuna nekaan suntarjai werin jukimjai.

²⁸ Wikia ¿urukamtaik achikiaruit? tusan Israer-patri naamkarin jukimjai nin.

²⁹ Páprunka ii uuntrj akupkamurin umiatsui tusar nin kajeriarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi.

³⁰ Tura wisha Israer-aents nin máatniun chichaman jurusman nekaan amijn akuptajme. Nuyasha nin kajerainia nunasha tajai “Atumsha Piriksaj werum átum warinma kajer-arum nu títiarum” tajai. Ayu. Júchiniak tájame.” Nuna tu áatar akuptukmiayi.

³¹ Tura suntarsha ni uunt kapitiántri tímia nútiksaran Páprun kashi júkiarmiayi Antipatris péprunam.

³² Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi.

³³ Sesaria péprunam jeawar papin Piriksan súsarmiayi. Tura Pápruncha nuí ejeniarmiayi.

³⁴ Akupniusha papí aujsua amik Páprun aniasmiayi “Amesha, ¿tuí akiiniaitiam?” Tutai “Sirisia nunkanmayaitjai” tímiayi.

³⁵ Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiayi, suntar ísarat tusa.

24

Papru Píriksjai áujmatsamiania nu

¹ Tura senku tsawant nankaamasai Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujai táarmiayi. Ju aents Páprun kajerainia ásar akupniunam wearmiayi.

² Nuí Páprun itiarmatai Térturu chichatan juármiai. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai.

³ Tuma asakmin iisha ashí matsatmanum tuke tsawant ti shiir yumı̄samajme, uunta.

⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi.

⁵ Ju áishman Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úuntriinti.

⁶ Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujai métek asutiátai tusar wakerimji.

⁷ Túrarin nuyanka kapitián Rísias taa tapit achik jurutramkimiaji.

⁸ Tura atumek akupin Piriksai werum nuí aujmatkatarum, turamaji, tímiayi. Tuma asamtai amesha Píriks, Papru aniasta. Nuı̄kia ii tájina nu nekasaiti, nu nekaattame” tímiayi Térturu.

⁹ Tura Israer-aents pujuarmia nu “Nekasaiti ashí ni tana nu” tiarmiayi.

¹⁰ Nuyá Píriks, uwejejai, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniurı̄ ti untsurı̄ uwitin pujusuitme. Tuma asamtai nuikia shiir enentáimsan páchitsuk chichastatjai.

¹¹ Wats, wi túramur nekartuata. Yúsan áujsatı̄ tusan Jerusarénum wi wémajna nu tuse (12) tsawant nankaamasai.

¹² Nuı̄sha yajauch áujmatki weaj wáitkiacharmai. Yusa Uunt Jeencha tura Israer-shuara aujtai jeencha tura pepru jı̄ntianmasha áentsnum charáa charáa ajá wekaaj penké wáitkiacharmai, tímiayi.

¹³ Ju aents juı̄ matsatainı̄ nu wı̄niaka penké turutchamnia áiniawai.

¹⁴ Túrasha juna paant ujaajme. Jesus yamarman jintı̄ana nuna umı̄ajai. Kame Israer-aentska wáitı̄aiti tuinia nuna wikia umı̄ajai. Túrasha nuna túran ii uuntri Yusrı̄ akupkamia nunak umiktasan pujajai. Jes, ashı̄ Muisais aar akupkamia nuna tura ashı̄ Yúsnan yaunchu etserin aar akupkarmia nunasha umı̄iaitjai.

¹⁵ Tura jakaasha nantaktin átatui, tajai. Warı̄, péı̄ker aents nútiksarı̄ yajauch aencha nantakiartatui imia Israer-shuar tuiniatsuk. Tura wisha nútiksarak túrunatniuitı̄ tajai.

¹⁶ Tura wisha tiniu asan, wikia winia enentáirı̄ Yus íimmianum makuumatsuk wekasataj tajai. Tura áentsnumsha nútiksarak penké makuumatsuk wekaajai’ tímiayi.

17 Tura, uunta, untsurí uwitin chíkich chíkich nunkanam wekaasuan amikian winia shuaruî támajai. Kuítrinchan kuítian susataj tusan tura Yusa kuítríncha nin susataj tusan támajai.

18 Túran wisha, Muisais jintinmia nútiksanak nijiaamaran, Yusa Uunt Jeen pujumiajai. Untsurí aents charaatum ajainiasha atsumiayi. Nui wiki pujái Ásianmaya Israer-aents wáitkiarmiayi.

19 Tura wi yajauch túraitkuíñkia winia wáitkiarainia nu táchatniukait ámin ujatmaktasa.

20 Túrachkuíñkia juî pujuinia nu, Israer-patri naamkari matsatmanum wi pujumajna nui yajauch túramun nékainiakka turutiarti.

21 Kame, ““jakamunmaya nantakminiaiti” tau asamtai makuurtiajtsarum pujarme” matsatmanum tímiaj nujai turutchartimpiash. Nú arantka yajauch túramun penké nekartuacharmai” tímiayi Papru.

22 Táman antuk Píriks, Kristu shuari túramun paant nekáa, áanik iniaisamiayi. “Antsu kapitián Riasias támatai nuíñkia nu chíchaman nekaatjai” tímiayi.

23 Tura nuyá suntara kapitiántrin chichaak “Ju Pápruka tuke emetnati. Tura ishichkikia ankant apujsataram. Tura nuyá ni amikri taa yáintaj takui suritkiairap” tímiayi.

24 Tura nuyá chíkich tsawantaj ataksha Píriks ni nuwejai Tursirajai támiaiyi. Núwenka Israer-shuarauyayi. Pírikska “Papru itiataram’ tímiayi. Papru Jesukristunun étserkui antimiaiyi.

25 Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi “Antsu yamaikia máakete. Tura ataksha wi ankant pujakun untsukmijiam” tímiayi.

26 Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa.

27 Tura nuyanka jimiará uwí nankaasmatai Píriks akupin náamkamu ajapnamiayi. Tura chíkich aents, ni naari Pursiu Jistu akupin náamkamiayi. Tura Pírikska, Israer-aents penker enentáimtursarat tusa wakerak, Páprun sepunam tuke ikiukmiayi.

25

Papru Jístujai áujmatsamiania nu

1 Jístusha akupkatin takatan nankaamataj tusa Sesaria péprunam támiaiyi. Tura menaintiú tsawant nankaasmatai nuyá we Jerusarénum jeamiayi.

2 Nuisha Israer-patri uuntri tura Israer-aentsu penkerisha Páprun tsanumprurtai tusar Jístun weriarmiayi.

3 Tura tiarmiayi “Wáitneasam Páprusha Jerusarénum akupkata” tiarmiayi. Jintiá maatai tusar wakeruiniak nuna tiarmiayi.

4 Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nui wárik waketkittiajai” tímiayi.

5 Nuyá nin tímiayi “Atumsha penkeri árumna nu, wijiai Sesarianam wétiniaitrume. Tura nú áishmanka tunaari ákuíñkia nuisha títiniaitrume” tímiayi.

6 Jístuka Jerusarénum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimiayi. Tura nui jeá kashin tsawar, akupin pujutainium pujus “Papru itiataram” tímiayi.

7 Tura Papru wayamtai, Israer-aents Jerusarénumia taarmia nu káunkarmiayi. Túrawar ti nukap chichainiak “Tunáa túrait Pápruka” tu tiarmiayi. Túrusha penké uyumantikiacharmiayi.

8 Pápruka chichamprumak tímiayi “Wisha tunaan penké túrachuitjai. Israera uuntri áarmarincha umirkaruitjai. Tura Yusa Uunt Jeencha yajauch awajsachuitjai. Tura uunt kapitiánniasha yajauch penké chicharkachuitjai” tímiayi.

⁹ Jístuka Israer-aents pé_nker enentáimtursarat tusa wakerak, Páprun tímiayi “Wakerak-min_kia Jerusaré_nnum wemí. Wis_ha nu_j ame túramurmin nekaatjai” tímiayi.

¹⁰ Tutai Papru tímiayi “Amesha paant nékame, Israer-áentsnum tunaan pen_ké túrachjai. Tuma asantai Rúmanmayá uunt akupniun wis_ha winia túramurun ujaktiniaitjai, nekartuati tusan.

¹¹ Wis_ha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuin_kia wíniaka Israer-shuarnum surunkachminiaitjai tajai. Tuma asantai seajme, wíi túramun uunt akupin Sésar nekartuati” tímiayi.

¹² Tutai, nuyá ni írutramurij_jiai chichasua amik, Jistu Páprun tímiayi “Uunt akupniui wétaj tusam seame. Tuma asantai nu_j wétatme” tímiayi.

Papru uunt akupniujai áujmatsamiania nu

¹³ Tura ishichik tsawant nan_kaamasmatai akupin Akripia ni nuwejai Pirinísejai Jístun áuj_sataj tusa Sesarianam wearmiyai.

¹⁴ Tura untsur_i tsawant pujusarmiyai. Tura nu_j pujuinia_j Jístuka Papru túrunamun akupniun ujaak tímiayi “Ju_j áishman_ḡ pujawai. Pír_iks nin achik en_kea ikiukmiayi, tímiayi.

¹⁵ Kame wikia Jerusaré_nnum pujá_j Israer-patri uuntr_i tura Israer-aentsu ún_untr_isha, Papru yajauchin túraiti tusar káutrukarmiyai, tímiayi. Mantamnati tusam akupkata, tu seattarmiyai.

¹⁶ Takui wi tímiajai “Iisha Rúmanmayá áentstikia chí_hcham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumats_{ai}n mantamnati tusar akupeatsji iisha” tímiajai.

¹⁷ Tiniu asan, táarmatai, wikia ná_katsuk kashin tsaw_{ar}an akupin pujutainium pujusan, Papru itiatarum tusan akupkamjai.

¹⁸ Tura Páprun tsanumprur_tai tusar taar chichainiaksha, wi enentáimmiajna núnaka tí_hcharmiyai.

¹⁹ Antsu áyatik Yus umirkar túmatair_in Papru nuna túrachai, tiarmiyai. Tura nuyásha áishman_ḡ Jesus naartin nantaki iwiaaku_i tawai Pápruka, tiarmiyai. Nunak tiarmiyai.

²⁰ Tura wikia nú chichaman túratniun nékachu asan, Páprun aniasmajai “¿Amesha Jerusaré_nnum wétaj tusam wakeramek? Nu_j nu chichaman nekartamawarti” tímiajai.

²¹ Tú_rasha “Atsá. Ju_jn_ḡ pujustajai. Rúmanmayá uunt akupin Akustu Sésar nekartuati” tímiayi Papru. Takui, “nu_in_kia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

²² Nuyá Akripia chichaak “Wis_ha itiursanak nu áishman_ḡ chichaamun anturkaj” tímiayi. Tutai Jistu tímiayi “Amesha kashinkia anturkattame”.

²³ Tura kashin tsaw_{ar} Akripia Pirinísejai taar, iwiaa-iwiarmamu ajas wayawarmiyai. Suntara ún_untr_ij_jiai tura nú péprunmayá ún_untr_ij_jiai wayawarmiyai. Tura nu_j Jistu, “Papru itiatarum” tímiayi.

²⁴ Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju_j áishman_ḡ íistarum. Ti untsur_i Israer-aents Jerusaré_nnumsha tura ju_j Sesarian-masha ju_j áishman_ḡkan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai.

²⁵ Tú_rasha wí_jj_{ai}n_kia tunáa jakamnianka túrachuiti. Kame niisha “uunt akupin Akustu Sésar nekartuati” takui, wis_ha nin akupkataj tusan wakerajai.

²⁶ Tura wariniak uunt akupniun áatrat_{aj} nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai.

²⁷ Warí wis_ha, ni yajauch túramur_in áattsuk, uunt akupniunam akupkashtiniaitjai” tímiayi.

26

Papru Akripiaj chichamprumakmiania nu

¹ Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi.

²⁻³ Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamáí wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta’ tímiayi.

Papru ni yaunchu túrutairin ujakmiania nu

⁴ Wí úchichik winia nunkaruñ tura Jerusaréñnumsha pujusan wi túramajna nuna ashí wí aents Israer ainia nu nékainiawai.

⁵ Pariséu ajasan, ni akupeamurin itiurchat aín ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui.

⁶ Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úntrin yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi.

⁷ Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákiniaji. Tuma asar Yus ájukur¹, tsawajsha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia.

⁸ Warí, atumsha “Yus jakancha iniantkimniaiti” tátsurmek’ tímiayi.

⁹ Tura wisha yáunchuka Nasaréñnumia Jesusnan umirkaruka kajerkatniuiti, tu enentáimniuyajai.

¹⁰ Tura Jerusaréñnum Yus-shuar ármia nuna kajerkarmiajai. Israer-patri uuntri chichamejai untsurí áentsun Jesusnan umirkarmia nuna sepunam enkeamiajai. Tura nú shuaran máiniakuisha wikia péñkeraiti tu wémiajai.

¹¹ Tura Israer-shuara iruntai jeen wayan ti asutiármiajai, Jesusnan umirkatniun ini-aisarat tusan. Tura imiá kajerkaran chíkich nunkanmasha pataatu wearmiajai achiktaj tusan’ tímiayi.

Tamasku jintianam túrunamun ujakmiania nu

(Túramurj 9.1-19; 22.6-16)

¹² Tura Israer-patri uuntri tsankatrukmatat, papin ni surusarmia nujai, Tamasku péprunam wétaj tusan jíinkimiajai.

¹³ Tura, uunta, nantu tutupin ai, jintiá wéai newaat ajaki ti tsáapin, tsawái nantujai nankaamas etsantrurarmiayi. Tura wijiaj wearmia nunasha núnisarañ etsantrurarmiayi.

¹⁴ Tura túrunamtai ashí nunká tepetar wáinkiararmiayi. Wiki Israer-chichamjai túrutun antukmajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wí aents kajera asam túruname” turutmai.’

¹⁵ Túrutkui wisha “¿Amesha yáitiam, Uunta?” tímiajai.

Tutai Uunt turutmai “Wisha Jesusaitjai, ame pataatamna núitjai.

¹⁶ Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai.

¹⁷ Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai.

¹⁸ Péñker jintintiata tusan akupeajme. Kame aencha kiritniumiã jíinkiar tsáapninium wekasarat tusan, tura iwianchin umirtsuk Yúsan umirkarat tusan akupeajme. Tura Winia enentáimtursarmatai Wisha ni tunaarın tsankurattajai. Nuna túran Yusna ajasaru áiniana nujai apujstatajai.” Nuna Jesus turutmai’ tímiayi.

Papru mesekrampra umikman ujakmiania nu

¹⁹ “Tuma asantai, uunt Akripia, Uunt Jesus nayaimpinmaya wantintiurak turutmia nuna umirkataj tusan pujajai.

²⁰ Enentai yapajjáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusaréñnumiãñ, Jutía nunkanmayanCHA tura nútiksanak Israer-shuarchanCHA nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiajai ashí shuaran.

²¹ Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asantai.

²² Yus winia yaintiu asantai, iniaitsuk tuke Yus-Chichaman ujainiajai. Uunt ainia nunasha, tura pééjchach ainia nunasha ujainiajai. Tura Muisaissha, Yúsñan etserniusha tiarmia nunak étsereajai. Nú arantka tátstujai.

²³ Krístuka wáitsatniuyayi, tura jakasha émak nantaktiniuyayi, ii uuntri tiniu ármiayi. Tura Krístuka nantaki Yusa chichamen íi áentsun tura Israer-shuarchanCHA nútiksant ujaktiniuyayi. Nuna tu tiarmiayi. Tura núñaka wisha tu ujainiajai” tímiayi Papru.

Papru Akripian Yus-shuar awajsataj tusa wakerimiania nu

²⁴ Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

²⁵ Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti.

²⁶ Wi tájana nuna, uunt Akripia jui pujana nuka nékawai. Tuma asantai arantutsuk nin chichareajai. Kame ju túrunamu ti paant asantai niisha nékawai, tajai” tímiayi.

²⁷ Nuyá Akripian chicharuk “Yaunchu Yúsñan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

²⁸ Takui Akripia chichaak “Maaj, ishichik awajtame Papru, Yus-shuar ajastin” tímiayi.

²⁹ Tutai Papru tímiayi “Tura ishichík chichamjaisha untsurí chichamjaisha, amesha uunt Akripia, tura ashí winia anturtukurmena nu, wijiã métek ajasúk tusan wakerajai. Tura antsu wia núñisan jĩñkiámua núñaka wakeratsjai” tímiayi.

³⁰ Papru nuna tuasua amikmatai akupniusha, uunt kapitíanCHA, Pirinísesha, tura nuñ ashí pujuarmia nu wajakiarmiayi.

³¹ Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

³² Tura Akripia Jístun tímiayi “Ju áishman “uunt akupin nekarati” tíchaitkuĩñkia akupmai makuitji” tímiayi.

27

Páprun Rúmanam akupkarmiania nu

¹ Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. PáprunCHA tura chikichnasha achikma ármia nunasha Akustunu tutai suntara kapitíantrijiañ nenakar akupkarmiayi. Nú kapitíani naari Júriuiti.

² Tura Atramitiunmaya kanu Asia nunkanam pepru ármia nuñ wétasa pujumia nu enkemprarmiaji. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúñia nunkanmaiti.

³ Nuñ enkemprar kashin tsawarar Sitiun péprunam jeamiaji. Nuñ jeawakrin kapitían Juriu, Páprun waitnentak tímiayi “Ame amikrumiñ wetá. Au írmasarti” tímiayi.

⁴ Tura Sitiunnumiã jíinkir, kanujai wesar nase tukumpramprakrin Chipri núnkaka menanmaani aa ikiukmiaji.

⁵ Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti.

⁶ Nuj jear nú kanu ikiukmiaji tura chíkich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitiántri, enkempratarum, turammiaji.

⁷ Tura untsurí tsawant yáitmataik we-wémiaji tura ti wiántkar Nítiunam jeastatuk ajasmiaji. Tura nuisha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiaji.

⁸ Tura Kritia nunkanam ayamchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjuchiiti.

⁹ Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin.

¹⁰ Tura Papru chicharuk “Amikru antuktaram. Wi nékajai, yamaí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjiash” tímiayi.

¹¹ Suntara kapitiántrinkia Páprunka anturtsuk, kanú wianniurin kapitiántrincha tura kanú kapitiántrincha chichamen anturkarmiaji.

¹² Tura nuji Shiir Pujutai tutainium yumitin pujustin péngerchaitkui “Nuinkia juyanka wéartai. Pinise péprunam jeamainchuashit” ashí tiarmiaji. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

Tsúumainium wekasarmiania nu

¹³ Tuma asamtai ukunam nase nunkaaniã tápiriri ajakui, ii wétin yamaikia péngeraiti, tu enentáimsarmiaji. Túmakui kanu emetai jiru júusar jíinkir Kritisianam ayamchik wearmiaji.

¹⁴ Túrasha árusan arakia kakaram nase, Nuristi tuinia nu tukumpramiayi.

¹⁵ Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji.

¹⁶ Tura Kritia nunkanam áawinini nankaamakur nuinkia nase ishichik mijiantmatai, uchich kanu japikir wémiaj nu ti takasar uunt kanunam enkermiaji.

¹⁷ Tura enkerar chapikjai uunt kanun jinkiármiaji wewe najanatai tusar. Tura náikim mukutniunam, Serti tutainium nase juramkishtajiash tusar, kanunam yakí tarach aan itiararmiaji. Nu tarach nase útsuktin tusar nenarma ármiaji. Túrawar áyatik nase juramkitiai, tiarmiaji.

¹⁸ Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiaji.

¹⁹ Menaintiú tsawant nankaasmatai iisha ii uwejéjain kanunam káarak iruniarmia nusha entsá utsankarmiaji.

²⁰ Tura untsurí tsawant tsawaisha etsantrachmiaji tura káshisha yaasha tsaparcharmiaji. Tura nasesha ti kakantar tukumpramkurin “Yamaikia uwempratn atawai” tiarmiaji.

²¹ Tura iisha ti untsurí tsawant yurumtsuk matsatu asakrin, Papru ajapén wajaki tímiayi “Amikru winia nuik Kritisianmayanka jíintsuk anturtukuitkiurminkia yamaí ju itiurchatnum pujutsuk tura emenkatmatsuk pujaaji’ tímiayi.”

²²⁻²⁴ ‘Yamaí kashi winia Yusru suntari nayaimpinmaya wantintiurkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámijiai kanunam enketainia ásarmatai uwempratniun Yus tsankatkarai” turutui. Tuma asamtai, amikru, shiir enentáimsatarum. Atumsha mash uwempratarme. Túrasha kánuka mesertatui.

²⁵ Wisha winia Yúsrún nekas enentáimtajai. Yusa suntari turutainia nuna nekas tu túrunattawai, tajai. Tuma asamtai kakartarum.

²⁶ Tura chíchimisha nunka uchich pújakmanum nuí patatmittiaji” tímiayi.

²⁷ Ayu, katurse (14) tsawant nankaasmatai nú kashi Atria nayaantsanam jeamiaji. Nuí nase nánkamas juram wémiaji. Nuyanka kashi ajapén wiantin armia nu nunka ámunam jeateman nekaawarmiaji.

²⁸ Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemañ ataksha nekapmamiayi. Nuínkia painti siati (27) mítru nekapmamiayi. Tuma asa nunká anumsatuk ajasun nekaawarmiaji.

²⁹ Tura kayanam ijiukají tusar ashamainiak kuaru jirun kijinian chapikjají kanú senkarin jínkiáwar entsá ajúnkarmiaji. Kijin asamtai, inít tepeámtai nase juramkichmi tusar túrawarmiaji. Tura wake mesekar, tsawarti tusar matsarmiaji.

³⁰ Tura matsatainiaj wiantin armia nu, iikia uchich kanunam enkemprar pisarchatjish tu enentáimsarmiaji. Túmainiak kanú nujinia chíkich jirun ajuntai tawa nútiksaran uchich kanun ajuntai tusar pujuarmiaji.

³¹ Tura tuma wáiniak Papru suntara kapitántrín tura ni suntaríncha ujakmiaji. “Ausha uunt kanunmañ enketainiachkuínkia atumsha uwemprashtarume” tímiayi.

³² Tutai suntarsha uchich kanú chapikrín tsupirkar entsá ajúnkarmiaji.

³³ Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumsuk pujarme.

³⁴ Seajrume, ishichkisha yurumárum kakaram ajastarum, uwemprataj tusarum. Imiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yuminsamiayi ashí ímmianumañ. Tura puuk yuamiayi.

³⁶ Tura apatkun yuan wáinkiar, ashí aents shiir enentáimsar yurumáwarmiaji.

³⁷ Nusha ashí aents irurmaka jimiará sián nuyá ataksha setenta sais (276) ármiaji.

³⁸ Yurumáwar ejemakar, yurumkanka entsá utsankarmiaji, uunt kanu wampú ajasat tusar.

Kanu penké mesermiania nu

³⁹ Tura tsawarmatai wiantin armia nu, nunkan nekaacharmiaji. Túrasha énkentamunam káanmatak aan wáinkiar “Aí kanu anuntai” tiarmiaji.

⁴⁰ Nuyá jiru entsá ajunman chapikrín tsupirkar entsá ikiukiarmiaji. Tura kanait jínkiárma ármia nuna chapikrín tsupirkarmiaji. Tura tarach kanú nujín amia nuna nenakarmiaji. Túram kanu káanmatkanam anumsatuk ajasmiaji.

⁴¹ Tura wainchi jímiar ámunam jeá kanu entsá wayá tepeamiayi. Tura kanú senkarínkia chíchimi yakí takuir ajíamu asa kupintramiayi.

⁴² Suntarsha, achik júamu armia nú shuaran máataj tusa wakeriarmiaji, yukuak pisararain tusar.

⁴³ Tura kapitáncha Páprun uwemtikrataj tau asa nuna túratniun tsankatkachmiaji. Antsu chichaak “Emka yukuaktin nékarmena nu yukuakrum péemkatarum, tímiayi.

⁴⁴ Nuyá chíkichkia kanunmayá numi, kame nánkamas numi achikrum awamkarum péemkatarum” tímiayi. Tu túrawar ashí iwiaakuk jíintrarmiaji.

28

Marta nunkanam túrunamia nu

¹ Tura ashí iwiaakuk jíintrar, nu nunka Marta naartin nekaamiaji.

² Tura nuí matsamin armia nu, shiir awajtamsarmiaji. Tuma asamtai iisha tsetsema asakrin, tura yumisha yútakui, uunt jinia ikiapármiaji. Tura “anamaitiarum” turam-maji.

³ Pápruka jinia kukarun ikiaanak jinium pataamiayi. Túmawai napi tsuéran ashamak jiinki, Papru uwején nemaramiayi.

⁴ Tura nú nunkanmaya aents, Papru uwején napi nemaran wáinkiar “Ju áishmansha shuáran majchuashit, tiarmiayi. Nayaantsanmaya uwempraitiatan ni yusrí iwiaaku átinian suritiawai” tiarmiayi.

⁵ Páprusha ni uwején pear napin jinium awanmiayi. Tura penkesha yajauch ajaschamiayi.

⁶ Tura niisha eáchatpiash tusar ii pujuarmiayi. “Túmatkesha jaka inianchatpiash” tiarmiayi. Túrasha ti núkap pujussha penké najaweachmiayi. Túrunamtai, nuinkia nusháa enentáimprar “Pápruka yúschashit” tiarmiayi.

⁷ Nú nunkanam aentsu penkeri ámiayi ni naari Pupriu. Nú Pupriu ni jeen in itiaarmamiayi. Tura menaintiú tsawant yurumkancha suramsarmiayi.

⁸ Tura nuí pujarin Pupriu aparí tsuer, numpajai ijiarki jáamiayi. Túmakui Papru werí iyumiayi. Tura Yúsan áujtus amik uwején nin awantkamiayi. Túram pénger ajasmiayi.

⁹ Nu túramun nekaawar, nú nunkanmaya aents jaa armia nu tariar, niisha pénger ajasarmiayi.

¹⁰ Túram incha ti shiir enentáimturmasar núkap ajampramsamiayi. Túram ukunam ii wétin jeamtai ashí ii atsumamun suramsarmiayi.

Rúmanam jeawarmiania nu

¹¹ Ii wétsuk nú nunkanam menaintiú nantu pujusmiayi. Tura nuyá chíkich kanunam enkempramiayi. Nu kanusha Arijiántrianmaya yaunchu tau menaintiú nantu yumi yútakui nuí pujumiayi. Nú kanu nujiin numi-yus najankamu jímiar ekemiarmiayi, ni náarinkia Kástur tura Púruks.

¹² Iísha nuí enkemprar weri Serakúsa péprunam jeamiayi. Nuí menaintiú tsawant pujusarmiayi.

¹³ Tura jíinkir nuyanka nayaantsa ayamach weri Rijiú péprunam jeamiayi. Nuí kanarmiayi. Tura kashin anariá nase suut umpuunti támiayi. Tuma asamtai nú kashinkia Putiuri péprunam jeamiayi.

¹⁴ Nuí jeawakrin Yus-shuar pujuarmia nu, ni jeen juramkimiai. Tuma asamtai nuin chikichkí tumin pujusmiayi. Tura nuyanka nunkan Rúmanmaani wémiai.

¹⁵ Tura Rúmanmaya Yus-shuar, ii jeatniurin neka ásar jintiá inkiunmaktai tusar winiarmiayi. Chíkichkia Apiu pepru támanum táarmiayi, tura chíkichkia, Menaintiú Jeá tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

¹⁶ Tura ii Rúmanam jeawakrin kapitián Juriu achikia yarumman Rúmanmaya uunt kapitiánin ejetimiayi. Túrasha, Pápruka jeá ikiamas niisháa pujustí, tiarmiayi. Tura Páprun íisat tusa chikichík suntarnak ni jeen apujtusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant nankaasmatai Pápruka Rúmanmaya Israer-aentsu penkerin untsuk ikiaanak “Yatsurtiram antuktarum. Wisha Israer-áentsun yajauchin penké túrachmiajai. Tura ii uuntri akupkarmia nunasha yajauch chicharkachmiajai. Tuma ain Jerusarénum winia achirkar Rúmanmaya áentsnum surutkarmiayi.

¹⁸ Tura nu aencha winia anintsar, akupkatai, turutiarmiayi, wisha penké yajauchin, mantamnamnia tímianu túrachu asamtai.

¹⁹ Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaarin kapitiánin ujaktinian táchaitjai.

²⁰ Tuma asamtai, yatsurtirmin, atumin untsukjarme chichastaj tusan. Yusa anaikiamuri, Israer-shuarti náakajnia nu táwiti wi tu étserkui, juí achikiar jinikiámu pujajai” tímiai Papru.

²¹ Tutai niisha tiarmiayi “Iisha Jutía nun_{kan}maya aentsti, ame yajauch túramu papí pen_{ké} wáinkichuitji. Tura ii shuar nuyá táarainia nusha “au yajauch túraití” tu ujatmakcharmaji.

²² Túrasha ashí nun_{kan}nam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantaj iruntrami tiarmia nú tsawant jeamtai, ti untsurí aents Papru pujamunam iruntrarmiayi. Papru jintintiainiak Muisais yaunchu aar akupkamia nujaj tura chíkich Yúsnan etserniu aarmarijiaisha, Jesus nekas Yusa Anaikiamurinti tusa paant jintintiawarmiayi. Nuna tura káshik nan_{ka}ama Yus akupeamunam pachiinkiatniun étse-étserkua kjaraj iniaisamiayi.

²⁴ Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiai.

²⁵ Chikichkí enentaikⁱ enentáimsatin atsá asamtai, jiinki weartasa pujuarmiayi. Túmainiakui Papru chichaak “Nékasen_u Yusa Wakaní yaunchu Yúsnan etserniu, Isayas naartin áarmarijiaj ii úuntrin_u chicharuk juna tímiayi:

²⁶ “Ame weme au aents ju titia:

“Ántutka ántakrumsha nekaashtatrome,

Íitkia iyakrumsha wáinkiashtatrome.

²⁷ Warí, au shuara enentáj katsuarai;

Kuishijiaj ántaksha ántichua núnin áiniawai,

Jiisha epetkamua áanin áiniawai,

Iyaksha wáinkiajn_u tusa, ántaksha antukajn_u tusa

Enentáimkiusha nekaawajn_u tusa,

Winí uwemprajn_u tusa, tura Winí tsuamarajn_u tusa túrunayi”.

Nuní áarmaiti.

²⁸ Tuma asamtai, nekaatarum. Yamaikia Yusaj uwempratin ana nuna Israer-shuarsha susamuiti. Tura nin_{ka} nekas umikiartatui” tímiayi.

²⁹ Tura Papru nuna tj iniaisamtai Israer-shuar nuamtak núkap chicharnaiyasua wearmiayi.

³⁰ Tura Pápruka nujn_u jea ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni jeen itiaamiayi.

³¹ Tuma asamtai Papru arantutsuk urukuk Yus akupeamunam ati, Uunt Jesukrístu túramuríncha ashí etserkamiayi. Nútiksaj etserkatniuncha Páprun pen_{ké} suritkiacharmiayi.

Papru RÚMANMAYA SHUARAN papí akúptukma

Papru Rúmanmaya Yus-shuaran áatramania nu

¹ Wi Papru Jesukrístu takarniuitjai. Núnisañ Yus achirak ni Shiir Chichamen etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsnañ etserin Yus-Papinium paant ujakarmiayi.

³ Nu Chichamnum Yus ni Uchirín áujmatui. Ayashijjiañkia Tawit weeanum akiiniamiayi.

⁴ Tura ni tishiir wakanjjiañkia Yusa Uchirínti. Tura ti kakarmaiti. Jakamunmaya nantakmiajají nekas Yusa Uchiría nu, paant nekanamiayi. Niisha ii Uuntri Jesukrístuiti.

⁵ Ni túramujají Yus shiir enentáimturuk nu Shiir Chichaman etserkat tusa akuptukmiayi. Núnisañ ashí nunkanmaya shuar nu chichaman umirkar Jesusa náarín shiir awajsarat tusa akuptukmiayi.

⁶ Atumsha nuyá shuaraitrume. Tura Jesukrístunu ajasarat tusa Yus achirmakuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yussa ii Uuntri Jesukrístusha waitnentrainia ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsnañ ti shiir yumisajai.

⁹ Tuke enentáirjají Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui.

¹⁰ Ashí tsawant ni wakerutakuñkia íitjarum tusan Yúsnañ seajai.

¹¹ Nekas íitniun wakerajrume. Nuñ jean wakanmin yainkian Yusjají kanakchamin ajasúk tusan wakerajrume.

¹² Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

¹³ Yatsurú, tuke íitjarum tusan wakerimjiarme. Túrasha iyatsjarme. Kame Yus-Chichaman ujaakun chíkich shuarnuma áintsañ atumíincha Yus kakaram takasman wáinkiatniun wakerajai.

¹⁴ Wikia Yus akuptuku asamtai ashí shuaran ujákártiniaitjai. Unuimiaruncha tura unuimiaruncha, ti nékainia nunasha tura nékachuncha, métekrak ujakartiniaitjai.

¹⁵ Tuma asan atumniasha Rúmanam pujarmena nunasha Uwempratin Chichaman ujaitjarum tusan pujajai.

Uwempratin Chicham kakarmaiti

¹⁶ Nu Shiir Chicham Yusa kakarmaríjají ti kakaram asa ashí shuaran uwentikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisañ uwentikramniaiti.

¹⁷ Nu chichamnum Yus enentáimsamia nu páantaiti. Júiti: Áyatik Yúsnañ nekas enentáimtuiniakui Yuska “péñkeraitme” tíminiaiti. Yus-Papiniumsha núnisañ tawai: “Yúsnañ nekas enentáimta nuna Yus “péñkeraitme” tutai tuke Yusjají shiir wekasattawai.” Tu áarmaiti.

Aentsu tunaari

¹⁸ Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kajerkar ti asutiátniun nayaimpinmaya paant awajsaiti.

¹⁹ Tura nu shuarka ashí Yusna nekaamnia nuna Yus paant awajsa asamtai péñker nékainiawai.

²⁰ Kame yámankamtaikniumiá Yus wáinchataitiat ni najanamurijjai júka paant nekaamniaiti: Nekas Yus asa tuke kakarmaiti. Nussha ti paant asamtai nu shuar tsankurnarchartatui.

²¹ Yúsan nékainiyat shiir awajsacharmiayi tura yumĩnsacharmiayi. Tuma ásar aya ánta nunak enentáimtuiniak ni enentái tunaajai piakai.

²² Tura ti nekajai tuńiyat enentáimcha núnin ajasari.

²³ Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinniasha napincha kuntinniasha yajasmáncha nakumkar nuna shiir awajenawai.

²⁴ Nu asamtai imiá yajauch enentáimiainiakui “áanik asati” tímiayi Yus. Túramtai ti natsanmainian túrunainiawai.

²⁵ Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnasti” tajai.

²⁶ Nuna túrin ásarmatai Yus natsanmainia nuna wakeruktinian tsankatkarmiayi. Túramtai nuwasha áishmanjai tsanĩntinian nakitrar nuamtak yajauch awajnainiawai.

²⁷ Núnisan áishmansha nuwajai tsanĩntinian iniaisar nuamtak áishmankak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashĩ wáitsatniunak sumamawarmiayi.

²⁸ Tura tuke Yúsan nakitiainia asamtai ti yajauch enentáimiainiak penké túrachminia nuna túrawarti tusa Yus tsankatkarmiayi.

²⁹ Nu shuar ti tunaajai piaku áiniawai. Tsanirmausha aya kuĩniak wakerincha tura yajauch awajin áiniawai. Nu arantcha awakmakun kajerniusha mankartincha tuke máanaincha anankartincha péñkercha awajkartincha, tsanumniusha áiniawai.

³⁰ Nu arantcha chikichnasha yajauch áujmatin áiniawai. Yúsnasha nakitiainiawai. Áimniusha áiniawai. Tura “péñkeraitjai” tiar nankaamantu enentáimtumainiawai. Tunáa túratniun eainiawai. Aparincha nukurincha umirainiatsui.

³¹ Enentáincha áiniawai. Tana nuna umichu áiniawai. Anenkartichu ásar waitnenkartichu áiniawai. Tsankurcha áiniawai.

³² Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chíkich yajauch túramtai ti shiir wararenawai.

2

Shuar tunáa túramun Yus paant nékawai

¹ Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame.

² Yuska nu tunaan túrin áinia nuna súmamtikiashtinkiat.

³ Amesha nuna túrin “imiá yajauchiiti” táyatam amesha métek túrakminkia Yus sumamtikiattana nuyá ¿itiurak uwemprattam?

⁴ Yus ti waitnentrana asa nu tunáa ikiukim Nin enentáimtustinian katsuntramuk nákarmawai. Tura péñker asa wárik asutiámchakui sumamashtiniaitjai ¿tu enentáimtumamek? Tu enentáimkium ni waitnentrannarij ántar awajsaitme.

⁵ Tura tunaarum enentáimtutsuk tuke túrakmeka súmamtikiatin tsawantaj ti tunáa irutmampramujai ti asutniáttame.

⁶ Nu tsawantaj ni túramujai métek Yus ashí shuaran akirartatui.

⁷ Shuar tuke pé_nker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Nii_jia_i shiir pujustinian sú_sartatui.

⁸ Antsu pé_nker nuna wakerutsuk antsu aya yajauchin wakeruiniak Yúsan nakitiainia nuna Yus ti kajerak asutiá_wartatui.

⁹ Nekas Israer-shuarsha tura nú_nisa_n Israer-shuarchasha tunaan túrin á_niakka ti wá_itsartatui.

¹⁰ Antsu nekas Israer-shuarnasha tura nú_nisa_n Israer-shuarchancha pé_nker túrin á_nia nú_naka Yus ti shiir imiatkinchanum apu_sartatui.

¹¹ Yus ashí shuaran akantsuk mai metek iyawai.

¹² Shuar Muisais akupkamun né_katsuk tunaan túraka aya jú_nisa_n sumamawartatui. Tura shuar Muisais akupkamun né_kayat tunaan túra_nka nu akupkamuj_ai suma_wartatui.

¹³ Akupkamun aya antukarua nuka Yus_ai pé_nker á_niatsui antsu antukar umirainia nuna Yuska “pé_nkeraiti” tawai.

¹⁴ Israer-shuarchaka Muisais akupkamun takakainiachkusha aya ni enentá_ij_ai nu akupkamun umirainiak

¹⁵ nu umireamuj_ai Yus nu akupkamun ni enentá_in ikiursarua nuka paant nekaamni_aiti. Nuj_ai mé_tek túruiniak shiir enentá_imiainiawai. Tura mé_tek túruiniachku_nka pé_nkercha enentá_imiainiawai.

¹⁶ Wi Uwempratin Chichaman é_tsereaj nu_i ashí shuar u_ukrisha túramun ashí paant awajsartatui. Tura nuna etserkatniun Jesukrístun anaitiukmiayi. Nu tsawant_ai tunaan túrin sumamawartatui.

Israer-shuarsha Muisais akupkamun umircha á_niawai

¹⁷ Á_meka “Tura Israer-shuaraitjai. Muisais akupkamun takakkui winia Yúsruka ti shiir enentá_imturui, tát_sumeash.

¹⁸ Yus wakeramuncha né_kajai. Tura akupkamun nekaan pé_nker nuna wakerajai, tát_sumeash.

¹⁹ Wakannium kusuraru á_nia nunasha jintintiamniaitjai. Tura tsá_apninian nekamtiki_awarminiaitjai, tát_sumeash.

²⁰ Akupkamu ti pe_nker neka asan nekasa nuna unuimiaruitjai. Tuma asan né_kachuncha á_ntuiniachuncha jintintiamniaitjai” tát_sumeash.

²¹ Pai, chí_kichka unuiniatimesha ¿urukamtaí imia á_meka unuimiatsum? “Kasamkash_tiniaiti” tu é_tsereatsmek. Tá_yatmesha ¿urukamtaí á_meka kasamam?

²² “Tsanirmashtiniaiti” tát_sumek. Enta, ¿urukamtaí á_meka tsanirmam? “Á_ntar-yusan nakitiajai” tát_sumek. ¿Urukamtaí á_meka nu yusa je_eniá_n kasamam?

²³ Akupkamun takakjai tusam shiir enentá_imtumayatam nu akupkamu umireachkum Yus yajauch awajeatsmek.

²⁴ Yus-Papiniumsha nú_nis á_rarmaiti: “Á_tum pé_nker umirchamuj_ai Israer-shuarcha Yúsan yajauch chicharainiawai.”

²⁵ Muisais akupkamia nu ashí umireakmeke nii timia nú_nismek tsupirnaktin pé_nkeraiti. Tura takamtsuk umireachkumka tsupirnakcha nú_nisketme.

²⁶ Chí_kich shuarsha tsupirnakchaitiat Muisais akupkamun umireakka tsupirnatskesh_a tsupirnakua á_nitsan_kete.

²⁷ Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin sú_mamtikramawartatui.

²⁸⁻²⁹ Kame nekas Israer-shuarka aya pá_tatkechu antsu tuke enentá_ij_ai Yúsnan wakera nú_iti. Nú_nisa_n nekas tsupirnaktinkia aya ayashí_jia_nchuiti antsu enentá_iniam shiir á_tinia nú_iti. Nekas akupkamu aya á_rarchamuiti antsu nekas enentá_ij_ai umirkamua nú_iti. Nekas tú tura nú_naka aents shiir enentá_imtuiniachkuisha Yus shiir enentá_imtawai.

3

¹ Núnis aisha Israer-shuar ainia nu ¿warí pénkernak takakainia? Tura tsupirnaktincha ¿wariniak yayá?

² Ti pénkeraiti. Warí, émkaka, Yus ni chichamen Israer-shuaran súsacharmakia.

³ Kame chíkich chíkich umichu áiniakui Yus tsan̄katkamia nuna nú shuaran súsachmatain̄kia nuikia “Yus umichuiti” ¿títinkiait?

⁴ Pénkea. Antsu Yuska nekas túratniua nujai métek ashí túriniaiti. Shuar umichu áiniakuisha ni támarin mash umiktatui. Ni tamajai shuáran wáitrin awajeakka nusha pénkeraiti. Núnisan atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuíniakuisha nupetmak-tatme” tawai.

⁵ Nu arantcha, “Wi tunaan túramujai Yus imiá pénkera nuna paant awajeakka ¿urukam-tai winia asutiua? ¿Nuka pénkerkait?” tíchatapash. (Kame aents chichainia núnisnak tajai.)

⁶ Warí, Yus pénkerchaitkiun̄ka ¿itiurak ashí shuara tunaarin súmamtikiawarat? Kame imiá pénkeraiti.

⁷ Núnisan, “Wi umirkachmajai Yus tuke umiiniana nuna paant awajeaknaka nuikia nujai in shiir awajsamtaí ¿urukamtaí “tunaitme” túruta?” tíchatapash.

⁸ Warí, “tunáa túramujai Yúsan pénker awajeajai,” tú nekas enentáimpramniaitkiuin̄kia shuar nuikia “Wats, ashí pénker áti tusar tunáa túratai” tímin ainti. Kame chíkich shuar in kajertamainiak “nuna jintintiainiawai” túramji. Nu shuar sumamawartin áiniawai.

Ashí shuar tunáa túraitji

⁹ Nuikia Israer-shuartikia chikichjai nan̄kaamas ¿pénkerkaitiaj? Penkesha. Warí, Israer-shuartisha Israer-shuarchajajisha ashí métekrak tunaan túrin áiniawai. Núnaka jú áarmajai paant awajsaitjai.

¹⁰ Yus-Papisha núnisan tawai:

“Pénkeran túrin chikichkisha atsawai.

¹¹ Yúsnan nekaatniun nakitiainiawai. Yusrasha eainiatsui.

¹² Yusnumiá kanakiar men̄kakatniunam wénawai. Chikichkisha pénkeran túrin penké atsawai.

¹³ Ashí yajauch chichainiak iwiarsamu yama urainiua núnisan áiniawai. Ni chichamejai tuke anañkartin áiniawai. Chichame napía áintsan̄ najamin áiniawai.

¹⁴ Aya yajauchin kakaram áujmatin áiniawai.

¹⁵ Máataj tusa wárik yujarin áiniawai.

¹⁶ Aya ti itiurchat ti yajauch awajin áiniawai.

¹⁷ Shiir pujustinian nékainiatsui.

¹⁸ Ishichkisha Yúsan ashamenatsui.”

¹⁹ Yaunchu akupkamun umirkatin ainia nú shuar aya

tákamtak umirkatin áiniawai. Tuma asamtaí ashí shuar umirkachu ásarmatai Yus nujai súmamtikiawartatui. Túrakui niisha pachischamin áiniawai.

²⁰ Akupkamuka aya ii tunaarin paant awajturmajai. Tuma asamtaí akupkamu pénker umirkatniujai Yus “pénkeraitme” turamchamniaitji.

Aya Yus shiir enentáimtusar uwempramniaitji

²¹ Yus-Chicham yaunchu ármanum itiura Yus in “pénkeraitme” túramminiaitjai nuna paant tawai. Kame akupkamujainchuiti.

²² Antsu iisha ashí shuarsha núnisan aya Jesukrístu shiir enentáimtakrin Yus “pénkeraitme” túramminiaitjai.

²³ Kame ashí shuarti tunáa túraitji. Tuma asar Yusjai métek pénker ajastin penké jeatsji.

²⁴ Tura Yus in waitnentrama asa kuítchajai “pénkeraitme” túramji. Jesukrístujai uwentikrampra asa túramji.

25 Tura Krístun akupkamiayi ni jakamujaj ashí tunaan asakátratniun. Túramtai shuar Nin nekas enentáimtuiniakui Yus tsan̄kuramniaiti. Yaunchu tunáa túramun katsunteak enentáimtuschiayi. Yamái tsan̄kuramnia nuna yaunchu nekáa, nuna túramniuyayi.

26 Tura yamaiya tunaancha tsan̄kureak ashí shuar Jesusan nekas enentáimtuinia nuna “pénkeraitme” tuke tíminiaiti. Kristu jakamujaj nuka paant ajasai.

27 Nújain̄kia ii pénker ajasjini nu “winia kakarmarjaj túrunajaj” tíchamnia asar ¿nan̄kaamantu enentáimtumarminkaitiaj? Pen̄kesha. Warí, akupkamu umitsuk aya Kristu nekas enentáimtakrin Yus “pénkeraitme” túramji.

28 Nujaj páantaiti. Akupkamu umirtsuk aya Jesukrístu shiir enentáimtakrin Yus “pénkeraitme” túramminiaitji.

29 Warí, Yuska Israer-shuarnasha tura núnisan̄ Israer-shuarchancha mai ni Yúsrinchukait.

30 Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “pénkeraitme” tíminiaiti.

31 Shuar Yúsan shiir enentáimtamujaj pénker ajastin ániakui nujaj ¿akupkamu ántar awajsamukait? Atsá. Antsu nuna nan̄kaamas umirkatin awajsamuiti.

4

Apraámsha Yúsan shiir enentáimtamujaj pénker ajasmania nu

1 Ashí Israer-shuara uuntri Apraám enentáimtustai. Niisha ¿itiurak Yusjaj pénker ajasma?

2-3 Ni pénker takasmajaj Yusjaj pénker ajasuitkiun̄ka nan̄kaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “pénkeraitme” tímiayi” tawai. Nu túramu asa Apraámsha Yus íimmianum nan̄kaamantu enentáimprachminiaiti.

4 Shuar íniamna nu takasmatai ¿aya tsan̄ka asam akiktatmek? Warí, ni takasmanum páchitsuk akikchatniukait.

5 Antsu shuar ni pénker turamuri enentaimtsuk áyatik “Yus tunáa shuaran pénker awajniuiti” tu enentáimtakui Yuska tsan̄ka asa “pénkeraitme” tawai.

6 Tura pénker túrachunak Yus “pénkeraitme” takui nu shuar shiir warasminiaiti. Núnisan̄ tawai uunt akupin Tawit:

7 “Shuar ashí ni tunaar̄in Yus asakátar tsan̄kuramu ana nuka shiir enentáimpramniaiti.

8 Uunt Yus ni tunaar̄in enentáimtachma asa ti warasminiaiti.” Tu tímiayi Tawit.

9 ¿Aya tsupirnakukeash warasminiait? Tura tsupirnakchasha waraschamniakait. Warí, Apraám Yúsan shiir enentáimtakui Yus “pénkeraitme” tímiayi.

10 Tura Apraám tuke tsupirnatsain̄ Yus nuna tímiayi. Emka Yus “pénkeraitme” timia nú ukunam Apraám tsupirnakmiayi.

11 Apraám tsupirnatsuk Yúsan shiir enentáimtusmatai Yus “pénkeraitme” tusa “tsupir-naktiniaitme” tímiayi. Nújain̄kia ashí Yúsan shiir enentáimtuinia nú shuar tsupirnatskesha Apraám weeá ániawai. Tura nu shuaran Yus “pénkeraitme” tawai.

12 Tsupirnakusha aya tsupirnakusa asa Apraám weeá ániatsui antsu nu arant Apraámjaj métek Yúsan shiir enentáimtuinia nuka Apraám weeá ániawai. Kame Apraám tuke tsupirnatsuk Yúsan shiir enentáimtusmiayi.

Yus shiir enentáimtamujaj Nii timia nu uminkiattawai

13 Yaunchu Apraáman Yus chicharuk “Amincha amée weeá shuarnasha jú nun̄kan susattajaj” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku nuna tsan̄katkamiayi.

14 Kame aya akupkamun umirniun súsatniuitkiuin̄kia nuikia Yus enentáimtustin ántrait. Tura Yus Apraáman timia nusha ántrait.

15 Akupkamu akui shuar umirkachka ti asutniáshtatuak. Tura atsakuin̄kia ¿asutniátniukait? ¿Itiurak umirtsuk ikiuktin̄?

16 Tuma asamtai Yus ti anen̄kartin asa Nin nekas enentáimtuinian ashí tsan̄katkaiti. Nujaīn̄kia Apraám weeasha Yus Apraáman timia nuna páchitsuk wáinkíártatui. Iisha Apraámjaī métek Yus nekas enentáimtakur ní weeitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsan̄katramkattaji.

17 Kame Yus-Papinium Apraám áatramuiti: “Untsurí shuarsha amée weeá ajasartatui.” Nu asamtai iisha Apraámjaī métek Yus shiir enentáimtakrinkia Yus incha Apraám weeá áintsan̄ írmaji. Nú Yuska ti kakaram asa jakancha iwiaaku awajniuiti; tura atsana nunasha ana nútiksān̄ nájanui.

18 Yus “ti pampan̄tatme” takui Apraám ti uuntach áyat Yus timian enentáimtak yajutmartinian nákasmiayi. Nujaī untsurí shuar ní weeá ajasarmiayi, Yus timia áintsan̄.

19-20 Apraámsha sian̄ (100) uwí takakuitiat tura ni nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tútsuk shiir awajsamiayi. Nujaīsha nuna nan̄kaamas kakaram ajasmiayi.

21 Tuma asa “nekas Yus tana nuna páchitsuk umiktatui” tu enentáimpramiayi.

22 Nu asamtai Yus “pén̄keraitme” tímiayi.

23 Tura Yus nekas enentáimtamunam Yus “pén̄keraitme” tana nu aya Apraámnak áatrachmaiti.

24-25 Antsu incha túramji. Iisha núnisrik ii Uuntrī Jesus nekas enentáimtakrinkia Yus incha “pén̄keraitme” turamtatji. Jesuska ii tunaar̄in jarutramkatniun surunkamiayi. Tura nujaī Yus in “pén̄keraitrume” taku Jesusan ataksha iniantkimiayi.

5

Yus “pén̄keraitme” túramkurin shíiraiti

1 Tuma asamtai Yus nekas enentáimtakrin Yus “pén̄keraitme” túramji. Nujaī iisha Yusjaī shiir nawamnaikiar pujaji. Núnaka ii Uuntrī Jesukrístu ni jakamujaī sumartamkamiaiji.

2 Tura Nii shiir enentáimtakur Yusaī weankaitji. Tura Kristu jarutramkakrin Yus ti anen̄maji. Tura tuke anenma asakrin Niijjaī métek shiir ajastin nákakur waraaji.

3 Nu arantcha yamá ititurchat pujayatrik nu ititurchatjaī unuimiartatji tusar waraaji. Katsuntratniuncha unuitiamji.

4 Tura nu unuimiarar ii katsuntram paant átatui. Tura nuyá Yus ti shiir awajtamsattajnia nuka shiir enentáijjaī nákastatji.

5 Nu ti shiir enentáimsar nákamujaī anan̄mamtsuji. Yuska ni Shiir Wakan̄in ii enentáin̄ pujurtamuk ni anen̄kartutair̄in ti paant awajturmajji. Tuma asamtai Yus túratin nákaunia nu imiá nekas wainkiattaji.

6 Iikkia pen̄ké uwemprachmin asakrin tsawant jeamtai Kristu ashí shuara tunaar̄in jarukmiayi.

7 Shuar chíkich shuaran uwemtikratniun ¿jaruktatuak? Pén̄ker shuar ain̄ jarukchattawai. Kame ti pen̄keraitkiuin̄kia jarukchaintiash.

8 Antsu ii tuke tunáa árin̄in̄ Kristu jarutramkamiaiji. Nujaī in ti anen̄majnia nuna ti paant iniakturmajji.

9 Tura ni numpejaī tunaar̄incha awajsamu asar imiá nekas Yus asutiámatniua nuyá uwempraitji.

10 Yusa nemasrī áyatar Yusa Uchirī jakamujaī yamaikia Yusjaī shiir nawamnaikiar pujaji. Nu arant nuik̄ia Kristu tuke iwiaaku asa iijjaī tsanīn̄kiu asa ashí yajauchinmaya uwemtikramar tuke shiir awajtamsattaji.

11 Ii Uuntrī Jesukrístu jakamujaī Yusjaī shiir nawamnaikia asar ti waraaji.

Atansha tura Krístusha túrawarma

¹² Ayu. Yámankamtaik emka áishman Atan nin̄ki tunaan túramtai nú tunaajaj ashí shuar tunaarintin ajasarmiayi. Tura ashí tunaarintin ajasar mash jákatin ániawai.

¹³ Akupkamu atsakuin̄kia umirkachma nekaachminiaiiti. Tuma ain̄ Muisais akupkamu atsajsha tuke tunaan túrin ármiai.

¹⁴ Atan̄ pujumia nuyá Muisais tuke akupeatsain̄ shuara tunaari paantcha ain̄ ashí shuar tunaan túrawar jákarmiayi. Kame ni tunaari Atanna áintsachauyayi. Atanka Yus akupkamu paant ujakman umirkachmiayi. Antsu nu shuar Yus akupkamu paant nekainiachiatan̄ tunaan túrin ániak jákarmiayi. Tura Atanka Krístujaj apatkar enentáimpratai.

¹⁵ Atan̄ tunáa túramia nujaj apatka iisam, Yus in tsankatramaj nuka nan̄kaamas pen̄keraiti. Kame Atan̄ nin̄ki tunaan túramujaj ashí aents untsurí armia nu, tunaarintin ániak, jákarmiayi. Tura Yus in ti anenma asa chikichik áishman̄jaj nuna nan̄kaamas tí shiiran tsankatramaji. Jesukrístujajin̄kia untsurí shuaran uwentikrar tí shiiran tsankateawai.

¹⁶ Atanka tunaari imiá yajauch ain̄ nuna nan̄kaamas pen̄keran Yus tsankatramkaitji. Iis, aya chikichik tunaan túramujaj aents sumamawarmiayi. Antsu Yus uwempratniun tsankatramaj nújajin̄kia ti untsurí tunaan asakáruiti, tura “pen̄keraitme” túramji.

¹⁷ Chikichik áishman̄ tunaan túramujaj aents jákatin ániawai. Tura nuna nan̄kaamas chikichik áishman̄ Jesukrístu túramujaj ti shiir pujustatji. Kame Yus ti anenma asa ii pen̄ker túratsriniñ “pen̄keraitrume” túramji. Nu asantai yamaram iwiaakmanum kakaram ajaji.

¹⁸ Atan̄ tunaan túramujaj ashí tunaarintin ajasar jákarmiayi. Núnisan̄ Jesukrístu pen̄ker túramujaj ashí shuar Yus “pen̄keraitme” timia nuka yamaram iwiaakmajaj tuke pujusartatui.

¹⁹ Núnisan̄ chikichik áishman̄ umirkachmajaj untsurí tunaarintin ajasarmiayi. Tura chikichik áishman̄ umirkamujaj untsurí shuar pen̄ker awajnasarmiayi.

²⁰ Wats, tunáa ti paant atí tusa Yus ni akupkamurin̄ susamiayi. Túrasha ti tunáa pampaakui Yus nuna nan̄kaamas waitnentramak nu tunaan asakátramji.

²¹ Shuar tunaan túrin ásar jákatin ármiai. Tura núnisan̄ ii Uuntri Jesukrístu túramujaj Yus in “pen̄keraitrume” túramkurin̄ iisha tuke iwiaaku pujustiniaitji.

6*Krístujaj jaka asar tunáa túrachminiaiiti tura Krístujaj tsanin̄kiu asar iwiaakuitji*

¹ Núnisaitkiuin̄kia Yus nan̄kaamas waitnentrampratai tusar ¿tunáa túrattajik?

² Pen̄kea. Warí, iikia tunáa túrashtin jákaitji. Jáka ¿itiurak tunaan túramniaiti?

³ Imianniutikia Krístujaj tsanin̄kiu asar imianir Niijjaj métek jaka áintsar aji.

⁴ Tura imianir Krístujaj jaka áintsar métek iwiarasuitji. Tura Yus ti kakaram asa Krístun jakan iniantkimia núnisan̄ incha nu kakarmajaj yamaram enentáijaj pen̄ker wekasatniun iniantamkimiaji.

⁵ Krístujaj tsanin̄kiu asar Niijjaj métek jaka áintsan̄ketji. Tura núnisan̄ Niijjaj métek nantaktiniaitji.

⁶ Yaunchu enentáimtain̄kia Krístujaj métek jaka asantai ii yajauch wakerutain emen̄kátrutmakuitji. Tuma asantai yamaikia pen̄ké umirkashtiniaitji.

⁷ Kame ¿jáka itiuurak tunaan túrat? Yamaikia an̄kant ajasuitji.

⁸ Iisha nekas Krístujaj jákaitkiurkia Niijjaj métek tuke iwiaaku pujustin enentáimji.

⁹ Kame Krístuka chikichí jaka nantakin asa atakka jákashtatui. Túmaitkiui atakka ajakrachminiaiiti.

¹⁰ Krístu chikichí jaka asa ashí tunaajaj itit awajsachmin ajasuíti. Tura yamaikia iwiaaku pujá asa Yúsan shiir awajsatniun pujawai.

¹¹ Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukrístujai tsaniñkiu asarum iwiaaku pujakrum Yus shiir awajsatarum.

¹² Nu asantai tunaaka ayashmijn akuptamkashtiniaitrome. Ayashí wakeramuri umirkashtiniaitrome. Ankantaitrome.

¹³ Atumi ayashí tunaan túrat tusarum ikiasairap. Antsu jakamunmaya nantakin asarum Yus wakeramu túratin surumaktarum. Tura ayashmisha aya péñkernak túratí tusarum Yus íktustarum.

¹⁴ Akupkamu umirkatniujai iwiaaku pujatsrume. Antsu atumin Yus ti anenma asa yamaram iwiaakman suramsaitrome. Tuma asantai yamaikia tunaaka nupet-tamkachminiaiti.

Tuke umireajnia nuna takarniurintji

¹⁵ Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Péñkea.

¹⁶ Tuke umireajnia nuna takarniurintji. Nuka nékatsrumek. Tura ni takarin ajasam umirkatniuitme. Tuma asantai tunáa umirkurkia ni takarniurintji tura umirkar jakattaji. Tura Yus umirkurkia péñker wekasattaji.

¹⁷ Atumsha yáunchuka tunáa umirniuiatrum ikiukrum yamaikia nekas chicham antukurmena nu nekas atumí enentáijjai umirkaitrome. Tuma asantai Yus ti yu-minsatniuiti.

¹⁸ Yamaikia tunaanumiá ankant ajasu asarum ti péñker wekasatniunam pachiinkitrome.

¹⁹ Paant nekaak tusan takarniun pachisan tájarme. Wats, yaunchu atumí ayashí muíjmiainian tura ashí yajauchin túrat tusarum tsankamakmarme. Núnisrumek yamaikia atumí ayashí péñkeran túrat tusarum tura tuke Yusjai shiir wekasat tusarum tsankamaktarum.

²⁰ Atumsha tunáa umirniuyarme nuikia péñker wekaichauyarme.

²¹ Tura nújajsha ¿warí péñkerna yáinmakmarum? Iista, yamá natsanmainchakait. Nusha jákatniunam júawai.

²² Antsu yamaikia, tunaanumiá uwempra asarum Yus umirniuitrome. Antsu júka Yusjai shiir wekasatniunam júawai tura nuyá tuke iwiaaku pujustatrome.

²³ Tunáa takarkumka tuke jákatniun akirmaktatui. Antsu Yuska iikia takaatsriniñ penké ántar tuke iwiaaku pujustinian suramsattaji. Ii Uuntri Jesukrístujai tsaniñkia pujá asakrin nuna túrutmattaji.

7

Akupkamujai ankantaitji

¹ Enentáimpratarum yatsuru. Jáka akupkachminiaiti. Aya iwiaakna nu akupkamni-aiti. Nu paant nékatsrumek.

² Wats, nuwá nuátkamu ni aishri iwiaakkui niijjai tsaniñ pujustiniaiti. Tura aishri jakamtaí ankant ajawai.

³ Tuma asantai aishri iwiaakain chíkich áishmanjai tsaniákka tsanirmawai. Tura ni aishri jakamtaí chíkich áishmanjai páchitsuk nuatnakminiaiti tura nuikia tsanirmatsui.

⁴ Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jaka áintsarum ajasuitrome. Túrakrum Krístujai nuatnaikiatin áintsarum ankantaitrome. Niisha jakamunmaya nantakniuiti. Yamaikia Krístunu ajasu asar Niijjai tsaniñkiar Yus wakeramu péñker túratniuitji.

⁵ Yaunchu wakerutai umirniuyaj nui akupkamu enentáimtusar nuna nankaamas yajauchia nu wakerimji tura jákatniunam juramkimji.

⁶ Antsu yamaikia akupkamu emettachmin jaka asar ankant ajasuitji. Túrunar akupkamu yaunchu áarma nu iniaisar yamaikia Yusa Wakaníjiaj tsańiakur yamaram iwiaakmajaj péńker wekasamniaitji.

Winia enentáiruj tunáa ana nu

⁷ Núnisaitkiuinikia “Akupkamu yajauchiiti” ¿titiajiash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuinikia wakerukchaajaj.

⁸ Tura nu akupkamun enentáimtakui winia enentáiruj tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai.

⁹ Yaunchu akupkamun nékachkun nánkamsanak enentáimniuyajaj. Tura akupkamun nekaan tunaan nekaamjai tura jaka áintsanak ajasjai.

¹⁰ Tuma asamtai akupkamujaj péńker wekasatniuitiatan umirkatniun tujintiaku aya jákatniunam jurukni.

¹¹ Kame tunáa wakerutainkia nu akupkamujaj anankrua péńker iwiaaku pujustinian surutsuk nu akupkamujaj jákatniunam jurukmiayi.

¹² Tuma asamtai akupkamuka Yusna asa ti penkeraiti. Yajauchichuiti.

¹³ Nuikia ¿pénkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péńker akupkamujaj jákatniunam jurukmiatai, nujaj Yus “tunáa wakerutai imiá yajauchiiti” tusa paant awajsamiayi.

¹⁴ Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajaj.

¹⁵ Kame túrajna nuna itiurchat enentáimtajaj. Péńker túratniun wakeraj nuna túratsjai. Antsu nakitiaj nuna nekaska túriniaitjai.

¹⁶ Akupkamu péńkeran nekaan umirkatniun wakerajaj. Túrayatnak umirchaitjai.

¹⁷ Tuma asamtai wíchaitjai tunaan wakerakun túrajna nuka. Antsu winia enentáiruj tunáa wakerutai pujá asa nu túrumtikriniaiti.

¹⁸ Yaunchu enentáimtai winia enentáiruj pujana nu penké yajauchiiti. Nuna ti paant nékajaj. Tuma asamtai péńker túratniun wakerayatnak penké tujintiajai.

¹⁹ Péńker túratniun wakerayatnak túratsjai. Antsu tunaan nakitiaj nuna túrajaj.

²⁰ Nu asamtai nakitiaj nuna túrakun wíchaitjai antsu winia enentáiruj tunáa wakerutai pujana nu túriniaiti.

²¹ Júnisaiti. Péńker túratniun wakerakun aya tunaan ínkiuajaj.

²² Nekas enentáijiaj Yusa akupkamurin wakerajaj.

²³ Tumaj yaunchu enentáimtai winia enentáiruj pujurtak nupettawai tura nekas wakeraj nuna akirturui.

²⁴ Maa, ti waitiajai. Jú ayash wakeramujaj jákatniunmaya ¿yaki uwemtikrurat?

²⁵ Yuska ii Uuntri Jesukristujaj túrutmamniaitji. Tuma asamtai Yúsan ti yuminkiajai. Ayu. Winia enentáirjaj Yus akupkamun umirniuitjai. Antsu winia ayashrujaj tunaan umireajaj.

8

Yusa Wakaníjiaj péńker wekasatin

¹ Jesukristujaj tsańinkiarun Yuska “tunaan túrawar jákatniunam wémin áiniawai” tatsui. Nu shuar ni ayashí wakerana nuna umirtsuk Yusa Wakaní wakerana nuna umirainiawai.

² Jesukristujaj tsańinkiu asakrin Yusa Wakaní nekas iwiaaku awajtamsaitji. Tuma asamtai tunáa túratniunmaya tura jákatniunmayasha ankant ajasuitji.

³ Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu

tujinkiamia nuna Yus túraití. Ni Uchirín ayashtin awajas tunaan jarukat tusa akupkamiayi. Tura nujají ayash tunáa wakeramun nupetkamiayi.

⁴Túramtai ii yamaikia ayash wakerana nu umirtsuk tura Yusa Wakaní wakeramu túrar akupkamu tana nu umirniuitji.

⁵Ayash wakeramun umirainia nu, ayashnia nunak enentáimtuiniawai. Antsu Yusa Wakaní wakeramun páchinia nuka Yúsnan enentáimtuiniawai.

⁶Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjají shiir nawamnaikiar tuke pujusartatui.

⁷Aya ayash wakeramun enentáimtuinia nú shuar Yusa nemasrj áiniawai. Yus akupeamun nakitiainia ásar ni taman umirkatniun penké jeainiatsui.

⁸Tuma asamtai shuar ni ayashí wakeramurj warareakka Yúsán shiir awajsachmini-aiti.

⁹Tura átumka ayash wakeramu umirtsuk tura Yusa Wakaní pujurtamkurmin ni wakeramu enentáimtiniaitrueme. Ashí shuar Krísturtin ainia nu ni Wakanin takaku áiniawai. Takakchaitkiunka nuikia Krístunuchuiti.

¹⁰Tura Kristu atumin pujurtamkurminkia atumí ayashí tunaajají jakamnia ajn Yus “pénkeraitme” túramu asamtai atumí wakanínkia nekas tuke iwiaakuiti.

¹¹Yus Jesukrístun jakan iniantkimiayi. Tuma asamtai ni Wakaní atumí enentáin pujurtamkurminkia Jesusan iniantkimia núnisanu nu Wakanjají yamaram iwiaakmajají iniantamkittiarne.

¹²Tuma asamtai, yatsuru, ayash wakeramu penké umirkashtiniaitji.

¹³Ayash wakeramu umirniuitkiurmeka jakattarme. Antsu Yusa Wakaní pujurtamkurmin ayash wakeramu nupetkarmeka pénker wekasarum nekas iwiaaku áatrume.

¹⁴Ashí shuar Yusa Wakaní timiajají métek wekainia nu, nu shuar nekas Yusa uchirínti.

¹⁵Yusa Wakaní in pujurtamkurin Yusa uchirí ajasar sapijmiatsuk Yusají weamkar “Aparú” tímimniaitji.

¹⁶Nu Wakan “nekas Yusa uchirínme” ii enentáin túramji.

¹⁷Tura ni uchirí ajasu asakrin Yus tímia núnisanu ashí Níiniun suramsattaji. Krístun ashí susattana núnisanu incha suramsattaji. Yamái Krístunu takaakur wáitiakrikia ukunam Krístujají métek ti shiir awajnastatji.

¹⁸Maa, yamá ti wáitiakrishá ukunmanka nayaimpiniam ti shiir pujakur nu wáitsamu kajinmatkittiaji.

¹⁹Tsawant jeamtai Yus ashí ni shuarin Niijjají métek ti shiir awajsartatui. Nuin nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu írúnna nu ti nákainiawai.

²⁰Ashí Yus najanamia nuna yámankamtaik ti pénker najanamiayi. Túrasha yajauch ajasmiai. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsan̄katkamiayi. Tuma asamtai iwiarnartin tsawantan nákwai.

²¹Nu tsawantají ashí Yus najanamu emesnartinniumiá uwemprartatui. Tura ashí Yus najanamuka shuar Yusa uchirí ajasarua nujají métek shiir awajnasar an̄kant ajasartatui.

²²Yamaisha ashí Yus najanamu ainia nu, nuwá jatema wáitia nunis ti wáitiainiawai.

²³Yus najanamuka ashí wáitiainiawai. Iisha Yusa Wakaní takakiatar ti wáitijají. Tura Yusa Wakaní takakur ashí Yus suramsattajnia nu nékaji achiktin. Tuma asar nekas Yusa uchirí paant awajnastin tsawant nákwai. Nuisha ii ayashísha an̄kant awajnastatui.

²⁴Nu tuke enentáimtuki wéakur takamtsuk uwemprattaji. Yamái nu wáinchiatar tuke nákwai. Warí, ¿wáinjinia nu nákwajik?

²⁵Tuma asar tuke waincha asar katsuntrar nákwai.

²⁶ Nu arantcha ii kakarmachu nekapeakrin Yusa Wakaní yáinmaji. Kame Yus áujatniusha nékachkurin in yáinmaji. ¿Warí seattajⁱ tura itiur seatjik? Nu nékatsji. Tura itiurchat pujakur ti wáitiakrincha Yusa Wakaní in áujturmajj.

²⁷ Tura Yus ii enentáin enentáimtaj nuna nékaiti. Tuma asa ni shuarj asakrin ni Wakaní ni wakeramujaj métek seatramkurin ántawai.

Ti nupetmakuitji

²⁸ Yus anea asakrin ashí nankaatamjinia nujaj Yus pujurtamji. Tura nujaj péñker awajtamji. Nu paant nékaji. Tura Ni wakerimia núnisan Ní shuar awajtamsaitji.

²⁹ Yámankamtaiknumia in nekarmak ni Uchirí Jesukristujaj métek ajasat tusa achirmakmiaji. Nujaj Yusa uchirí untsurí ajasji. Tura Kristu ii iwiairinti.

³⁰ Tura Yus achikmia nuna Niiniu awajsamiayi. Tura nu shuaran “péñkeraitrume” tímiayi. Tura ti shiir awajsamiayi.

³¹ Wats, nuikia Yus in yáinmakrin ¿yaki in nupettamkattaj?

³² Ni Uchiríncha suritramkachmiaji antsu in jarutramkat tusa akupturmakmiaji. Tura asa ni Uchiríjaj métek ti shiira nuna ashí suramsashtatjik.

³³ Yus achikmia nú shuaran ¿yaki sumamtikiat? Yus Ápaka “péñkeraitrume” tiniu asa péñké túrashtatui.

³⁴ Tura ¿yaki “jiniun apenáti” titi? Warí, Kristu péñké túrashtatui. Antsu nu shuaran jarukmiayi. Tura nantaki Yusa untsuurinj ekemas in áujturmajj.

³⁵ Kristu ti anenma asakrin in akantamkitin atsawai. Wáitiakrishá, itiurchat ínkiuakrishá, shuar áintramkurnishá, tsukamakrishá, entsatai atsakuishá, tsúumainjaishá, tura mantamnakrishá, nujaj “Kristu anentsui” tíchamniaitji. Nuka Kristu anenkrattairiya akantamkitin jeatsui.

³⁶ Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmajj.”
Tu áarmaiti.

³⁷ Tuma ajn Kristu in anenma asakrin Niijaj ti nupetmakuitji.

³⁸ Kristu anenkrattairiya akantamkitin péñké atsawai. Nuna ti paant nékajaj. Jákatniusha, iwiaakmasha, nayaimpinmaya suntarsha, ashí nayaimpinmasha tura nunkanmasha akupin ainia nusha, yamá írunna nusha, ukunam átatna nusha,

³⁹ yakí írunna nusha, nunká írunna nusha, kame ashí Yus najanmu írunna nusha Yusa anenkrattairiya péñké akantamkichminiaitji. Yusa anenkrattaisha ii Uuntri Jesukristu túrunamujaj paant wainji.

9

Yus Israer-shuaran ni shuarj arti tusa achikiarmiania nu

¹ Yamái tájana nu Kristu shuarj asan imiá nekasan wáitrutsuk tájaj. Winia enentáirsha tura Yusa Wakanísha “nekas tawai” turutainiawai.

² Israer-shuaran waitnentakun ti kuntuts enentáimjai.

³ Wíishuar áiniakui Krístunmaya kanakin yuminnaraintjai nujaj wíishuaran yáinminiaitkiunka.

⁴ Israer weeá shuar áiniawai. Tura ni uchiría áinis Yus achikiaruiti. Yusa wincharisha niijaj pujumiayi. Yaunchu Chicham ni weatríjaj iwiamuncha tura Muisais akupkuncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsanatkattana nunasha ujakmiayi.

⁵ Ni weatrín Yusan ti péñker enentáimtin irunmiayi. Krístusha aents ajas nú shuarum akiiniamiayi. Krístuka Uunt Yus asa tura ashí akupin asa Nínki tuke shiir awájastí. Núnisan atí.

⁶ Kame Yus ashí Nii timia nuna Israer-shuaran súsachmataisha nujaj “Yus timia nu uminkiachuiti” tíchamniaiti. Antsu junis enentáimpratniuiti: ashí Israer weeá áiniayatan Yusjaj íismaka ashí nekas Israer-shuar ániatsui.

⁷ Núnisan Apraám weeá shuarsha ashí nekas ni shuar ániatsui. Iis, Yus Apraáman tímiayi “Aya Isak pampanma amee shuarum ártatui.”

⁸ Nujaj páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajaj métek akiinia nu nekas Apraám weeá shuar ániak Yus timian wainkiattawai.

⁹ Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

¹⁰ Nu arantcha, ii weatrj Isaka nuwe Ripikia jimiampramiayi.

¹¹⁻¹³ Nu uchisha akiiniainiatsain pénkernasha tura yajauchincha túruiniatsain Yus Ripikian tímiayi: “Iwiairia nu ni patain umirkattawai.” Ataksha núnisan Yus ni Papiirin chichak “Jakupan aneakun Esaun nakitramjai” tímiayi. Nujajinkia páantaiti. Yus wakerak aya ni enentáijjain shuaran achikminiaiti. Nu shuar túrunamu enentáimtusuk túramniaiti.

¹⁴ Túriniaitkiui “Yus péinkerchaiti” ¿titiyajash? Atsá.

¹⁵ Yus Muisaisan junis tímiayi:

“Wi wakerajna nunak waitnentrattajai.”

¹⁶ Tuma asamtai shuar ti wakerakuisha tura kakaram takaakuisha aya nujaj Yus waitnentatsui. Antsu aya ní enentáijjain wakerak waitnentawai.

¹⁷ Ataksha Yus-Papinium tawai “Yus Ejiptu nunka akupniurin tímiayi

“Ámijjaj ashí nunkanam winia kakarmarun nekaawarat tusan uunt akupniun awajsamjame” tímiayi” tawai.

¹⁸ Tuma asamtai Yus Nii wakera nuna waitnentawai. Túrasha Ejiptu akupniurin túramia núnisan Nii wakera nú shuaran enentáin kátsuram awajtawai.

¹⁹ Tura “Núnisaitkiuinikia ¿urukamtai shuaran Yus súmamtikia? turutchatapash. Nii wakerakuinkia ¿itiurkattajik?” turutchatapash.

²⁰ Warí, aents asam Yusjaj ¿tunaiminkiaitiam? Nuwaj pininkian nájankui núweka “¿urukamtai junis najatam?” tíminkiait.

²¹ Nuwaj wakerakka nu nuwejaj amamkuncha tura yukunnasha nusháa takakmas-tinian mai najanachminkait.

²² Yajauch shuar ti asutiátin ániak emesnartinnium wétin ániawai. Yus nu shuaran asutiá ni kakarmarin iniaktustaj tayat ti katsuntramiai.

²³ Tura katsunteak ni anenkrattairin iniakmasmiayi. Nú arant nuikia in waitnentrak shíir enentaijjaj pénger awajtamkur ni anenkrattairi ti paantchakait. Nekas shíir enentaijjaj pénger ajasat tusa yaunchu iwiartampramijai.

²⁴ Tura incha, Israer-shuarnumiasha Israer-shuarchanumiasha, ni shuari ajasat tusa achirmakmijai.

²⁵ Núnisan yaunchu Yúsnan etserin Useas Yus-Papinium tawai:

“Wíishuarchan Wíishuar awajsattajai. Aneachmancha aneamu awajsattajai.

²⁶ Tura Yus “Wíishuarchaitrume” tímia nú shuaran “Nekas iwiaaku Yusa uchiríniuitrume” ukunam títiatui.”

Tu áarmaiti.

²⁷ Antsu Isayas Israer-shuaran páchis tímiayi:

“Israer weeá ti nankaamas untsurí áiniayat penké ishichik uwemprartatui.

²⁸ Kame Yus yajauchin akupkataj timia nuna takamtsuk wárik umiktatui.”

²⁹ Núnisan Isayas ataksha tawai:

“Ashí akupeana nú Yus in waitnentrachkurninkia Sutuma péprusha Kumura péprusha takamtsuk jákarmia núnisan jákaaji.”

Israer-shuar uwempratin chichamjai tujinkiarmania nu

³⁰ Wátsek, Israer-shuarcha, Yus iisam ni túramurijjai “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiayi.

³¹ Antsu Israer-shuarka pénker akupkamun umiktinian wakeruiniayatan tujintiainiakui nujai pénker ajastinian tujinkiarmai.

³² ¿Urukamtai tujinkiarma? Yúsan enentáimtutsuk aya ni pénker túramujai pénker ajastinian enentáimtuiniak tujinkiarmai. Krístun enentáimtustinian nakitiainiak shuar kan kapen awankemtuktinia núnisan iniararmai.

³³ Tura kaya tukumkar iniarchamniakait. Nu asamtai Yus-Papinium Krístun pachis tímiayi:

“Seun péprunam kayan ikiujai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsaarchartatui” tawai. Tu áarmaiti.

10

¹ Yatsuru, Israer-shuar uwemprarat tusan ti wakerakun Yúsan áujtajai.

² Maa, uwempratniun nékachiatan Yúsan shiir awajsatniun ti wakeruiniawai.

³ Túmaitiat shuáran Yus pénker awajsatniun nékachu ásar aya ni pénker túramujain pénker ajastinian wakeruiniawai. Tuma ásar Yus pénker enentáimtamujai pénker ajastinian jeacharai.

⁴ Aya Kristu enentáimtamujai pénker ajastin asamtai akupkamu umirkatniujai pénker ajastin ántrai.

⁵ Akupkamujai pénker ajastinian pachis Muisais tímiayi: “Nuna takamtsuk umirniuka nujai pénker pujustatui.” Tu áarmaiti.

⁶ Antsu Krístun enentáimtus pénker pujustinian pachis shuar juna tíminiaiti: “Ti itirchata áinis “¿Yaki nayaimpiniam waka Krístun itiarat?” tiirap,” tawai.

⁷ Tura ¿Yaki jakamunam we Krístun iniantkit?” tiirap” tawai.

⁸ Tura junasha tawai: “Yus-Chicham yúpichuch umirkamniaiti. Aya enentáimjai enentáimtakum wenumjai ujaktiniaitme.” Nu Chicham “Yus enentáimtustiniaiti” tawai. Nu Chicham take étsereaj núiti.

⁹ Yus Jesusan jakan iniantkimia nu enentáimtakum tura wenumjai “Jesus winia Úntruiti” takum uwemprattame.

¹⁰ Kame Kristu enentáimtakmin Yus “pénkeraitme” turamtatui nuyá wenumjai “Jesuskrístun enentáimtajai” takum uwemprattame.

¹¹ Ataksha Yus-Papinium tawai: “Nin shiir enentáimtuinia nú shuar natsaarchartatui.”

¹² Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí pénkeran súawai. Tura ashí métek ni Úntrinti.

¹³ Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti.

¹⁴ Tura Krístun enentáimtuiniachusha ¿itiurak Nin áujsarar? Tura Krístun nékainiachusha ¿itiurak Nin enentáimtusarar? Tura Yus-Chicham ujaachmasha ¿itiurak nekaawarar? Shuar Yus-Chichaman ujaktiniaiti.

¹⁵ Tura akupkachmasha ¿itiurak Yus-Chichaman ujakarar? Tura shuar Yus-Chichaman etserkataj tusa wéana nuna Yus-Papinium tawai:

“Shuar Yusa Shiir Chichamen etserki weana nu ti shírchakait.”

¹⁶ Tura ashí shuar uwempratin chichaman ántuiniayatan umirainiatsui. Isayasha yaunchu aak tímiayi:

“Uuntá, ¿yaki ii étserman antukaruit?”

¹⁷ Paantchakáit. Kristu túramu ujakam antuktiniaiti. Tura antukar Krístun shiir enentáimtustiniaiti.

¹⁸ Tura ¿Israer-shuar Yus-Chichaman antukcharu ásarān Yúsan enentáimtuscharma? Atsá. Warí, Yus-Papí tawai:

“Ashí nunkanam ni chichame antunkaiti.”

¹⁹ Tura “Israer-shuar nu chichaman antukariat ¿paant nekaawarmaashi?” inin-trusminiaiti. Tura nekas nekaawarmai. Tuma asamtai Muisais tawai:

“Israer-shuarchan nékachu ainiana nuna shiir awajeakun akajkattajrume.”

²⁰ Nuyá Isayas ashamtsuk áarmiayi:

“Eatkacharua nu wáitkiarmiayi. Inintruiniatsaiñ wantintiukmiajai.”

²¹ Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

11

Chíkich Israer-shuarsha uwemprartatui

¹ Tura Israer-shuar Yúsan umiiniachkui ¿Yus nin iniaisaashit? Péñkea. Warí, wi Israer-shuarchakaitiaj. Wi Apraámsha tura Pinjamin weeá akiiniachukaitiaj.

² Yámankamtaikniumiā Yus Israer-shuaran ni shuar arti tusa achikiu asa yamaikia iniaisashtatui.

Ti yaunchu Yúsnan etserin Erías Israer-shuaran pachis Yúsan áujtak tímiayi:

³ “Untrú, namañ awasar Yus sútaincha mash saakiarai. Áminiun etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiai.

⁴ Tura Yus ayak tímiayi “Siatí mir (7000) áishmankan Israer-shuarnumiā apujtum-saruitjai. Nu shuar ántar-yus Páaran tikishmatrachu áiniawai” tímiayi Yus.

⁵ Núnisañ yamaisha Yus ti waitnentainia asa ashí Israer-shuarnumiā ni shuarin achikiuiti.

⁶ Yus ni enentájjiañ waitnentak túraiti. Nú shuar péñker tura asamtai waitnentatsui. Yus aya péñkernak waitnentakka nuikia waitneñkratchainti.

⁷ Ayu. Nuikia ashí Israer-shuar péñkeran eakarū aīñ aya Yus achikmia nú shuar wainkiarmiayi. Antsu ni achikchamuka nuna nankaamas nekaachmin ajaras kusurua núnin awajnasarmiayi.

⁸ Yus-Chichamsha núnisañ tawai: “Yus enentáimchatai enentáin súsarmiayi. Wáinmashtai jñincha tura ántushtai kuíshniasha súsarmiayi. Yamaisha núniskete.”

⁹ Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

¹⁰ Ni enentáin kusurarti tura wainmakcharti. Itiurchat ana nusha, káarak kijinia áintsañ, tuke áentskatá.” Tu áarmiayi.

Israer-shuarcha uwempramin áiniawai

¹¹ Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarcha yamaikia uwempratin jeainiawai. Nujai Israer-shuarsha nujai métek uwempratniun enentáimsartatui.

¹² Israer-shuar umirkachmajai ashí shuar, Israercha ainia nusha, uwempramnia ajararmiayi. Nuna nankaamas Israer-shuar atak Yúsan enentáimtuiniak uwemprarmatai nujai ashí shuar ti péñker ajasartatui.

¹³ Israer-shuarchatirmea, atumin uwempratin chichaman etserkatniun Yus akup-kamu asan nu takatan ti takaajai.

¹⁴ Nuna túrakun átum uwemprarmena núnisañ niisha, wíshuar ainia nu, nuna ísar uwemprarat tusan wakerajai.

¹⁵ Kame Israer-shuaran iniaisamujai ashí shuar Yusjai shiir nawamnaikiarmatainkia nuikia atak nin achikmajai jakamunmayā nantaktinia áintsañ ti shiir átatui.

¹⁶ Emka apatuk ana nu Yus súakur yuminsamuitkiunka nuikia ashí apatkunam Yus yuminsamuiti. Núnisan̄ numí kan̄kapé péñkeraitkiunka numi takamtsuk péñkeraiti.

¹⁷ Yuska chíkich chíkich Israer-shuaran, numí kanawen̄ tsupik ajapniua áinis, ini-aisamiayi. Tura nuyá atumin niisháa numinmaya árumniñ nu numiniam anujtamkamarme. Nujai péñker numijjai tsanínkrum nu kakarmajai iwiaakrume.

¹⁸ Tura kanawē tsupikmajai nan̄kaamantu enentáimtumasaip. Warí, ame kakarmarmijjai numi wajatsui antsu ni kakarmarijjai iwiaakme.

¹⁹ “Túrasha wi anujnaktinian kanawen̄ tsupikchamka” tíchainmeash.

²⁰ Nekasaiti, túmaitiat niisha Yúsan enentáimtuiniachu ásar tsupinkiarmaiayi. Atumsha aya Yus nekas enentáimta asam anujnakuitme. Tuma asamtai nan̄kaamantu enentáimtumatsuk aya anearta.

²¹ Yus nekas kanawē péñkercha túrawarun tsupikkia páchitsuk amincha tsupir-makchamniakait.

²² Iista, Yus atumjai ti tsánkai ti tura Israer-shuar umichua nuna ti wari asutiaiti. Tura péñker wáinmamkata. Yus tuke nekas enentáimtachkurminkia atumniasha páchitsuk tsupirmaktatrum.

²³ Núnisan̄ Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai.

²⁴ Túram Israer-shuarcha asam niisháa numinmaya tsupikiar penké numiniam anujnakuitrum. Nuna tura asa nekas ni kanawē tsupikia ajapamun páchitsuk atak anujkamniaiti.

Israer-shuarsha uwempratin áiniawai

²⁵ Yatsurú, nan̄kaamantu enentáimtumaraipurum tusan yaunchu nekaachman ujaajrume. Júiti: Israer-shuarnumiánka chíkich chíkich Yúsan nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi.

²⁶ Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seúnnumiá Uwemtikkiartin tátatui. Israernumiá tunaan asakátrattawai.

²⁷ Jú Chichamnasha niijjai najanattajai: ni tunaarín asakturtatjai.”

²⁸ Uwempratin chicham atumsha nekaatarum tusa Israer-shuaran Yus ni nemasri awajsaruiti. Tura yaunchu ni weatrín achikiu asa nincha tuke anenawai.

²⁹ Kame Yus amáa nuna ataksha ataatsui. Shuáran achiksha atak iniaiyatsui.

³⁰ Átumka yaunchu Yus umirchauyarme. Tura yamaikia Israer-shuar umirainiachkui Yus atumin waitnentrarmarme.

³¹ Núnisan̄ nii yamaikia Yúsan umirainiatsui. Tura atumin waitnentramparamum núnisan̄ nincha waitnentrattawai.

³² Nujai ashí métek sumamtikiak métek waitnentrar uwemtikrattawai.

³³ Maa, Yus imiá shiirchakait. Tí nekachukait. Ni túramu penké nekaachminiaitji.

³⁴ “Uunt Yus enentáimmian ¿yaki neka? Tura ¿ya Nin unuiniaruit.

³⁵ Yaki Nin péñkeran susa shiira nujai yapajniuit?” Tu áarmaiti.

³⁶ Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnástí. Núnisan̄ atí.

12

Yusaj surumaktarum

¹ Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsan suu ármiai. Atumsha núnisrumek iwiaaku árumna nuñ Nii túrutataj taku túrutati tusarum tuke enentáijjai Yusaj tsan̄kamaktarum. Yusaj ísam ti shiir atí tusarum túratarum. Nu túrakrumka pátatkechu antsu ti nekas enentáimjai Yus shiir awajin átatrum.

² Chíkich shuar aya jú nunkanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsankatkatarum. Nu túrakrumka Yus wakera nu nekaattarme. Ní wakeramusha yajauchichuiti antsu imiá nekas péñkeraiti.

³ Yus winia waitnentrak akatar akuptuku asamtai júna tájarme. Atumek wíkitiajtai tu enentáimtumatsuk jeamna nujaj métek enentáimtumasta. Yus enentáimta asakmin takastinian suramsana nujaj apatkam nekaamata.

⁴ Ii ayashí chikichkiitiat ii muchitmarj untsurínti. Tura métekrak muchitiániatsui.

⁵ Núnisrik iisha, Yus-shuarti, ayashí muchitmarjya áintsarik untsuríitiatar chikichik ayashtinia áintsar takaaji. Nusha Krístujaj tsanínkiu asar áitkiamuitji. Túramu asar nuamtak atsumnaiyaji.

⁶ Ii túratniun Yus nusháa nusháa súramji Nii wakera nujaj métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuin_kia Yus enentáimtakum unuimiarmam nujaj métek etserkata.

⁷ Chíkich shuar yáintinian Yus suramsaitkiuin_kia nekas enentáimjaj yáintá. Unuiniar-tiniaitkiumka yawetsuk unuiniarta.

⁸ Chíkich shuar ikiakártiniaitkiumka nekas péñker ikiakárta. Súsatniuitkiumka shiir enentáijjaj ementutsuk súsarta. Shuaran wáinin atí tusa Yus apujtamsaitkiuin_kia ti enentáimsam túratá. Tura shuar itiurchat pujuinia nu yáintinian Yus suramsaitkiuin_kia shiir enentáimsam túratá.

Yus-shuar túratniua nu

⁹ Nekas enentáijjaj mai anenai ajatarum. Yajauch nakitrarum péñkera nu túratarum.

¹⁰ Nuamtak yachí asarum núnisrum mai anenai ajatarum. Chíkich wijjaj nankaamas úuntaiti tu enentáimtunaistarum.

¹¹ Nakittsuk kakaram ajasrum ashí enentáimjaj ii Uuntri wakera nu túratarum.

¹² Ukunam Yus tsankatramkattajnia nu enentáimtusarum warastarum. Wáitiakrumsha katsunratarum. Tuke iniaitsuk ashí túrunamujaj Yus áujtsatarum.

¹³ Yus-shuar atsumainia nujaj yáintarum. Írarsha péñker itiaatarum.

¹⁴ Yajauch awajtamainia nu shiir awajtsatarum. Yus yajauch yumíntsuk nu shuaran péñker túrawarat tusarum seattiarum.

¹⁵ Warainia nujaj warastarum. Kúntuts pujuinia nujajsha úuttiarum.

¹⁶ Chikichik enentáijjaj métekrak shiir enentáimtumaitiarum. Nankaamantu enentáimtumasaairap. Antsu péejchach ajastarum. “Ti nekajai” tu enentáimtumasaairap.

¹⁷ Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá.

¹⁸ Ame jeamna nujaj ashí shuarjaj nawamnaikiam wekasata.

¹⁹ Yuska ni Papiriin júna áamtikramiayi: “Wíitjai tunaan asutiátniun. Wisha yapajkiatajai” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti.

²⁰ Tura nu arantcha tawai: “Ame nemasrum tsukamakuisha ayurata. Kitiamakkuisha umartin susata. Nu túrakum péñker ajachua nu iniatsaartatme.”

²¹ Yajauch nupettamkain. Antsu péñker túrakum yajauchia nu nupetkata.

13

¹ Akupniunka ashí shuar umirkatniuiti. Akupniunka Yus apujsamuiti. Yus apuj-sachma akupin atsawai.

² Tuma asamtai shuar akupniun umirtsuna nu, Yus apujsamun umireachu asa nekas asutniátniuiti.

³ Kame akupniuka péñker shuar sapijmiakarat tusar apuj sachma áiniawai. Antsu yajauch shuar ashamkarat tusar apuj samu áiniawai. Nii ashamtsuk pujustin wakerakmeká péñker túratá. Túrakminkia akupin shiir enentáimturmartatui.

⁴ Yainmakat tusa Yus apuj samuít. Antsu yajauch túrakmeká akupin nekas ashamkatniuitme. Warí, Yus ántar apuj sachmaiti. Tunáa shuaran asutiátniun Yus apuj sáiti.

⁵ Nu asamtaí akupin tuke umirkatniuiti. Aya asutiáwain tusar umirkashtiniáitji. Antsu shiir enentáijiaí wekasatin umirkatniuiti.

⁶ Tuma asamtaí núnisan akupniun kuit súsatniua nu páchitsuk susatarum. Nu takatan pujursarat tusa Yus apuj saruít.

⁷ Ashí túratniua nu túratarum. Akiktiniáitkiumka páchitsuk akikta. Akupniusha uuntcha ashí núnisan írúnna nusha shiir enentáimtikratarum.

⁸ Kuitjai tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame.

⁹ Akupkamusha tawai: “Tsanirmawaip, mankartuawaip, kasamkaip, chíkich shuar tsanumpruraip, chikichna wakerutkaip” tawai. Tura nusha ashí chikichik chichamjain tuminiaiti: “Ame ayashim aneam núnismek ashí shuar aneata.”

¹⁰ Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

¹¹ Ii yámankamtaik Yus nekas enentáimtusmiaj nuí “Ii ti shiir ajarar tuke uwempratin ukunam átatui” tu enentáimprachmashiaj. Antsu yamaikia nu tsawant yuntumsamtaí ashí túrajnia nujai shintiarar enentáimpratniuitji.

¹² Tuke káshiitiat tsawaatemprai. Ii Uuntri Kristu jú tunáa nunkanam tátin ishichik ajasai. Tuma asamtaí ii túrutairi kiritniua núnisan yajauch túrutai ana nuka túrutsuk tsáapninium péñker wekasatin kakaram ajastai.

¹³ Túratniua nujai métek wekasatai. Tsawai wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratai.

¹⁴ Ii Uuntri Jesukristu túramia núnisrik túratai. Tura ii ayashí wakeramu umikiat tusar tsankatkashtiniáitji.

14

Ame yatsum kakantraip

¹ Shuar Yúsan ishichik enentáimtana nu itiaatarum tura kakantrairap.

² Iis, chíkichka ashí yuamniaiti tuiniawai. Tura chikichcha, Yúsnan awajirar, naman yúashtiniaiti tuiniawai.

³ Tura ashí yúa nuka namanken yúatsna nuna wishikrashtiniaiti. Núnisan ashí yucha nu ashí yuun kakantrashtiniaiti. Warí, núnaka Yus ni shuarin awajsachukait.

⁴ ¿Ámeká timiataash péñkeraitiam chíkich shuar kakantinia? Antsu ni úuntrin ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

⁵ Chikichcha enentáimpratai. Chíkich shuar tsawantan achikiar “Jú tsawantaj Yus nankaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti.

⁶ Chikichik tsawantan enentáimtakka Yúsan shiir awajsatniun túrawai. Tura ashí métekrak enentáimtakka Yúsan shiir awajsataj tusa túrawai. Yurumkajajsha ashí yúana nu Yúsan yumiñkias shiir awajsataj tusa túrawai. Núnisan ashí yúatsna nusha Yúsan yumiñkias shiir awajsataj tusa túrawai.

⁷ Iikkia ii enentáijiaín iwiaaktsuji. Tura jáakrishá ii enentáijiaín jaatsji.

⁸ Kame iwiaaku pujakrishá ii Uuntri Kristu shiir awajsatai tusar pujurji. Tura jáakrishá tuke Níiniuitji. Nu asamtaí iwiaaku pujakrishá tura jakarsha tuke Krístunuitji.

⁹ Kame jakancha iwiaakuncha ashí ni Uuntri ajastaj tusa Kristu jaka nantakmiayi.

¹⁰ Tura çurukamtai ame yatsum “yajauchiiti” tame. Urukamtai nakitiam? Warí, ashí iikia ii túramu paant awajnasat tusar Kristuï naka wajastatji.

¹¹ Nu asamtai Yus-Papinium tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrutiartatui” tawai.” Tu áarmaiti.

¹² Tuma asamtai iisha chikichik chikichik ashí ii túramu Yus paant ujakartatji.

Ame yatsum tunaanum ajuaraip

¹³ Nu asamtai “yajauch túriniaiti” tu áujmatnaisashtiniaitji. Antsu ii yachi tunaanum ajuarchatin ti enentáimturtiniaitji.

¹⁴ Jesukrístu jintintiamu asan juna nékajai: Yus najanamuka péñkerchaka atsawai. Ashí túramniaitjai. Túrasha shuar chichaak “Nu túrushtainti” táyat nuna túrakka niijjai tunaiti.

¹⁵ Tuma asamtai shuar chichartamuk “Nu yúakminkia Yusjai péñkerchaiti” taj, ame yúakminkia nu shuar itiurchat enentáimsashtatuak. Tura niisha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nujain ame yatsum Kristu jarukmia nu emenkaikaip.

¹⁶ Tura “yuamniaitjai” táyatam wi yúakui yajauch áujmatrusarain tusam iniaisata.

¹⁷ Kame Yus umirkatin yurumátniujaisha umartinjaisha enentáimtuschatniuiti. Antsu Yusa Wakanjiai shiir wekasar Yusjai tura shuarjai nawamnaikiar ti péñker wekasatniuitji.

¹⁸ Ashí shuar Krístun núnis umireakui Yussha tura chíkich shuarsha péñker enentáimtuiniawai.

¹⁹ Nu asamtai tuke shiir pujusminia nu túrakur Yusjai kakaram ajastin yáiniaiktai.

²⁰ Yus iisam ashí yuamniaitji. Antsu ame yuamna nujai chíkich shuar tunaanum ajuartin tunaiti. Tuma asamtai ame yuam nujai Yus nu shuara enentáin takarsamu emesraip.

²¹ Nu túrashtin nuikia naman yúashtincha karía umarchatniusha péñkeraiti. Warí, túrushtaijai ame yátsum itiurchat enentáimtikram tunaanum ajuarchatapash. Tura nu shuar Yúsan nekas enentáimtuschania ajastatui. Nuka atsutí.

²² Ame Yus nekas enentáimtakum ashí túramniaitkiumka Yúsak wararsata. Shuar Yus íimmianum shiir enentáijiai mash túramnia nu nekas shíiraiti.

²³ Tura araantushim yua nuka Yúsan shiir enentáimtutsuk yua asa sumamattawai. Kame ashí Yus shiir enentáimtutsuk túramu tunaiti.

15

Chíkich shuar wakeramuk enentáimtustiniaiti

¹ Yusjai katsuaru ájiniá nu iik enentáimtumatsuk kakarmachu ainia nu yáintiniaitji.

² Chíkich shuar wakeramu enentáimtustiniaitji. Tura Yusjai nu nankaamas shiir wekasatniun yáinminiaitkiui túratniuitji.

³ Krístusha ni wakeramun túrachmiayi. Antsu Yus-Chicham tana núnisan chikichnan enentáimtusmiayi. Nu asamtai Yúsan umirin asa wáitiak timia nu áarmaiti: “Ámin katsekramainiak Winiaja katsekrukarmiyai.”

⁴ Núnisan ashí yaunchu Yus-Papinium aarma in jintinramatniun áararmiyai. Nujai atsantamkurin shiir wáinikiattajnia nuka katsuntrar nákastatji.

⁵ Yus atsantamar katsuntratniun jintinramji. Tuma asa Jesukrístu túramia áintsan atumniasha chikichik enentáijiai enentáimtunaisar pujustinian yáinmakartí.

⁶ Nujai ashí métekrak Yus shiir awajsattarme. Niisha ii Uuntri Jesukrístuncha Aparínti.

Israer-shuarchanmasha Uwempratin Chicham etserkamu

⁷ Tuma asamtai chíkich shuarjaisha shiir awajnsatarum. Kristu núnisan Yúsan shiir awajsat tusa incha shiir awajtamsamijai.

⁸ Juna tajai. Kristu Israer-shuaran yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujai Yus timia nuna umikmia nu nekaamniati.

⁹ Tura nu arantcha Israer-shuarchasha Yus waitnentrartin ásarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattajme.”

¹⁰ Tura nu arantcha tawai: “Ashí nunkanmaya shuartiram ashí Israer-shuar Yúsna ainia nujai warastarum.”

¹¹ Tura ataksha tawai: “Ashí aents ii Úuntrin shiir awajsarti. Tura ashí shuarsha Nin “Ti úuntaiti” tiarti” tawai.

¹² Isayassa áarmiayi: “Tawitia aparí Isai weatriya akupin akiinkiattawai. Niisha ashí nunkan akupeakui ashí shuar niiniak shiir enentáimtusartatui.” Tu áarmaiti.

¹³ Yus ashí shíiran suramsattakrin nu shiir nákaji. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakaní kakarmarijjai ti shiir enentáijjai katsuntrarum, nu nákastarum.

¹⁴ Yatsurú, atumsha anenainiaitume. Tura ashí Yusna nekaarum nuamtak chicharnaikiatin nékarme.

¹⁵ Tuma ain kajinmatkiirum tusan ataksha ti paant áakun jú enentáimtikeajrume. Yus winia waitnentrak ni Chichamen etserkat tusa akuptakui nuna áatjarme.

¹⁶ Kame Jesukristu Israer-shuarchan Yusa shiir chichamen etserkat tusa akuptakui. Nuna túrakun Israer-shuarchan Yusa Wakaníjjai shiir awajsamu ásarmatai Yusai juiniajai. Tura Yussa shiir enentáijjai itiaiawai.

¹⁷ Jesukristu yaintiu asamtai Yusna takarsamaj nuna wararsamniatjai.

¹⁸ Tura chíkich shuarjai Kristu túramun pachischattajai. Aya wi chichasmajajisha tura wi túramujajisha Israer-shuarchan Kristu umimtikiamia nunak áujmatsattajai.

¹⁹ Yusa Shiir Wakaní kakarmarijjai aents tujintiamun túran ashí shuaran Jerusarén péprunam nanakan etserkin Iririkiu nunkanam ejekamjai. Kristu-chichaman ashí nu nunkanam etserkaitjai.

²⁰ Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nujai chíkich takasmanum takarsachuitjai.

²¹ Yus-Papisha núnisan tawai:

“Chichaman penké antukcharuka nekaawartatui. Nin áujmatman anturkacharusha unuimiarartatui.”

Papru Rúmanam wétaj tawai

²² Nuna pujuru asan íitjarum táyatan íichmajrume.

²³ Tura yamaikia juyá takatrun umikian tura yáunchusha take íitjarum tiniu asan

²⁴ Ispania nukanam wéakun íistatjarme. Tura atumjin shiir irasan Ispanianam wéakui atumsha yaintkiarum shiir akuptukchattarpash.

²⁵ Tura yamaikia kuitjai Jerusarénnumia Yus-shuaran yáintaj tusan wéajai.

²⁶ Masetúnianmaya shuarsha tura Akayanmaya shuarsha kuitian irurar Jerusarénnumia Yus-shuaran atsumainia nuna akuptuktai tuiniawai.

²⁷ Ti wakeruiniak túrawarmiayi. Nu nekas túrashtinkiait. Israer-shuarnumia Yus-Chichaman antukaru ásar yamaikia ni kuítrijai páchitsuk yáinchatniukait.

²⁸ Tuma asamtai jú kuitian súsaran umiran nuikia Ispanianam wéakun íiktatjarme.

²⁹ Tura nu winiakun Kristu Shiir Chichamen nujai shiir yáintajrum tusan ejeetittiarume.

³⁰ Yatsurú, ii Uuntri Jesukristunu asarum tura ni Wakaní pujurtamkurmin anenia asarum Yus áujtursatarum. Núnisrum wijjai métek Yusna takastin yaintkiattarme.

³¹ Jutia nunkanmaya Israer-shuarnumia uwentikrat tusarum Yus áujtursatarum. Tura jú kuitian júajna nunasha Jerusarénnumia Yus-shuar shiir achikiartí tusarum Yus áujtursatarum.

³² Nujaj, Yus wakerakuinka, péñker wampú enentáimsan warasan íttiajrume.

³³ Yus ti shiir pujustinian súana nu atumjai tsanin pujurtamsati. Núnisan atí.

16

Amikmaamun akupramiania nu

¹ Ii umai Jépeka Senkrea péprunmaya Yus-shuaran yáiniaiti. Ti péñker Yus-shuaraiti.

² Kristu náarijn shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti péñker wáitin asamtai atumsha ni atsumamusha yaintarum.

³ Pirisirasha Akirasha wijjai métek Jesukrístunun takasaru ásar amikmaatainijai.

⁴ Niisha winia uwentikrurtai tusar jáninkiarmai. Tuma asamtai yuminkinijai. Tura aya wíkichu antsu ashí Israer-shuarchanumia Yus-shuar áinia nusha yuminkiniawai.

⁵ Núnisan ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentáimtusmai.

⁶ Marisha, atumjai ti takasua nu amikmaatruatarum.

⁷ Tura wí shuarsha Antrunikiusha Júniassha amikmaatruatarum. Niisha wijjai sepunam pujusarmai. Wijjai emka Krístun shiir enentáimtusar chích akatramujai nankaamas takasaru áiniawai.

⁸ Ámpriassha Krístunam winia aneamu amikiur asamtai amikmaatruatarum.

⁹ Urpanujajsha Jesukrístu takatrí tsaninniuitji. Niisha tura aneamu Estakissha amikmaatruatarum.

¹⁰ Apirisssha amikmaatruatarum. Niisha Krístun ti shiir enentáimtamú ti páantaiti. Núnisan Aristúpuru shuarsha amikmaatruatarum.

¹¹ Wíshuar Erutiúnsha tura Narsisu shuarsha Kristu shuari ásarmatai amikmaatruawarta.

¹² Tripiniasha tura Tripiusasha Yúsnan takainia ásarmatai amikmaatruatarum. Núnisan ii umai Pírsitia Yúsnan ti takasu asamtai amikmaatruatarum.

¹³ Rúpusha, nusha ti péñker Yus-shuar, tura nukurísha amikmaatruatarum. Niisha wijjai nekas winia nukurua núnisaiti.

¹⁴ Asinkritiusha, Pirikiuntisha, Érmassha, Patrupassha, Érmessha, tura ashí niijjai Yús-shuar áinia nu amikmaatruatarum.

¹⁵ Núnisan Jirurukusha, Júriasha, Néreusha, ni umajjaisha, Urimpiassha, tura ashí Yus-shuar niijjai pujuinia nu amikmaatruatarum.

¹⁶ Nuámtaksha shiir aujnaisatarum. Ashí juyá Kristu shuari amikmaatmainiawai.

¹⁷ Yatsurú, shuar nusháa enentáimtuiniak Yus-shuaran akanainiak itiurchat awajenawai. Nu shuar wáinkiarum kanaktiarum. Ni yajauch túramu átum péñker takastin unuimiarmena núnischaiti.

¹⁸ Nu shuar ii Uuntrí Jesukrístunun takainiatsui. Antsu ni wakeramun uminiawai. Tura ti shiir chichasar nékachun anañkenawai.

¹⁹ Átum umirma ashí shuar nékainiakur ti waraaji. Yajauch túrutsuk aya péñker túratin enentáimsarum pujustarum.

²⁰ Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntrí Jesukrístu shiir yainmakarti.

²¹ Timiutéusha, wijjai takau, amikmaatmarme. Núnisan Rúsiusha, Jasunsha, Susipatresha, mash wíshuar áinia nu amikmaatmarme.

²² Wi, Tersiu asan, Papru chichamen ju papinium áateakun Kristu náariin amikmaajrume.

²³ Káyusha amikmaatmarme. Ni jeen pujaji tura juisha ashí Yus-shuar irunainiawai. Erastusha ju pepru kuítrín wáinniuiti. Niisha ii yachi Kuártujai amikmaatmarme.

²⁴ Ii Uuntri Jesukristu ti shiir yainmakarti. Núnisañ atí.

Yus shiir awajsatai

²⁵ Watsek, Yus shiir awajsatai. Niñki nekas kakaram awajtamsamniaiti. Wi Uwempratin Chichamnum Jesukristunun étsereaj nujai ikiantamprattawai. Nu chicham yámankamtaiknumiã nekaachmanak Yus yamaikia paant awajsaiti.

²⁶ Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nunkanmayã shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pujuwiti.

²⁷ Yúsak Niñki ti neka asa tura Jesukristu ti penker tura asamtai Niñki tuke shiir awájnástí. Nuke atí.

Papru KURINTIUNMAYA SHUARAN Emka papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai, Jesukrístu akatramu. Yus nuna wakerak, ni akatramurj atí tusa anaitiukmai. Wi, ii yachi Sústinisjai, ju papí akupeaji.

² Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujai tsaninkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntrinti.

³ Yus ii Aparí tura ii Úuntrj Jesukrístusha waitnentramainia ásar yainmakarti imiatkinchanum tuke shiir pujustinian.

Ii Uuntrj Jesukrístujai tsaninkia pujustin

⁴ Yusan áujkun yuminsan atumin shiir enentáimtajrume. Jesukrístujai tsaninkia pujakrumin Yus shiir enentáimturmawai.

⁵ Jesukrístujai tsaninkia pujakrumin Yus atumin ti yáinmawai ashí pénger ana nu enentáimtakrum tuke shiir chichastinian.

⁶ Kristu juna túramniaiti tíchamkaji. Ashí yamaikia uminkiaiyi.

⁷ Tuma asantai ashí Yus súramna nu atsumatsrume. Nu túrakrum ii Uuntrj Jesukrístu tatin tuke nákarne.

⁸ Tura iniaitsuk tuke emettamattawai ii Uuntrj Jesukrístu támatai atumi tunaarj pachischatin.

⁹ Jesukrístu ii Uuntrinti. Niijjai tsaninkia pujusúk tusa Yus achirmakmarne. Tura Nii tana nuna tuke umiktatui.

Yus-shuar akantramu

¹⁰ Yatsuru, ii Uuntrj Jesukrístu naari pachisan, seajrume métek enentáimpratarum tusan. Níisháa níisháa enentáimprairap antsu chikichik enentáijjai métek enentáimsa pujustarum.

¹¹ Átum yajauch chicharnaisarum pujarme. Kruí shuarj tu ujatkar matai tájarne.

¹² Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaraitjai” tuiniawai.

¹³ ¿Warí, nuinkia, Kristu akantramukait. Páprusha krúsnum jarutramkamaashi. Tura Papru naari pachisa imiaimiukaitrum?

¹⁴ Atumin untsurj imiaichu asan shiir enentáimjai. Aya Krispu Káyujai jímiarchiniak imiaimjai.

¹⁵ Nújainkia shuar “Papru náarj in imiaimiuitjai” tíchamniaiti.

¹⁶ Maa, nekas, Estepanasa shuarincha imiaimjai tura chíkich wi imiaimiun nékatsjai.

¹⁷ Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarain tusan. Antsu yúpichuch chichaajai Kristu krúsnum jakamuk paant atí tusan.

Kristu Yusa kakarmarj incha ni nekatairj incha paant iniakmasmiania nu

¹⁸ Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántrai nu chicham” tu enentáimainiawai. Antsu Yus-shuarti, uwempratniunam wéakur, “nu chichamjai Yusa kakarmarj takusminiaiti” tu enentáimjai.

¹⁹ Núnisan tawai Yus-Chicham yaunchu aarma: “Jū nunkanmayan ti neka áiniana nuna chichamen emesrattajai; ti unuimiararu áinianak ántar awajsattajai” tawai Yus ni chichamen.

²⁰ Iis, jū nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkiertin áiniana nusha, ashí jū nunkanmayan unuimiar ti chichastinian nékana nusha, nu shuar mash “wi tájana nujai pénger pujusam uwemprattame” tu enentáimiainiawai. Tura núnaka mash Yus penké ántar najanaiti.

²¹ Aya ni nékamujai aents Yúsan nekaacharmiayi. Núnisan atí tusa Yus túramiayi, timiá neka asa. Antsu ashí aentsun Yus ni chichamejai uwemtikratniun wakerimiayi. Chíkich “ántraiti” tuiniana nu chichamjainkⁱ Yus Nin enentáimtuinia núnaka uwemtikratniun wakerak túramiayi.

²² Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash pénger júkim turuttia wisha métek enentáimprataj” tuiniawai.

²³ Iikia antsu Kristu krúsnum jarutramkamuk étsereaji. Israer-shuarsha “jū chicham natsantaiti” tu enentáimiainiawai. Israer-shuarchasha “jū chicham ánttraiti” tu enentáimiainiawai.

²⁴ Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutramak Yusa kakarmaríncha ni nekatairíncha paant iniakmasmiayi” tu enentáimji.

²⁵ “Yusa nekatairí ánttraiti” tuiniawai aents, túrasha imiá nekas péngeraiti. “Yusa kakarmarísha jeatsui” tuiniawai aents, túrasha imiá nekas kakarmaiti.

²⁶ Enentáimtumastarum yatsuru. Yus achirmakmarme Niiniu ajastinian, tura jū nunkanam ti neka áinia núnisan atumíin ti neka íruntsui. Ti akupniusha ti nankaamakusha atumíin íruntsui.

²⁷ Antsu jū nunkanam nékachua núnis ana nuna Yus achikiuiti ti neka nuna iniatsáartinian. Tura jū nunkanam kakarmachua núnis ana nunasha Yus achikiuiti kakarma nuna iniatsáartinian.

²⁸ Péejchachincha, nakitsamuncha, ánttrachincha, Yus achikiuiti ashí nankaamantu írúnna nuna amuktinian.

²⁹ Nújainkia chikichkisha Yusjai waantu enentáimprachminiati.

³⁰ Tura Yus atumin Krístujai tsaniñ apujtamsaiti. Tura Kristu enentáimtusar Yus nekas nekatainkia nekaattaji. Kristu enentáimtakrin Yus shiir enentáimturmajai, pénger awajtamji, tura uwemtikramji.

³¹ Yus-Papinium yaunchu aarma núniskete: “Shuar nankaamantu enentáimprataj tákuñka ii Uuntrí Yus túramun wararsati.”

2

Kristu krúsnum jakamu etserkamu

¹ Wisha, yatsuru, atumíin jeamaj nuí Yus-chichaman ti neka chichainia áintsan tura íwiasanak ujakchamajrume.

² Tura atumjai pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu.

³ Né kayatan kakarmachu sapíjmiashím jearmiajrume.

⁴ Yus-Chichaman ujaakun ti neka chichainia áintsan nupetkataj tu enentáimturhamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume.

⁵ Aentsu nekatairíjiai Yus enentáimtuschatniuiti antsu Yusa kakarmarí paant nekaarum Yus enentáimtustiniaitrumé. Nuní asamtai Yus-Chichaman tu ujakmajrume.

Aya Yusa Wakaníjiai Yúsnan nekaamniaiti

⁶ Túmaitiat Yusa nekatairí átsuk. Yúsnan unuimiararujai Yusa nekatairín áujmatji. Tura Yusa nekatairínkia aentsu nekatairí áintsachuiti. Ju nunkanam akupin ainia nuna nekatairínchuiti Yúsnaka. Ju nunkanam akupniuka ishichik pujus amuukachartatuak.

⁷ Yaunchu ju núnka atsajín Yus in uwentikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji.

⁸ Ju nunkanam akupniuka nuna penké nekaacharmiayi. Nékainiakka ii Uuntri timiá shiira nuna, krúsnum máacharu aayi.

⁹ Yaunchu Yus-Papinium áarchamukait: “Shuar Yúsan aneana nuna Yus ti shíiran susattawai. Susattana nuka timiá péñker asamtai shuar wáinkiachman, antukchamuncha, enentáimtachmancha Yus susattawai” tu áarmaiti.

¹⁰ Tura Yusa Wakaní ii enentáin pujurtamuk Yus suramsattajnia nuna yamá paant jintinramji. Nu Wakancha imia Yus enentáimniancha mash nékawai.

¹¹ Shuar enentáimna nuna chíkich shuar nekaamniakait. Antsu aya ní enentáijjiajn nékatsuk. Núnisan aya Yusa Wakaní Yúsnan paant nékawai.

¹² Ju nunkanmaya aents enentáimiainia nujai Yusna nekaachminiaiti. Antsu Yusa Wakanin in súramaj nujai Yus shiir tsankatramajnia nu nekaamniaitji.

¹³ Yusa Wakaní jintinramji Yúsnan chichastinian Nii wakera áintsan. Ni chichamen súramji. Túramtai ii nékamujai Yúсна étsertsuji. Tuma asamtai imia Yusna nuka Yusjai péñker wekainia nu jintíaji.

¹⁴ Yus-shuarcha Yusa Wakaníniun ántatsui ántrai tusa. Aya Yusa Wakaní jintinti-amniaitkiui Yus-shuarcha nuna penké nekaachmin áiniawai.

¹⁵ Antsu Yusa Wakanin takaku ashí mash iis, péñkera nuna nekaamniaiti. Nii túrana nunasha chíkich shuar súmamtikiachminiaiti.

¹⁶ Yus-Papinium yaunchu áarmaiti: “¿Yusa enentáimmiari ya neka. Tura Yúsan ya jintintiamniait?” tu áarmaiti. Tuma ajín iikia Yus-shuar ájinia nu, Kristu enentáimna núnisrik enentáimji.

3

Páprusha Apurussha Yusa takatrín mai tsanínkiar takainiawai

¹ Tura wikia, yatsuru, nuik ai atumjai pujakun Yusa Wakanín umirniun chichastinia áintsanak atumjai chichastinian tujinkiamjai. Antsu ayash wakeramu umirin asakrumin Kristunam katsuarcharujai chichastinia áintsanak atumjai chichasmajai.

² Uchi kuírach namañ ayurachminiaiti antsu aya umuntsatniuiti. Núnisan aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarne.

³ Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nujai páantaiti átum ayash wakeramu umirniuitrume. Yúsnan enentáimticharujai métek wekainiaitrume.

⁴ Atumíinkia shuar “wi Páprunuitjai” tuiniatsuk. Chikichcha “wi Apurusnaitjai” tuiniatsuk. Tu chichaakrum ayash wakeramu umirniuitrume.

⁵ Wátsek. Wi Papru ti péñkeraashitaj. Apurussha ti péñkeraashit. Antsu iisha aya Yusa takarniurintji. Yus-Chicham étserkurin ii Uuntri enentáimtuschamkuram. Ii Uuntri takatan chíkich chíkich suramsamajnia nuke takasmaji.

⁶ Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai.

⁷ Arakan araana nusha, entsan ukatna nusha ántrachukait. Antsu Yusak arakan tsakatmaru asa ashí túrachukait.

⁸ Arakan araana nusha, entsan ukatna nusha métek áiniawai. Túmaitkiuisha takasmajai métek Yus akiktatui. Péñker takasmataínkia péñker akiktatui.

⁹ Wisha Apurussha Yusa takatrĭ mai tsanĭnĭkiar takaaji. Tura Yus atumĭ enentáin takaakui atumsha Yusa núnĭkeá áintsaitrume.

Jeasha enentáimpramniaiti. Yus atumjai takaak jeá jeamtinia áintsan takaawai.

¹⁰⁻¹¹ Jeá jeamainiak, emka uunt kaya nunĭká init ikiursar kaki awajsatin áiniawai. Tura nuyanka nu kayanam ekeniar júkitniuiti jeá wewe atĭ tusa. Wikia jeá jeammin ti unuiniamiarua áintsanak uunt kaya nunĭká emka ikiustinian nekaan, núnisnak Jesukrĭstunun emka ujakmajrume. Tura Jesukrĭstu uunt kaya kaki ikiusma áinis asa Nĭnĭkiti nuĭ jeá ekenkatin. Iis, ashĭ enentáimtustinia nanĭkaamas Jesukrĭstu enentáimtustiniaiti. Nu asantai Jesukrĭstunun emka ujakmajrume. Yus nuna etserkatniun tsanĭkatrukuiti. Wi emka, uunt kaya ikiursatniua áintsan, Jesukrĭstunun ujakmajrume. Tura nuyanka chĭkich shuar ekeniar jeammin áiniawai. Tura anearti pĕnĭker jeamtinian.

¹² Tura jeá jeamainiak nii wakerak pĕnĭker ana nujai jeamminiaiti. Nii pĕnĭker jeamtinian wakerak kurijiaisha, kuĭtjaisha, shĭirmach kayajaisha jeamminiaiti. Chĭkich jeamkuka numijiaisha, kenĭkujiaisha, nukajaisha jeamminiaiti. Núnisan shuar Yúsnan takaak pĕnĭker takasminiaiti túrasha nánĭkamas takasminiaiti.

¹³ Tura amuukatin tsawant jeakui ashĭ ni takatrĭ paant átatui. Nu tsawantajsha Yúsaiya ĭi átatui tura nu jisha ni takatrĭ pĕnĭkera nunasha tura yajauchia nunasha nekapsattawai.

¹⁴ Tura shiir jeamuka tura nu jeasha esaachmataĭnĭkia shiir akinkiattawai.

¹⁵ Antsu nánĭkamas jeamuka imianiĭnĭki jiniumiá uwemprattawai, tura ni jeamma esaa pĕnĭké atsuttawai.

¹⁶ Enentáimpratarum. Yusa Wakanĭ atumĭin pujá asantai Yusa Jĕĕ ajasuram nu nékatsrumek.

¹⁷ Shuar Yusa Jĕĕn émeseakuĭnĭkia Yus nu shuaran emesrattawai. Yusa Jĕĕnĭka timiá shiir asantai túrattawai. Nu Jeá atumketrume.

¹⁸ Ju nunĭkanmayan unuimiarua núnisrum “ti nekaitjai” tu enentáimtumasmus ananmamawairap. Antsu ju nunĭkanmayan nékachu áinis ajas Yúsnan ti shiir unuimiártiniaiti.

¹⁹ Ju nunĭkanmaya aents nékainia nuna Yus “ántraiĭ” tawai. Yus-Papinium áarmaiti: “Ju nunĭkanmayan unuimiarun ni enentáimmiájain Yus sumantikiattawai.”

²⁰ Tura nu arantcha áarmaiti:

“Uunt Yuska “unuimiaru enentáimmiancha pĕnĭké ántraiĭ” tawai.”

²¹ Tuma asantai “Páprunuitjai tárugna nusha, “Apurusnaitjai”, tura “Pĭtrunuitjai” tárugna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashĭ írunna nu atumĭin yainmaktiniaiti.

²² Páprusha, Apurussha, Pĭtrusha, ju nunĭkanmayasha, iwiaakmasha, jákatniusha, yamáí írunna nusha, ukunam átatna nusha, mash atumniaiti shiir yainmaktin.

²³ Atumsha Krĭstunuitrume, tura Krĭstusha Yúsnaiti.

4

Yus akatramu takatrĭ

¹ Júnisan ashĭ shuar enentáimturmastiniaitji. Iikia aya Kristu yáinĭrĭntji. Kristu akatramurĭntji Yusna yaunchu nekaachma ana nu yamáí etserkatin.

² Wátsek, akatramuka tána nujai métek umiktiniaiti.

³⁻⁴ Wi umikmancha umikchamuncha ii Uuntrĭ Kristu nékawai. Átum enentáimturarmena nusha tura chĭkich aents enentáimturainia nusha wĭjĭainĭkia ántraiĭ. Imia wĭkisha nekamatsjai. Kame winia tunaarun pĕnĭké wáintsujai tura aya nujai “pĕnĭkeraitjai” tíchamniaitjai. Nĭnĭki Yus iirui.

⁵ Tsawant jeamtai ii Uuntrĭ Kristu atak tátatui. Tura ashĭ yamáí kiritniunam uukma nuna tura shuar ashĭ enentáimprarma nunasha paant awajsattawai. Nu tsawant jeatsain

shuar umikiuashit tusarum enentáimtusairap. Tura nu tsawantaj Yus ashí pénker umikiarun shiir awajsattawai. Pénker umikiuncha ishichik umikiuncha takasmajaj métek Yus shiir awajsattawai.

⁶ Átum “Ju shuar pénkeraiti tura chíkich pénkerchaiti” tu akannáirarum penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurus-naitjai” tírap” tajai. Antsu aya Yus-Papinium áarmajaj métek enentáimsatarum.

⁷ Ámeka chíkich shuarjaj méteketme. Tura ashí takakmena nusha Yus amasmaiti. Tura Yus amasu asamtai çitiurak áminiukea áintsam nujaj nankaamantu ajai tu enentáimtumam?

⁸ ¿Ti kuítrinnia áintsan tura ashí takakua áintsan enentáimtsurmek. In nankaakarum uunt kapitián ajasua áintsan enentáimtsurmek? Nekas uunt kapitián ajasrumka maak. Nuñkia iisha atumjaj akupkaintji.

⁹ Chíkich shuar mash nankaamantu áinis áiniakuisha Yus in ni akatramurin ashí amúamunam apujtamsaitji. Tu enentáimpramniati. “Yajauch áiniawai, máatái” tu pujurtamji shuar. Tura Yusa suntarisha ashí juyá shuarsha in íistai tusar káutramkaitji.

¹⁰ Iikia atumjaj jeatsji. Kristu shuarj asakrin nékachua áinis enentáimturmajj shuar. Átum antsu Krístunam tí nékachushitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia muíjtaintji.

¹¹ Tuke yamaisha tsukamaji, kitiamaji, entsartin atsumaji. Katsumpramji. Jeasha atsumaji.

¹² Ii ewejéjaj takaakur ti pimpíaji. Shuar katsekramainiaji túrasha iikia shiir chichamjaj aiyajaj. Itiurchat awajtamainiakuisha katsunteaji.

¹³ Tsanumprutmakrincha tuke shiir chichajaj. Tsuata áintsarik tuke yamaisha ashí yajauchia núnisan ajapramatniun enentáimturmainiaji.

¹⁴ Atumin aya iniatsaartajtsan juní áattsujrume. Antsu winia aneamu uchirua áintsan jintintjarme.

¹⁵ Atumin Yus-Chichaman ujaakun Yus-shuar ajastinian unuiniamjarme. Nujaj Jesukrístu enentáimtakrumin atumí aparía áintsan ajasmajaj. Chíkich shuar Krístunun jintintrámatin timiá untsurí ákuisha aya wiki atumí aparíntjai.

¹⁶ Tuma asamtai wi wekaajna áintsan wekasatarum atumsha.

¹⁷ Nu túratarum tusan winia aneamu uchirun Timiutéun akuptukmajrume. Niisha ii Uuntri Krístun enentáimtamunam winia uchiruiti tura Krístun enentáimtak tuke shiir wekaawai. Túrasha wi Krístujaj wekaamun ataksha enentáimtikramprattawai. Núiti ashí Yus-shuarnum wena jintíajna nuka.

¹⁸ Papru yamaikia iraishtatui enentáimturainiak chíkich chíkich nankaamantuitjai tu enentáimtumainiawai.

¹⁹ Antsu Yus wakerakuñkia wárik íitjam tusan wakerajaj. Nuñkia nankaamantu chichameñ antukchattajaj antsu wátskea, ni túramurisha íistái.

²⁰ Yus akupeana nú shuar aya chíchainiatsui antsu Yusa kakarmarj iniaaktuiniawai.

²¹ Wátsek, ¿warí enentáimprum? Átum tuke núnisan enentáimkiurminkia wi winin asutiátniuitjarme. Tura pénker enentáimkiurminkia, aneakun shiir chichasminiaitjarme. ¿Atumsha túa wakerarum?

5

Tsanirmamu ti tunaiti

¹ Atumjaj shuar ti tunáa tura awai. Ju yamá ashí nekanaiti. Nu shuar ni aparí nuwé achikiuiti. Timia tunaaka nu tsanirmamu Yus-shuarchanumsha atsawai.

² ¿Nu tunaajajsha tuke nankaamantu enentáimprumek? Antsu úuttinaitrume. Nu shuar tunáa túraka atumjaj akankatniuiti.

³ Ayashur pujachkuisha wi nuĭ pujáa áintsan nuna tunaarĭn paant nekaamjai, tura asutiátniuiti tajai.

⁴ Tuma asamtai átum káunkakrumin ii Uuntriĭ Jesukrístu kakarmariĭjai tura wi nuĭ pujáa áintsanak, ii Uuntriĭ Jesukrístu kakarmariĭjai

⁵ nu shuar uunt iwianchnum surunkatniuiti ni ayashi wakeramurĭ amukati tusa. Nujai ni wakanĭ uwemprattawai ii Uuntriĭ Jesukrístu támatai.

⁶ “Iikia péñkeraitĭi” tárumna nu ántraiĭ, tunáa atumĭĭn tuke akui. Iis, “Karía ishichik yuminnium enketam mash karimtiktsuk” tiniu ániawai. Núnis átatui ju tunaajai.

⁷ Tuma asamtai nu karía ukartarum yajauch awajturmasajĭ tusarum. Núnisrum ju tunaanumiá kanakrum péñker átatrume. Yaunchu enentái karía núnis amuukatniuiti. Ashí yamarmak yuminiá áintsanĭ ajasuitrume. Tanta wakapruachusha enentáimpratai. Israer-shuar paskua nampernum aya wakapruachu tantan yuu ániawai. Atumĭ tunaarĭ atsakui atumsha nu námper-tantaa áintsar péñker ajasuitrume. Paskua nampertincha Israer-shuar murikiun main ániawai. Núnisanĭ Kristu jaka ii murikrĭa áinis ajasuiti.

⁸ Tuma asamtai iisha paskua námper nájanku pujakur tuke núnisanĭ shiir wekasatniuitĭi. Tuma asamtai ashí yajauch tunaasha írunna nuka karía yaunchu nawamua áintsanĭkete. Nuka atsutniuiti. Antsu nekas ana nuka shiir enentáimsar wekasatniuitĭi. Nuka yuminiá áintsanĭkete.

⁹ Nuik papin áatramajrumna nuĭ “Tsanirma shuarjainĭkia íschatniuitrume” tímiajrume.

¹⁰ Ju nunĭkanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin ániatsuk. Nú shuarjainĭkia penĭké íschatniuitkiurmeka ju nunĭkanmayaĭ jíinkintrume. Núnaka tátsujai.

¹¹ Antsu wi tájana nu júiti, Shuar “Yus-shuaraitĭjai” tákunĭka tura tunáa túriniaitkuinĭkia niĭjĭjai íschatniuitrume. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitĭjai” tákuinĭkia íschatniuitrume. Penĭké niĭjĭjai yurumáshtiniaitrume.

¹²⁻¹³ Yus-shuarcha tunaarĭ pachischatniuitĭjai. Yus núnaka íistatui. Átumka antsu atumĭĭn Yus-shuar ainia nuna tunaarĭ íistiniaitrume. Tuma asamtai nu shuar tunaarintin atumĭĭya akankatarum.

6

Yus-shuar nuámtak itiurchat awajnaisarka Yus-shuarchajai nuna iwiarashtin ániawai

¹ Yus-shuarka chíkich Yus-shuarjaiĭ itiurchat pujakka kapitianĭjaiĭ chichas iwiarashtini-aiti Yus-shuarcha asamtai. Antsu Yus-shuar írunna nujaiĭ iwiarati.

² Enentáimpratarum. Amuukatin tsawantajĭ Yus-shuarka ashí ju nunĭkanmayaĭ shuara tunaarĭ mash nekaawartatui. Tura ashí tunáa nekaatniuitkiurmeka itiur yúpichuchia nu nekaashtatrum.

³ Nu arantcha Yusa suntarĭ túramurĭsha nekaattajĭ péñkerashit tusarĭ. Nayaimpiniam túrawarma nekaatniuitkiurkia itiura ju nunĭkanmayaĭ nu tujinkiattajĭ.

⁴ Pai, itiurchat ákuinĭkia Yus-shuar penĭké tujintiainiana nujaiĭ iwiaratarum antsu.

⁵ Natsaruk tusan nuna tájarme. Warí, ¿atumĭĭni chikichkisha atsawak ni yachiĭ itiurchatrĭ péñker iwiamnia?

⁶ ¿Urukamtai Yus-shuar ni yachĭjĭjaiĭ itiurchat pujakka Yus-shuarchanum wea iwiaratniun?

⁷ Atumĭ itiurchatrĭ kapitianium jukirmeka nujainĭkia átum tujinkiamu páantaiti. Nat-santchakait. Itiurchat ana nusha ¿urukamtai antsu katsuntram asakáatsum? Kasamkamusha ¿urukamtai katsuntram asakáatsum?

⁸ Antsu átumka nuámtak yachĭjĭjaiĭ itiurchat awajnáyarme tura kasárnáyarme.

⁹ Tunáa túrinkia Yus akupeamunam pachiinkiachmin ainia nu nékatsrumek. Anan̄nawairap. Ashí tsanirma nusha, ántar-yusan tikishmatniusha, nuamtak áishman̄jaj̄i tsanirmasha,

¹⁰ kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuaran anan̄kawar atantin ainia nusha Yus akupeamunma nuí pen̄ké wayashtin áiniawai.

¹¹ Atum̄iyasha chíkich chíkich nuna túrin armái. Tura yamaikia ii Uuntrī Jesusa kakarmarij̄iaisha tura ii Yusrī Wakan̄i kakarmarij̄iaj̄i atumi enentáí shiir ajasuiti, atumsha Yusna ajasurme, tura tuke pen̄ker ajasurme.

Ii ayash̄i yajauch áchatniuiti

¹² “Ashí túramniaitjai” tiniu áiniawai tura nekasaiti. Tuma aijn̄ mash yáinkiashtatui pen̄ker wekasatniun. Nekas ashí túramniaitjai tura nán̄kamas túratniuj̄aj̄i nupetnakchat-tajai.

¹³ Junasha tiniu áiniawai: “Apatuk wakej̄ainchu tura wake apatkuj̄ainchu mai ántrai.” Apatkuj̄aj̄i wakesha nekas mai metek enentáimpratin áiniawai tura Yus mai metek amuktatui. Núnisan̄ ii ayash̄i ii Uuntrī Krístuniuiti tura Kristu ii ayash̄i nérenniuiti. Tuma asamtai ii ayash̄ij̄iaj̄i tsanirmashtiniaiti.

¹⁴ Tura Yus ii Uuntrī Jesusan iniantkimia núnisan̄ ii ayash̄íncha nu kakarmarij̄iaj̄i iniantkittiwai.

¹⁵ Ashí ii ayash̄ijn̄ Kristu ayash̄ímkaiaiti. ¿Nu átumka nékatsrumek? Winia ayash̄rusha Kristu ayash̄iia asamtai ¿itiurak nuna tsanir̄i ayash̄ín najanattaj? Pen̄ké túrachminiaitjai.

¹⁶ Kame ¿jusha nékatsrumek? Áishman̄ tsanir̄ij̄iaj̄i tsanin̄kiar chikichik ayashtinia áinis ajainiawai. Núnisan̄ Yus-Papinium áarmaiti: Mai chikichik ayashtinia áinis ajasartatui.

¹⁷ Tura shuar ii Uuntrī Krístuj̄aj̄i tsanin̄kia mai chikichik wakantin ajainiawai.

¹⁸ Tuma asamtai tsanirmatniunmaya yajáyañ wainkiarum tséken̄tiarum. Chíkich tunáa írunka nu ii ayash̄ínkia ti yajauch awajeatsui. Túrusha shuar tsanirmakka ní ayash̄iniak yajauch awajeawai.

¹⁹ Yusa Wakan̄i ame enentáimin pujurtamu asamtai, ame ayashim ni jeente. Nu Wakan̄ínkia Yus amasuiti. ¿Nuka nékatsrumek? Tuma asamtai ame ayash̄mi nérenchaitme.

²⁰ Kristu numpej̄aj̄i sumakma asamtai, ayash̄misha wakanmisha Yusna áiniawai. Yusna asamtai ayash̄mij̄iaj̄i pen̄ker túratniuitme, Yus shiir awájnástí tusam.

7

Nuatkatniusha pen̄keraiti, nuatkashtincha pen̄keraiti

¹ Ayu. Átum áatrurmarmena nuna yamaikia ujaktajrume. Shuar nuattechkusha pen̄keraiti.

² Tura ti tsanirmatniun enentáimtuinia ásar ashí áishman̄ ní nuwenak nuatkati tura ashí nuw̄a ní áishrin̄in̄ iniumkati.

³ Áishman̄sha ní áishrī asa nuwen túratniua nuna umiktiniaiti. Núnisan̄ nuw̄asha ní nuw̄e asa ní áishrin̄ túratniua nuna umiktiniaiti.

⁴ Núwaka nin̄ki ní ayash̄i nérenniuchuiti, antsu ní áishrin̄iuiti. Núnisan̄ áishman̄sha nin̄ki ní ayash̄i nérenniuchuiti, antsu ní nuw̄éniuiti.

⁵ Ní ayash̄i suritnaikiashtin áiniawai. Tura mai itit awajnaitsuk Yus áujsatin wakeruiniak ishichik tsawant kanakmin áiniawai. Tura nuin̄kia atak tsanin̄ pujustin áiniawai. Túracharmatain̄kia uunt iwianch, Satanás, tunaanum iniartinian útsutkattawai katsuntratniun tujintiaku.

⁶ Ayu. Tura nuna áarayatan nújain̄kia “ashí shuar páchitsuk nuatkatniuiti” tátsujai. Nuatkatniuitkiumka pen̄keraiti.

⁷ Túramtai “ashí wíjjai métek nuatkachuitkiuñkia maak ainti” tajai. Tura Yus ashí shuaran imiá métek najanachuiti. Chikichan nuatkatniun súsaiti, tura chikichan yúpitchuch katsuntratniun súsaiti.

⁸ Natsancha wajencha juna tájai, “Wíjjai métek nuattsuk pujusrumka péñkeraiti.”

⁹ Tura katsuntratniun tujinkiarka nuatkariti. Ti katsuntrachmin nekapeakum nuatkatniun péñkeraiti.

¹⁰ Nuatnaikiarun antsu tájai, “Nuwa nuatkamuka ni áishrin ikiukchatniuiti” tajai. Núnaka ii Uuntri Kristu akupkaiti aya winia chichampruchuiti.

¹¹ Túramtai ni áishrin ikiukkia niñki atak nuatnatsuk pujustí tura tsaniñ pujustinian wakerakka ataksha ni áishrin waketkiti. Núnisan áishmansha ni nuwen ajapashtiniaiti.

¹² Chikich shuaran juna tájai wikia, ii Uuntri Kristu juna akupkachuiti. Yus-shuara nuwenka Yus-shuarchaitkiunka tura ni áishrijai pujustinian wakerakka péñkeraiti; ajapashtiniaiti, tájai.

¹³ Núnisan Yus-shuara aishri Yus-shuarchaitkiunka tura ni nuwejai pujustinian wakerakka péñkeraiti; ikiukchatniuiti.

¹⁴ Nu nuwaka “Yus-shuarchajai tsaniñ pujakun Yusjai yajauch ajastatjai” tu enentáimprashiniaiti. Antsu nii Yus-shuar asantai ni aishri niijai pujá asa péñker ajasminiaiti Yusjai. Núnisan núwaka Yus-shuarchaitiat ni aishri Yus-shuaraitkiuñkia niijai tsaniñ pujá asa péñker ajasminiaiti Yusjai. Núnisan ni uchirísha péñker ajasmin áiniawai Yusjai. Núnischaitkiuñkia ni uchirí Yus-shuarcha uchiría áintsar ainti.

¹⁵ Tura áishmansha nuwasha Yus-shuarcha ana nu kanaktinian wakerakka túrati. Yus-shuar nujai ankantaiti. Núnisan asati. Tuke máaniaktinian Yus nakitramaji.

¹⁶ ¿Núwaka ni aishri Yus-shuar ajastatna nuna nekas nékawak. Tura áishmansha ni nuwe Yus-shuar ajastatna nuna nekas nékawak? Yus-shuarcha nuka wétinia wakerakka weti.

¹⁷ Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarnum akupeajai.

¹⁸ Iis, Yus-shuar ajasuka Israer-shuaraitkiunka tuke Israer-shuar atí. Tura Israer-shuarchaitkiunka Israer-shuar ajastin enentáimprashiniaiti.

¹⁹ Israer-shuaraitkiumsha tura Israer-shuarchaitkiumsha nuka enentáimtuschatniuiti. Aya Yus tana nu umirkatin nekas enentáimtustiniaiti.

²⁰ Yus-shuar ajasuka nuik pujumia áintsan pujusminiaiti.

²¹ Chikich shuara takarniuri asam ti itiurchat pujakmesha itiurchat enentáimpráip. Tura ankant jínkimniaitkiumka jínkitiá.

²² Ankantchaitkiumka ankantaitkiumsha ju enentáimpratá. Takarniuka Yus-shuar ajas tuke chikich shuara takarniurñkiusha shiir enentáimpratniuiti Kristu nin tunaanumiá ankant awajsantai. Tura shuar takarniuchua nu, Yus-shuar ajas Kristu takarin ajasuiti.

²³ Ti wáitsamiayi Kristu in ankant awajtamsatniun. Ni numpejai sumakma asarum shuar emetamu áirap.

²⁴ Tuma asantai shuar Yus-shuar ajas nuik pujumia áintsan yamaisha pujustí tura Yusan enentáimtus wekasati.

²⁵ Nuwa natsa túratniua nuna yamaikia áujmatjai. Kristu juna akupkachmai tura Kristu anenkratmari ti nekapsa asantai wi tájana nu antukminiaiti.

²⁶ Tuma asantai juna tájai. Ti iturchatnum pujá asakrin shuar aya júnisan nuattsuk pujustin péñkeraiti.

²⁷ Nuatkaitkiumka núwem ikiukip. Nátsaitkiumka nuwa eakaip.

²⁸ Tura nuatkumka tunáa túratsme. Nuwasha iniurtukka niisha tunáa túrachuiti. Túrasa nuatnaikiaru itiurchatan ti wáinkiertatui ju nunkanam. Nú itiurchatnumiá wi uwentikraintjai.

²⁹ Yatsuru, juna tájarme. Ishichik tsawant taasai. Juyañka nuatkaru ainia nuka aya ni nuarín enentáimprashiniaiti antsu Yúsna enentáimtustiniaiti.

³⁰ Núnisan̄ tuke Yúsna enentáimsar úutainia nusha uutcha áintsar pujustin áiniawai. Warainia nusha warascharua áintsar pujustin áiniawai. Súmainia nusha sumakcharua áintsar pujustin áiniawai. Ju nun̄kanmayajain̄kia itit awajmamsashtiniaitji.

³¹ Núnisan̄ aya jú nun̄kanam péñker pujustin ti takaschatniuiti. Ashí jú nun̄kanmayañka amuukatniuiti.

³² Jú nun̄kanmayajain̄ itit ajaschak tusan wakerajrume. Nátsaka Yúsna enentáimtawai ni wakera nuna umiktinian.

³³ Túrasha nuatkaka ju nun̄kanm̄an enentáimtawai ni nuarín shiir enentáimtiksa.

³⁴ Núnisan̄ nuw̄a nátsasha nuatkamusha niisháa enentáimiainiawai. Nuw̄a natsa Yúsna enentáimtawai ni ayashísha ni wakanísha tuke Yúsjaí shiir atí tusa. Tura nuátkamuka ju nun̄kanmayañ enentáimtawai ni áishrín shiir enentáimtiksa.

³⁵ Atumin yáintajtsan juna tájarme. Itiurchat awajsa tsan wakeratsjai antsu shiir wekaakrum itit awajtsuk Yus shiir enentáimtarum tusan wakerajai.

³⁶ Tura shuar ni nawantr̄i natsan nuatnaikiati tákuñka péñkeraiti. Nawantr̄in natsa tuke apujsatniun nakitiakka surukminiaiti. Nusha tunaachuiti.

³⁷ Tura chíkichka tuke natsan apujsataj tákuñka nekas péñkeraiti. Apujsatin itiurchat chaitkiuñkia tura ni nawantr̄i nuatnakchatniuitkiuñkia apujsatniuiti. Apujsañka nekas péñker túrait.

³⁸ Tuma asamtai nuatmamtikian̄ka péñker túrayi tura apujsañka nu nañkaamas péñker túrayi.

³⁹ Nuw̄a aishr̄i iwiaaku pujakuñkia tuke niijjai tsan̄in̄ pujustiniaiti. Tura ni aishr̄i jakamtai an̄kant ajas ni wakera nujai Yus-shuaran iis nuatnaikiamniaiti,

⁴⁰ tura tuke nuatnatskesha nu nañkaamas nekas shiir pujustatui. Tú enentáimjai wikia tura Yusa Wakanísha métek tátsuash.

8

Yurumkasha namansha ántar-yusnum susamu

¹ Ayu. Yamaikia yurumkasha namansha ántar-yusnum susamun áujmatsattajai. Jujai túratniua nuka mash nékaji. Tura shuar “ti nékaitjai” enentáimkiuñka nujain̄kia “neka asan nañkaamantuitjai” tu enentáimiui. Antsu shuar chíkich shuaran aneakka nin péñker atí tusa yayawai.

² Shuar “ti nékaitjai” tákuñka nekas nekaatniua núnaka unuimiarchaiti.

³ Tura Yúsna aneana núnaka Yus péñker nékawai.

⁴ Wátsek. Ántar-yus susamu yúatin junis enentáimpratniuiti. Yuska aya chikichkiiti. Tura chíkich Yus atsakui,

⁵ aentsu yusr̄i nayaimpinmasha nun̄kasha írunna nuka pen̄ké ántar áiniawai. Kame aentsu yúsr̄isha tura úuntr̄isha ti írunui.

⁶ Tura iikia nékaji, aya chikichik Yus awai, nusha ii Aparínti. Ashí írunna nuna najanaiti tura ni wakera nuna umikiat tusa najatmamji in. Ii Úuntr̄isha chikichkiiti, Jesukrístu. Niijjain̄kia ashí najanamuiti. Tura iisha ni kakarmarijjai iwiaaku pujaji.

⁷ Tuma asamtai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimpr̄ar “enentáirūi yajauch ajasjai” tiartatui.

⁸ Watsek, yuamujai Yus in shiir enentáimtikrampratniun jeatsui. Yuarkia nujai péñker áchattaji tura yúachrikia yajauch áchattaji.

⁹ An̄kantaitme yúatin wakerakmek. Tura anearta. Ame yúakmin chíkich shuar itiurchat enentáimna nusha ámin wáitmak yuñka ni enentáin̄ tunáa ajastatui.

¹⁰ Íistá. Ámeka neka asam ántar-yusa jeen wayam tura nuí yúakminkia ame yatsum nuí wáitmákchanpiash. Tura niisha itiurchat enentáimiat ántar-yus susamun yúashtimpiash.

¹¹ Nújajinkia ame nékamujaj ame yatsum Kristu jaka uwentikramia nu yajauch ajastatui.

¹² Túramtai ame yatsum itiurchat enentáimna nu yajauch awajeakum Krístunmasha tunáa túraitme.

¹³ Nu asantai winia yatsurun wi yúajna nujaj yajauch awajeaknaka namañnaka penké yuashtatjai nii tunáa ajasain tusan.

9

Kristu akatramu túramnia nu

¹ Ashí Kristu akatramurí túratniua nuna wisha túramniaitjai ni akatramurí asan. Iis, wisha ii Uuntrí Jesusan wáinkiaitjai tura wisha Jesukristu takatrín takaajai. Winia takatrujain átumka Yus-shuar ajasuitrume.

² Chíkich shuar “Kristu akatramurinchuiti” túrutainiakuisha átumka winia takatrujaj Yus-shuar ajasu asakrumin nujaj wi nekas Kristu akatramurintiaj nu paant nekaamniaiti. Tura tu enentáimtursatniuitrume.

³ Ashí shuar “Kristu akatramurinchuiti” túrutainia nuna juna tájai.

⁴ Wisha Yus-Chichaman etserkataj tusan shuárnum iraakun ashí ajampruinia nuna yuamniaitjai tura umarminiaitjai.

⁵ Tura Pítrusha, Jesusa yachísha, tura chíkich akatramusha irainiak ni nuwen Yus-shuar ainia nuna jukimnia ániawai. Wisha núnisnak túramniaitjai.

⁶ Chíkich akatramuka kuit susamujaj Yus-Chichaman etserainiawai. Wisha Pirnapísha núnisrik túramniaitji. Kame ¿aya íchikik takastiniaitjai?

⁷ Suntarka ¿ní kuítrijaiimpiash takaa? ¿Tsanimpian aráa nu nuna neren yúatsuk. Wáakan wainiua nusha muntsurin úmatsuk? Núnisan Yus-Chichaman étsera nusha nú takasmanumia yurumámniaiti.

⁸ Aya aents enentáimmian chichaatsjai. Muisais akupkamunmasha métek tawai.

⁹ Muisais akupkamunam áarmaiti:

“Turu takaak jiníkiatia saepen pakartaj tusa nájakui ni nují jiníkiatáshtiniaiti. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujaj.

¹⁰ Antsu in jujaj nekaawarat tusa tímiayi. Jiníkiain araana nusha tura júukmatai saepen pakaana nusha nuna jiníkiain mai yurumátin ániawai. Paant atí tusa Yus nuna áarmiayi.

¹¹ Tuma asantai Yus-Chicham atumiin etserkakrin nuyá átum takakrumna nujaj in ajamsatniuitrume. ¿Nusha itiurchatkait?

¹² Chíkich akatramu atumiin irutainiak ajamsamun yuamniaitkuinkia iikia nekas túramniaitji ii etserkamujaj Yus-shuar ajasakrumin.

Tura wikia antsu túrachuitjai. Atsumaknasha ashí itiurchat ana nuna katsuntramjai Kristu shiir chichamen étserkui shuar itiurchat enentáimturarain tusan.

¹³ Ashí shuar ni yúsriniun tuke pujurin ainia nu, ni yusrí jeen írunna nuyan yurumáiniawai. Tura yus-sutai namañken maawar nuyá yurumáiniawai.

¹⁴ Núnisan Yus-Chichaman etserniua nuka Yúsnan takasu asantai péñker ajamsatniuiti. Nuna Kristu akupkamiayi.

¹⁵ Tura wisha ajamsamun yuamniaitiatan tuke winia kuítrujaj yurumámjai. Tura yamaisha surúsúk tusan áattsujrume. Antsu nuna túrutsuk jakañka maak aintjai.

¹⁶ Uwempratin chichaman wi étserkun aya nújain “ti penkeraitjai” enentáimtumatsjai. Kame Yus nuna túratniun surusuncha itiurkatjak. Nuna túrachkunka ti itiurchat pujusaintjai.

¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai.

18 Tura jujai antsu nekas warasminiaitjai: Wi túramnian iniaisan chikichnan takat-suk aya winia kuítrujain uwempratin chichaman étserjai. Nujai waraakun akikma áintsankete.

19 Chíkich shuara takarniuchuitiatan ashí shuara takarniuriya áintsanketjai Kristu shuari untsurí ajasarat tusan.

20 Israer-shuarjai pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurí umirkatin áiniakui wisha aun umirkashtiniaiatnak umirniuitjai.

21 Tura Israer-shuarchasha Yus-shuar ajasarti tusan, nu shuar Muisaisa akupkamurín umirkashtin áiniakui, wisha nuna umirkashtinia áintsan ajai. Tura Kristu akupeana nuna umirkatin asan nekas Yus akupkamun umirniuitjai.

22 Yusjai katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjai métek ajajai ishichkisha Yus-shuar ajasarti tusan.

23 Ashí wi túraj núnaka uwempratin chicham tuke shiir atí tusan túrajai. Tura nu chichamjai wisha atsumtsuk shiir wekaajai.

24 Shuar nekapnaisatniusha untsurí tsékeñtin átsuk tura aya chikichik awakmatsuk. Niñki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktinia áintsarum Yusna takastarum.

25 Shuar nakurak nekapnaisatin ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentáijjai Yusna nu takastiniaitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjina nú tawasap tuke amuukashtatui.

26 Wikia aya nánkamsan tsékeatsjai. Nasejai maania áintsan máaniatsjai.

27 Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitru-rainiti.

10

Ántar-Yus tikishmatrashtiniaiti

1 Enentáimpratarum, yatsuru. Yus yaunchu ii úuntrín ashí métek yáinmiayi. Nusháa yurañmijjai jintian nekapruamiayi. Tura ashí ii uuntri nu yurañmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi.

2 Tura Muisaisan umirkar yurañminiam tura nayaantsanam ashí imiaimiu áintsan ajasarmiayi.

3 Núnisan ashí mash Yusnumia yurumkan yuawarmiayi.

4 Entsancha ashí mash Yus susamunak umararmiayi. Kame Yus kayanmaya entsan akupkamtai ashí umararmiayi. Krístusha, nú kaya áintsan, niijjai tuke weakui ni wakaní atsumamurín Krístunmayaan takusarmiayi.

5 Tuma aín Yus ti yáinmaitiat ni wakeramun umikcharmiayi. Tura ásar ni nunkeñ jeatsuk atsamu nunkanam ti untsurí jákarmiayi.

6 Iisha nujai unuimiartiniaitji. Iikia ni wakeriarmia áintsarⁱ yajauchia nu wakerukchatniuitji.

7 Nu asamtai ántar-yus ni túrawarmia áintsarum tikishmatrairap. Iis, jiru yusrí shiir awajenakui Yus-Papinium áarmaiti,

“Nu shuar yurumáwar nampekar námper ti najanawarmiayi.” Tu áarmaiti.

8 Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantaj jákarmiayi.

9 Iisha tunáa túrar “Yus asutiuáshtatui” tu enentáimprashtiniaitji. Niisha nuna túrawar napijjai esaim untsurí jákarmiayi.

¹⁰ Yussha yajauch áujmatsashtiniaiti. Nuna túrawarmatai Yus ni suntarin akupak untsurín maawarmiayi.

¹¹ Yaunchu ii úuntrijjai túrunamu in amúamu tsawantnum pujajnia nuna jintintramat tusa áarmaiti.

¹² Tuma asamtai shuar “Tunaanum iniaarchattajai” tákuŋka anearti. Anearchamka iniaarminiaitme.

¹³ Tura ame itiurchatrumka aya amek nekapeatsme. Chíkich shuarsha nu itiurchatjai métek nekapsatin áiniawai. Jusha ti enentáimpramniaiti. Ame katsuntratin tujintiamna nuna nankaamas itiurchatan Yuska péŋker asa tsan̄katramatsui. Antsu itiurchat tarutrammatai, nu itiurchatnum pujamin Yuska uwempratniun jintintramattawai. Nújain̄kia katsuntrattame.

¹⁴ Nu asamtai aneamu yatsuru pen̄ke ishichkisha ántar-yus enentaimtusairap.

¹⁵ Atumsha nékatsrumek. Wi tájana nu nekaschakait.

¹⁶ Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujai Kristu numpé métek enentáimtaji taji. Tura apatkusha púurarⁱ tura métek yuarⁱ nujai Kristu ayashí in jarutramkamú métek enentáimtaji taji.

¹⁷ Apatkusha chikichkiitiat púuram untsurí ajatsuk. Iisha núnisrik untsuríitiatar nu apatuk métek yuarⁱ métek enentáimprar chikichik ayashtinia áintsar aji.

¹⁸ Israer-shuartisha enentáimpratai. Yus-sutai naman̄ken yuinia nu, métek yuawar Yusan métek enentáimtuiniatsuk.

¹⁹⁻²⁰ Núnisar̄ Yus-shuarcha ántar-yus sutai naman̄ken suiniak nekas-Yusan suiniat-sui antsu yajauch wakanin suiniawai. Kame ántar-yus áiniak pen̄ké ántar áiniawai, iwiaakuchu áiniawai. Nu namansha sutai naman̄ketiat péŋker naman̄kete, yajauchichuiti. Aya junak tajai. Yus-shuarcha ántar-yus sutai naman̄ken suiniakui amesha nijjai métek yuamka yajauch wakanniasha nijjai métek enentáimtajai tame. Nu antsu yajauchiiti.

²¹ Kristu numpen nakumea nu úmakrum íwianch susamua nuka umarchatniuitrume. Kristu ayashin̄ nakumea nu yúakrumka íwianch susamua nuka yúashtiniaitrume.

²² ¿Warí, Yus akajkatin wakeramek. Iisha nin nupetkamniashitaj?

Aya aneakur takastiniaitji

²³ “Ashí túramniaitjai” tiniu áiniawai. Ayu, tura mash yáintkiashtatui péŋker wekasatniun. Nekas ashí túramniaitjai tura mash yáintkiashtatui wakaniur kakaram ajastin.

²⁴ Nú arantcha chíkich yáintin̄cha enentáimpratniuitji. Aya íniuk pachischatniuitji.

²⁵ Naman̄ súmakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata.

²⁶ Ashí ju nun̄kasha tura ashí írunna nusha Yúsnachuk ainia. Tuma asamtai péŋker áiniawai.

²⁷ Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme.

²⁸ Tura chíkich chichaak “Juka ántar-yus susamu naman̄kete” túramkuiŋkia nuikia yuawaip. Yúakminkia nu shuar itiurchat enentáimprattawai.

²⁹ Ame páchitsuk yuamniaitkiumnisha nii antsu yúachmin asa itiurchat enentáimprattawai.

Tura amesha tíchatameash “¿Urukamtia nii tujintiakui wi yúachminiaitaj.

³⁰ Wi Yúsan yumiŋsan yúakuisha urukamtia itiurchat enentáimturainia. Yus yumiŋsachmakait?” tíchatameash.

³¹ Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá.

³² Tuma asamtai ii túramujai chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji.

³³ Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

11

¹ Kristu turamia áintsan takaajai wisha. Atumsha núnisrum wi takaajna áintsarum takastarum.

Nuwa Yusa jeen túratin

² Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume.

³ Nu arantcha ujaajrume. Yus Apa Krístun akupea áintsan Kristu ashí áishmankan akupeawai. Núnisan áishmansha ni nuwen akupeawai.

⁴⁻⁵ Íjjiainkia shuar Yus áujenak tura núnisan Yus-Chichaman étserainiak áishman et-senkrukchatniuiti antsu nuwa múuknum nukumaktiniaiti. Tuma asamtai áishman nui etsenkrakka natsantaiti. Tura nuwa múuknum nukumakchanka natsantaiti. Intiashin tsupimiarua áintsankete.

⁶ Nuwa múuknum nukumaktinian nakitiakka intiashin tsupírti nuikia. Watsek, nuwa ni intiashin tsupirtinian nakitiakka, tura awampratniun natsamakka múuknum nukumakti nuikia.

⁷ Áishmanka Yúsan nakumeawai. Yusna shiir ana nuna nakúmkáttsa Yus áishmankan najanamiayi. Tuma asamtai áishmanka etsenkrukchatniuiti. Antsu nuwanka áishmanna shiir ana nuna nakúmkáttsa Yus najanamiayi.

⁸ Iis, Yus áentsun najaneak nuwanmayan áishmankan najanachmiayi antsu áishmanka ukunchíjjai nuwan najanamiayi.

⁹ Nuwan yáinkiat tusa áishmankan najanachmiayi antsu áishmankan yáinkiat tusa nuwan najanamiayi.

¹⁰ Tuma asamtai núwaka múuknum nukumaktiniaiti, nayaimpinmaya aencha ísarti tusa.

¹¹ Ayu, tura áishman nuwajainchu atsuinti tura nuwasha núnisan áishmanjainchu atsuinti. Yus ju nunkan núnisan atí tusa najanaiti.

¹² Iis, Yus nuwan áishmannumia najanamiayi tura áishmansha nuwanmaya akiiniaiti. Tura Yus mai najanaiti.

¹³ Enentáimpratarum atumsha. Nuwa múuknum nukumatsuk Yus áujsatin ¿pénkerkakit?

¹⁴ Ii shuartinkia áishman intiash ajakin natsantchakait.

¹⁵ Antsu núwaka intiash ajakin pénkerchakait. Múuknum nukumaktinian susamuiti.

¹⁶ Watsek, shuar tuke umiktinian nakitiakka juna nekaati, iisha tura ashí Yus-shuartisha aya tu enentáimji.

Kristu jakamu enentaimtustin nampernum yajauch túramu

¹⁷ Yamái áarattajrumna nujain shiir enentáimtatsjarne. Atum irunkuram yáiniaiktiniaitrume tuke pénker wekasatin. Átum antsu iruntrarum yajauch awajnaiyarme.

¹⁸ Wats, Yusa Jeen irunkuram atumsháa enentáimprarum kanakurme. Kame tu ujakarmai. Nekaschashit.

¹⁹ Tuke tupartatrumek Yúsnan ti nekana nu shuar paant nekanat tusarnea. Antsu kajernaikar kanaktin pénkerchaiti.

²⁰ Kanakin asarum Kristu jakamu enentaimtustin nampernum atum iruntrarum yúarmena nu nekas Yúsnachuiti.

²¹ Iis, ashí ní yurumken itiaawai ai yurumáttsa tura chikichan nákatsuk niá niá wari yuattsá wakerawai. Chíkíchia ishichik itiaana nu tsukamawai tura chikichcha nampekarai.

²² Yurumkan ishichik itiaana nu iniatsáarchamek. Atum áitkiarum núnisan Yusa jéen yurumáshtiniaiti. Natsantaiti. Warí, chíkích jea átsuk ai yurumátin. ¿Warimpait. Jujai shíirash áujsatjarum? Atsá. Jujai shiir áujsachminiaitjarne.

Kristu jakamu enentaimtustin námper

²³ Ii Uuntri Kristu jintintruama núnaka ujakmajrume. Jútas tuke súratsain, nu kashi ii Uuntri Jesus apatkun jukí

²⁴ Yusan yumínsamiayi. Nuyá puur tímiayi “Yuatarum. Jusha winia ayashruiti; atumin jarutramkatta núiti. Ju yúakrum Winia enentáimtursatarum” tímiayi.

²⁵ Núnisan yurumá umik piniñnasha achik tímiayi “Ju piniñ Yamaram Chichamaiti. Tura winia numpar puármatai Yamaram Chicham nekas uminkiattawai tawai. Ju tuke úmakrum Winia enentáimtursatarum’ tímiayi.

²⁶ Tuma asamtai ju apatuk yúakrum tura piniñsha úmakrum ii Uuntri Kristu jakamuri enentáimtarme. Kristu táatsain ju tuke túratniuitrume.

Shiir enentajijiai Kristu jakamu enentaimtustin nampernum yuatniuiti

²⁷ Tuma asamtai shuar Yusan enentáimtutsuk ju apatkun yuawar tura ju piniñnumiancha umarar Kristu ayashincha ni numpencha yajauch enentáimta asa tunáa túraiti.

²⁸ Nu asamtai ashí shuar ju apatkun yútsuk tura ju piniñnumiancha úmutsuk ni enentáin iwiaratniuiti Yusjai.

²⁹ Kristu ayashi jakamu enentáimtutsuk yúakka tura úmakka nuna tura asa asutniáttawai.

³⁰ Atumsha tura asarum jaarme tura pimpiruitrume. Chikichcha jákaru áiniawai.

³¹ Ímia-iik ímiakrinkia Yus in asutiámachaintji.

³² Tura ii enentáin Yus yajauchia nuna wáiniuk asutiámji. Túrachkuka ashí Yus-shuarchajai súmamtikramawaintji.

³³ Tuma asamtai, yatsuru, iruntrar yurumáttsa matsatkurmeka nákastarum métek yurumátin.

³⁴ Shuar tsukamakka ni jéeniinkⁱ yurumáti. Nújainka yajauchijai irunchakrumin Yus asutiámashtatrume. Ayu, chíkích áatrururmena núnaka wi ai jean iwiarattajai.

12

Yusa Wakaní ni shuarin susamu

¹ Yusa Wakaní ashí ni shuarin súana nuna yamáí ujaktatjarne. Nekaatarum, yatsuru. Yus-shuar shiir takasarti tusa Yusa Wakaní juna súsaiti.

² Yaunchu átum Yus-shuar tuke ajatsuk chíkích shuarjai métek ántar-yus tikishmatrarmarme. Niisha ántar-yus ásar áujmattramsachmin ármiai.

³ Tura jújain shuar Yusa Wakaní kakarmarijai chichaana nu nekaamniaiti. Yusa Wakaníjainka shuar “Jesus yajauchiiti” tíchamniaiti. Núnisan aya Yusa Wakaníjain “Jesus winia Úuntur asa akuptuktiniaiti” tímianiaiti.

⁴⁻⁵ Yusa takatri íruntuk. Tura Yusa Wakanínkⁱ ashí nuna takastinian súsaiti. Tura shuar Yus-shuara Uuntri chikichik ain ashí Yusa takatrin métek takaatsui. Antsu chikichkin ashí nankaamas penker takaawai. Yusa Wakanísha nuna shiir takasat tusa súawai. Tura Nii wakera nuna Ninki ni shuarin chikichik chikichik niisháa niisháa súawai.

⁶ Yúskete ashí ni shuarin niisháa takamtikeana nu. Ninki ashí ni shuari enentáin takaak takatnasha shiir takamtikeawai.

⁷ Yusak túratin súam Yusa Wakaní kakarmari paant átatui nu takasmanum. Tura ashí shuar ní takatrijiaí yáiniaiktin áiniawai.

⁸ Júnaka Yus takamtikeawai. Nékana nu shuarnasha, unuimiarua nunasha Yúsna ujaktinian súawai. Tura mai shuaran Yusa Wakaní kakarmarijiaí nuna túratniun súsai.

⁹ Chikichnasha Yúsna áujenak Yúsna ti enentáimtusar nekas itiurchat ana nuna iwiaratniun súawai. Nincha Yusa Wakaní kakarmarijiaí nuna takastinian súsai. Chikichnasha jaan tsuártinian súawai.

¹⁰ Chikichnasha aents nínki túrachminian túratniun súawai. Chikichnasha Yúsna etserkatniun súawai. Chikichnasha shuar wari yajauch wakannia péñker wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintiatniun súawai.

¹¹ Tura ashí shuara enentáin nu Wakanik takaawai. Tura Nii wakera nuna ankant ankant súawai takastinian.

Ashí Yus-shuar Kristu ayashía áintsan ajainiawai

¹² Iikia Kristu ayashía áintsari ayashímkiatji. Kristu ayashí muchitmarisha írunui. Niisha túmaitiat chikichik ayashiniati.

¹³ Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarchasha, ti itiurchat takaana nusha, ankant ainia nusha, ashí yamá chikichik ajasuitji. Tura Yusa Wakaní pimiutkamuitji Niijiaí tsaniñkia pujakur.

¹⁴ Ayashi muchitmarí aya chikichkichiiti.

¹⁵ Tuma asamtai, winia nawer uwejruchuitiat tuke winia ayashrunuiti.

¹⁶ Winia kuíshrusha jíiruchuitiat tuke winia ayashrunuiti.

¹⁷ Wátsek winia ayashur aya jíikitkiuinñkia ¿itiurak antukaintiaj? Winia ayashrusha aya kuíshkitkiuinñkia ¿waríjiaín nekapsaintiaj?

¹⁸ Nu asamtai Yus winia ayashru muchitmarí ni wakeramunam ikiusuiti.

¹⁹ Chikichik muchitmajain ¿ayash áminkiait?

²⁰ Antsu untsurí muchitma akuisha chikichik ayashkiiti. Iisha núnisrik chíkich chíkich iisháa takayatrik métek takasar Yus wakeramu takamtsuk umíaji.

²¹ Winia jíiru péñker aín winia uwejrúncha wakerishtatjak. Winia muukarsha péñker aín winia nawernasha wakerishtatjak. Núnisan Yus-shuar shiir enentáimtumak ni yachin “atsumatsjame” tíchamniati.

²² Antsu ii muchitmarí ishichik enentáimtajnia nu atsakuinñkia ti atsumawaintji.

²³⁻²⁴ Chíkich muchitmasha, ímiancha nu, shiir iwiarmamtaji. Tura nu muchitmaka shiir ísminia nujai nankaamas péñker wainji. Iis, shiircha nu antsu péñker wainji. Yus ii ayashin núnisan atí tusa najanamiaiyi.

²⁵ Nujainñkia ayashí muchitmarí máanaitsum métek yáiniainiawai.

²⁶ Chikichik muchitmaram najaimiakum ashí ayashnium wáitiatsmek. Núnisan chíkichik muchitmaram ayap ajakum ashí ayashnium shiir átsmek.

²⁷ Núniskete Kristu ayashíjiaí ayashímkiaji nu. Tura chíkich chíkich ni muchitmarí aji.

²⁸ Ayashnium muchitma írunna áintsan Yus ni shuarin untsurí takatan súsai. Emka Yus akatramu, nuyá ni chichamen etserin, nuyá jintinkiatin, nuyá aents túrachminian túrin, nuyá tsuákratin, nuyá yáinkratin, nuyá akupin, nuyá niisháa chichamjai chicharin, mash írunui.

²⁹ ¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia.

³⁰ Ashí tsuákratniuk ainia. Ashí niisháa chichamjai chichamtiniak ainia. Ashí niisháa chichamjai chichasman jintinkratniuk ainia? Atsá. Túmachuiti.

³¹ Túmaitkuinñkia péñkera nu takastin wakerukturum. Tura imiá péñkera nuna jui jintintiatjarne.

13

Aneatin

¹ Ju nunkanmaya aentsu chichamen untsurí chichayatnak tura nayaimpinmaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Penké ántranak chichaajai.

² Yus-Chichamnasha ti shiir étseriatnak, túrasha ashí uukmancha tura ashí nekaamniancha nékayatnak, túrasha Yúsán ti enentáimtusan murá umuchiayatnak, anenkratchaknaka penké ántraitjai.

³ Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan surumayatnak tura anenkratchaknaka ántranak túraitjai.

⁴ Anenkartaka wari kajeatsui, tsánkaiti, chíkich shuaran shiir awajniuiti, péejchach asa waantu enentáimtumatsui.

⁵ Anenkartaka natsanta nuna túrichuiti, níniunak enentáimchaiti, kajechuiti, páchichuiti.

⁶ Chíkicha tunaarín wararchaiti antsu péñker shuaran wararniuiti.

⁷ Anenkartaka aya katsunteawai. Tsanú chichamnasha nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

⁸ Anenkrattainkia tuke amuukashtiniaiti. Antsu ju nunka amuukmataisha Yus-Chicham etserkatin atsuttawai, tura niisháa chichamjai unuimiatsuk chichastincha amuukattawai, tura ashí nekanamtai unuimiartincha atsuttawai.

⁹ Kame yamaikia aya ishichik nékaji. Yus-Chichamsha amutsuk étseraeji.

¹⁰ Túra ukunam mash nekanamtai yámankamtaik nekaamuka ántar átatui.

¹¹ Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai.

¹² Núnisrik yamáí ju nunkanam Yus paant wáintsuji. Íspik kusurunam ímsatniua áintsankete. Antsu ukunam mai métek paant wainniaikiattaji. Yamaikia aya ishichik nékajai. Nuj antsu Yus winia nékara áintsanak nekaattajai.

¹³ Watsek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju menaintiunmasha anenkrattainkia ashí nankaamakuiti.

14

Niisháa chicham unuimiatsuk chichastin

¹ Nu asantai, anenkratin atarum. Tura núnisrumek Yúsán péñkera nu takastin wakeruktarum. Imiankaska Yus-Chicham etserkatin péñkeraiti.

² Nújainkia niisháa chichamjai unuimiatsuk chichastin péñkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamni-aiti. Yusa Wakaní nin chichastinian súawai túrasha tana nu nekaachminiaiti.

³ Antsu Yus-Chichaman étsera nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai.

⁴ Niisháa chichamjai unuimiatsuk chichaana nuka aya niñki katsuartinian yáinmamui. Antsu Yus-Chichaman étsera nuka ashí Yus-shuaran ikiatsuáwai.

⁵ Atumsha ashí mash niisháa chichamjai chichastinian wakerajrume. Túrasha nuna nankaamas Yus-Chicham etserkatniun wakerajrume. Aya chichastinjainkia ju imiá péñkerchakait. Kame chichasma jintiákmeka maak. Nujai Yus-shuar tsakarartatui.

⁶ Enentaimpratarum, yatsuru. Nuj iraakun aya niisháa chichamjai chichaaknaka çitiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarume. Yus-Chichamnasha tura ashí Yúsáncha jintinkiuuncha yáintatjarume.

⁷ Peemsha tura tumansha wi tájana áintsan áiniawai. Péñker tuntuíyamuka paant nekaamniaiti. Tura péñker tuntuíyachkuinka, nu tuntuíyamu nekaachminiaiti.

⁸ Suntarsha mesetnum wéenakuí ni kapitíántri ni wakeramun ujaktinian kachun umpuawai. Paant umpuakuinka suntarsha ni wakeramun nekaawartatui. Tura paant umpuachkuinka suntarsha ¿itiurak mesetnum wétinian iwíarat?

⁹ Atumjaisha núniskete. Nekaachmin chichamjai chichaakminkia ¿támena nuna itiu nekaawartata? Nase chichartsumeash.

¹⁰ Ju nunkanmaya chichamka ti untsurí írunui. Nu chichaman nékaka ashí antukmin áiniawai.

¹¹ Tura chíkich shuara chichamen ántachkunka níjiainka yajaya apachia áintsanak ajajai. Niisha wíjiainka yajaya apachia áintsankete.

¹² Tuma asantai, Yusa takatrí ti wakera asarum ashí Yus-shuaran ikíarartatna nú takat nekas wakeruktarum.

¹³ Nu asantai niisháa chichamjai chichaitkiumka chichasumna nu jintiartin Yus seata.

¹⁴ Niisháa chichamjai Yusan áujeaknaka nekas winia wakantrujai áujeajai tura áujsajna nuna nékatsjai.

¹⁵ Antsu wikia júnisan enentáimjai. Yusan áujeakun winia wakantrujajisha áujsattajai tura enentáimtsuk áujsashtajai. Kantamkuncha kantamaj nuna enentáimkiun winia wakantrujajisha kantamattajai.

¹⁶ Amesha shuar iruntramunam aya wakanmijjai niisháa chichamjai Yus shiir yuminsakmincha nekaachmin asantai nékachuka ámijjai métek áujsatniun jeatsui.

¹⁷ Ti shiir Yus yuminsam áujeatsmeash tura chíkichka Yusjai ikiakáatsme.

¹⁸ Ashí átum nusháa chichamjai chicharmena nuna nankaamas wikia chichajai. Nuna Yusan yuminsajai.

¹⁹ Túmaitiatnak untsurí chichamjai chichasan ántumtikiashtinjainkia nankaamas Yus-shuar iruntramunmanka aya senku chichamchijain tiintjai, paant jintintiawartaj tusan.

²⁰ Yatsuru, uchía áintsarum enentáimprairap. Kuirchia áintsarum tunáa túrashtin enentáimpratarum tura chíkich írunna nujai uunt enentáimpratniua áintsarum enentáimpratarum.

²¹ Yus-Papinium áarmaiti:

“Yajaya shuaran akupkan niisháa chichamjai chichastatjai. Tura nújajisha antur-tukchartatui” tawai Yus.” Tu áarmaiti.

²² Nújainkia páantaiti, nusháa chichamjai chichastinkia Yus-shuarchan ashantikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarchan enentáimtiktsuk Yus-shuaran yáintinian súsaiti.

²³ Tuma ain, nékachusha tura Yus-shuarchasha Yus-shuar iruntramunam wayanka tura ashí niisháa chichamjai chichainianak wáinkianka “mash waurka ajasarai” enentáimturmarshartatuak.

²⁴ Tura Yus-Chicham étserkurminkia nékachusha tura Yus-shuarchasha nuj wayanka ashí tárumna nujai ni tunaarín ímias enentáimturtatui.

²⁵ Nújainkia ni enentáin úumak ana nuna paant wáiniak tikishmatar Yusan shiir awajattawai. Tura “nekas Yus atumjai pujawai” títiatui.

Ashí tuke shiir takastarum

²⁶ Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwíainiakman ujaktinniasha, nusháa chichamjai chichastinniasha, nusháa chichasman jintiatniuncha, ashí Yus-shuar Yusjai tsakararti tusar juna mash takasarti.

²⁷ Nusháa chichamjai chichainiakka chikichik chikichik chichasarti. Tura jímiarchik menaintiuchiksha chichasarti. Tura ni timianka jintiartiniaiti.

²⁸ Jintiartin atsakuinkia nusháa chichamjai iruntramunam chichaschatniuiti. Antsu ninki Yusjai chichasti.

²⁹ Núnisan jimiarchiksha menaintiuchiksha Yus-Chichaman etserkarti. Tura chíchich shuar nuj iruntrar ni etserkamun enentáimprarti péñkerashit tusar.

³⁰ Tura chikichik chichaakui Yus chikichan nuj pujana nuna yamaram chichaman súakuinkia emka chichaa nu iniáisatí.

³¹ Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújajisha Yus-shuar unuimiarar kakarartatui.

³² Yúsnan étserainia nuka tuke enentáimprar chichastin áiniawai. Enentáimtsuk nánkamsañ chichasmin áiniatsui.

³³ Yuska pachimtak chichaman nakitiak shiir chichasmanak wakerawai.

Chíchich nunkanmasha ashí Yus-shuar iruntramunam túrainia áintsarum túratniuitrume atumsha.

³⁴ Yus-shuar iruntramunam nuwá chichastin surimkiamuiti. Yus akupea núnisan núwaka chichatsuk umin átin áiniawai.

³⁵ Inintrustininian wakerakka ni jeen waketkin ni aishrin nuj aniasti. Ashí iruntramunam nuwá chichastin natsantaiti.

³⁶ Jusha enentáimpratarum. Yus-Chicham atumjai nankamnachmai. Núnisan aya atumjinin Yus-Chicham jeartamchaiti. Chíchich nunkanmasha Yus-shuarti túrutai enentáimpratniuitrume atumsha.

³⁷ Atumjin shuar “Yus-Chichaman tuke etserniuitjai” enentáimtumatsuash. Tura chíchich shuarsha “Yusa Wakaní tuke winia akuptaiti” enentáimtumatsuash. Nu shuarka wi átjarmena nuna enentáimprar “nekas Yúsnan tíniuiti” tiartí.

³⁸ Tu táchakuinkia niisha ántar áiniawai.

³⁹ Nu asantai, yatsuru, Yus-Chicham etserkatin wakeruktarum. Nusháa chichamjai unuimiatsuk chichastincha surimkiairap.

⁴⁰ Túmaitiat antukchamin awajtsuk ashí shiir túratarum.

15

Kristu nantakmia

¹ Ataksha, yatsuru, uwempratin chichaman wi etserkamaj nuna atumin enentáimtikrattsan wakerajrume. Nu chichamsha atumsha enentáimturarum tariarurme.

² Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaitkiurmeka nekas uwempraitrume.

³ Winia ujatkamunak ujakmajrume. Nu chichamsha ashí nankaamas úuntaiti. Júiti nu chicham: Ii tunaarín asakártasa Kristu jarutramkamiaji, Yus-Papinium tana núnisan.

⁴ Tura jakantai iwarsarmiayi. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisan.

⁵ Nantakisha Pítrun wantintiukmiayi, nuyá ni akatramurín wantintiukmiayi.

⁶ Nuyanka kiniantusa (500) nankaamas Yus-shuaran wantintiukmiayi. Nú shuarnumiasha ishichik jákaru áiniawai tura untsurí tuke pujuiniawai.

⁷ Nuyasha Sántiakun tura nuyá ashí ni akatramurín wantintiukmiayi.

⁸ Ashí amúamunmasha winiasha wantintiurkamiayi, wi yajauch wekaa aijn.

⁹ Wisha Yus-shuaran ti yajauch awajsa asan chíchich Yus-akatramujai ímianchaitjai. Nekas winia péñkerujai ni akatramuríntjai tíchamniaitjai.

¹⁰ Antsu Yus ti shiir anentak winia enentáiruuj pujurtus péñker najataiti. Nu asantai winia kakarmarjai takaschaitjai, antsu Yus, anenkartin asa, winia enentáiruuj takaakui ashí ni akatramurín nankaamas takasuitjai.

¹¹ Tura wi takaakuisha tura ni takainiakuisha mai péñkerkete. Nu chichamka mash étserajai tura nu chichamsha átum enentáimtusarme.

Jákaru nantakiartatui

¹² Iisha “Kristu jakamunmaya nantakniuiti” tu étsereaji. ¿Itiur nuikia shuar jakamunmaya nantakchatniuiti tuinia?

¹³ Jakamunmaya nantakchatniuitkiuñkia nuikia Krístusha nantakchaiti.

¹⁴ Tura Kristu nantakchaitkiuñkia ii ujajnia nu penké ántrai, atumsha Kristu enentáimtarmena nusha ántrai.

¹⁵ Núnisaitkiuñkia iisha “Yus Krístun iniantkimiayi” tákur waitruamji. Iis, nekas jakamunmaya nantakchamniaitkiuñkia nuikia nekas Yus Krístun iniantkichuiti.

¹⁶ Jaka nantakchatniuitkiuñkia imia Krístusha iniantkichmaiti.

¹⁷ Tura Kristu iniantkichmaitkiuñkia átum Kristu enentáimtamusha penké ántrai. Tunaarmisha asakárchamu áiniawai.

¹⁸ Núnisaitkiuñkia Yus-shuar jákaru ainia nu tuke menkakarú áiniawai.

¹⁹ Iikia Kristu enentáimtusar tuke Niijjai shiir pujustin náka. Tura aya jú nunkanam pujustiniaitkiurkia Kristu ántar enentáimtakrin ashí nankaamas waitnentrampratiuiti.

²⁰ Antsu imiankas Kristu jakamunmaya nantakniuiti. Ashí ukunam jakanmaya tuke jákashtinian nantakiartatna nuna Nii émtukuiti.

²¹⁻²² Yaunchu Atañ tunáa túramtai ashí shuar jákatin áiniawai. Núnisañ yamaikia Krístujain tuke atakka jákashtinian nantakiartiniaiti. Iis, chikichik áishmanjain jákatin nan kamnamiayi. Nuka Atañkauyayi. Núnisañ chikichik áishmanjai nantaktin nan kamnamiayi. Nuka Krístuiti.

²³ Yus wakerana nuñ Yusna nu mash nantakiartatui: Kristu emka-juukma áintsan émtukim nantakniuiti tura atak jú nunkanam tara ashí ni shuarin júuktinia áintsan iniantkittiwai.

²⁴ Nuñkia mash amuukattawai. Nuñ Kristu ashí kapitániasha, ashí akupniuncha, ashí núnisañ jú nunkanam írúnna nunasha nupetak emesrattawai. Krístusha ashí mash ni Aparin susattawai. Tura Yus Apa ashí akupin átatui nuikia.

²⁵ Iis, júnisañ átatui. Emka Yus Apa ashí ni nemasrin nupetak Krístun susattawai akupin atí tusa.

²⁶ Tura ni nemasrin nupetak ashí amúamunam jákatniuncha nupetkattawai.

²⁷ Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti.

²⁸ Tura Yus Apa ashí mash ni Uchirin Krístun nekas susamtai Kristu nuikia ashí akupin ajas atak ni Aparin mash awantuki núnisañ surumaktatui. Nuñkia Yuska tuke ashí nan kaamantu átatui.

²⁹ Ayu. Tura shuar jakan enentáimtusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

³⁰ Iikia ¿urukamtai tuke jániñkiaruitiaj? Nantakchatniuitkiuñkia ánta wáitsaintji.

³¹ Atsá, penké áintsachuiti. Nu asamtai átum ii Uuntri Jesukrístu enentáimtakrumin wi shiir enentáimtajrume. Tura wisha tuke tsawantin ti iturchat pujakun jákatniua áintsan pujajai.

³² Jakamunmaya nantakchatniuitkiuñkia wi ántanak kaje shuarjai Ipsiunam máaniakuitjai. Maa, uunt yawáa áinis kaje ármái. Wats, núnisaitkiuñkia antsu “yurumár nampektai, kashin jákashtatjik” titiai nuikia.

³³ Anannawairap. “Pénkeraitiatam yajauch shuarjai tsaniñkia wekakmeka yajauch máatrattame” tiniu áiniawai.

³⁴ Tunáa ikiuakrum péñker wekasatin shiir enentáimpratarum. Iis, shuar Yúsan nékainiachu tuke awai. Atumin natsaaruk tusan tájarne.

Iniantkimiu ayash átatna nu

³⁵ Shuarsha inintruschaimpiash ¿jákarusha itiurak nantakiarat. Nantakiarsha warí ayashniak takusarat?

³⁶ Enentáimtsuk inintraawai. Jínkiaí araamsha jaka áintsan amúatsuk. Túrayat tsapaatsuk.

³⁷ Tsapaitniurisha araatsme antsu trikiu jínkiaichisha chíkich árika jínkiaichirisha araame.

³⁸ Nuyá tsapaakuisha Yus wakerana núnisan ní tsapaitniuríncha súawai. Tura ankant ankant tsapaitniurínkia súsaiti.

³⁹ Núnisan ashí ayash métekcha áiniawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa áiniawai.

⁴⁰ Nayaimpiniam yaa írunui tura ju nunkanam írunna nujai nusháa íimtin áiniawai. Nayaimpinmayasha nun kayasha shíirmari nushaiti.

⁴¹ Etsá wincharisha nantunusha yáanusha mash nushaaiti. Nuamtak yaaksha chikicha wincharínkia chikichnajainkia nushaaiti.

⁴² Núniskete jaka nantaktincha. Káurtinnium iwiarsam jákashtinnium nantaawai.

⁴³ Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai.

⁴⁴ Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan nayaimpinmaya ayashsha awai.

⁴⁵ Yus-Papinium nuní áarmaiti:

“Emka áishman ni naari Ata, aents ajas iwiaaku ajasmiayi.” Tu áarmaiti.

Ukunmanka, yamaram Atanka áintsan, Kristu, wakan asa, ashí áentsun nekas iwiaaku átinian susanniaiti.

⁴⁶ Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu.

⁴⁷ Emka áishman nun kajai najanamu asa nun kayaiti. Ukunmaya áishmansha ii Uuntri Kristu asa nayaimpinmayaiti.

⁴⁸ Atanka áintsan ainia nusha juyá ayashtin áiniawai. Kristu áintsan ainia nusha nayaimpinmaya ayashtin áiniawai.

⁴⁹ Yamái juyá áiniakur ukunam nayaimpinmaya ayashtin ajastatji.

⁵⁰ Juna tájarme, yatsuru. Ayash númpentin asa nayaimpiniam, Yus akupeana nu, wayachminiaiti. Iis, káutainkia káurchatniunam wayachminiaiti.

⁵¹ Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji.

⁵² Tura puseri muíttsarnin ti wárik yapajniáttaji. Tura ashí amuukai tusa umpuartatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuin yapajniáttaji.

⁵³⁻⁵⁴ Jú kautainkia yamá jákatniuiat káurchamnia ajastiniaiti. Túrasha jákachmin átatui. Nu túrunamtaisha Yus-Papinium aarma uminkiattawai:

“Jákatniun Yus nupetak amukuiti.

⁵⁵ ¿Itiur jákatjik yamaikia. Jákatniusha itiur nupettamkan mantamataji?” Tu áarmaiti.

⁵⁶ Yaunchu Yus akupkamu tiniu asamtai shuar tunáa tura jákatniuiti.

⁵⁷ Yamái antsu ii Uuntri Jesukristu túramujai jákatniunka Yus nupetkaiti. Tura incha nujai uwempratniun amaakui shiir yúminkiaji.

⁵⁸ Nu asamtai, aneamu yatsuru, kakaram ajasrum yawetsuk nan kaamas Yusa takatri takastarum. Ii Uuntri Kristujai tsainkia takaarum nuka penké ánrachuiti. Nu paant nékarme.

¹ Yusa kuitri irurtinkia, Yus-shuaran Karasea nunkanam tímiaj núnisnak atumniasha tájarme.

² Ashí tumiñtin, Yus súramna áintsam akankam ikiusta. Nújainkia wi jeattaj nuñ yaunchu akankamu mash irurmin átatui.

³ Nuñ jeancha átum anaiyarmena nu shuaran papijjai Jerusarénum akupkattajai. Tura atumí kuítrumin aisha ii yachin sústartatui.

⁴ Wisha wéminiaitkiuinikia wijjai wéartatui.

Papru irastatna nuñ

⁵ Wi Masetúnia nunkanam wétiniaitjai tura nuyá Kurintiunam jeattajai.

⁶ Nuñsha untsurí tsawant pujuschatjash. Ishichik nantusha wéchamnianum pujuschatjash. Tura wi atak wéakui atumsha yáintkiarum shiir akuptukchattarpash.

⁷ Aya wárik nankaamaktinian nakitiajai. Antsu Yus wakerakuinikia untsurí tsawant atumjai pujustaj tajai.

⁸ Tura juñ Ipsiunam pintikustís nampernum pujustajai.

⁹ Juñkia Yusa takatrí tí shiir takastin awai. Tura untsurí shuar wi takaamun nakitiainiawai.

¹⁰ Timiutéu nuñ jeamtainkia, shiir awajsatarum; sapijmiakain. Niisha wijjai métek Yusa takatrin takaawiti.

¹¹ Nu asamtai nakitairap. Antsu yáinkrum winí shiir akupkatarum. Chíkich yachijjai tatí tusan náakajai.

¹² Apurusnasha chíkich yachijjai winí írmasartí tusan ti seamjai tura penkesha nakiarmai. Kame nii ankant aku nuñ winishtimpiash.

Áujmamsamu

¹³ Aneara tariarum Yus nekas enentáimtustarum. Áishmanchakaitrum, kakaram ajasarum.

¹⁴ Anenkartamujai mash túratarum.

¹⁵ Ayu, yatsuru. Estepanasa shuari ashí emka Akaya nunkanam Yus-shuar ajasarman nékarme. Niisha Yus-shuaran yáintajtsar tuke takainiawai.

¹⁶ Niisha tura ashí niijjai métek yáinkiar takainia nú shuar seatmana nu tuke túratarum.

¹⁷ Estepanassha Jurtunátusha Akaikiusha atumíyá táarmatai shiir waraajai. Átum yajá pujakrum tujintiarmena nuna túrawarmai.

¹⁸ Niisha winia shiir enentáimtikrurarai. Núnisan shiir enentáimtikramprattarme. Nuní aents tuke shiir enentáimtustiniaiti.

¹⁹ Asia nunkanmaya Yus-shuar amikmáatmainiawai. Akirasha ni nuwe Prisirajajisha ashí Yus-shuar ni jeen Yus-Chichaman irunturarusha Jesusa náariin amikmáatmainiawai.

²⁰ Ashí ii yachisha amikmáatmainiawai. Nuámtaksha shiir awajnaistrum amikmáaniatarum.

²¹ Wi Papru asan júchiniak winia uwejrui áaran amikmaajrume.

²² Ii Uuntri Jesukristun aneachuka yajauchiniam yuminkramu atí. “Ii Úuntri, wari tatá.”

²³ Ii Uuntri Jesukristu yainmakarti.

²⁴ Jesukristunu asakrumin atumin ashí ti aneajrume. Nu atí.

Papru KURINTIUNMAYA SHUARAN Ataksha papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai Jesukrístu akatramu. Yus nuna wakerakui ni akatramuri anaikiamuitjai. Ii yachi Timiutéujai Yus-shuar Kurintiu péprunam íruntrumna nuna áatjarme. Kame ashí Akaya nunkanam Yusna ajasurmena nunasha áatjarme.

² Apa Yussha, ii Uuntri Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamuri

³ Ii Uuntri Jesukrístu Apari, ii Yusrí ana nuna naari uunt awajsatai. Niisha ii Aparínti. In waitnentramaji. Tura Niisha ii Yúsrínti. Tuma asa in tuke atsañtamji.

⁴ Ii wáitiajnia nuí Yuska in atsañtamji. Tura in atsañtamjina nútiksarik iisha chíkich shuar wáitiainia nuna atsañkrarat tusa túrutmaji.

⁵ Warí, Kristu wáitsamuri núkap pachiinkiaitjina núnisrik ni atsañkramurin núkap pachiinkiaitji.

⁶ Tuma asamtai, wáitiajnia nu, Yusa uwentikrampratniuri tura ni atsañkratniuri atumsha takustarum tusar wáitaji. Tura Yus in atsañtampramjina nu, Yusa uwentikrampratniuri tura ni atsañkratniuri átum takustarum tusar atsañkramuitji. Wats, átum uwentikramu tura atsañkramu asarum, ii wáitsajnia nútiksarmek wáitiayatrum shiir enentáimsarum katsuñtramniaitrum.

⁷ Tura “túrattawai” tu enentáimtajrume. Warí, átum iijjai métek wáitsaitrum. Núnisan iijjai métek Yus atsañtamtsurmek.

⁸ Yatsurtiram, iikia Asia nunkanam ti itiurchat wáinkiamjina nu nekaatarum tusar wakeraji. Imiá itiurchat wáinkiar iikia katsuñtratin jeachmaji.

⁹ Nu itiurchatnumia “iwiaaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan iniannia nú Yúsan enentáimtusarat tusa nu túrunamji.

¹⁰⁻¹¹ Jakamnia itiurchatnumia Yuska uwentikrampramji. Tura yamaisha uwentikrampratajtsa pujurtamji. Tura atumsha in Yus áujtakrumniñkia “Yuska tuke uwentikramprattaji” taji. Tura untsurí shuar Yus aujsa asakrumin, ii uwempra asakrin untsurí shuar Yúsan yumínsartatui.

Kurintiunam wau wéchatniun Papru ujakmiania nu

¹² Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anantsuk tura Yus umirkar wekaimji. Aya ii nekatairijjain wekaichamji. Antsu Yus in waitnentrama asa péñker wekasatniun yainmakmaji. Nu nekaar shiir enentáimji.

¹³ Áatjarmena nu páantaiti. Átum áujsarum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume.

¹⁴ Ishichik nékayatrumek nú núkap tuke nekaki wetarum tusan wakerajrume. Nuñkia Jesukrístu tátinia nú tsawantai átum winia shiir enentáimtursattarme. Tura átum péñker wekasa asakrumin shiir enentáimtustatjarme.

¹⁵ Tura ii shiir enentáimtuniaj nuna nékakun ataksha Yusá waitnenkartutairi nekap-sak tusan ataksha atumjin irastinian wakerimjai.

¹⁶ Masetúnia nunkanmaani wéakun írkuta nankaikitjjarum tusan enentáimmiajai. Tura wáketkuncha ataksha ístajrum tusan wakerimjai. Túramtai wi Jútía nunkanam weakui átum yáintkiatarum tusan atumin ístinian wakerimjai.

¹⁷ Nuiñkia ¿urukamtai túrachmaj? ¿Pénker enentáimtsukek “wetajai” tímiaj? ¿Wi Yusshuarcha nunisan, jimiara chichamtiniaiti, tú enentáimtsarumek?

¹⁸ Núchaiti. Yus tana nuna tímiatrusan umíana nútiksarik iikia ii chichame umiktai tusar wakeraji. Jú chichamaik, “Ee, atsa” tátsuji.

¹⁹ Wisha Serpanujai Timiutéujai Yusa Uchiri Jesukristunun ujakmajrume. Niisha jú chichamaik, “Ee, atsa” tíchaiti. Antsu nii tana nuna tuke umíawai.

²⁰ Niijiaisha Yus tana nu tímiatrusan uminiui. Tuma asamtai Jesukrístu enentáimtakur “nii tana nuna nekas túrattawai” tu enentáimji. Tu enentáimsar Yusa naari shiir awajeaji.

²¹ Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamji.

²² Tura ukunam ii achiktatjnia nuna, nekas amastatjai tusa Yus ni Wakanin ii enentáin apujturmajai. Nujai Níiniuitji tusar paant nékaji.

²³ Atumín ititurchatan wáinkiajj tusan nakitiakun atumí péprurin Kurintiunam jeachmajai. Wáitrukuñkia “Yus iirsati” tajai.

²⁴ “Aya wi tájana nútiksarmek Yus enentáimtustarum” waantu enentáimtumasar nu titin nakitajai. Yus nekas enentáimtusmaajai kakaarme. Antsu nekas warastarum tusar wakeraji.

2

¹ Tuma asamtai, atak kúntuts awajsajrum tusan nakitiakun, “atumí tunaari íwiartsurminiñ jeashtajai” tímiajai.

² Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitume.

³ Wi jeakun atumí tunaari íwiartsurminiñ kúntuts enentáimsajj tusan nakitiakun, nu papin áarmaj nútiksarak áarmajai. Warí, atumketrume winia waramtikrustin.

⁴ Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauchin túrana nu tsankuratin

⁵ Túrasa kúntuts awajtusmia nu, aya wíniak kúntuts awajtuschamai. Antsu atumniasha ishichik kúntuts awajtamsayi. Patasa chichasajj tusan “ishichik” tajai.

⁶ Kame nu áishmankan iruntra chicharkarum wáitkiasmarum nuke máakete.

⁷ Antsu yamaikia tsankuratniuitrume. Shiir enentáimtikratniuitrume. Niisha imiá kúntuts pujus nú arant ajasáin tusarum túratniuitrume.

⁸ Túrakrum nii nekas anearmena nu paant iniaktustarum tusan seajrume.

⁹ Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme.

¹⁰ Átum tsankurearmena nú shuaran wisha núnisnak tsankureajai. Tura tsankuratin ákuñkia, wi tsankurajna nu ashí atumnian enentáimtusar, Krístu ímmianum túrajai.

¹¹ Kame uunt iwianch Satanás in emestampratajtsa wakerana nusha nékaji. Tuma asamtai, túrawain tusar tsankuratniuitji.

Trúas péprunam Papru juákchamiania nu

¹² Krístunu shiir chichaman Trúas péprunam etserkatajtsan jean, ti péñker takastinian wáinkiamjai.

¹³ Túrasa ii yachi Titiun wáinkiachu asan, shiir enentáimsatniun tujinkiamjai. Tura asamtai Trúasnumiá aentsun áujsan ikiukiaran Masetúnia nunkanam wémiajai.

Krístujai nupetkamniaitji

¹⁴ Kristu Jesusjaj Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukuji kunjúakui, ashí nékainia núnisan ii etserkamujaj Kristu shiir chichamen Yuska ashí aentsun nekamtikiainiawai.

¹⁵ Kristu in pujurtamu asamtai Yusjaj nekapsamka iikia kunjúaji. Ii kunjúajnia nuna uwemtikramu ainia nusha tura uwemtikrachma ainia nusha nekapramnia ainiawai.

¹⁶ Menkakatniunam weena nuka ii kunjúajnia nuna jakamnia mejea nekapramji. Tura iwiaaku átinnium weena nuka iwiaaku átin kunjúa nekapramji. Maa, nu túratniuncha ¿yaki jeá?

¹⁷ Kame untsurí aents kuítian achiktaj tusar Yusa chichamen yapajinia núniskechuitji. Antsu Krístunu ajasu asar, Yus akupkamú asar, Yus ímmianum anantsuk esetsar étsereaji.

3

Yamaram chícham najanamú

¹ ¿Nu tákurninkia, “ataksha ninki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitiaji? ¿Chíkich iniaktustin nú papí atumin seatniukaitiaji?

² Atsá. Átumka ii papiría núniskechukaitrum. Ii enentáin nu papí áarmaiti. Tura nú papí áujsatniua núnisan ashí aents atumí túramurí wáinkiar ii etserkamaj nu, Papru nekas Yusa takatrín takaawai tusa nekaamnia áiniawai.

³ Iis, tátsujak. Papí aarma núnisketrume. Nu papí Kristu áarmaiti tura iisha nú papí atumin súaji. Tíntiajainchu antsu iwiaaku Yusa Wakaníjjaj áarmaiti. Kayanmasha áarchamuiti; antsu shuara enentáin, auka, áarmaiti.

⁴ Kame Krístunu asar, Yus enentáimta asar, nusha tímíniaitji, taji.

⁵ Ju nékaji; imia iik penké tujinkiaitji. Antsu ii túrajnia nu Yus ní kakarmarin súramkurin túraji.

⁶ Yamaram chichaman Yus najanamia nuna, incha péñker etserkatniun suramsaitji. Yaunchu aarma chichamnum, ashí takamtsuk umirkachrikiya tuke jakamniuyaji. Antsu yamaram chichamnum, Yuska ni Wakaníjjaj yamaram wekasatniun súramji. Yusa kakarmaríjjaj nu chicham étserji.

⁷ Yaunchu chichamnaka kayanam aar Yus Muisaisan susamiayi. Susamia nu, Muisaisa yapi ti wincha ajasmiai. Túrunamtaí Israer-shuar ni yapin íistinian tujinkiarmai. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatan winchajaj susamuyayi.

⁸ Tura yamaram chichaman Yusa Wakaní súramna nu, nujaj nankaamas shíiraiti.

⁹ Kame mesertinnium ejeana nú chicham winchajaj susamuyayi. Tura nujaj nankaamas Yúsnum ejeana nú chichamka Yus ímmianum péñkeraiti.

¹⁰ Iista; yamaram ana nu imiá shiir asa, yaunchu wincha amia núnaka mushatmamtkiui.

¹¹ Núkap arur pujuschamnia nu wincha áchamkia. Kame tuke átinia nuke nujaj nankaamas shíiraiti.

¹² Nu nékakur ti paant étserji.

¹³ Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiarain tusa tarachjaj ni yapin Muisaiska nukumakmai.

¹⁴ Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarmai. Tura yamaisha núnisan yaunchu aarma chichaman áujsam antukar nekaatniun tujintiainiawai. Kristu enentáimtuschatin ni enentáin nukukma nu yapajíachmaiti. Aya Krístujaj nuka yapajíámniaiti.

¹⁵ Yamaisha Muisaisa áarmarin áujsar nékainiatsui, ni enentáimmiari nukurkamú asa.

16 Tura aencha ni enentáí yapajíá Uuntna ajasmataikia ni enentáimmiariya nukurkamu ana nu jusamuiti.

17 “Uunt” tájinia nu, Yusa Wakaníiti. Uunt Yusa Wakaní pujana nuí ankant ajastiniaiti.

18 Nuke asamtai, iisha ii yapí tarachjai nukukchamu asar íspikia núnisketji. Uunt Kristu péñkeri iniakmaji. Kristu péñkeri nú núkap takaki wéakur, Krístujai métek ajastasa pujaji. Yusa Wakaníkia nuna túrawai.

4

1 Yus in waitnentrama asa ni chichamen etserkatniun ataktamsaitji. Tuma asamtai yawetsuk takaaji.

2 Uuka túratin ana nuyá tura natsanmai ana nuyasha kanakmiaji. Anankatai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai.

3 Uwempratin Chicham ii étserjinia nu páantaiti. Áyatik menkkakatniunam weena nu “páantchaiti” tuíniawai.

4 Uunt iwianch, ju nuñká uuntri ana nu, nu aentsu enentáin ukusturuiti. Uunt Krístunu shiir chichaman ii étsermajai tsáapnin enentáimpraraín tusa ukustawai. Nu Kristu Yúsan ímiatrusan nakumui.

5 Iisha étserkur, Jesukristu ii Úuntrinti tu étseraji. Iikia atumí úntrintji tátsuji. Antsu, Jesus ii uuntri asamtai, atumí yáintrintji, taji.

6 Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsaapnin awajtamsamia nu. Nu tsaapnijai ni shiirmarin, Jesukristu iniakmia nuna, ashí aents nekaawarat tusar Jesukristunun étseraji.

Yusak enentáimtusar wekasatin

7 Nu tsáapin imiá péñker ana nuna ii ayashíin Yus ikiusuiti. Tura ii ayashí kakarmachu, nuwe najanamua áanin asamtai, warí, kakaram ájinia nu Yúsnumiachukait. Ii ai nuna nekaawarat tusa Yuska ni tsáapnintrin ii ayashíin ikiusuiti.

8 Tuma asamtai ii itiurchatri árentmaku árinin tuke jiinkimnaitji. “Itiurkatjik” taji, túrasha Yus yáinmaji.

9 Aents pataaturmainiakrincha Yus ikiurmatsji. Emesrataj tukamá tujintiainiawai.

10 Kame Krístun máataj tusa tuke wakermia núnisan incha tuke mantamataj turamainiaji. Túrasha jákachu asar Kristu kakarmari ii ayashíin iniakmaji.

11 Iisha Jesusna ajasu asar wekaajnia nuí tuke tsawant tsúumainium jasattuk ajaji. Túrar ii ayashí jakamniaitiat nu ayashnium Jesusa iwiaakmari paant iniakmaji.

12 Iisha Yus-Chicham étserkur ii ayashíin jasattuk ajaji, tuma aín atumsha umikiu asarum nekas iwiaaku atin wáinkiarne.

13 Yus-Papinium yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji.

14 Yus kakarmaiti. Uunt Jesusan jakamunmayan iniantkimiayi. Incha núnisan Jesusjai iniantamkittiaji. Tura atumjai métek ni pujamunam juramkittiaji. Nusha paant nékaji.

15 Atumsha untsurí aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yuminsarum pujarme. Nujai Yusa naari uunt awajsamuiti. Nu nekaar wáitsatin ashamatsji.

16 Tura yawetsuji. Ii ayashí amuiki wéakuisha ii enentáinkia yamaram ajaki wéawai.

17 Warí, ukunam tuke shiir pujustatinia nu enentáimtakrikia, ju nuñkanam wáitiajnia nu, ti itiurchataitiat, aya yamaiya asa tiikia itiurchatchaiti, tura wárik nankaamawai. Túrasha ii itiurchatrijiaji Yuska ti shiir ana nuna amuukachmin ana nuna núkap suramsattaji.

¹⁸Tuma asamtai wáinjinia nu ti enentáimtatsji. Antsu wáintsujnia nu nekas enentáimtaji. Wáinjinia nusha aya yamaiyáiti. Antsu wáintsujnia nuka tuke amuukachminiaiti.

5

¹Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashí emes-nakuisha warí itiurtamajia. Nuka aaka núnisañ amuukamniaiti.

²Ju ayashnium pujusar wáitiaji, taji. Yamaram ayash nayaimpiniam pujana nu achiktai tusar wakeraji.

³Ayashtichu ajasaj tusar, yamaram ayashtin ajastaitсар wakeraji. Pushía núnik yamaram ayash in nukurmaktai tusar wakeraji.

⁴Tura juí ayashjai pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsartinia núnisrik yamaram ayashnium tuke pujusmí tusar taji. Iista, ju ayash amuukachminkiait. Yamaram ayashnium pujusar tuke iwiaaku pujustatji.

⁵Yamaram ayashintin ajastinian iwiarturmaruitjinia nu Yúsaiti. Tura nekas túrattajai tusa ni Wakanin suramsaitji.

⁶⁻⁷Ju nékaji. Ju ayashnium pujajnia juinkia Uunt Jesusjai pujatsji. Tuma asamtai, wáinjinia nu ti enentáimtutsuk Yus enentáimtsar tuke shiir enentáimsar wekaaji.

⁸Tura ju ayashniumia jínkir Uunt Jesusjai tuke pujustaitсар wakeraji. Tura túrattajai tu nékaji.

⁹Tuma asamtai ju ayashnium pujakrishia tura ju ayash ikiukrishia Uunt Jesus tuke waramtikсатаi taji.

¹⁰Warí, ju ayashjai ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristuj jeatniuitji. Tura ii túramujai métek akirmaktatji.

Krístun waramtikсатаj taji

¹¹Tuma asamtai ju nékaji: Uunt umirkashtin ti tsúumainti. Nu nekaar ashí shuar Yushuaran awajsataj tusar ti takaaji. Tura incha Yus nékarmaji. Tura ii túramurí átumka atumí enentáin paant nékarme, tajai.

¹²Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya pátatkea nujai warainia nú shuar tsanumprut-mainiakui yaintkiatarum tusar taji.

¹³“Wáurkaiti” turamainiajiash. Nusha warí, itiurtamajia. Ashí túrajnia nu, Yus aneakur tura atumin yáintaí tusar túrajai.

¹⁴Kame ashí ii túrajnia nu Kristu anenkrattairijiaí túrajai. Kame ju nékaji: Kristu ashí shuaran jaruku asamtai, Yus íimmianum ashí iisha jaka núnisaitji.

¹⁵Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia juí, iik wararmamtsuk, Kristu umirkatniuitji.

¹⁶Tura yamaisha aya ni ayashí íirsar, “nu shuar pénkeraiti” tura “nu shuar yajauchiiti,” titin tujintiaji. Kame yaunchu aya ni ayashí íirsar “Kristu yajauchiiti” tu enentáimsamajia. Tura yamaikia yapajjár, esetsar enentáimkiur “Kristu Yusa Uchirínti” taji.

Krístujai yamarmaitji

¹⁷Tuma asamtai, Krístunu ajasúka yamaram najanamuiti. Yaunchu enentáimtaiirí menkakayi. Antsu núnaka íikias ni enentáimtaiirí nekas yamarmaiti yamaikia.

¹⁸Nunasha Yus túrait. In nawampramkattsa Krístun akupturmakuitji. Tura nu etserkatniun incha ataktamsaitji.

¹⁹Yuska in tunaarinniutin asutiámatniun nakitiak Krístujai nawampramkamajia. Tura incha Yus-shuartin nu ujaktinian ataktamsaitji.

²⁰ Krístunu ataksamu asar, Yuska “winia Uchirjaj*ni* nawamnaikiatarum” tusa ii wenejaj*ni* atumin seatmarme. Tuma asakrin, Kristu náar*ni*in “túratarum” tájarme.

²¹ Krístuka tunaan penké túrachmiayi. Túmanak ii tunaarij*ni* Yus Krístun makuumiayi. Nuna tura Krístunam makuuchmin awajtamsamaj*ni*.

6

¹⁻² Ni Papiri*ni* Yus yaunchu Isayasan juna tímiayi:

Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatr*ni*in pachitkijania nu, Yusa anenkrattair*ni* penker achiktarum tusar seajrume.

³ Tura “Papru etserkamur*ni* ántrait*ni*” tíar*ni*in tusar chíkich yajauch enentáimtiktsuk penker wekaaj*ni*.

⁴ Nekas Yusa takarniurintj*ni* nuna paant nekaawarat tusar wáitiatrik, atsumayatrik, ititurchatnum pujayatrik shiir katsunteaj*ni*.

⁵ Ju ititurchat wáinkiamj*ni*: katsumpramkarmaj*ni*; sepunam enketmáwarmaj*ni*; charáa-charáa awajtamiarmaj*ni*; takatcha ti ititurchat takasmaj*ni*; kanutsuk pujumaj*ni*; tura tsukasha ti tsukammaj*ni*.

⁶ Tunáa nakitrar wekaaj*ni*; Yus-Chicham unuimiátraitj*ni*; shiir enentáijjaj*ni* katsuntrar wekaaj*ni*. Chíkich shuar penker awajeaj*ni*; Yusa Wakaní pujurtamkurin shuar nekas aneaj*ni*;

⁷ nekas chicham ana nu étseareaj*ni*; tura Yusa kakarmarisha nú paant iniakmaj*ni*. Tura ni nemasrin nupettukaj*ni* tusa suntar ni tantarin júana núnisrik iisha ii nemasri íwianch nupettamkaj*ni* tusar ii Yusri tuke umirkar wekaaj*ni*.

⁸ Shuar shiir enentáimturmainiakrincha, yajauch enentáimturmainiakrincha, penker chichartamainiakrincha, yajauch chichartamainiakrincha tuke Yusjaj*ni* shiir wekaaj*ni*. “Wáitruiniawai” turamainiakrincha tuke nekas chichaj*ni*.

⁹ “Nu aents nékatsj*ni*” turamainiakrincha Yusnumka nékanj*ni*; jákatin tsúumainnium wekayatrik tuke iwiaaku pujaj*ni*; asutiámuitiatrik mantamnatsj*ni*. Yusa takarniurintj*ni* nu ashí nujaj*ni* paant nekaamniai*ni*.

¹⁰ Kúntuts pujayatrik ii enentáinkia waraaj*ni*; kuítrinchaitiatrik chíkich shuar kuítrintin awajeaj*ni*; penké takakchiatrik ashí wáinj*ni*.

¹¹ Yatsurtiram, Kurintiunam pujarmena nu, ashí paant ujakchamkajrum. Ti anearumna nu nékarme.

¹² Wikia atumin paant chichastajtsan wakerajrume; antsu átumka anenttsuk paant chichastin nakitrarme.

¹³ Winia uchirua núnisnak chichajrume; wi tuke paant chichajarjarmena núnisrumek atumsha atumí enentáin ana nu, paant ujakatarum tusan seajrume.

*Yusa jeentj*ni**

¹⁴ Yus-shuar Yus-shuarchajaj*ni* tsaniñktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjaj*ni* métek enentáimiainiawak? ¿Tsáapnisha kiritjaj*ni* máimtek áminkiait?

¹⁵ ¿Krístuka uunt iwianchjaj*ni* nawamnaikiamniakait? ¿Yus-shuar Yus-shuarchajaj*ni* tsaniñ shiir pujusminkiait?

¹⁶ ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jeentrum. Yus Niñki ni Papiri*ni* juna tíchamka:

Niijjaj*ni* tsaniñkia pujusan, niijjaj*ni* wekasartatjaj*ni* tura ni Yusri átatjaj*ni*; tura niisha Wíi aents ajasartatui.

¹⁷ Tuma asamtai junasha tímiayi:

Nii matsatainia nuyá jíinkítarum, tura níjya kanaktiarum, tawai Uunt Yus; tura yajauch ana nu antínkiarap. Túrakrumninkia awayattajrume.

¹⁸ Tura atumí Aparí átatjai; átumka winia uchir átatrume. Nuna Wi imiá kakaram uunt Yus asan tajai. Tu áarmaiti.

7

¹ Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasain tusar, ashí tunáa ana nuyá kanaktiníaitji. Túrar “Yusak nekas ii úntrinti” takur, ii ayashisha, ii enentáisha takamtsuk tuke tsawant Yus íktustiniíaitji.

Kurintiunmaya shuar enentáimprarmatai Papru warasmiayi

² Ataksha nawamnaikiatai. Iikia shuar yajauch awajsachmaji; yajauch jintintrachmaji; anankachmaji.

³ Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme.

⁴ Araantutsuk áatjarne; shiir enentáimjai. Itiurchatnum pujayatnak, atumin enentáimtusán enentairuí kakaram enentáimsán waraajai.

⁵ Jui Masetúnianum penké ayamprachmaji. Antsu ti wáitsamji. Áentsnumiá itiurchat wáinkiamji, tura ii enentáijiaínkia ashamkamji.

⁶ Tura kúntuts pujakrincha Yus ikiakátmartinian nékawai. Tuma asamtai Titiún akup-turkamai. Nujai winia enentáirun ikiakármái.

⁷ Tura átum nii ikiakármarmuna nuna Titiu ujatkamai. Nuna antukan ti warasmajai. Títiuka átum írsatin wakerarmena nuna ujatkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujatkamai. Nuna antukan nú nañkaamas warasmajai.

⁸ Papí nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujsarum ishichik kúntuts enentáimprarmuna nuna nekaan waraajai.

⁹ Kame kúntuts enentáimprakrumin waraatsjai. Antsu atumí tunaari nekaarum kúntuts enentáimprarm atumí enentái Yusjai yapajiá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijiai yajauch awajsachji.

¹⁰ Nekaatarum. Yus wakerana nútiksán kúntuts katsunteakka ni enentái Yúsnum yapajiáwai. Nuiñkia ni tunaariya uwempráiti. Nuka “túrmainchu túraitjai” tíchamniíaiti. Antsu Yusan enentáimtutsuk kúntuts pujakka ni enentái yapajiáshtatui; yapajítsuk ni tunaariya uwemtsuk jakattawai.

¹¹ Tura iistarum; Yus wakerana nútiksarmek atumí kúntutsri katsuntearme. Tuma asarum wi áatjarne nu esettsarum enentáimtusurme. Atumí túramuri ujatkatajtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiámarne. Tura winia anentu asarum wi tímia tímiatrusrumek turatai tusarum ti wakerimiarme. Nu tura asakrumin penker túrarmena nu, paant iniakmarne.

¹² Kame yajauchin túramia nuna ni tunaarin iniaísat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarne. Tura nú nañkaamas átum Yúsnum in anearmena nu nekamatarum tusan áatramjarne.

¹³ Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nañkaamas shiir waraaji.

¹⁴ Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asamtai atumin natsantrachmajrume. Kame atumin tuke nekas ana nuna tímiajrume. Núnisán atumnian Titiun tímiaj nusha nekasauyi.

¹⁵ Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashamkachurmek. Túmayatrum, nii péñker tati tusarum pachischarme. Tura nii taa seatmarma nu umikiurme. Títiuka nuna enentáimias waraawai.

¹⁶ Tura wikia, átum péñker túramurmin nekaan tura péñker túrawartatui tu enentáimsan waraajai.

8

Yus-shuarti ii kuitri súsatin

¹ Yatsurtiram, Masetúnia núñkanmayaḡ Yus-shuaran Yus waitnentainia nuna yamáí ujaktatjarme.

² Ti itiurchatnum nekapsamu ainiawai. Túmayataḡ warainiawai. Tura ti kuítrincha áiniayataḡ emeentutsuk kuítrinnia núnisaḡ suiniawai.

³ Juna wi paant nekaan ujaajrume. Niisha wakeramujai súsatniun jeainia nuna súiniawai; tura nú nankaamassha súiniawai.

⁴ Yus-shuaran kuítrinchan súsartaitsa ti wakeruiniak, nu túratniun ti seatmarmaji.

⁵ Tura ii enentáimmiyaj nú nankaamas túrawarmiayi. Emka Yúsnum niñki sumamawarmiayi. Tura Yusa wakeramuri túratjaji tusar incha “yáíñtajrume” turammiaji.

⁶ Tuma asamtai, “Masetúnia nuñkanam kuit júuktin nankamamamna nu, Kurintiu peprunmasha amukta” tusar Titiu seamiaji.

⁷ Atumsha ashí péñker túratin ti nékarme. Yus enentáimtustincha, unuiniartincha, ju nuñkanmayaḡ nekaatniusha, in aneatniusha nuka ashí nékarme. Wats, jusha túratatum. Yus-shuar kuítrincha ainia nu achikiarat tusarum Titiu támatai núkap susatarum.

⁸ Kame atumí úuntriá núnisnak akupeatsjarme, túratniuitrume tusan. Antsu chíkich shuar ni kuítrin susartasa ti wakeruinia nuna atumin ujakan, atumí anenkrattairi nekaspashi tusan nekapsatajtsa pujajai.

⁹ Ii uuntri Jesukrístu waitnenkartutairi nékarme. Ashí takakuyayi, tura atumin anenma asa kuítrincha núnisaḡ ajasmiaayi. Ju nuñkanam kuítrincha núnis ajasmatai átum nayaimpiniam kuítriniak tusa túramiaayi.

¹⁰ Juna enentáimjai. Nuik uwitin, “yáíñtatji” tíchamkarum. Tura nu túratin ti wakerimiarme.

¹¹ Nankamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum.

¹² Iistarum. Ni kuítrin Yúsán nekas susatajtsa wakerakuñkia, nii jeana nuna susat tusa Yus wakerawai. “Jeana nú nankaamas susati” tátsui Yus.

¹³ Chíkich ti núkap susarum atumnia táasat tusan tátsujai.

¹⁴ Antsu ashí métek takusarat tusan tajai. Iis atumsha yamaikia ti nukap takakrume; nujai atsuma nu súsatniuitrume. Ukunam chíkich tsawantaj átum atumashtarmeash. Nuñkia niisha atumin suramsarti. Nu túratin ákuñkia ashí métek takustin átatui.

¹⁵ Yusa Papiriin yaunchu áarman núnis tátsuk:

Núkap takusmia nu ampirchamiai; tura ishichik takusmia nu atsumachmiai.

Titiu chíkich Yus-shuarjai Kurintiunam wetin ármiaiyi

¹⁶ Tura wi aneajrumna núnisaḡ atumin aneatniun Yus Titiun susamiai. Tuma asamtai Yúsán yuminsan pujajai.

¹⁷ Iis, wi takui wétinian wakerimiayi. Tura nú nankaamas, atumin anenma asa, ni enentáijjaiḡ wéawai.

¹⁸ Tura chíkich Yus-shuar Titiujai akupkatajtsa pujaji. Nu shuar Yusa Chichamen ti peñker etserainakui, ashí Yus-shuar iruntramunam nin péñker áujmatainiawai.

¹⁹ Tura nú shuarnaka ii tsaniakmari atí tusar ashí Yus-shuar iruntramunam nuna anaikiarmiayi. Iijjai kuítian jukiarti tusar anaikiarmiayi. Iis Yusa náarin ashí aents uunt najanawarat tusar tura ashí shuar atumí tsañkarin nekaawarat tusar nu takat túratsjik.

²⁰ Iis, ju kuit ii jukittiajnia nu, núkap asamtai, aents tsanumprutmawarajj tusar, Titiujaj tura ju shuarjaisha wéaji.

²¹ Yus ímmianumsha, aents ímmianumsha ii naka wekaajnia nuna nekaawarat tusar túraji.

²² Nu jimiará shuarjaj chíkich Yus-shuar akupeaji. Yusa takatrjn takastasa ti wakerana nu nekas nékaji. Tura átum yáintin ti wakerarmena nuna nekáa niisha atumijn jeataj tusa ti wakerawai. Nuna túmak Yusa takatrjn takastinian wakerana nuna paant iniakmawai.

²³ Tura ajsha chíkich shuar Titiun nekaataitsar anintruiniakuisha, “Titiu Papru tsaniakmarinti. Incha yáinmaktajtsa Páprujaj takaawai” titiarum. Chíkich Yus-shuaran nekaataitsar anintruiniakuisha, “Yus-shuar akupkamu áiniawai, tura Kristu náarjn shiir awajin áiniawai” titiarum.

²⁴ Tura atumí anenkrattairj ashí Yus-shuar nekaawarat tusarum, nu shuar pénger itiaatarum. Nu túrakrum, atumnia ii shiir tímiaj nu nekasaiti tu iniaktustatrume.

9

Yus-shuaran kuítrinchan súsarmia nu

¹⁻² Kame átum Yus-shuar kuítrincha súsatin wakerarme; nuna nékajai. Tuma asan núnaka áatrachminiaitjarme. Atumsha súsatin wakera asakrumin wi nunasha shiir enentáimsan, “Akaya nunkanmaya shuar nuik uwitinia wakerusmatak yáintinian wakeruiniawai” tusan Masetúnianmaya shuáran ujaajai.

³ Tura “kuítniasha súsatniun ti wakeruiniawai” tímiaj nuna, “wáitiaiti” tírajn tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai.

⁴ Wi ukunam Masetúnianmaya shuarjaj atumijn jean, kuit súsatin tímiarmena nuna iwiarachman wáinkian natsarajj tusan, tura atumsha natsarajrum tusan túraji. Warí, “súsatniun ti wakeruiniawai” tuke tu wéatsjak.

⁵ Nu tuma asamtai, au takui súarme tu enentáimsarajn tusan ju Yus-shuaran emka akupenajai. Niisha nu kuítian iwiaratniun yáinmakarti, tajai. Nuinkia wisha Masetúnianmaya shuarjaj ukunam jeawakrin, nu kuit atumsha nekas atumí enentáijjainkⁱ súsatin wakerarmena nu nekaamnia átatui.

⁶ Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete.

⁷ Tura ashí shuar ni enentáin enentáimsana nunak susati. “Nakitiyatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtawai.

⁸ Ashí pénger ana nuna suramsatniun Yus tujintiatsui. Nujaj átum atsumashtatrume. Tura chikichan yáintin núkap takustatrume.

⁹ Yus-Papinium ju aarma awai:

Kuítrinchan núkap susayi;
nuna tura, tuke túratin átatui.

¹⁰ Arakmaun araakan súana nusha Yúsaiti. Tura yurumkan súana nusha Yúsaiti. Niisha átum pénger araatniun suramsattarme. Tura araarumna nujaj pénger túratarum tusa araakrumin ipiampartatui.

¹¹ Tuma asamtai núkap juukma takaku asarum, núkap súsatin jeattarme. Nuinkia súarmena nuna ii uwejeyan chíkich Yus-shuar achikiar Yúsan yumiñsartatui.

¹² Warí, ju kuit Yus-shuar kuítrincha súakrin ni atsumamurjncha atsumachartatui. Tura nú nañkaamas Yúsan ti yumiñsartatui.

¹³ Nu shuar yáintai tusarum tura ashí Yus-shuar yaintai tusarum súatsrumek. Nujaj Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarjn uunt awajartatui.

14 Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anenmainiak Yúsan áujturmasartatui.

15 ;Tura ashí iisha ii Yusrj ti yumı̄nsatniuitji! ¿In súramjinia nuna yaki jintíartinian jeá?

10

Papru nekas jintintiamniaiti

1 Wats, “Papru iijjaj̄ pujak péejchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijjaj̄ juna seatjarum tusan pujajai.

2 Atumí weatkamuriya shuar chichainiak “Papru ni tsaniakmarijjaj̄ ju nunkanam akupin ajastai tusar wakeruiniak jintintiniawai” turutainia nuna kíishtumaktajtsan enentáimjai. Wisha atumiin jean kakaram chichaschataj tusan, nu antukairap tu seajrume.

3 Áentstan̄ka nunkanmaya áentsuitji, túrasha jú áents maania aintsar máaniatsji.

4 Ju nunkanmaya nan̄kijjaj̄ máaniatsji antsu ii nan̄kiri Yusa kakarmarinti. Nujaj̄ iwianchi kakarmari núpeteaji.

5 Ju nunkanmaya aentsu jintíamuriñkia tura waantu enentáimtumamuriñkia, Yus nekaatniun itit awajea nuka, nu nan̄kijjaj̄ núpeteaji. Tura ashí ju nunkanmaya enentáimsatin yapajniak, emetamu áintsan̄, Kristun umirkarat tusar nu nan̄kijjaj̄ núpeteaji.

6 Nekas umirkatin átum jeawakrumniñkia nuiñkia umirkatniun tuke nakitiainia nu, Yusa kakarmarijjaj̄ asutiáttaji, tajai.

7 Atumsha aya pátatek ana nu iiyarme. Wats, shuar nekas Krístunu ajasman neka-maka, núnisan winiasha Krístunuiti tu enentáimtursatniuiti.

8 Yusa kakarmarijjaj̄ akupeaji tuke tákuncha natsaamatsjai. Nu kakarman atumin péñker jintintiatarum tusa Kristu suramsaitji. Kame atumin emesratniun suram-sachuitji.

9 “Ni áarmarijjaj̄ awaktamkatajtsa wakerutmaji” tátsurpash. Núchaiti.

10 “Papru áarmari ti kakaram áiniawai, tura juj̄ pujak kakarmachuiti; tura etserkatni-uncha nékatsui” turutainiawai.

11 Wats, tuinia nuka junasha nekaawarti. Yajá pujakur kakaram áajinia núñisrik atumjaj̄ pujakrishakakaram túrattaji.

12 “Wiki imiá péñkeraitjai” tuinia nujaj̄ méteketji tátsuji. Ní shuaraitji tátsuji. Warí, niisha imia niñki nekapmamainiawai. Tura ni aj̄ íisar “nu nan̄kaamas péñkeraitjai” tu wéenawai. Nuna túruiniak netse túruiniawai.

13 Antsu iikia, ii nekamatın jeajnia nú nan̄kaamas waantu ajaschattaji. Ii takas-tatjinia nuj̄ Yus Niñki jintinramji. Nu arant wéatsji. Kame atumiin takastinian Yus tsan̄katramkaitji.

14 Tuma asamtai, tájinia nu Yus tsan̄katramka nú iniañkas túratsji. Warí, iisha emka Kristu chichamejaj̄ atumiin jeachmakaj̄. “Emka jeamji” tájinia nu ántrar tátsuji. Kame Yus tsan̄katramakrin jeamji.

15 Chíkich takasmanum iikia waantu enentáimtumasar, “ii takatrı̄nti” tátsuji. Antsu yamá enentáimtarmana nú nan̄kaamas Yus enentáimtustarum tusar wakeraji. Nu túrakrumninkia atumiin tuke takasminiaitji.

16 Nuyasha chíkich takaana nuj̄ takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íiniuiti” tíchattaji.

17 Tura péñker enentáimtumastaj tusa wakerakka, Yúsnaıtjai tusa péñker enentáimtumasti.

18 Warí, niñki “péñkeraitjai” tumamna nuka anturkachminiaiti. Antsu Uunt “péñkeraiti” tana nú shuar nekas péñkeraiti.

11

Ántar etserniun Papru áujmateawai

¹ Waurua núnisnak chichastatjana nu anturtukaintrumeash. Ee, anturtuktarum tusan seajrume.

² Atumniasha Krístunak anajmamtikrajrume. Tura nuwá chíkich áishmañkan nékatsuk ni áishrijajinkⁱ nuatnaiya núnisrumek átum chikicha chichame umirtsuk aya ni chichamenkⁱ umiakrumin Krístuⁱ ejetaj tusan wakerajrume. Nuna túratⁱ tusan atumin akasmatajⁱ rume. Nu akasmaktinian Yus surusuiti.

³ Túrasha íwianch ni nekatairijjajⁱ emka nuwá Epan anañkamia nútiksañ atumniasha Yusa jintiyá awajimtikramar Krístu aneashtinian enentáimtikramprarmatai anañkamu ajrum tusan tsuutajrume.

⁴ Warí, chíkich shuar Jesusnan nusháa étserkamujajⁱ táiniakuisha péñker ántarme. Tura nusháa wakan achikiam, nusháa chichamjajⁱ uwempramniaiti tu etserainiakuisha, nekasapitia tárume.

⁵ Kame “Yúsnumiá akatramu asar etserkatin imiá nékaitji” tuinia nujajⁱ nañkaamas nékaitjai, tu enentáimjai.

⁶ Ti péñker chichastinian nékachiatnak winia nekaatairsha taamtsui. Núnaka ii túramurijjajⁱ tuke paant iniakmaji.

⁷ “Akirkata” tútsuk Yus-Chichaman atumin ujakmajrumna nuⁱ ¿tunáa túrajak? Átum ankant ajastarum tusan wikia péejchach ajasu asan, “etserkamunam akirkata” tíchamjarme.

⁸ Antsu atumin yáintaj tusan pujakun chíkich Yus-shuarnumiá kuítian suruiniakui achikmiajai. Nuna túran ni kuítrín emeentukmiajai.

⁹ Tura atumjajⁱ pujusan atsumaknasha atumniaka seachjarme. Masetúnianmayá Yus-shuar taar, wi atsummiajna nuna surusarmiayi. Nu tuma asantai tájarme, seachjarme tura seashtatjarme.

¹⁰ Ashí Akaya nunkanam nuna ujaktinian suritrukchartatui. Nuna tákun Krístu nekasrijjajⁱ tajai.

¹¹ ¿Urukamtai nuna taja? ¿Atumin aneachu asanak taja? Atsá. Anejrumna nuna Yus nékawai.

¹² Túrasha wi túrajna nuna tuke turu wétatjai. “Papru túrana núnisrik túrajⁱ” tuinia nuna tárainⁱ tusan túrattajai.

¹³ Warí, niisha Yúsnumiá akatrachma áiniawai. Anañkartin áiniawai. “Krístu akatramurintji” tumá átaj tusar wekainiawai.

¹⁴ Nusha urukaku túmait tíchamniaiti. Warí, imia Satanáskesha “nayaimpinmayá akatramuitjai” tumá átaj tusa wekaatsuk.

¹⁵ Nuñkia imia ni suntarisha péñkeran túrawai tumá atai tusar wekasachartinkiait; túrasha ni amuamurinkia tunáa túriarma nujajⁱ métek nekapmá asutiátin átatui.

Papru wáitsamia nu

¹⁶ Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsañkatrukⁱ tarum. Ishichik waantu enentáimtumastaj tusan wakerajai.

¹⁷ Tura waantu enentáimtumastaj tájana nu, Uunta tsañkatramurijjajⁱ tátsujai. Antsu waurka núnisnak chichaajai.

¹⁸ Untsurí ju nunkanam uunt ajasar ti waantu enentáimtumainiakui wisha ishichik waantu enentáimtumastatjai.

¹⁹ Imiá nékatrum waurka ainia nu shiir enentáimtusum ánturearme.

²⁰ Niisha atumin takamtikramainiakuisha, kasartamainiakuisha, atumí nérenniurí ajainiakuisha, yajauch chichartamainiakuisha, yapimin awattamainiakuisha ashí nu katsuntearme.

²¹ Natsamayatnak tájarme jikia nu túratin kakarmachuuji! Wats, niisha araanainiat-sna nuna wisha araantatsjai. (Waurka núnisnak chichaajai.)

²² Niisha Ipríu-shuar áiniakuisha wisha núnisnak Ipríu-shuaraitjai. Israer-shuar áiniakuisha wisha núnisnak Israer-shuaraitjai. Apráama weetri áiniakuisha pai, wisha núnisnak.

²³ Kristu takarniurintji, tuiniawai. Wikia aujai nankaamasaitjai. Kame nuna tákun waurka núnisnak chichaajai. Kame nijjai nankaamas takasuitjai; nijjai nankaamas asutiámutjai; nijjai nankaamas sepunam enkeamuitjai; ti núkap jáninkiamjai.

²⁴ Israer-shuar chikichkí achirkacharmai. Antsu tímiajni senku jea achirkarmai. Tura emka achirkarmia nuí awa-awatatkua trainta nuiwi ejeyarmiayi. Tura nu tímiajni senku jea achirkarmia nuísha nútiksán nujai métek awatturarmiayi.

²⁵ Numijjai menaintiú awatturarmai. Kayajaisha mantuatai tusar chikichkí tukurarmai, kanusha menaintiú wayamai wi enkempran wekaimiaj nuí. Tura nayaantsanam ajapén chikichik kashi nuí pujusan tsawarmajai tura nu tsawantcha tuke pujusmajai.

²⁶ Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjaisha, wí shuarjaisha tura yajaya shuarjaisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajtustaj tusar wakeriarmai.

²⁷ Itiurchatnasha ti wáinkiaitjai; takatnasha ti takasuitjai. Ti untsurí kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekruí wáitsaitjai.

²⁸ Tura nuna nankaamas, kaarka kijin júkitniua núnisnak Yus-shuar péñker wekaini-awash tusan ashí tsawant ti enentáimsan pujajai.

²⁹ Chikichik Yus-shuar kakarmachu pujakui wisha kakarmachu nekapeajai. Shuar chikichan tunaanum ajuawarmatainkia wisha natsamakun kajekan wáitiajai.

³⁰ Maa, waantu chichastin ákuinkia, antsu winia kakarmachu awajtuinia nuna ujakan waantu ajasaintjai.

³¹ Yus, ii Uuntri Jesukristu Apari ana nu (ni naarí tuke shiir awajsamu atí) wi wáitratsjana nuna nékawai.

³² Tamasku péprunam pujai nu nunkanmaya akupin winia jinkiá juruktiaj tusa wakerak pepru tanish téntakma wáitirín suntaran apujsamiai. Aretas uunt kapitían pujai túramiai.

³³ Túrasha uunt chankinnium enketawar pepru aa tanishri áankamunam jiki itiararmiayi. Tu uwempramajai.

12

Papru wáinkiamia nu

¹ Kame wiki shiir chicharmamsatniun nakitiajai. Túmayatnak ímiarjana nuna tura uunt Yus iniaktursamia nuna ujaktiniaitjarne.

² Krístun umirin ana nú áishman kan nékajai. Nu áishman jimiará nayaimpin nankaikin menaintiú nayaimpiniam junakniuiti. Nusha katurse uwí nankaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai.

³ Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai.

⁴ Yus-shuara wakaní shiir pujutainium junakmiayi. Nuísha paant awajsachmin ana nuna antukmiayi. Nii antukmia nú chicham paant awajsatniun suritkiamuiti.

⁵ Nu áishman̄ka túrunamuri nan̄kaamakuiti tajai. Tura wikia nan̄kaamakuitjai túmamtsuk, kakarmachuitjiana nuna paant ujaajai.

⁶ Nan̄kaamakuitjai túmamtiaj tusan wakeraknaka nekas tíminiaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujai métek enentáimtursatarum tusan wakerajai.

⁷ Wi nayaimpiniam wáinkiamajna nu timiá péñker asamtai ántar waantu enentáimtumaschatniun, jañki mesertinia núnisañ winia ayashruj najaimiatniun sunasmiajai. Nuka wi wáitsatin Satanásnumia akupkamuiti.

⁸ Nuka jurutkitia tusan Úntan menaintiú seamjai.

⁹ Tuma aiñ Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashjñ winia kakarmarun wáiniainiawai.” Tuma asamtai, Kristu kakarmari winia ayashruj paant ati tusan kakarmachuitiatnak araantatsjai.

¹⁰ Tuma asamtai, wi Krístun anekui shuar katsekruiakuisha, kajertuiniakuisha, winia kuítrusha, kakarmarsha atsaiñ waraajai. Kame ashí itiurchat ana nuñ kakarmachuitiatnak kakaram nekapeajai.

¹¹ Wi “péñkeraitjai” túmamkun waurua núnisnak chichaaajai. Tura atumsha winia péñker chichartusminiaitiatrumek, túrachu asakrumin tu chichasjai. Warí, wi penké ántraiiatnak, “ti péñker akatramuitji” tumamainia nú nun̄kaachichuitjai.

¹² Atumjai pujumiaj nuñ, itiurchat ámanman̄ katsuntran takasmiajai. Yuska ni kakarmarin iniakmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruiti” tusa paant iniakmasmiayi.

¹³ Warí, chíkich Yus-shuaran yáinmij núnisnak atumniasha yáinmajrume. Áyatik atumin “kuit surusta” tíchamjarme. ¡Nu yajauchiitkiuin̄kia tsañkurturtarum!

Papru atak tátinrñ ujakmiania nu

¹⁴ Jújain̄kia menaintiú iwiarnarjai atumin íistaj tusan. Tura jeaknaka, “etserkamun akirkatarum” tíchattajrume. Atumí kuítrñ wakeratsjai. Antsu atumin wakerajrume. Warí, winia uchirchakaitrum. Uchisha aparñ kuítian ikiauntukchatniuiti. Antsu aparñ ni uchirñ kuítian ikiauntuktiniaiti.

¹⁵ Atumniasha yáin̄taj tusan ashí takakjana juna ajapawaintjai, tura winia kakarmar-nasha ashí emen̄kákaintjai. Wi ti wakeramaitiatrum átumka ishichik wakerutarminiñ túrawaintjai.

¹⁶ Túrasha chíkich shuar chichainiak “Nekasaiti; Papru nin̄ki ii kuítrñ jurutramkich-maji. Túrasha anañkartuatniun neka asa in anañkramachmiashia” turutainiatsuk.

¹⁷ ¿Nusha itiura? ¿Shuáran wi akupkamaj nujai kuítrumin achikjak?

¹⁸ Atumin íirmasat tusan Titiun “wetá” tímiajai. Tura nin̄ atamprít tusan chíkich Yus-shuaran akupkamjai. ¿Titiusha kuítrumin juruttramkimkiarum? ¿Wisha niisha mai metek enentáimsar métek takaschamkaj’?

¹⁹ ¿Warí enentáimsarum? ¿Átum péñker áiniawai turutik tusar nu tájik? Antsu, aneamu yatsurtiram, ii tájina nu atumin Yúsnum ikiakártajrum tusar taji.

²⁰ Wi atumjñ jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrumek, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, nin̄ki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itiurchat enentáimjai.

²¹ Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurñ shuartiram iniaisachurmena nuna

nekashtajash. Tura enentáim yapajitsuk tuke tura asakrumin úutchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

13

¹ Jujai menaintiú íistajrum tusan winiajai. Ashí iwiaratin ana nu, jimiará tura menaintiú shuara chichamejai iwiarnartatui.

² Wi atumjai pujachiatnak, atumjai pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaisashtatjarme.

³ Nuinkia wi Kristu kakarmarijjai chichaaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takaawai.

⁴ Kristu nekas kakarmachua nútiksaj krúsnum máamuitiat, Yusa kakarmarijjai iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrasha Yusa kakarmarijjai ni takatrí takaaji. Nu atumin iniakmstatji.

⁵ “Nekas Yúsan umirniuashitiaj” tusarum nekamatarum. Íimiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme.

⁶ Tura iikia ántar Yus-shuarchaitji nu nekaatarum tusan wakerajai.

⁷ Tura átum tunáa túrawáirum tusar Yus seaji. Aents in péñker enentáimtikramprat tusar tátsuji. “Ántar ániawai” túramprin, átum péñker wekasatarum tusar wakeraji.

⁸ Warí, Yusa nekas chichame emesratin tujintiaji. Antsu ii túrajnia nu Yusa nekas chichamejai túraji.

⁹ Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji.

¹⁰ Atumin emesratin Yuska winia akuptatsui. Antsu Yus akuptukuiti atumin iki-akártinian. Tuma asamtai, wi atumíin jeaknaka kakaram chicharkajirum tusan winit-suk ju papin áatjarme.

Amikmaawai

¹¹ Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichík enentáik enentáimsatarum. Shiir awajnisarum pujustarum. Tura Yus anenmarmena nu, shiir enentáimtikramna nu atumjai pujurtam-sattarme.

¹² Yúsnum shiir enentáimtunaisrum amikmaanaisatarum.

¹³ Ashí Yus-shuar ainia nu amikmaatmarme.

¹⁴ Uunt Jesukrístu waitnenkartutairi, Yusa anenkrattairisha atumíin pujurtamsati. Tura Yusa Wakanísha tuke nemartamsarti. Nu atí.

Papru KARASEANMAYA SHUARAN Papí aar akuptukma

Karaseamaya Yus-shuaran Papru áatramiania nu

¹ Wi Pápruitjai, Yus akatramu. Yúsak winia akatturuiti. Shuarka akatturchamai. Yussha chíkich shuáran akupturak akatturchamai, antsu Nun̄ki, Yus Apa, Jesusan jakamunmaya iniantkimia nu, tura Jesussha winia akatturarmai Yusa shiir chichamen etserkatniun.

² Wissha, ashí Yus-shuar wijjai pjuinia nusha, ju papí akupeaji. Ashí Yus-shuar Karasea nun̄kanam pujarmena nu áuj̄satarum tusan ju papin akuptajrume.

³ Yus Apa tura ii Uuntri Jesukrístusha waitnentramainia ásar yainmakarti imiatkinchanum tuke shiir pujustinian.

⁴ Yus ii Aparí nuna wakera asamtai, Jesus ni ayash̄in surumak wáitsamiayi ii tunaari asakártinian. Nuna tura ashí tunáa ju nun̄kanam ana nuyá an̄kant awajtamatai tusa in yáinmaji.

⁵ Tuma asamtai tuke Yus shiir atí. Ayu.

Chíkich uwempratin chichamka atsawai

⁶ Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum.

⁷ Wátsek, nekas chíkich chicham pen̄ké atsawai shuar umikiar uwempratin. Antsu yajaya shuar atum̄in taar pen̄kercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai.

⁸ Tuma asamtai Yus nin yajauchiniam yum̄in̄krattawai. Wissha Yus-Chicham yapajiamun etserkamtain̄kia Yus winia yum̄in̄krurtatui. Nayaimpinmaya suntarsha nusháa chichaman wi etserkachmaj nuna étserkuin̄kia nunsha yum̄in̄krattawai.

⁹ Paant ujakjarme túmaitiatak ataksha ujaajrume: Nán̄kamas shuar niisháa uwempratin chichaman, wi etserkachmaj nuna étserkuin̄kia Yus yum̄in̄krattawai.

¹⁰ Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiayi

¹¹ Antsu nekaatarum, yatsuru. Uwempratin chichaman wi étserjana nuka áentsnumian̄chuiti.

¹² Aentska ujatkachmai. Unuitiutnasha unuitiurchamai. Antsu Jesukrístuk winia paant jintintruamai.

¹³ Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wissha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme.

¹⁴ Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsurí shuaran wijjai métek uunt armia nuna nan̄kaamas Yúsnan takasmajai. Túmaitiatan aya winia úntrun chichamen ti umirniuyajai.

¹⁵ Túrasha wikia akiintsain̄ Yus winia achirkamiayi, tura ti anen̄kratmarijjai winia anaitiukmiayi.

16 Nuikia shiir enentáimiuk ni Uchirín paant nekantikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai.

17 Uunt péprunmasha, Jerusarénumka, wéchamjai winí emkaru Yus akatramujai chichastinian. Antsu wárik Arapia nunkanam wémajai. Tura nuí Yúsan enentáimtasuan atak Tamasku péprunam waketkimjai.

18 Tura menaintiú uwí nankaasmatai, nuyá Pítrujai áujmattsataj tusan Jerusarénum jeamjai. Tura jimiará semanachik pujusmajai Pítrujai.

19 Tura Jakupuncha, ii Uuntri Jesusa yachia nuna, wáinkiamjai. Nú arantka chikich-naka Yus akatramunka wáinkiachmajai.

20 Yus iirui. Wi tájana nu nekasaiti, wáitchaiti.

21 Nú ukunmasha Siria nunkanmasha, Sirisia nunkanmasha wémajai.

22 Tuma asamtai ashí Yus-shuar Jutía nunkanam pujuarmia nu winia nekaracharmai.

23 Aya antukarmai. “Yaunchu in ti áintrammiaj nu yamaikia Yus-Chichaman étseruk wekaawai. Yáunchuka in amutmaktinian wakeriniaiat yamaikia iniaisaiti” tiarmai.

24 Túrawar winia enentáimtursar Yúsan shiir yumisarmai.

2

Chíkich Yus akatramu Paprun shiir enentáimtuiniawai

1 Tura katurse uwí nankaasmatai wisha Pírnapijaj Jerusarénum wémajai. Titiuncha jukimjai wijjai.

2 Yus akupta asamtai Jerusarénum wémajai. Tura nuí jean aya Yus-shuara úntrijaiin áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar aín tusan tu áujmattsamjai.

3 Niisha Yus-shuara úntrintiat itiurchat enentáimpracharmai. Antsu chíkich shuarka Titu Israer-shuarchaitiat wijjai pujakui niisha Israer-shuar ajastí tusa tsupimiamtiki-atniun wakeriarmai. Túrasha tujinkiarmai.

4 Tura nu shuar ántar yachi ániak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asamtai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiurchat ana nujai uwentikrampratniun wakerutmakarmaji.

5 Túrasha penké ishichkisha umikchamji. Antsu atumín Yus-Chicham yapajniátsuk métek jeartamat tusar ni chichame penké anturkachmaji.

6 Nu arantcha Yus akatramu uuntriñkia yamaram túratniunka suruscharmaj. Nincha ashí aents ti neka ainiawai tu enentáimtuiniawai. Kame nu shuar ti nékainiakuiasha ti enentáimtatsjai. Yus ashí shuaran mash métek iyatsuk.

7 Yus akatramu uuntriñsha Yus winia Israer-shuarchan Yus-chicham ujaktinian akup-tukma nuna nekarawarmaj. Tura Pítruncha akupkamaj Israer-shuaran Yus-Chicham ujaktinian.

8 Pítrun Israer-shuarum akupkama nú Yusak winiasha akuptukmaj Israer-shuarchanum.

9 Tuma asamtai Jakupusha, Pítrusha, Juansha, Yus akatramu uuntri ásar, Yus winia ti paant akuptan nekaawar, winiasha Pírnapiñsha, “Ayu, átum, Israer-shuarchanum Yus-Chicham etserkatarum, tiarmaj. Iisha Israer-shuarum Yus-Chicham etserkattaji” tiarmaj. Túrawarmatai shiir áujnaisar ii uwejejai achirnaikiamji métek enentáimji tusarⁱ.

10 Áyatik “Kuítrincha enentáimtusum tuke yáıntarum” tiarmaj. Wisha núnaka ti waker-akun tuke túriniaitjai.

Papru Pítrun chicharkamaj

11 Tura nú ukunam wi Antiukía péprunam pujain Pítiur tamai. Tura nuĵ yajauch túramtai, Yus-shuara úuntrinĵiak chicharkamjai.

12 Iis, Israer-shuar tuiniawai, “Israer-shuarcha Muisais timia núnisanĵ tsupirnakcha asamtai, nu shuarĵai yurumáshtiniaiti” tuiniawai. Túmaitiat Pítiur yurumámnian nékak, emka Sántiak shuar táatsainĵ Israer-shuarchajai yurumámai. Tura nuyá Sántiak shuar Jerusarénumĵ Antiukíanam jeawarmatai Pítiur ashamak tsupirnakcha shuarnumĵia kanakin yurumáchmai. “Tsupirnakĵtiniaitme” tiniu ainia nuna ashamak túramai.

13 Tuma asamtai chíkich Yus-shuar, Israer-shuar armia nu, Pítrujai métek emka yurumáwaru áiniayat jimiara enentai takusar ukunam iniaisarmai. Pirnapísha neka áyat nútiksainĵ nupetnakmai.

14 Tura nuna íisan ashí íimiainiaĵ Pítrun chicharkamjai. Yus Shiir Chicham tana nujai métek wekasachu ásarmatai tímiajai “Ame Israer-shuaraitiatam Israer-shuarti ikiukim tsupirnakchajai yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartĵiaĵ métek wekasatin áiniawai” tiip” tímiajai.

Israer-shuarsha Israer-shuarchasha mai métek Yúsan enentáimtusar uwemprartatui

15 Iikia nekas Israer-shuaraitĵi. Israer-shuarcha, tunáa ainia áaniuchuitĵi.

16 Túmaitiatar ĵu nékaji. Akupkamu umámujai uwemprachminiaitĵi antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajainĵchu atai tusar. Aya Kristu nekas enentáimtusar péñker átatĵi. Akupkamu takasar umirkarsha tuke nujai péñker ajaschattajĵi. Akupkamunka shuar umiktaj táyat, chíkichkí shuarkesha nujai péñker ajaschamniaiti. Nu nekaar antsu Jesukrístu nekas enentáimtusmaji péñker ajastai tusar.

17 Tura Israer-shuar enentáimprashtimpiash, “Wátsek, núnisaitkiuinĵkia wisha Krístun enentáimtustaj tákunka, emka tunáa shuaraitĵai tu enentáimtumastiniaitĵai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashtiniaiti.

18 Antsu yaunchu, wi túrashtiniaitĵai tímiaĵ nuna awainĵkin túratniuitĵai tákunka nuikia nekas tunaitĵai.

19 Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yusĵai iwiaaku pujajai ni wakera nuna umiktinian.

20 Wisha Krístujai krúsnum jákaitĵai. Tuma asamtai yamaikia wikia iwiaaktsujai wi wakeraj nuna túratniun antsu Kristu winí iwiaakui ni wakera nuna túratniun. Tura ĵu ayashnum pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi.

21 Yus ti péñker asamtai itiurak “Kristu ántar jakamiayi” títiaĵ. Iis, aya akupkamun umirkan péñker ajasminiaitkiuinĵkia, nuikia Kristu ántar jákaayĵi.

3

Yus akupkamu tura Yus enentáimtustin

1 ĵWarin aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktuschkamĵrum?

2 Wátsek, aniasatĵarme, enentáimpratarum. ĵWarĵiaĵin Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram?

3 ĵTuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashĵ kakarmarĵiaĵi umiktin enentáimprarmek.

4 Penké ántarmek wáitsamarum tura antsu ishichkisha unuimiarchamkarum?

⁵ Naka enentáimpratarum. Yus ni Wakanín súrantsuk tura aents túrachminian atumín ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

⁶ Yaunchu ii uuntri Apraám enentáimpratai. Yus-Chicham nin tawai:

“Apraám Yúsan enentáimtusmatai Yus “Ayu, péñkeraitme” tímiayi” tawai.

⁷ Iis, nujai páantchakait. Ashí shuar Yúsan enentáimtuinia nuka Apraámjai métek enentáimpraru ásar, ni uchiría áintsan ajasaru áiniawai.

⁸ Yamái páantaiti. Yus ashí Israer-shuarchancha tawai “Aya winia enentáimtursarum péñker átratume”. Israer-shuarchasha nujai péñker ajastinia nuna ti yaunchu neka asa, Apraáman ujakmiayi,

“Ámijjai ashí aents ti shiir ajasartatui.”

Tu ujakmiayi.

⁹ Tuma asamtai ashí shuar Yúsan enentáimtuinia nuke Apraámjai métek péñker ajarar shiir warasartatui.

¹⁰ Antsu ashí shuar “akupkamun umirkan uwemprattajai” tuinia nuka yajauchiniam yuminkramu áiniawai. Yus-Papinium áarchamukait

“Ashí shuar Yus akupkamun ashí aarma nuna takamtsuk umirkachka yajauchiniam yuminkramu áiniawai.” Tu áarmaiti.

¹¹ Nújainkia páantaiti. Akupkamu umirkatniujai péñker ajaschamniaiti Yusjai, antsu aya Yus enentáimtusam péñker ajasam uwemprattame.

¹² Shuar akupkamu umirkatniun enentáimna nuka aya nujai péñker ajastinian enentáimiui; Yúsan enentáimtak péñker ajastinian enentáimtsui.

¹³ Tura Kristu yamaikia uwemtikrampramji. Akupkamun umirkachu yuminkramuiti tana nuka in túramtsuji. Antsu Kristu in yainmaktin krúsnum jaka yuminkramu ajasmiayi. Kame áarmaiti:

Shuar jakati tusa numiniam nenasma yuminkramuiti.

¹⁴ Tuma asamtai Jesukrístu jakamujai ashí Israer-shuarchasha Apraámjai métek péñker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achiktatji Yus enentáimtusar.

Yus akupkamu tura Yus túrattana nu anajmarma

¹⁵⁻¹⁶ Iis, yatsuru, Yus Apraáman Chichaman najana anajmatuk,

“Ámijjai tura amée weeá akiinkiattana nujajisha ashí aents ti shiir ajasartatui” tímiayi.

Kame ‘amée weeá akiinkiartatna nujai’ tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajítsuk umiktiniaiti. Umitsuk iniaisachminiaiti. Patattasha patattsachminiaiti.

¹⁷ Wátsek, Yus núnisan Chichaman Apraámjai najana, ukunam umitsuk iniaisachmini-aiti. Tura Chichaman najanamia nú ukunam, kuartu sianu nuyá trainta (430) uwí nankaasmatai, Yus ni akupkamurin Muisaisan susamiayi. Túramaitiat nujai Yusa yaunchu Chichamen yapajiáchmiayi iniaisatniun.

¹⁸ Tuma asamtai Yus timia nuka tuke uminkiattawai, Yus yaunchu Apraámjai Chichaman najana asamtai. Nújainkia páantaiti, péñker ajastajtsar akupkamu umikrikia shiir pujuschartatji antsu Yus timia nujai iikia takatsuk shiir pujustatji. Nuna tsankatkamiayi Yus Apraámjai Chichaman najaneak.

¹⁹ “¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsain Yus tímía nu uminkiachminiuyayi. Tuma asamtai nii táatsain ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntari ju akupkamun ashí iwiarar Muisaisan susar akatrarmiai Israer-shuaran susárti tusar.

²⁰ Antsu chikichik shuar nin̄ki takastinian enentáimkiun̄ka chikichan atsumatsui. Tura Yus aya chikichkiiti. Nin̄ki chikichan akattsuk ashí aentsun Apraám̄jaj̄i pēnker awajatsniun Apraáma anajmatar niij̄jaj̄i Chichaman najanamiayi.

Yus akupkamu itiúrkátiñ

²¹ “¿Tura Yus jimiara chicham̄jaj̄i chichaawak, tíchaintmeash. Emka Apraáman “Juj̄aj̄i uwemprattame” tíchamkia, nuyá Muisaisan ni akupkamur̄in súsachmakia?” tíchaintmeash. Tura áintsachuiti. Nekaata, akupkamu umirkatniuj̄aj̄i Yusj̄aj̄i tuke pēnker pujusminiaitkiumka nuyá aya akupkamuj̄aj̄i uwempram tunaaj̄aj̄in̄chu ajasaintme.

²² Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukristu enentáimtuinia nú shuar, aya Yus timiá asamtai, uwemprartatui.

²³ Tura Kristu táatsaiñ Nin enentáimtushamniauyayi. Tuma asamtai Nii táatsaiñ akupkamuka in emettama pujurtamji aya akupkamu tana nu umirkatin. Tura ukunam ju nekanayi: Kristu enentáimtusar uwempratniuitji.

²⁴ Akupkamu, nuika, in waitmakmaji uchin kuírchin wainnia áintsan̄. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yús̄jaj̄i pēnker áiniawai.

²⁵ Yamái Kristu nekas enentáimtustiniaiti tuma asamtai yamaikia akupkamu kuirchia áintsan̄ wáitmatsji.

²⁶ Antsu Jesukristu enentáimtusar, nuj̄aj̄i Yusa uchirí úuntmaru ajasuitji.

²⁷ Ashí Kristu náariñ imiaimiutirmeka Kristu áintsan̄ ajasuitrume.

²⁸ Jesukristuj̄aj̄i tsanin̄kiu asari imiá métek aji. Israer-shuar, Israer-shuarcha, ankant ainia nu, ankantcha ainia nu, áishman̄, nuwa, ashí mash Jesukristunuitkiuin̄kia yamaikia “niishaaiti” tu enentáimprashtiniaiti. Ni shuari mash chikichik áinij̄aj̄i.

²⁹ Tura Krístunuitkiurmeka Apraám̄ weeá áintsan̄ ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

4

¹ Kuítrinniu uchirí ashí ni aparí takakna nuna niiniu áchattawak ukunam. Tura uchichitkiun̄ka ni aparí takarniuriya núkete.

² Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíniu ashí wáinkiatniuiti.

³ Núnisrik iisha úchichik asarkia ashí aentsu akupkamur̄i umirkatniuji.

⁴ Tura tsawant jeamtai, Yus ni Uchir̄in akupkamiayi ju nun̄kanam. Niisha Yúsaitiat nuwanam akiiniamiayi. Tura aents ajasmiayi. Tura aents ajas yaunchu akupkamuncha umirkatniuyayi.

⁵ Nuj̄aj̄i ashí aents akupkamun umirkatin armia nuna uwentikrataj tusa támiayi. Tura iisha yamaikia nuj̄aj̄i ni uchirí uunt ajasminiaitji.

⁶ Atumsha nekas ni uchirí ajasakrumin Yus ni Uchirí Wakan̄in atumi enentáin̄ akupturmakuiti. Tura nu Wakan̄ atumí enentáiȳa Yús̄an “Aparú” tawai.

⁷ Tuma asamtai yamaikia aya takarniuchuitme antsu Yus ni uchir̄in najatmaiti ámin. Tura ni uchirí asakmin ashí Yus takakna nuna amastatui Krístuj̄aȳan.

Papru nu Yus-shuaran yáin̄tinian wakerawai

⁸ Yaunchu átum nekas Yus nékachkuram, ántar-yus írunna nu umirkamarme nekascha yúsak.

⁹ Tura yamaikia nekas Yus nékarme, kame Yus atumin nekarmarme. Núnis asamtai itiuirtsuk atak aentsu akupkamur̄i umirkatin enentáimprum. Nuj̄aj̄i kakaram ajaschaminaitme tura umikmesha yainmakchattawai uwempratin.

¹⁰ Átumka jísat ti najanearme. Yaunchu jísat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum.

¹¹ Ashamajai, atumin ántrankeash takasmaj tusan.

¹² Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nui pujakui ishichkisha yajauch awajtuschamarme.

¹³ Antsu nekarmeme ayashrui itiurchat pujayatan Yusa shiir chichamen emka ujakmajrume.

¹⁴ Tura winia sunkur ti yajauch awajtain atum winia nakitrurum mujrukchamarme, antsu Yusa suntaria áintsarmek itiamarme. Jesukristu anturkatniua áintsarum anturtukmarme.

¹⁵ Maa, wi nekajai, nuik atumi jimi ukuinkiarum surusaarme, túramniaitkiurmeka. Tura shiir enentáimpramarmena nusha itiurtsukait yamaisha.

¹⁶ Yamaikia nekas chichaman étserkun ¿atumi nemasri ajasjak?

¹⁷ Chikich yajaya taaru ti shiir awajtamainiawai tura atumin yainmaktasa áitkiarmainiatsui. Aya winya akantamkitiai tusa wakerutmainiawai, winia antsu shiir enentáimtursat tusar.

¹⁸ Niisha nekas yainmaktinian wakerutmainiakka atumin shiir awajtamsatin tuke penker ainti, wi atumjai pujainsha tura pujatsainsha.

¹⁹ Uchiru, nuwa jurertaj tana núnisnak ataksha wáitiajai Kristu atumin paant atí tusan.

²⁰ Atumjai pujaknaka maak aintjai. Yamai pujaknaka nekas nushaa chichasaintjarme. Itiurkatjarmetsuk nekatsjai.

Akarsha, Sarasha jimiará Chichaman nakumainiawai

²¹ Ayu, “akupkamu umirkatniuiti” támena nu nekaata; akupkamuka júnisaiti.

²²⁻²³ Aarma awai: Apraám jimiará uchirtiniuyayi. Emka ni takarniuri jurermiayi Ismaeran. Nuyá Apraáma nuwe jurermiayi Isakan. Ismaera nukuri Apraáma takarniuriyayi. Tura Apraám Yusan enentáimtutsuk niijai kanarmatai, ni takarniuri jurermiayi. Tura antsu Isaka nukurinkia takarniurinchuyayi, antsu nekas ni nuwe áuyayi. Niisha ti úuntchiniak, Yus “jurertatme” tímiyayi. Tuma asamtai Yus timiajai Isakan jurermiayi.

²⁴ Ayu. Yamai tájana nuka Yusa Chichamen jímiaran nakumui. Ismaera nukuri Akar chikichik Chichaman nakumui. Yaunchu Senai muranam Yus ni akupkamurin áarmiyayi Israer-shuar, takarniua áintsan, umirkarti tusa.

²⁵ Senai murasha Akara nunke Arapianam wajaawai. Akarsha Senai muran naku-mak, ashí Israer-shuaran “Akupkamujai uwempramniaiti” tuinia nuna nakumui. Yamaisha Israer-shuara uuntri Jerusarénnum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai.

²⁶ Antsu ashí Yus-shuarti uwempra asar imiankas ankant pujaji. Nayaimpinmaya Jerusarénnumia áentsuitji. Nuyá áentsti tuke ankant pujuiniaji. Nuyá aents asakrin, nu yakiya Jerusarénka ii nukuria áintsan enentáimpramniaiti.

²⁷ Júnis áarmaiti:

Warasta, misurma, uchi takakchiatmek;

Ti shiir warasta, uchí najawe nekachiatmek.

Nuwa ajapamu uchin jurertatui;

Nuwa áishrinniu núnaka nankaamas uchirtin átatui.

²⁸ Iisha, yatsuru, Isaka áintsari, Yus timiajai akiiniaitji.

²⁹ Yaunchu Ismaer Isakan kajerak itiurchat awajsamiayi. Núnisan yamaisha Ismaera áintsan aya ayashnumia ainia nú aents Yusa Wakanya akiinia nuna yajauch awajenawai.

³⁰ Tura Yus-Papinium áarmaiti:

“Takarniusha, ni uchirijai, ajapam awemata. Nekas penker nuwa uchirijai tsanin pujuschamniaiti. Apari kutrincha achikchamniaiti,” tawai Yus-Papí.

³¹ Ayu, yatsuru, nekaatarum. Takarniu uchirínchuitji antsu ankant pujaji nekas péñker nuwá uchirí asarⁱ.

5

Yusjai tuke ankant atarum

¹ Kristu uwentikrampramiaji tuke ankant átinian. Tuma asantai kakaram ajasam tuke ankant pujustá. Ataksha nu itiurchatnum waketkip.

² Wi Papru asan ujaajrume. Átum Muisais timia núnisrumek tsupirnakrumniñkia ¿Kristu nuikia warí itiurtamkamniait?

³ Ataksha tájarne, ashí tsupirnakua nu shuar ashí Muisais timia nuna takamtsuk umirkatniuiti.

⁴ Atum “Akupkamu umiakmin Yus shiir enentáimturmastatui” tárugna nu, nu shuartiram Krístuiya tupañniuitrume. Yusa anenkrattairiya kanakniurme.

⁵ Iikia, antsu, Yusa Wakaníjiai tura Yus enentáimtakrin Yus shiir enentáimturmastatji, tu enentáimji.

⁶ Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷ Atumsha Krístujai péñker wekaimiarme. ¿Urukantai nekas Yus timia nu iniaisatin enentáimprum ataksha akupkamunam waketkitin?

⁸ Nú enentai Yúsaiyanchuiti. Niijiai wekasatniunka Yus achirmakuitrume.

⁹ Ju enentáimpratarum: Karía ishichik yuminnium enketam mashⁱ karimtiktsuk. An-eartarum atumsha.

¹⁰ Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

¹¹ Wíkia, yatsuru, yamaisha “tsupirnaktiniaiti” tuke tákuñkia Israer-shuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuñkia kajertukcharainti.

¹² Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

¹³ Atumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum.

¹⁴ Ju chichamjai ashí akupkamu mash uminkiattawai: Ame ayashim aneamna áintsamek chíchich shuarsha aneata.

¹⁵ Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

Ayash wakeramu tura Yusa Wakaní wakeramu

¹⁶ Juna tájarne: Atumí ayashí wakerana nu umikíajj tusarum Yusa Wakaní kakarmarijiai wekasatarum.

¹⁷ Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait.

¹⁸ Tura Yusa Wakaní jintinramkuñkia, aentsu akupkamurijiai itit áchattame.

¹⁹ Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin,

²⁰ ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, warí kajektin, nankaamantu enentáimtumastin, aya niisháa niisháa enentáimsartin, níiniunak íistin,

²¹ yajauch enentáimtunaistin, mankartuatin, nampektin, nampernum aya ti yurumin, tura ti nampen átin. Chíkich nujaj métek ániawai. Nuik ujakmajrumna núnisnak ataksha tájarme: Shuar nuna túrakka Yusaj pujustinian penké tujinkiattawai.

²² Ayu, yamaikia Yusa Wakaní kakarmarijijaj túratin enentáimsatai. Yusa Wakaní ii enentáin pujak, péñker túratniun nerektinia áintsan neremtikramji. Ju ániawai: aneatin, shiir enentáimsatin, Yusjaj tura shuarjaj nawamnaikiar wekasatin, shiir enentáijijaj katsuntratin, chíkich shuar shiir awajsatin, tsanka átin, tana nuna tímiatrusan umiktin,

²³ péejchach ajastin, iik ímiasar tunáa túrashtin. ¿Ju túratniuncha yaki surimia?

²⁴ Shuar Jesukristunu ainia nu, ni ayashí wakeramuríncha tura nunisan ni túramuríncha surimiak wekaawai. Ni ayashí krúsnum maatniua áintsan túraiti.

²⁵ Yusa Wakaní kakarmarijijaj Yus-shuar ajasu asar, núnisrik Yusa Wakaní kakarmarijijain wekasatai.

²⁶ “Wats, nekapnaisatai. Wi imiá péñkeraitjai” nuámtak túnaitsuk, yajauch enentáimtunáischatniuiti.

6

Yáinniaiktarum

¹ Túrasa, yatsuru, Yus-shuar tunáa túrashtimpiash. Atumsha nekas Yusjaj wekaarumna nu, nu wáinkiumeka, yátsum Yusjaj iwiarat tusarum yáintárum. Tura nankaamantu enentáimtumatsuk túratarum. Tura amesha nekamata. Tunaanum iniaraj tusam anearam wekasata.

² Káarak kijin akui nuámtak yáiniaiktin átsuk. Núnisrumek atumsha, itiurchatrij akui nuámtak yáiniaiktarum. Túrakrumka Kristu akupeamurij umíarme.

³ Shuar tujintiayat “nankaamantuitjai” tákuñka anañmamui.

⁴ Shuar ní túramuriniak enentáimtumastiniaiti. Níiniunak enentáimtumakuñkia tura péñkeraitkiuñkia chíkicha túramurij iirtsuk, antsu níiniun péñker iis wararsattawai.

⁵ Iis, ashí ní káarkariniak júkishtinkiait.

⁶ Shuar Yus-Chichaman unuimiatna nu, nu shuar nin jintána nuna ashí takakna nujaj yáinti.

⁷ Anañmamawairap. Shuar Yusan anañkatniun tujintiawai. Ame araamna nuna nereñ júuktatme. Chíkich nere áhattawai. Atumi enentáincha núniskete.

⁸ Iista. Shuar ni ayashí wakeramunak tuke enentáimtakka, jataj nereá áintsan araaiti. Nerekmataj jákatniun júuktatui. Tura Yusa Wakaní wakera nuna tuke enentáimtakka Yusjaj tuke shiir pujustinian júuktatui.

⁹ Nu asamtai péñker túratin yawetkishtiniaiti. Tura pimpitsuk takasar júuktin tsawant jeamtai, páchitsuk júuktatji.

¹⁰ Tuma asamtai yáinmin ákuñkia ii jeajnia nu túratniuitji nekaska ii yachij yáinkiartin, Yus-shuar ainia nu. Tura ashí shuarsha yáintinaiti.

Jesukristunu ajasar yamaram akiiniatin nekas péñkeraiti

¹¹ Íimsakua, winia uwejruraj urutá uuntna áatjarum.

¹² “Nekas tuke tsupirnaktiniaitme” tuinia nuka áyatik shuar shiir enentáimtursartí tusa tuiniawai. Kristu krúsnum jakamun étsereakuñkia itiurchat awajtusarajin tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan tsupirnaktiniaiti.

¹³ Pai. Tura nú shuar tsupirnaku áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnaku tusa wakerutmainiawai. Áyatik atumin “Pai, niisha tsupimiatkiakji” titiai tusar wakerutmainiawai.

¹⁴ Wikia, antsu, aya ii uuntri Jesukristu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nunkanmayá ana nuna jaka áintsan páchiatsjai; tunaanum winia útsutkatin atsawai.

¹⁵ Krístunu ajasrikiá tsupirnaktincha tsupirnakchaitkiursha mai ántrai ti antsu yama-ram akiiniatin nekas pénkeraiti.

¹⁶ Ashí nekas Yus-shuaran, wi tájana nujai métek wekainia nuna, Yus shiir enentáimias yáinti tuke shiir pujustinian.

¹⁷ Yamaikia itiurchat najatawarain. Jesusa takatri takaakui asutiuawarma paant ayashruj chimikma írunui.

¹⁸ Yatsuru, ii uuntri Jesukrístu atumin shiir yainmakarti. Nuke atí.

Papru IPISIUNMAYA SHUARAN papí akuptukma

Ipisiunmaya Yus-shuaran Papru áatramiania nu

¹ Yus nuna wakerakui Jesukrístu akatramuitjai. Jesukrístu nekas enentáimtusrum Yus-shuar ajasrum Ipisiunam pujarmena nuna ju papín áatjarne.

² Yus ii Aparísha tura ii Uuntri Jesukrístusha waitnentramiania ásar imiatkinchanum shiir pujustinian yainmakarti.

Krístujai tsanínkiu asakrin Yus ti shiira nuna tsankatramji

³ Ii Uuntri Jesukrístu Aparí Yus nekas shiir awajtustiniati. Iisha Krístujai tsanínkiu asar ii enentáin ashí nayaimpinmaya ana nujai warasminiatji. Túmaitkiui Yus nu waratain ashí suramsaitji.

⁴ Krístujai uwemprar ti shiir tunaajainchu Nijjai pujusarat tusa Yus, ju nunka at-sajsha, anaitiamkamiaji.

⁵ Yámankamtaiksha incha ti anenmak Jesukrístu túrunamujai ni uchiri ajasat tusa wakerutmakmiaji.

⁶ Ni aneamu Uchirijjai tsanínkiu asakrin nekas ti anenmaji. Nu enentáimsar ti shiir awajsatniuitji.

⁷ Yus ti anenmakrin ni aneamu Uchirí numpé puarmatai, nu jakamujai ii tunaarín akikmatramak uwemtikrampraitji.

⁸ Tura ti anenmak ni enentáimtain tura nekatairíncha suramsamiaji.

⁹ Nujai shiir enentáimturmak in uwemtikrampratniun wakerutmakmiaj nuna, yaunchu nekaachman, yamá paant awajturmaj.

¹⁰ Ashí jú nunkanam írúnna nunasha tura nayaimpiniam írúnna nunasha Kristu ashí akupin ati tusa Yus tsankatkattawai. Nunasha Yus yaunchu enentáimturmu asamtai tsawant jeamtai ashí umínkiáttawai.

¹¹ Iisha Krístujai tsanínkiu asakrin Yus yaunchu achirmakmiaji ashí Niiniu ana nuna tsankatramkatniun. Nunasha, ashí Nii túrana núnisan, aya Nii wakera asa túramiayi.

¹² Iikia Israer-shuar asar Kristu emka umirkakrin in imiá péñker túrutmamun nekaawar ashí shuar Yúsan ti shiir awajsamín ániawai.

¹³ Núnisan atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanín akuptuktaj timia nuna akupturmakmai. Nuna tura “nekas Wíi shuaraitrume” tawai.

¹⁴ Yamái Yusa Wakaní ii enentáin pujuruk tuke uwemtikramji. Tura takas umik nu tsawantaj ashí tsankatramkattaji. Tura ii enentáin pujá asamtai Yus ukunam Nijjajisha ashí tsankatramkattaj nu paant nékaji. Maa, Yus ti penker asamtai Nin ashí ti shiir awajsarti.

Papru Yus-shuaran áujtusmiania nu

¹⁵ Átum ii Uuntri Jesukrístu nekas enentáimtamuncha tura ashí Yus-shuarjai shiir awajnaiyamuncha antukjai.

¹⁶ Túran shiir enentáimkiun Yúsan áujkun tuke yúminkiajai.

¹⁷ Ii Uuntri Jesukrístu Aparí Yus ti shiir asamtai Nin áujeakun ni Wakaní ni nekatairín suramas ashí jintinramawarti tusan seajai. Nujai nuna nankaamas Yus nekaattarme.

¹⁸ Tura enentáimincha paant enentáimtikramprarti tusan seajai. Nujai shiir túrutmataj tusa achirmakuitrum nu nekaattarme. Nu arantcha imiá shíra nu, Yus ni shuarin ashí tsankatkattana nusha nekaattarme.

¹⁹ Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai

²⁰ nujai Krístun jakamunmaya iniantkimiayi. Tura nayaimpiniam jukí ni untsuurini akupin pujutainium apujsamiai.

²¹ Tura ashí ju nunkanam akupin ainia nújaisha tura ukunam nunka átatna nui akupin áminia nújaisha tura ashí akupin ainia nújaisha tura ashí naari nékamu ainia nujajisha Yus Krístun ashí nankaamas akupin najanamiai.

²² Tura ashí írunna nu, Krístun umirkartin ániawai. Tura Yuska Krístunak ashí Yus-shuara Akupniuri awajsamiai. Túramtai Kristu ni shuari muuké áintsankete.

²³ Tura ashí nunkanam Yus-shuar ainia nu Kristu ayashí najanainiawai. Tura Kristu ashí ni ayashin pimiutkaiti tura nu arantcha ashí írunna nunasha pimiutkaiti.

2

Yus anenma asa uwemtikramji

¹ Átum yajauch túrakrum tunaanum tuke wekaakrum Yúsnumia kanakin asarum jákauyarme.

² Nu tunaanum jú nunkanam pujuinia nujai métek tuke wekainiuyarme. Túrarum uunt iwianchi wakeramuri umirniuyarme. Uunt iwianch ashí Yúsan umirainiatsna nuna akatenawai.

³ Ashí iisha núnisrik yaunchu nu shuarjai métek ii ayashí wakerakmu umirniuyaji. Tura íi enentái wakeramusha umirniuyaji. Tuma asar tura tunaajai akiinia asar chíkich shuarjai métek ti kajernakmiji.

⁴ Antsu Yus ti waitnenkartin asa in ti anenmamiiji.

⁵ Tuma asa ii tunaanum tuke jaka pujarnin Krístujai métek iwiaaku awajtamsamiiji. Aya ti anenkartin asa uwemtikrampramiiji.

⁶ Tura Krístujai métek iniantamkimiiji. Nuyá Jesukrístujai métek, akupin pujutainium yamaisha apujtamas tuke nupetkatniun tsankatramkaitji.

⁷ Nujai ni ti anenkratmarincha tura Kristu túrunamujai waitnentrampamuncha tuke iniaktusmin átatui.

⁸ Jesukrístu nekas enentáimta asakrumin Yus waitnentramar uwemtikrampraiti. Juka átumkeka túrunachuitrume. Antsu Yuska Niñki kuítchajai suramsaitrume.

⁹ Shuar ni takatríjjai uwempratniuitkiunka nankaamantu enentáimsainti winia kakarmarjai uwemprajai tusa. Nu enentáimsatniuka atsutí tusa Yuska átumka takaat-srumnin uwempratniun suramsamiarme.

¹⁰ Yus najanamuitji. Kame Jesukrístujai tsaníakrin yamaram iwiaakman suramas tuke péñker túratniun najatmamji. Yáunchuk nuna enentáimturmasmiji.

Krístujai tsaninkiu asar shiir nawamnaikiar pujaji

¹¹ Nuik ámarum nu enentáimpratarum. Ashí Israer-shuar ni ayashin tsupirnaku ásar ashí Israer-shuarchan, tsupirnakcha ániakui, penké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme.

¹² Nuik Krísturtinchauyarme. Israer-shuarcha asarum ashí ni túrutairisha tura ashí Yus nin tsankatkarmasha nekaachuyarme. Tura jú nunkanmaya asarum nekas Yusa nu enentáimtichuyarme tura shiir pujustin nánkamsarum enentáimpramarme.

¹³ Antsu yamaikia Krístujai tsaninkiu asarum, yaunchu Yusaíya yaja pujuwitiatrum, yamaikia Kristu numpé puármatai ni jarutramkamujai tántaitrume.

¹⁴ Israer-shuarjai Israer-shuarchajai nemasmanaikiar ajapén péñkramu ámiiji. Tura Kristu nuna sáaki nawamnaintikramkamiiji. Tura chikichik shuar najatmamiji.

¹⁵ Nuik aya Israer-shuar Muisais akupkamu untsurí armia nuna umirkatin áiniak nujaj chíkich shuarjaj nemasmanainiarmiayi. Tura Kristu jaka nu akupkamun ántar awajas chikichik shuar yamaram awajtamsamijai.

¹⁶ Núnisan ámiayi. Kristu krúsnum jaka nemasjaj mai apattamak chikichik awajtamás Yusjajsha nawamnaimtikramkamijai.

¹⁷ Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi.

¹⁸ Yamaikia Israer-shuartisha tura Israer-shuarchasha mai metek Kristu túrunamujaj tura Yusa Wakanj takaku asar Yusaj jeatniuitji.

¹⁹ Tuma asamtai yamaikia chíkich shuarchaitrume, antsu ashí Yus-shuarjaj métek ajasuitrume. Nekas Yusa shuarinrume.

²⁰ Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisan yaunchu Yúsnan etserniusha tura Kristu akatramurisha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujaj nankaamas Jesukristu enentáimtustiniaiti.

²¹ Jea apujtukmarj Kristu asamtai Nij ti penker ekeniar jea jeamnaki wéawai. Tura ii Uuntri Krístujaj Yusa Jee ti shiir átatui.

²² Núnisrumek atumsha Krístujaj tsaninriu asarum átum ashí Yus-shuarjaj Yusa Jee ya áintsan ajasuitrume. Tura Yusa Wakanj ashí Yus-shuara enentáin pujú asamtai nekas Yusa Jee ente.

3

Papru Israer-shuarchanum Yus-chichaman etserkatniuya nu

¹ Nu asamtai atumin Israer-shuarchatirmin yáintaj tusan Jesukristunu étserkun sepunam pujajai.

² Yus anentak Yus-Chichaman atumin etserkatniun akatar akuptukuiti. Nu nékatsrumek.

³ Yus nuna túrutak yaunchu nekaachmancha paant awajtursamiayi. Núnaka ishichik áatraitjarme.

⁴ Nu áujсарum Krístunu yaunchu nekaachman yamaikia paant nékajna nu nekaattarme.

⁵ Nú chichaman yáunchusha chikichkinkesha ujankachmiayi. Túrasha yamaikia Yusa Wakanj Kristu akatramurincha etserniurincha nu chichaman paant awajtusarai.

⁶ Nu chicham juiti: Uwempratin chichaman umirkar Israer-shuarcha Israer-shuarjaj métek Krístujaj tsaninriaru ásar chikichik shuar ajasartatui. Tura nu arantcha Yus ni shuarin ashí shíran tsanikatkatniun anajmatrama nu métek pachiinkiertatui.

⁷ Yus ni kakarmarijjaj winia yáintiuk tura ti anentu asa nu uwempratin chichaman etserkat tusa akatturmiayi.

⁸ Ashí Yus-shuarjaj nankaamas wi penkercha ajn Israer-shuarchanum shiir chichaman etserkat tusa Yus tsanikatrukmiayi. Krístujajin kuitjaj nankaamas penker, enentáimtustin jeatsjinia nu, takakji. Nusha ti shiir chichamaiti.

⁹ Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi.

¹⁰ Yamaikia ashí nayaimpiniam pujuinia nuka Yus ni shuariin túrunamun ísar Yuska imiá neka asa ashí enentáimniua nuna paant nékainiawai.

¹¹ Yus júnis túratniun yáunchuk enentáimpramiayi. Tura ii Uuntri Jesukristujaj mash uminkiamiayi.

¹² Tura Krístujaj Yusaj yúpichuch jeaji. Tura Nin nekas enentáimtusar sapijmiatsuk Nijn tantamniaitji.

¹³ Tuma asamtai tájarme, atumin yáintaj tusan sepunam pujakui kúntuts enentáimprairap. Antsu nujaj Yus atumin ti shiir awajtamkurmin átum warasuk tusan wakerajrume.

Kristu ti anenkratniuiti

¹⁴ Nu asamtai ii Uuntri Jesukrístu Aparín tikishmatran áujtajrume.

¹⁵ Ashí nayaimpinmasha tura nun̄kasha Yus-shuar ájiniá nu nekas ni shuari áiniaji.

¹⁶ Yus ti kakaram asa ni Wakan̄jjai atumí enentáin pujureak ashí ni kakarmariyan atumin suramsarat tusan áujtajrume.

¹⁷ Yus nekas enentáimtakrumin Kristu atumí enentáin pujusat tusan áujtajrume. Tuke yapajítsuk anenkratin átarum tusan áujtajrume.

¹⁸ Túrakrum ashí Yus-shuarjai Kristu anenkrattairi nekaattarme. Imiá uunt asa nan̄kantsuk tuke amuukachminiaiti.

¹⁹ Nu anenkrattai ashí takamtsuk nekaachmin aijn nekaatarum tusan áujtajrume. Nujaj Yus takamtsuk pimiutramkattarme.

²⁰ Nekas Yus shiir awajnasti. Ni ti kakaram asa ii seajnia nuna nan̄kaamas tura enentáimprachminia nunasha nan̄kaamas iijn pujurtamuk ashí túramniaiti.

²¹ Ashí Yus-shuarjaisha tura Krístujaisha Yusa péñkeri tuke paant wantinin atí. Yus tuke iniaitsuk shiir awajnasti. Núnisañ atí.

4

Yusa Wakan̄jjai tsaninkiar pujakur túratin

¹ Atumsha ni shuari ajastin Yus achikma asarum péñker wekasatarum tájarme. Ii Úuntriñiun étserkun sepunam pujakun seajrume.

² Nekasmiancha ajasrum aneniakrum katsunnairatarum.

³ Yusa Wakan̄ chikichik shuar awajtamkurmin shiir awajnisarum pujustarum.

⁴ Yusa Wakan̄kia chikichkiiti. Tura ashí métek Yus achikma asar métek Niijjai shiir pujustin enentáimji. Iisha Kristu ayashí ayashímkia asar chikichik ayashkiitji.

⁵ Ii Uuntri chikichkiiti. Niñki nekas enentáimtusar métek imiantiniaitji.

⁶ Chikichkiiti Yus, ashí Yus-shuarti ii Aparínti. Ashí akuptamniuitji. Ashí ni shuariin pujak ii enentáin pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

⁷ Tura chikichik chikichik niisháa shiir takastinian suramsaitji. Tura Kristu wakerimia núnisañ suramsaji.

⁸ Nu asamtai Yus-Papiniumsha tawai:

“Achikman jukí nayaimpiniam wakamiayi. Tura shuáran shíiran susamiayi.”

Tu áarmaiti.

⁹ Tura “wakamiayi” tana nu ¿warintiuá? Kristu nayaimpiniam pujá asa yakí wakan̄ka emka tárashinkiait. Nekas nun̄ká taramiayi.

¹⁰ Niñki ataksha nekas nayaimpiniam wakamiayi. Nuna tura asa ashí ni shuariin pimiutkarmiayi.

¹¹ Tura nujaj chikichan akatramun awajsamiayi. Chikichnasha Yúsnan etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinniun awajsamiayi. Tura chikichnasha unuikiartinian awajsamiayi.

¹² Túramtai ashí Yus-shuar ni takatrijjai yáiniaikiar ti pen̄ker shuar ajainiakui Kristu ayashí takamtsuk katsuarartatui.

¹³ Nujaj Yus nekas enentáimtamunam Yusa Uchirí ashí métekrak péñker nekaattaji. Nu túrakur katsukir Krístujai métek péñker ajastatji.

14 Tura uchía áintsar áhattaji. Úchikia ashí yamaram chichaman antukar wari yapajíniawai. Tura anankartinia chichamen antukar waaku áiniawai. Kame nu anankartin shuar ti paant chichayatan ni shiir chichamejai anankatniun pujurenawai.

15 Antsu nekas aneniakur nekas chicham ujanaiktiniaitji. Túrar Krístujai tsaniñkiar tuke tsakakir ashí péñker túratniujai Niijjai métek ajastatji. Krístuka ashí ni shuari muuké áintsankete.

16 Tuma asa ni ayashin wáinkui ashí nuna muchitmarí péñker yáiniaikiar ashí ni túratniurín shiir takasartatui. Nujai nu ayashnium muchitmarí chíkich chíkich péñker takainiak métekrak shiir tsakartatui. Tura anenainiakui nu ayashsha péñker úntmartatui.

Krístujai tsaniñkiu asar yamaram iwiaakmanum wekaaji

17 Ii Uuntri Krístu ímmianum juna akatjarne: Chíkich aents Yúsan nékachu ásar ántar ni enentáimmiajain wekainia núnisrum wekasairap.

18 Ni enentáin kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui.

19 Nu arantcha, ni túramurjjai natsamtichu ásar ti yajauchiniam surumakar ashí tunaan wararainiak túrin áiniawai.

20 Antsu átumka núnisrum enentáimtustin unuimiarchamarme.

21 Nekas Nii anturkaitkiurmeka tura Jesus nekas tama Krístu unuiniarmaitkiurmeka Nin shiir enentáimtustin unuimiarmarme.

22 Yaunchu enentáimtairmeka ayash wakeramu anankramin ainia nujai piaku asa imiá yajauchiiti. Nu enentáimtairmesha yaunchu túrutairmesha ajapa iniaisatarum.

23 Túrarum péñker enentáimsarum wakannium yapajíatarum.

24 Tura yamaram enentáimtairam emetatarum. Nuka Yusjai métek najanamu asa nekas péñker tura shiira nuna tuke túriniaiti.

25 Nu asantai chikichik ayashi muchitmarí asarum wáitrutsuk nekas chicham chicharnaisatarum.

26 Kajeakrum tunáa túrawairap. Tura nu kajekmasha tsawant takamtsuk áchatniuiti.

27 Uunt iwianch yajauch awajtamsatin tsankatkaip.

28 Kasasha kasamtsuk kakaram takakmasti. Tura ni uwejéjai péñker takaak atsumainia nú shuarnasha susati.

29 Muijmiai chicham chichasairap. Antsu chichastin akui péñker chicham, chíkich shuar péñker awajsamnia nu chichastarum. Anturtuinia nuna yáintaj tusarum nu chicham ujaktarum.

30 Yusa Shiir Wakaní kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

31 Ashí yajauch ana nuyá kanaktiarum. Nakitratniusha, kajernaikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí.

32 Antsu shiir awajkartin ajasrum waitnennairarum, Krístu jakamujai Yus atumí tunaarín tsankurtampra nútiksarmek tsankurnairatarum.

5

Yus-shuar túratin

1 Nekas Yusa Uchirí aneamu asarum Nii tura núnis túratin wakeruktarum.

2 Krístu in anenmaj núnisrum anenaitiarum. Kame ii tunaarín akikmaktaj tusa jákatniunam surumakmiayi. Túramtai Yus shiir enentáimtusmiayi.

3 Yusna asarum tsanirmatniusha yajauch túratniusha tura jú nunkanmayan iki-aunkatniusha ishichkisha enentáimtuschatniuitrume.

4 Natsanmaincha, ántar chichamsha yainmakchamnia asantai chichaschatniuitrume. Antsu Yus shiir yumĩnsatniuiti.

⁵ Shuar chíkich nuwajaj tsanirmakka tura ashí yajauchin wakerakka tura jú nunkanmayan ikiaunkatniun wakerakka Yusaj Kristu akupea nu penké pachinkiach-miniaiti. Kame jú nunkanmayan ikiaunkatin ántar-yus tikishmatratniua nujaj méteketete.

⁶ Nu túramniaiti tusar ántar chichamjaj anankramacharti. Warí, nuna túruiniakui Yúsan umirainiachun Yus ti asutiáwartatui.

⁷ Tuma asamtai nu shuar penké pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krístujaj tsaninkiu asarum penker tsáapninium wekaarme. Shuar tsáapninium wekainia nujaj métek wekasatarum.

⁹ Tsáapninium wekainiaka shiir awajkartincha tura nekas chichamtincha tura penker túrin áiniawai.

¹⁰ Ii Uuntri Kristu wakeramu nekaatin wakeruktarum.

¹¹ Kiritniunam wekainia nu túramu pachisairap. Antsu nu shuar tsáapninium enkeatarum.

¹² Ni uuuk túruinia nu áujmatsatin natsanmajniaiti.

¹³ Tura ashí tsáapninium itiamu ashí paant ajawai. Tsáapnikia ashí paant awajeatsuk.

¹⁴ Nu asamtai Yus-Papinium tawai:

“Kanáruitme nu shintiártá. Jakamunmaya nantáktiá. Tura Kristu tsáapin awajturmas-tatui.”

Tu áarmaiti.

¹⁵ Nu asamtai átum túramu ímiastarum. Nékachu áintsarum pujusairap. Antsu penker enentáimprarum wekasatarum.

¹⁶ Penker túratin tsawant wasúrkáip. Tunáa ti pampaatsuk.

¹⁷ Enentáincha áirap. Ii Uuntri Kristu warinia wakera nu enentáimtustarum.

¹⁸ Nampekairap. Nampeakmeka aya yajauch ajame. Antsu Yusa Wakanj winia enentáiruuj takamtsuk pujurtusti, tu enentáimsatarum.

¹⁹ Túrarum Yus shiir enentáimtakrum Yus-kanta kantamkirum shiir áujnaisatarum.

²⁰ Ii Uuntri Jesukrístu náarijjaj ashí irunna nu Yus Apa tuke yuminsatarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum Kristu shiir awajsattarme.

²² Núwaka Krístun umirna núnisañ ni áishrincha umirkatniuiti.

²³ Kristu ni shuarin akupeana núnisañ áishmansha ni nuwen akupkatniuiti. Kristu ni shuarin ayashimiak ni muuké áintsankete. Tura nin uwemtikiartiniaiti.

²⁴ Nu asamtai Yus-shuar Krístun umirin áiniawai. Núnisañ ashí ana nujaj nuwá ni áishrin umirkatniuiti.

²⁵ Kristu ni shuarin ti aneak nin yáintaj tusa jákatniun surumakmiayi. Núnisrumek áishmantirmesha atumi nuwé aneatniuitrume.

²⁶ Kristu ashí ni shuarin ni Chichamejaj tura entsajaj nijjar ní shuar penker árat tusa jakamiayi.

²⁷ Nujaj ashí ni shuarin tunaarinniuchu tura yajauch máatrachu antsu ti penker shiir awajas Niini ejetaj tusa túramiayi.

²⁸ Núnisañ áishman ni ayashin anea núnisañ ni nuwen aneatniuiti. Shuar ni nuwen aneak nujaj ni ayashincha aneawai.

²⁹ ¿Yaki ni ayashin nakitniuit? Antsu penker wáiniuk áyureatsuk. Kristu núnisañ ni shuarin wainiui

³⁰ ni ayashí asamtai. Kame ni ayashí muchitmarintji.

³¹ “Tuma asamtai áishman ni aparincha nukuríncha ikiukin ni nuwejaj tsaninkiar chikichik ayashin ajainiawai.” Tu áarmaiti.

³² Nusha Kristu ni shuarijjaj tsaninmán tawai. Nuka yaunchu nekaachma yamaikia nekanaiti, tura ti enentáimturtniaiti.

³³ Tura núnisañ ashí áishman̄tiram atumí nuwé atumí ayashía nútiksarmek aneatniuitrume. Nuwasha ni áishrín umirkatniuiti.

6

¹ Uchitirmesha, Yus-shuar asarum apasha nukusha umirkatarum. Nuka ti péñkeraiti.

² Emka akupkamu “umirkam nekas shiir átatme” tana nu júiti:

“Apasha nukusha umirkata.

³ Túrakmeke shiir átatme tura jú nunkanam untsurí tsawant pujustatme” tawai.

⁴ Atumsha, uchirtintirmesha, atumí uchirí ántarum akajkairap. Antsu Yúsan shiir enentáimtusarat tusarum ti péñker jintinkirum tsakatmartarum.

⁵ Takakmautirmesha, atumí uuntri jú nunkanam pujuinia nu ti penker umirkatarum. Kristu umirkatniua áintsarum wishiktsuk ashamakrum tuke enentáijjai takarsatarum.

⁶ Aya wáitmakui shiir enentáimtursat tusarum péñker takarsairap. Antsu Kristu takarniuria núnisrum ashí ame enentáimjai Yus wakera nu túratarum.

⁷ Aya shuárnak yayá nútiksarum takasairap. Antsu ii Uuntri Kristu takarsatniua nútiksarmek ásump enentáijjai takastarum.

⁸ Kame chíkich chíkich ni takasmajai métek akinkiartatui. Ii Uuntri Kristu nu shuar péñker túramujai métek akiktatui.

⁹ Tura atumsha, iniamniutirmesha, atumí takartamu wakaní mántutsuk shiir enentáijjai iniartarum. Nekas enentáimpratarum. Ii Uuntri nayaimpiniam pujana nuna niisha atumjai métek umirainiawai. Tura Yuska ashí shuaran akantsuk métek iyawai.

Yusa kakarmarijiai íwianch taritratarum

¹⁰ Wátsek, yatsuru, ii Uuntri Yusjai tsanínkiu asarum ni ti kakarmarijiai iwianchjai máanaiktin kakaram ajastarum.

¹¹ Apach máanainiak jiru entsarua núnisrum Yus susamujai entsartarum. Nujai íwianch nupettamkui tariartatme.

¹² Kame Yusna takáa asar penké áentsjai máaniatsji antsu yajauch wakan kakaram írúnna nujai máaniaji. Niisha jú nunkanam, kiritniunma áintsañ, tunaanum wekainia nuna akupin áiniawai.

¹³ Jiru entsartinia áintsarum Yus súramna nu entsartarum. Nu entsarmajai itiurchat tsawant taritra nupetkarum tuke tariarum wajastatrume.

¹⁴ Wats, nekas tariartin nekas chicham emenmatarum. Tura péñker túratniujai jatairum ajaktarum.

¹⁵ Suntar iwiarnak sapatan aweá áintsarum Yusa shiir chichame etserkatin iwiarnatarum.

¹⁶ Nuyasha ashí nankaamas, tantar takustinia áintsañ, Yus tuke nekas enentáimtustarum. Nujai íwianch ekeétrámkamusha uwemturtatme.

¹⁷ Múukem ajaktincha Kristu uwentikrampramu múukmiin etsenkruktarum. Tura Yus-Chicham puniáa áintsañ achiktarum. Nuka nekas Yusa Wakaní puniarinti.

¹⁸ Yusa Wakaníjiai Yus áujeakrum tuke seatniuitrume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum.

¹⁹ Núnisañ winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum.

²⁰ Yus nu chichaman etserkatniun akuptukuiti. Nuna túrakun sepunam pujajai. Sapijmiatsuk etserkat tusarum Yus áujtursatarum.

Amikmaamu

²¹ Ii aneamu yachj, Tíkikiu, ashí wi túramun ujatmaktatui. Niisha Ii Uuntri Krístunu etserkatniun ti penker yáinniuiti.

²² Tuma asamtai ii jú pujamun ujatmak ikiantamprarat tusan akuptajrume.

²³ Yus Apasha tura ii Uuntri Jesukrístusha ashí Yus-shuartirmin anenmak shiir imiatk-inchanum pujustinian suramsarti. Tura Nin tuke nekas enentáimtustinian suramsarti.

²⁴ Ashí ii Uuntri Jesukrístun tuke enentájjaj aneana nuna Yus shiir yáinti.
Nuke atí.

Papru JIRIPIUSNUMIA SHUARAN papí akuptukma

Papru sepunam pujus Jiripiusnumia Yus-shuaran áatramiania nu

¹ Wi Papru Timiutéujai Jesuskrístu takarin asar ashí Yus-shuar Jiripius péprunam pu-jarmena nu ju papí akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisañ Yusna asarum tura Jesukrístujai tsaniñkiu asakrumin ju papí áateajrume.

² Yus ii Aparísha Jesukrístu ii Úuntrišha atumin waitnentramainia ásar imiatkin-chanum tuke shiir pujustinian yainmakarti.

Papru Yus-shuaran Yúsan áujtawai

³ Ashí tsawant atumin enentáimtakun Yúsan tuke shiir yúmiñkiajai.

⁴ Yúsan áujeaknasha ti warasan seatjarme.

⁵ Kame iikia yámankamtaiknumia Yus-Chicham métek yáiniáikiar iniaitsuk takasuitji.

⁶ Yus atumíjn ti péñker awajsatniun nan̄kama asa núnisañ Jesuskrístu táatsain̄ tuke shiir awájtámki nekas péñker najatmattarme. Nuka ti nekasaiti.

⁷ Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yáintiarme. Yus ti anen̄kartin asa nu túratniun mai metek tsan̄katrámkaitji. Tuma asamtai atumin júnisan enentáimtustin ti pen̄keraiti.

⁸ Jesukrístu anen̄krattairijjai wi atumin aneamun Yussha paant nékarui.

⁹ Yúsan áujeakun anearmena nú nan̄kaamas aneak tusan seatjarme. Tura nújajisha ti neka ajasrum

¹⁰ ashí péñkera nu achikiuk tusan Yúsan áujtajrume. Atumin nu túrunamtain̄kia ya-maisha tunáajain̄chu pujustatrume tura Kristu támatai sumamashtatrume.

¹¹ Núnisañ Jesukrístu kakarmarijjai ashí péñker túrin áatrume. Tura nújai ashí shuar Yúsan ti shiir enentáimturartatui.

Wi ju nun̄kanam aya Krístunak enentáimtakun pujajai

¹² Winin túrunamu itiurchat ain̄ nujai uwempratin chicham nekas pampaawai. Nu nekaatarum tusan wakerajrume, yatsuru.

¹³ Iis, uunt akupniu suntarišha tura ashí shuarsha wi Krístunun etseru asan sepunam pujamun paant nékainiawai.

¹⁴ Ti untsurí Yus-shuar wi sepunam en̄ketman nekaawar ii Uuntri Jesusan nekas enentáimtusar sapijmiatsuk Yus-Chichaman etserainiawai.

¹⁵ Kame shuar awai winia kajertuiniak tura nan̄kaamantu enentáimtumainiak Krístun páchiniawai. Antsu chíkich shuarka nekas enentáijjai Krístun etserainiawai.

¹⁶ Yajauch shuarka Krístun shiir enentáimtutsuk antsu ashí shuar ní chichamen̄ak anturkar wí shuar ajasarat tusar etserainiawai. Túruiniak wisha sepunam pujakui nu arant itit awajtustinian wakerutainiawai.

¹⁷ Antsu péñker shuar Krístun nekas aneenak etserainiawai. Nu uwempratin chicham imiá pen̄keraiti wi titin asamtai winiasha anentainiak shiir etserainiawai.

¹⁸ Wats, mai metek chíkich yajauch enentáijjai tura chíkich shiir enentáijjai Krístun etserainiakui shiir enentáimjai.

Tura nuna nan̄kaamas shiir enentáimprattajai.

¹⁹ Kame Yus áujtursa asakrumin tura Jesukrístu Wakanísha yaintiu asamtai ti péñker uwempran jiinkittiajai.

²⁰ Nekas juna wakerajai: Natsamtsuk uunt akupniun Jesukrístun paant ujakartinian wakerajai. Nujai winí Kristu kakarmari pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmarin winí nankaamas nekaawarat tusan wakerajai.

²¹ Wíjiainkia ju nunkanam iwiaaku pujakun aya Krístunak enentáimtakun pujajai. Tura jákatniusha juí pujajnia nuna nankaamas péñkeraiti.

²² Ju nunkanam pujakun Uunt Jesusnan takasminiaitjai. Nu asamtai tunatsuk achiktaj nékatsjai.

²³ Wíjiainkia iturchataiti mai achiktin. Jákatniuncha wakerajai Krístujai tsaniñkian pujustaj tusan. Wíjiainkia nu imiá péñkeraiti.

²⁴ Túrasha atumín yáintaj tusan tuke ju nunkanam iwiaaku pujusminiaitjai.

²⁵ Kame tuke pujustajai nékajai. Núnisnak atumjai pujakun Yus nekas enentáimtakrum nankaamas waraakrum tuke katsuaruk tusan yáintatjarme.

²⁶ Nu asamtai wi atumjai pujakuí Jesukrístu yumínsarum shiir warastatrume.

²⁷ Kristu chichame ti péñker asamtai atumsha aya péñkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjai kakaram ajastarum.

²⁸ Atumí nemasrisha ishichkisha sapijmiamtikramkarain. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan atí tusa Yus túraití.

²⁹ Krístunu asarum Nii nekas enentáimtustinniaasha tura Niiniu asarum wáitsatniusha Yus anenma asa tsankatramkaitrume.

³⁰ Yus-Chicham pamparat tusar maimetek ti takáa asar wáitiaji. Wi nuik ti takasmaj nu nekarmarme. Tura yamá tuke takaaj nusha ántarme.

2

Kristu péejchach ajasmatai Yus ti uunt awajsamiayi

¹ Kristu ikiantamkuisha, ni aneñkrattairi atsanamkuisha, ni Wakaní atumjai pujakuisha, aneñkratniuitkiurmesha, waitneñkratniuitkiurmesha

² waramtikrustarum. Métekrak takastarum. Mai metek anenaitiarum. Yusa Wakaní atumí enentáin pujá asamtai chikichik enentáik enentáimsatarum.

³ Átum wakeramuk túrawairap. Nankaamantu ajastaj tírap. Antsu péejchach ajasrum chíkich shuar atumjai nankaamas péñker enentáimtusta.

⁴ Aya níniak péñker átatna nunak shuar túrashti. Antsu chíkich shuar yáinminia nuna túrati.

⁵ Kristu Jesus enentáimpramia núnisrum enentáimpratarum.

⁶ Niisha Yúsaitiat ju nunkanam winiak tuke Yusjai métek átinian emettsuk

⁷⁻⁸ antsu nuna ikiuak aents ajas péejchach asa ashí aentsu takarin ajasmiayi. Tura aentsu ayashin ayashimiak tura Yusan umireak jákatniuncha surimiakchamiayi. Maa, imiá tunaarinnia áintsan krúsnum natsanmainium jakamiayi.

⁹ Túramtai Yus nekas nankaamantu awajsamiayi. Ni náarincha ashí paant awajsamiayi.

¹⁰ Tuma asamtai ashí nayaimpiniam írunna nusha, nunká írunna nusha, tura iwiarsamusha Jesusa náarin antukar tikishmatrartatui.

¹¹ Tura ashí shuar Jesukrístu ashí akupin ajasman paant nekaawartatui. Nújainkia Yus Apá kakarmarisha paant nekanattawai.

Yus-shuar kiritniunam keeák tsáapin awajeana áintsan áiniawai

12-13 Nu asamtai, aneamu yatsuru, wi atumjai pujakui umirtukmarmena nuna nankaamas yamaikia arant pujakuisha umirtuktarum. Iis, Yus atumí enentáin takaak ni shiir wakeramu wakeruktinniasha tura umiktinniasha pujurtamprume. Nu asamtai atumsha kakaram ajastarum Yus ti penker awajtamsatniun wakera nu túrunati tusarum. Tura péjchach enentáimprarum awajirminiaitjai tusarum aneara wekasatarum.

14 Ashí yajauch tunaitsuk tura jianaitsuk wekasatarum.

15 Túrakrum makuumatsuk tunaajainchu átatrume. Antsu Yusa uchirí átatrume. Ju nunkanmasha shuar imiá tunaan túrinjaisha máatrachu asarum kiritniunam ji keeá áintsanketrume

16 iwiaaku pujustin chicham paant awajeakrum. Nújai Kristu támatai atumín ántran takascha asan ti shiir wararsattajrume.

17 Winia takatrujai Yus-shuar ajasakrumin wi jákatniuitkiuncha nújaisha warasaintjai. Atumsha wi waraajna jui núnisrumek warastarum tusan wakerajrume.

18 Atumsha waraakrumin métek wararnaisatai.

Timiutéuncha Epaprutíiuncha Papru ujakamiania nu

19 Ii Uuntri Jesus wakerakuinkia Timiutéun írmainiarat tusan ti warik akuptuktatjarme. Tura átum shiir pujamu ujateakui warastatjai.

20 Kame Timiutéu wijiai métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarume.

21 Chíkichka Kristu wakeramun iniaisar ní wakeramunak páchiniawai.

22 Túrasha átumka Timiutéu tuke penker túramu nékarme. Uchi ni aparíjjai takaana áinis Yusa shiir chichame etserkatniun yáintkiaiti.

23 Winia itiurtukartin nuna nekaan Timiutéu írmainiarat tusan akuptuktatjarme.

24 Kame Kristu yáintkiui wíkisha wárik ímniaitjarme.

25 Wi atumaj nuna írsati tusarum Epaprutíiu akupturkamarme. Wijiai métek tsanin takasuiti. Tura métek wáitsaitji. Áunkesha akupkamnia enentáimjai.

26 Nii jaawai taman átum antukman nekáa, írmaitniun ti wakerutmarme.

27 Maa, nekas ti janinkiamai. Túrasha Yus nin waitnentramai. Kame winiasha wi jui wáitiakun nii jakamtai nu arant ti kuntuts pujuschatniun waitnentrurmai.

28 Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarme.

29 Kristu yuminsarum ti shiir warasrum wáinkiatarum. Chíkich shuar niijjai métek penker Yus-shuar ainia nusha shiir enentáimtustarum.

30 Kristu takatrin takaak ti janinkiamai. Átum yáintkiachminia nuna winia yáintkiataj tusa pujus janinkiamai.

3

Kristu nekaatin ashí nankaamas péñkeraiti

1 Ayu. Warastarum, yatsurtiram, ii Uuntri Kristu ti penker asamtai nuik áatramajrum nuna ataksha títiatjarme. Ataksha ujam yainmakminiaitkiuinkia wíjjainkia itiuurchatchaiti atak enentáimtikratin.

2 Yajauch shuarjai aneartarum. Nu shuar Muisais timia núnis tuke yamaisha tsupirnaktiniaitrum tuiniawai.

3 Antsu iikia ayash tsupirnakmajai penker átiniaitji tu enentáimtatsji. Iikia antsu ii wakaníjjai Yus shiir awajeaji tura Jesukristunu asar Niñki shiir wararji. Nu túrakur Muisais timia nu umintikia iitji.

4 Ju nunkanam írunna nujai waantu enentáimpramniaitkiuinkia ashí shuarjai nankaamas wikia waantu enentáimtumaraintjai.

5-6 Israer-shuar asan Muisais timia núnisan wi akiiniamtai uchu (8) tsawant nan_{ka}asmatai tsupirtukarmiayi. Israer-shuarnum Pin_{jam}ín weeitjai. Winia aparsha nukursha mai Israer-shuar ániakui wi imiá Israer-shuaraitjai. Wisha Pariséu tuinia núnisan Muisais akupkamun ti umirin asamtai chíkichka winia sumamtikiatniun tujintrin ármiai. Tura Pariséu asan Kristu-shuarin ti kajerkan áin_{tr}amjai.

7 Ashí nuj_{ain}kia waantu enentáimtumauyajai. Antsu yamaikia Krístuj_{ain}kia pen_{ké} ántar ániawai tajai.

8 Ashí enentáimpramnia ákuisha winia Úuntur Jesukrístu shiir enentáimtustin nekas pen_{ker}aiti. Nu asamtai Krístunu ajakun wi takusmaj nu muijmiai ajasmatai núnaka iniaisamjai.

9 Nuna túran Nii_{jai} tsaninkian pujajai. Tura akupkamu umirkatniujai pen_{ker} ajaschaitjai antsu Krístun enentáimtakui Yus “pen_{ker}aitme” túrutui.

10 Tuma asamtai ashí nan_{ka}amas wakeraj nu júiti: Krístun pen_{ker} nekaan nekas enentáimtustinniasha tura ni iniantkimiu kakarman takustinniasha wakerajai. Tura Nii_{jai} métek ajastinian wakerakun ni wáitkiamunam tsanintinniasha tura Nii jakamia núnisan jákatniuncha wakerajai.

11 Túraknaka Krístuj_{ai} métek jakamunmayá nantaktiaj tusan wakerajai.

Papru kakaram ajasmiai Kristu wakeramun umiktinian

12 Kame wakerukuitjia nuna mash umirkachuitjai. Krístuj_{ai} métek nekas pen_{ker} shuar ajaschaitjai. Túrasha Kristu Jesus “nu_i ejetajam” emka túrutkui, wisha nu_i jeataj tusan kakaram ajasan pimpitsuk takaajai.

13 Yatsuru, wisha nu_i jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai.

14 Tura nuna umikmatai nayaimpiniam Jesukrístuj_{ai} tsaninkian shiir pujustinian Yus surustatui.

15 Ashí shuar Yus_{jai} katsuaru ájina nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme.

16 Tura aneartarum. Naki pujutsuk jeajnia nuj_{ai} métek umirkatin pimpitsuk takastiniaitji.

17 Yatsuru, wisha tura chikichcha wii_{jai} métek pen_{ker} túrajnia nu wáinkiamun atumsha núnisrumek túratarum.

18 Tura yajauch shuarsha írunui. Wi nuiksha ti ujakmajrume tura ataksha úutkun ujaajrume, nu shuar Kristu krúsnum jakamun mu_{jai}iniawai.

19 Tuma ásar emesratniunam akupnakartatui. Ni ay_{ashí} wakeramun, ni yus_{ria} áintsan, tuke umirainiawai. Natsanmainian túruiniayat wararainiawai. Tura ju_nkanmayanak enentáimtuiniawai.

20 Antsu iikia nayaimpinmayá shuar asar ii Uun_{tri} Jesukrístu in uwentikrampra asamtai nayaimpinmayá tatí tusar ná_{kai}.

21 Nii taa, ii yajauch ay_{ashin} yapajá ni ay_{ashíj}ai métek ti shiir awajsattawai. Ashí uunt akupin ajas nu kakarmaj_{ai} túrutmattaji.

4

Krístuj_{ai} tsaninkia wekáa asarum warastarum

1 Nu asamtai, aneamu yatsuru, ii Uun_{tri} Krístuj_{ai} tsaninkiu asarum kakaram ajastarum. Maa, ti aneakun atumin enentáimtakun ti waraajai tura ístajrum tusan wakerajrume. Tawasap achikiar shiir enentáimsatniua núnisnak shiir enentáimtajrume.

2 Ewautiancha tura Séntikinchá, ii Uun_{tri} Kristu shuar_i ásar, mai metek enentáimsarat tusan seajai.

³ Amincha, winia airú, nu nuwá yáinkta tusan seajme. Niisha wi iwiaaku chichaman étsereakui wijjaj métek takasarmai. Tura Krimintisha tura chikichcha wijjaj métek takasarmai. Nuna náarin iwaaku átinnium Yus áatraití.

⁴ Nu asamtai Uunt Jesusjaj tsaniñkia pujá asarum warastarum. Ataksha “warastarum” tájarne.

⁵ Uunt Jesus tátin ishichik ajasai. Tuma asamtai tsan̄ka enentái takakrum nu paant nekanati.

⁶ Itiurchat enentáimsatin atumjaj pen̄ké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yuminsata.

⁷ Nuñkia atumí enentái an̄kant átinian, áentstikia pen̄ké nekaachminia nuna, Yus amastatui. Yus atumin an̄kant awajtamsa asa atumí enentáin tura atumí enentáimsamurin̄cha yajauch wayawain̄ tusa shiir waitmaktatrumé Jesukrístujaj tsaniñkiu asakrumin.

Ashí péñker ana nu enentáimsatarum

⁸ Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chíkich shuarnasha péñker enentáimtusminia nusha, kame ashí péñker ana nu enentáimsatarum. Nuyásha chíkich shiir anturkamnia ana nusha enentáimsatarum.

⁹ Wi unuiniarmajrumna nu umiktarum. Tura wi túramur ísurmena nu tura anturkumena nusha umiktarum. Túrakrumñkia Yuska an̄kant átinian amastaj tusa pujurtamsattarme.

Jiripiusnumiá Yus-shuar Páprun kuítian akuptukarmiania nu

¹⁰ Ii Uuntrī Kristu anea asarum winiasha ataksha enentáimturú asakrumin ti waraajaj. Kame kajinmatrukmiarme tátsujaj antsu kuítium atsakui yáintkiatin tujinkiamarme.

¹¹ Tura kuítian atsumakun tátsujaj. Antsu wi takakjana nujain̄ warastinian unuimiáruitjai.

¹² Kuítrinchatí pujustinia nuna nékajaj tura ti nukap takustinia nunasha nékajaj. Tsukamknasha jéemarnasha, itiarar takustinniasha tura pen̄ké takutsuk pujustinniasha unuimiáruitjai.

¹³ Kristu ni kakarmarin̄ surakui ashí túramniaitjai.

¹⁴ Tuma aj̄n atumsha wi atsumamu akupturkarum ti péñker túramarme.

¹⁵ Jiripiusnumiá shuartiram, jū ti péñker nékarme. Masetunia nun̄kanam Yus-Chichaman etserumtai aya atumek kuit akupturkamiarne. Wi etserkamujaj atumí wakan̄in yáin̄ma asamtai yuminsarum akupturkamiarne.

¹⁶ Atumek wi Tisarúnikia nun̄kanam atsumakun pujaisha kuit akupturkamiarne.

¹⁷ Aya kuit akupturkakrumin tu enentáimtsujaj. Antsu nu kuit Yusaj kawentramkaku tusan wakerajrume.

¹⁸ Epaprutítíujaj akupturkamarum nujajsha atsumamaj nuna nan̄kaamas tiaruncha wáinkijaj. Akupturkamarum nusha ti kun̄kuin Yus susamua áinis ti shiir auyi.

¹⁹ Winia Yúsrusha ti péñkeran núkap takakui. Atumsha Jesukrístunu ajasu asarum Yus seamniaitrumé. Tura Yuska ti takakna nujaj ashí atsumarmena nuna suramsattarme.

²⁰ Ii Aparí Yus tuke shiir atí. Nuke atí.

Amikmaamu

²¹ Winia náaruisha tura Jesukrístu náarin̄cha ashí Yus-shuar ainia nu chícham ujatrukatarum. Niisha shiir pujusarti. Wi írutramusha núnisan̄ shiir pujusarti tusa akupturmainiawai.

²² Tura ashí akupin Sésarai pujuinia nuyá Yusna ajaruka tura chíkich Yus-shuarsha shiir pujusarti tusa chichaman akupturmainiawai.

²³ Ii Uuntri Jesukristu atumniasha ti shiir yainmakarti. Nuke atí.

Papru KURUSENMAYA SHUARAN papí akuptukma

Kurusenmaya Yus-shuaran Papru áatramiania nu

¹ Wi Pápruitjai. Yus wakerutak Jesukrístunun etserkat tusa akatra akupkamuitjai. Wisha ii yachi Timiutéujai

² ju papí áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Apari atumin wáitnentaimturma asa yainmakarti imiatkinchanum tuke shiir pujustinian.

Papru Yus-shuaran Yúsan áujtusmianis nu

³ Iisha atumin Yus áujtakur ii Uuntrí Jesukrístu Apari Yus ashí tsawant yúminkiaji.

⁴ Atumsha Jesukrístu ti shiir enentáimtamusha tura ashí Yus-shuar aneamusha antukji.

⁵ Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatái tusarum nákarne.

⁶ Nu chicham ashí nuñkanam pampaakui shuara enentáin nereá áinis nusháa ajarar yamaikia péñker túrin áiniawai. Núnisan atumíncha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiai.

⁷ Nu chichaman Épapas ujatmakmarme. Niisha iijjai métek takasu asantai ti aneamuiti. Atumniasha Kristu takatrín ti shiir takartamsaiti.

⁸ Niisha átum Yus-shuar asarum mai anenai ajamun ujatmakmaji.

⁹ Iisha nu antukar Yus ashí tsawant áujtajrume. Yus ni wakeramun ti paant nekaprut-mawarat tusar seaji. Ashí Yúsnan ni enentáimtaijijai ashí Níiniun paant nekaatniun Yus jintinramat tusar seaji.

¹⁰ Atumsha Krístunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum Nin ti péñker nekaak tusar seaji.

¹¹ Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum katsuntrattarme.

¹² Yus ni shuarin tsáapnina nuí ashí péñkeran susattawai. Tura incha nuí pachiinkiatniun tsankatramka asakrin Yus Apa yuminsamniaitrum.

¹³ Yus iwianchin nupetak íwianch akupeana nú kiritniunmaya uwemtikramar ni aneamu Uchiri akupeana nuí wearmakmaji.

¹⁴ Ni Uchiri krúsnum jaka ii tunaarín nijiar tsankurtamar uwemtikrampramiai.

Kristu jakamujai Yusjai nawamnaikiar shiir pujustin

¹⁵ Yus wáinkiachminiaitiat ni Uchiri akiiniamaí tura ayashimkiamiayi. Túmaitiat ashí najanamua nuna yaunchu pujú asa ashí akupniuiti.

¹⁶ Niiijai Yus ashí nayaimpiniam írrunna nunasha nuñká írrunna nunasha, ashí wáiniaj nunasha núnisan wáintsuj nunasha mashi najanamiayi. Nu arantcha ashí akupin ju nuñkanam írrunna nusha, nayaimpiniam írrunna nusha, iwianchnium írrunna nusha, ashí Niiijai najanamua áiniak Nin umirkarti tusa najanamua áiniawai.

¹⁷ Ashí najanamua nuna yaunchu, Krístuka tuke pujuwiti. Ashí najanamua írrunna nuna emestsuk wáinniuiti.

¹⁸ Ashí Yus-shuar métekrak chikichik ayashtinia áinis enentáimkiumka nuna muuke Krístuuiti. Tura nu ayashín ni iwiaakmarijjai iwiaaku átinian súsaiti. Niisha ashí jakamunmaya nantakniujai imiá nankaamantuiti. Nújainkia ashí enentáimpramnia írrunna nunasha akupniuiti.

¹⁹ Yus ashí takamtsuk Kristuj shiir pujumiayi.

²⁰ Núnisan Yus Kristu krúsnum jakamujai ashí nayaimpinmasha tura ju nunkanmasha íranna nuna Niijjai nawamnaikiar shiir pujusarat tusa wakerukmiayi.

²¹⁻²² Atumsha nuik tunáa túrin asarum atumí enentáin Yusa nemasri ámarme. Tuma asarum yajá wekaimiarme. Antsu Kristu, aentsu ayashín ayashimiak, krúsnum wáitias jakamujai ii tunaari asakármatai yamaikia Yusjai nawamnaikiar shiir pujaji. Nujai Kristu in péñker ajasuncha tunaan máatrachmancha tura sumamachuncha Yúsai ejetamtatji.

²³ Tuma asamtai Jesukrístu shiir enentáimtusum kakaram ajasrum kat-suártiniaitrum. Tura uwempratin chicham antukuitrum nuyá kanakchatniuitrum. Ju uwempratin chichaman ashí nunkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinkratniuiti

²⁴ Atumin wáitiaknasha ti shiir waraajai. Kristu ni shuarin nekas péñker awajsat tusa wáitiana nuí pachiinkia asan waraajai. Ashí Yus-shuar Kristu ayashí áintsan áiniakui Yus-shuaran yáintajtsan ayashrujai wáitiakun shiir enentáimjai.

²⁵ Atumin yáinkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáintrintjai.

²⁶ Yámankamtaiknumiá nekaachman Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuiti.

²⁷ Nu chichamsha júiti: Kristu atumí enentáin pujak Niijjai métek ti shíiram awajtam-sattawai. Nu imiá shiir chichamnum Israer-shuarchasha pachiiniainian Yus ashí ni shuari nekawaarat tusa wakerimiayi.

²⁸ Iisha Kristu étsereaji. Túrar ashí enentáimtikrar péñker nekaawarat tusar jintintiaini-aji. Nujai Krístujai tsaninkiar ashí péñker tsakarartatui.

²⁹ Tuma asamtai Kristu ni kakarmarin tí surakui nekas kakaram takaajai.

2

¹ Nekaatarum, yatsuru. Yus-shuaran yáintaj tusan ti takaajai. Tura atumíncha, Rautiséanmayá shuarnasha, tura ashí winia waitcha ainia nunasha yáintaj tusan ti takaitjai.

² Ashí shiir enentáimtikratniun ti takaajai. Núnisan aneniarum chikichik enentáijjai métekrak wekasatarum tusan wakerajrume. Nu arantcha, ashí Yusna ti peñker nekaarum tuke katsuaruk tusan takaajai. Nujai Kristu ti peñker nekaattarme. Tura yaunchu nekaachman Yus yamá paant awajsaiti. Nuka Krístuiti. Tura Nii nekaatin nekas shíiraiti.

³ Tura kakaram ajasam Kristu péñker nekaam ashí shiir enentáimpramnia nusha tura ashí Yusna nekaamnia nusha nekaattarme.

⁴ Atumin chikich shuar niisháa chichamjai shiir chichartamas anankramawarain tusan nuna tájarne.

⁵ Wi nuí atumjai pujachkuncha nuí pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimturumena nuna ísnaka shiir enentáimjai.

⁶⁻⁷ Nu asamtai átum ii Uuntri Jesukrístu nekas enentáimtusum Yus-shuar ajasmar-mena núnisum yamaisha Nii nekas enentáimtusum Niijjai tsaninkrum ashí túratarum. Nu túrakrum Nii enentáimtakrum tuke tsakaki wétatrume. Tura te tariara wajasrum Yusjai kanakchattarme. Yus-Chicham núnisan etsernakmatai nekarmarme. Tuma asarum Yus tuke yuminsarum, núnisan péñker wekasatarum.

Krístujai yamaram iwiaakma takakji

⁸ Aneartarum atumsha. Shuar aentsti enentáimmiajain ashí ju nunkanmayaan enentáimprar tura Krístun enentáimtutsuk niisháa chichaman áujtamainiak nekaschajai anankramataj tusa wakerutmainiawai.

⁹ Krístunam Yus ashí takamtsuk pjuwiti.

¹⁰ Túmakui atumsha Krístujai tsaniñkiu asarum ni iwiaakmarj takamtsuk takakuitrume. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti.

¹¹ Nu arant átum ayashnium tsupirnatskesha Kristu shuari ajasakrumin ashí ayash wakeramun, tsupirkatniua áintsan, Kristu ajapamiayi.

¹² Tura atumsha Yus ni kakarmarijjai Kristu jakan iniantkimia nu enentáimtusrum imianmiarme. Túrarum Krístujai métek iwiarnasmarme. Tura núnisrumek Krístujai métek nantakmiarme.

¹³ Nuikkia átumsha tsupirnatsuk atumí tunaarij tuke akui atumí wakanjin jákauyarme. Tura yamaikia Jesukrístujai tsaniñkiu asakrumin Yuska atumí tunaarij tsankur yamarum iwiaakman suramsaitrume.

¹⁴ Tura ashí ii tumashrin sumamtikramatin amia nuna japiruiti. Kristu krúsnum jakamtai ashí akupkamujai sumamtikramamun tsankurtampramijai.

¹⁵ Núnisan Kristu krúsnum jaka, iwianchnium ashí akupin ainia nuna nupetak ashí íimiainain iniatsararmiayi.

Nayaimpiniam írunna nu enentáimtustarum

¹⁶ Akupkamunmaya Yus ankant awajtamsantai chíkich shuar ame túramujai yajouch enentáimturmarain. Yúamna nujai, úmamna nujai, uwitinha, nantutinha, tura tsawantinha nampermam nujai chíkich shuar yajouch áujmatramkuisha ¿warí urukatin?

¹⁷ Nu nampernum Israer-shuar Kristu túrattana nuna nakumainiak túrin ármiai. Tura Kristu taa imia Niñki pujá asantai nakumkamuka ántrai.

¹⁸ Tura shuar “Péejchach ajasam Yus áujtsuk aya Yusa suntari shiir awajsatniuiti” túramkuinikia anturkairap. Nu shuar mesekranam wáinkiamun áujmatenak ántar nankaamantu enentáimtumainiawai. Aya aentsti enentáimian chichainiawai.

¹⁹ Tuma ásar Krístujai tsaniñkiar wekainiatsui. Kristu ashí akupin asa ni shuarin Yúsnan jintintiá shiir tsakarát tusa péñker wáiniui. Nu arantcha ashí ápateak Yus wakerana áintsan chikichik awajeawai.

²⁰ Atumsha Krístujai jaka asarum aya aentsti enentáimtai ikiukniuitrume. Nuikia ¿urukamtai ju nunkanmaya ana nu tuke páchiarum? Nii tuinia nu umirkashtiniaiti.

²¹ “Ju antinchatniuiti, tuiniawai. Ju yúashtiniaiti. Tura ju achikchatniuiti” tuiniawai.

²² Nusha ¿warí, takasam amuukashatuak? Kame áyatik aents akupkamu áiniawai.

²³ Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

3

¹ Nuikia Krístujai nantakin asarum nayaimpinmaya írunna nu wakeruktarum. Nui Kristu pujawai Yusa untsuurin.

² Ju nunkanam ana nu enentáimtsuk aya nayaimpinmaya ana nu enentáimtustarum.

³ Atumsha Krístujai tsaniñkrum jakamarme. Tuma asarum Krístujai tsaniñkrum Yusjai iwiaaku pujarme.

⁴ Krístukete ii iwiaakmarj. Nii nayaimpinmaya wantinkiuisha atumsha Niijjai métek wantinkiatarme. Tura Niijjai métek ti penker átatrume.

Yaunchu iwiaakmasha tura yamaram iwiaakmasha

⁵ Tuma asamtai ju nunkanmaya ana nu ajakratniua áintsarum iniaisatarum. Tsanir-matniusha, tunáa wakeruktincha, tura takakna nujai nankaamas wakeruktincha ántar-yus tikishmatratniua áintsan asamtai iniaisatarum.

⁶ Shuar Yúsan umirtsuk aya nuna túrin ásarmatai Yus nin kajerak ti asutiáttawai.

⁷ Atumsha núnisrumek túriniuyarme.

⁸ Tura yamaikia jusha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum.

⁹ Yus-shuar ajasrum yaunchu enentáimtairam iniaisarmame. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap.

¹⁰ Yaunchu enentai, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Nijijai métek shiir atí tusa. Túramtai Yus ti penker nekaki wéaji.

¹¹ Krístuka ashí írúnna nujai nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarin ainia nusha tura ankant ainia nusha, Kristu ashí ni enentáin pujakui nusháa enentáimtunairchatniuiti.

¹² Yus atumin anenmak Niiniu arti tusa achirmakmarme. Túrutma asamtai jujai shiir iwiarmampratniua áintsarum tuke túrin atarum: waitnenkartin, shiir awajkartin, péejchach átin, émtin áchatin, tura katsuntin átin.

¹³ Kristu atumí tunaarin tsankuramia núnisrumek nuamtak tsankúrnáiratarum. Chíkich yajauch awajtamkuisha shiir katsuntram yapajniaitsuk tsankúrnáiratarum.

¹⁴ Tura ashí nankaamas anenaitiarum. Túrakrumka chikichik ajasrum mash penker túrattarme.

¹⁵ Kame chikichik ayashtinia áintsarum ajastarum tusa Yus ni shuari ajasat tusa achirmakmarme. Tuma asamtai Yusa shiiri atumí enentáin pujurtamsati. Nujai Yus yuminsatarum.

¹⁶ Kristu shiir chichame atumí enentáin piakti. Nekas naka enentáimprarum jintin-niaiyarum mai ikiakánai ajatarum. Yus kanta kantamárum tuke enentáijjai Yus yuminsarum shiir awajsatarum.

¹⁷ Tura takaakmesha, chichaakmesha, kame ashí túramna nuka Jesukrístu shiir awaj-sataj tusam ni kakarmarijjain túrata. Túrakum Krístujai Yus Apa yuminsata.

Yus-shuar túratniua nu

¹⁸ Nuwatiram, atumí aishri umirkatarum Uunt Yus nuna wakerakui.

¹⁹ Áishmantiram, atumí nuwé aneatarum. Atumí nuwejai kajernaikiairap.

²⁰ Uchitiram, ame apa nukusha tuke umirkatarum. Nu túrakrum Yus shiir enentáimtiksattarme.

²¹ Uchirtintiram, atumí uchiri ti kakantrairap. Ti kakanteamka uchisha ti kuntuts pujus penker wekasatniun nakitchanpiash. Nu túrunawain tusarum ántararum atumí uchiri kakantrairap.

²² Takarniutiram, atumí uuntri shiir umirkatarum. Ju nunkanmaya uuntri ain aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke penker takastiniaitrume.

²³ Ashí túramna nu asump enentáijjai takakmasta. Aya aentsuk yáintinia áintsachu antsu nayaimpinmaya Úuntrum yayá áitkiasrum takastarum.

²⁴ Ame Úuntrum Kristu asa nayaimpiniam ashí shiir takustinian tsankatramkattawai.

²⁵ Antsu tunáa túrin ni yajauch túramujai métek akinkíáttawai. Yus ashí áentsun métek iyawai.

4

¹ Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk péñker iniartiniaitrome.

² Yus áujkuram Nii yumĩsarum asummiarum iniaitsuk áujstarum.

³ Incha Yus áujtustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir ankant etserkat tusarum áujtursatarum.

⁴ Tura wi paant etserkatniuitiaj núnisan etserkat tusarum áujtursatarum.

⁵ Yus-shuarchajai shiir túratarum Yus-Chichaman yajauch enentáimturarain. Kakaram ajasrum tsawant ánrarum iniankasairap.

⁶ Ti shiir chichamtin átiniaitrome tura anturújamin átiniaitrome. Núnisrum chíkich chíkich Yus-chicham paant ujaktin nekaattarme.

Amikmaamu

⁷ Ii aneamu yachi Tíkikiu ashí wínian ujatmaktatrume. Niisha wijjai métek Yúsnan pimpitsuk ti péñker takasuiti.

⁸ Nu asamtai ii jui pujajnia nuna ujatmak ikiantamprarat tusan akuptajrume.

⁹ Núnisan ii aneamu yachi Unisemu niijiai winiawai. Niisha atum wéeaiti, tura Yusjai shiir wekaawai. Nu shuar ashí jui túrunamun ujatmaktatrume.

¹⁰ Aristarku wi sepunam tsaninkia pujamur amikmaatmarme. Núnisan Markus, Pirnapí kaná yachia nu, amikmaatmawai. Niisha nu jeamtai antukmarum núnisrum péñker wáinkiatarum.

¹¹ Justu Jesus náartin amikmaatmarme. Júchik áiniawai Rúmanmaya Israer-shuar winia Yúsnan etserkatin atutkaru ainia nu. Túmainiak ti shiir ayamtikruiniawai.

¹² Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusjai kakaarum tuke shiir Yus wakera nu túrak tusa seatramprume.

¹³ Wisha Épapas atumin ti enentáimturman nékajai. Núnisan Rautiséanmaya shuarnasha tura Iarapurisnumia shuarnasha ti páchiniawai.

¹⁴ Rukas, aneamu tsuákratin, núnisan Témassha amikmaatmarme.

¹⁵ Tura Rautiséanam pujuinia nú Yus-shuarsha amikmaatruatarum. Núnisan Nímpiassha tura ni jeen irunainia nú Yus-shuarsha amikmaatruatarum.

¹⁶ Átum ju papí áujsarum umikrum Rautiséanmasha nuyá Yus-shuar áujsarti tusarum akupkatarum. Tura atumsha núnisan Rautiséanmaya papí támatai atumsha áujstarum.

¹⁷ Tura ju Arkipiu titiarum: “Ii Uuntri Jesus ni takatrin suramsa nu péñker umikta” tawai, titiarum.

¹⁸ Wi, Papru, winia uwejruij júchiniak áatkun amikmaajrume. Sepunam pujajna ju enentáimturatarum. Yus shiir yainmakarti.

Nuke atí.

Papru

TISARÚNIKIANMAYA SHUARAN

Emka papín aar akuptukma

Papru ni tsaniakmarijjai Yus-shuaran áatramiania nu

¹ Wikia Pápruitjai. Wisha Serpanujai tura Timiutéujai Tisarúnikianmaya Yus-shuar ajasuitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukrístunuitrume. Ii Apari Yus, tura ii Uuntri Jesukrístu waitnentrama ásarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar umirkatniun jintintiarmania nu

² Iisha Yus áujkurkia atumniasha tuke enentáimtusar Yus shiir yuminsaji.

³ Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume.

⁴ Yatsurú, Yus anenmarme. Anenma asa Winia arti tusa achirmakurmena nusha nékaji.

⁵ Enentáimpratarum. Iisha Yúsai Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakaní kakarmarijjai tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

⁶ Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat aín Yus-Chicham umikiurme. Tura wáitiatrumek Yusa Wakaní shiir enentáimtikramkui warasrum pujarme.

⁷ Nu túrakrum ashí Masetúnia tura Akaya nuñkanmaya Yus-shuarsha shiir wekasatin jintintiarne.

⁸ Tuma asarum Uunt Yusa chichame ti ipiamparurme. Tuma asamtai Masetúnia tura Akaya nuñkanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui.

⁹ Antsu átum in péñker itiaamun nii íksan ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji.

¹⁰ Tura nuyasha Yusa Uchiri Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajetáiri tsawantri jeattana nuyá uwentikrampratin.

2

Yus-chichaman paant ujakarmiania nu

¹ Atumsha nékarne, yatsurú, iisha ántar atumín jeachmaji.

² Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti péñker nékarne.

³ Warí, iisha Yus-Chicham atumin ujakmiaj nu nekasauyi. Tura yajauch enentáimsan, anañkatjarum tusan tíchamjarme.

⁴ Antsu Yus in péñker enentaimturmas Uwempratin Chicham etserkatarum tusa aka-trampramiaji. Tuma asamtai núnisrik étseraeji. Túrasha aya aents warantiksatai tusar

étsertsuji. Antsu Niñki Yúsak ii enentáin nekartamin asamtai, shiir enentáimtiksatatsar túraji.

⁵ Átumka nékarme, penkesha shíirmach chichasan anan̄kachjarme. Nuyasha, kuit achiktai tusar ántrar chichaschamji. Núnaka Yus nékawai.

⁶ Iisha Kristu akatramur̄intji. Tuma asar ni kakarmar̄ijai akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji.

⁷ Antsu uchi kuírchin ni nukur̄i péñker iis tsakatmana áintsarik iikia atumniaka shiir íismajrume.

⁸ Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisach̄aji, atumín ti anea asarⁱ.

⁹ Yatsurú, ii atsumaj nu sumarmaktai tusar kakaram takakmasmaj nu ¿kajinmatkin-trumek? Atsá. Nékarme. Iis, Yus-Chicham étserkur, tsawajsha káshisha takasmiaji. Nusha, akirkata, tíj tusar takakmasmiaji.

¹⁰ Yatsurú, atumjai pujumiaj nu iisha Yus wakerana nu túrimiaji, tura yajauch túrutsuk shiir wekasamiaji. Nujai incha chikichkisha yajauch chichartamkatniusha atsumiayi. Nuka atumsha nékarme tura nú arant Yus nékawai.

¹¹ Tura atumniasha an̄kant an̄kant Yúsnum ikiakármajrumna nu nékarme. Tura uchin ni apar̄i átsan̄keana nútiksarik shiir enentáimtikramajrumna nusha nékarme.

¹² Tura Yúsjai shiir wekasatarum tímiajrume. Yus nan̄kaamas uunt asa ashí aku-peawai. Tura Yus-shuaraitrumna nuna, Winin pachiinkiarat tusa, Yus untsurmarme. Yus untsurma asamtai Níiniuitrume. Niiniu asarum Yusa uchir̄ia núnisrumek wekasat-niuitrume.

¹³ Yus-Chicham ii étserma antukrum, aya áentsnumian̄chaiti tímiarme. Yúsnumīaiti tímiarme. Nu tiniu asarum umirkarmarme. Kame nekas tárume. Ii étserjinea nu nekas Yusa chicham̄ente. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmin̄kiaji.

¹⁴ Yatsurú, ju nekaatarum. Aya atumek wáitiatsrume. Ashí Jutía nun̄kanam Israer-shuar, ni shuarin̄ketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuarin̄ wáitkiarmainiawai. Nujai Jutía nun̄kanmaya Yus-shuarjai métekrak ajasurme.

¹⁵ Niisha Israer-shuaraitiatan̄ Yus-Chichaman etserin armia nuna nuamtaketiat máawarmiayi. Tura nú weeák Uunt Jesusnasha máawarmiayi. Tura incha aā j̄iki akup-tamkarmiaji. Maaj, niisha Yúsan shiir enentáimtikianiatsui. Tura núnisan̄ ashí áentsun kajerainiawai.

¹⁶ Warí, Israer-shuarcha Uwempratin Chicham ujaktaj tákurnisha niisha suritramaini-aji. Nuna túruiniak yaunchu tunaan túriarmia nújain̄kia nan̄kaamas yamaikia túrawarai. Pai, túrasha yamaikia Yusa kajetair̄i imiá tsumaj̄i ana nūi pujusarai.

Papru ataksha Tisarúnikianam irautajtsa wakerimiania nu

¹⁷ Iisha, yatsuru, ishichik tsawant atum̄iija kanakir jeachat pujayatrik, atumjaj̄isha wáinniaiyachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji.

¹⁸ Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammiaji.

¹⁹⁻²⁰ Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintri shiir enentáimsar nákaaji. Nii támatai imiá warastatji. Atumin Yus-shuar awajsa asar, Nii támatai atumsha iij̄jai Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

3

1-2 Iisha ataksha atumin ístaitсар ti wakerimji. Tura tujintiakur iikia Atenas péprunam juákur ii yachi Timiutéu atumin írmainiarat tusar akupkatai, timiaji. Iisha Kristuj Uwempratin Chicham etsermiaj nuj, Timiutéuka iijjai métek takasuiti. Tuma asa niisha Yusa takatrin takáa asa atumniasha Yusaj kakartarum turamarti tusar akupkamji.

3 Tura nú arant, itiurchatan wáiniuk iniaisarain tusa ikiakátmararti tusar Timiutéu akupkamji. Yatsuru, átumka nékarme, ashí Yus-shuaraitjinia nuka páchitsuk wáitsatniuitji. Iis, tuma asamtai atumsha ti nekas itiurchatnum pujarme, Yus-Chicham umirka asarum.

4 Iimiatarum, atumjai nuik tuke pujumjinia nuj “iisha wáitsartatji” tíchamkajrum. Iis, túrunachaik. Nuka nékarme.

5 Tura atumin íwianch tunaanum ajunmarchariash tusan, wisha kúntuts enentáimsamiajai. Tura ántrar takaschajiash tu enentáimsamiajai. Tuma asamtai nekaataj tusan ti wakerakun, wisha ti nukap tsawant nákaschamiajai. Antsu wárik Timiutéun akupkamiajai. Yúsaj péñkerash wekainia tusan, “nu inintrusam ikiuuta” timiajai.

6 Tura yamaikia Timiutéu Tisarúnikianmayá waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitсар wakerajnia núnisrumek atumsha incha írmaitiai tusarum wakeramuncha Timiutéu ujatmaji.

7 Tuma asamtai, yatsuru, ashí itiurchat tura wáitsatin wáiniatrik átum Yus shiir enentáimta asakrumin iisha shiir enentáimji.

8 Atumsha Yúsaj tariara weká asakrumin, shuar jaa péñker ajas enentái chinkiana áintsarik enentáimji.

9 Yus péñker umirka asakrumin, iisha shiir waraaji. Warasu asar ii Yusri ti yúminkiaji.

10 Incha Yus akuptamkurninkia atumjin tímiajaik jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

11 Atumjin weri ístinian ii Apari Yussa tura ii Uuntri Jesukristusha in yáinmaktai tusar wakeraji.

12 Atumin ii aneajnia núnisan Yus atumniasha mai anenai ajatniun tura chikichcha aneastinian enentáimtikrampartí. Tura nú nukap anenkrattain Yus amasartí tusar wakeraji.

13 Yus ikiakátmakui átum tunáa túrutsuk Yus umirkarum wekasatarum tusar ii Apari Yus seaji. Ii Uuntri Jesus Níiniurijjai winiak péñker wekaarmin tati tusar taji.

4

Péñker túratniun Yus wakerana nu

1 Iikia Uunt Jesus akupkamuitji. Tuma asar nu kakarmajaj atumniasha ju túratarum tusan akupeajrume. Atumsha iwiaaku pujarmena nuj Yus shiir waramtiksatarum tura tuke péñker túrukum wetarum tusar seajrume. Iisha nuik atumin unuiniarmajrumna nútiksarmek túratarum.

2 Uunt Jesusa akupeamurijjai tura nu kakarmajaj atumniasha nuik unuiniarmajrumna nu átumka nékarme.

3 Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanirmaashti”.

4-5 Yus-shuarcha ainia nu, Yúsán nékainiachu ásar, aya niniki enentáimtumasar aya ni ayashí wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuari péñker enentáimtusrum shiir aneasrum ayastarum.

6 Nú arant, amesha ame yatsum anankam ni nuari yajauch awajtusaip. Nu túrakrumninkia ii tímiajrumna nútiksán Uunt Yus ti kakaram asutiámawartatui.

⁷ Warí, Yus incha pé_nkercha yajauch túratarum turamchaitji. Antsu aya pé_nkerak túratarum turamji.

⁸ Tuma asamtai shuar ju chichaman nakitiakka áentsun nakitiatsui, antsu Yúsan nakitraiti. Tura nu Yussha ni Wakanin amaawiti tunaan túrashtinian.

⁹ Tura yamaikia nuamtak Yus-shuar aneniastin ana nuna ti neka asakrumin áatrashtatjarne. Warí, imia Ni_nki Yus atumin mai anenai ajatniun jintinramawarmatai nékarme.

¹⁰ Iis nútiksarmek aneniatsrumek ashí Masetúnianam matsatainia nujai. Túrasha, yatsuru, atumí ane_nkrattairi nú nukap ajasti tusan, seajrume.

¹¹ Yamaikia tímiaj nútiksarmek, yayauchin túruinia nu_i wekatsuk, chíkich shuarna pachittsuk, atumí takatri_n shiir an_kant pujusrum atumí uwejejai_n takakmá pujutarum.

¹² Átum táasa_irum tusan tájarne. Túrakrumni_nkia atumniasha chíkich shuar pé_nker enentáimturmasartatui.

Kristu tátintri

¹³ Yatsuru, Yus-shuarcha ni shuari jakamtaí “ata_kka wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsa_irum tusan ju_na tájarne. Jákaru ainia nu urukawartinkit paant nekaatarum.

¹⁴ Jesus jákayat nantakchamkia. Núnisa_n Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha.

¹⁵ Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikiuakur émkishtatji.

¹⁶ Antsu Yus akupeakui, Yusa suntari_i uuntri_i unsumkui tura Yusa kachuri_n umpuarmatai Uunt Jesukrístu unsumuk Yus pujamunmaya_n tarattawai. Nui_nkia Krístunu ajarar jákaru áiniana nu iwiarsunmaya_n nantakiartatui emka.

¹⁷ Tura nuyá iisha Yus-shuar tuke iwiaaku pujajnia nu Krístujai yura_nminiam ajapén in_kiunaikiartatji. Nuní ashí nayaimpiniam ii Uuntri_i Jesukrístujai_i tuke iwiaaku pujusartatji.

¹⁸ Tuma asamtai ju shiir chicham atumin ujakjana jujai_i mai ikiakánai ajatarum.

5

¹ Túrasha, yatsuru, ni tátintri wariti_n tura warí tsawantai, nuka áatratin atsumatsrume.

² Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisa_n ná_katsuk pujuinia_i Uunt Kristu tsawantri_i jeattawai.

³ Ashí shuar “Pai, yamaikia ti nekas shiir pé_nker pujuinia_i” tu matsatainia_i, aya aneachma nu_nka mesertin tsawant jeattawai. Nuwa_n ajantin aya aneachma jatema áintsan_n, nékachmanum átatui. Túmakui pisartin pe_nké atsuttawai.

⁴ Túrasha, yatsuru, á_tumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsan_n tarutrámashatui.

⁵ Enta, á_tumka tsáapninium wekáa asarum Yus-shuartirmeka nékaitrume. Iikia kiritniumi_nchuitji.

⁶ Nu tuma asar, chíkich uruka núnisrik, ii enentáin kanartinia núnisrik “Warí, winia itiurtawa” tíchami. Antsu naka enentáimsar anearmi.

⁷ Iis, kashi kanarchatniukait. Tura nampeena nu kashi nampeenawai.

⁸ Túrasha iikia shiir tsáapninium wekainia_i nuka naka enentáimprar tuke nampetsuk pujustiniaitji. Suntar ni nemasri_i ana_nkruawai_n tusa anear wekasatniuiti. Tura iisha núnisrik íwianch yajauch awajtamsai_j tusar anearmi. Yus enentáimtusar aneetniuitji. Tura núnisrik iisha, ju nu_nkanmaya_n uwemprar Yúsa_i tuke pujustatji, tu enentáimprar wetái.

⁹ Páantchakait. “Jinium wéchatniuitrume” Yus incha túramji. Antsu ii Uuntri_i Jesukrístujai_i uwempratniun tsan_katramkaitji.

¹⁰ Niijjai métekrak iwiaaku ami tusa Jesukrístu in jarutramkamiaji. Nu tuma asamtai iisha ii ayashijjai iwiaaku pujakrishha Niijjai iwiaakji, tura ii ayashijjai jáakrishha Niijjai tuke iwiaakji.

¹¹ Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹² Yatsurú, juna seajrume. Atumjai pujuinia nú shuar Yúsnan takakmainiakui shiir enentáimtustarum. Jintintramuk chichartamainiakui umirkatarum.

¹³ Yúsnan takainia ásarmatai ti péñker enentáimtusrum aneestarum. Tura yajauch awajnaitsuk ti shiir nawamnaikiarum matsamsatarum.

¹⁴ Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáintarum. Tura ashí shuarjai kajetsuk katsuntrarum wekasatarum.

¹⁵ Aneartarum, yatsuru. Chíkich yajauch túrutmantai amesha nútiksamek yapajki-aip. Antsu nuka túrutsuk átumka mai péñker awajnai ajatarum. Tura nú arant, ashí nunkanmasha ashí shuarsha nútiksarmek túratarum.

¹⁶ Tuke shiir warasrum pujustarum.

¹⁷ Tuke tsawant iniaitsuk Yus áujstarum.

¹⁸ Péñker pujakmesha, itiurchat pujakmesha ashí warí wáiniam nuisha Yus shiir yuminsatarum. Kristu Jesusai Yus-shuar ajasutiram nu túratniun Yus wakerawai.

¹⁹ Ji ikiajniaktinia núnisañ Yusa Wakaní enentáimin keana nuka tunaajjai téenmantikiarum ikiajniakairap.

²⁰ Yus jintintrar akupkamu asa péñker chichaman etserainia nu nakitirairap.

²¹ Ashí etserkamu ana nu nekasashit tusarum nekaatarum. Túrarum aya péñker ana nuke achiktarum.

²² Ashí yajauch ana nuyañka kanaktiarum.

²³ Yuska, imiatkinchanum wekasatin amaana nu, atumin takamtsuk shiir awaj-tamsartí. Tura ii Uuntri Jesukrístu táatsain, atumí wakaní atumí enentai tura atumí ayashisha mash métek tunaajainchu awajtamsati.

²⁴ Yus atumin untsurmakmarumna nu tímianak uminiaiti. Nii tana nuna yawetsuk túrattawai.

Amuamunam amikmaatin

²⁵ Ashí yatsurtiram winiasha Yus áujtursatarum.

²⁶ Ashí Yus-shuar árum nu, amikmaaniatarum.

²⁷ Winia Uuntru Jesukrístu chichamejai juna tájarne. Ju papí ashí Yus-shuar antukarti tusarum ashí iruntramunam áujstarum.

²⁸ Ii Uuntri Jesukrístu atumin yáinmákartí. Nu atí.

Papru

TISARÚNIKIANMAYA SHUARAN

Ataksha papin aar akuptukma

Papru ni tsaniakmarijjai Yus-shuaran áatramiania nu

¹ Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarne. Atumsha ii Apari Yusna tura Uunt Jesukristunu ajasuitrume.

² Tuma asakrumin ii Apari Yus tura ii Uuntri Jesukristusha waitnentrama ásarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

³ Yatsurú, átum péñker matsatu asakrumin iisha Yus tuke yúminkiaji. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yuminsatniuitji.

⁴ Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitiarme. Nu tuma ajn átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji.

⁵ “Yusa akupeamurin pachiinkiamniaitrome” Yus túramprume. Nui pachiinkiatat tau asarum ju nunkanam wáitiarme. Tura wáitiakrumsha nuna nankaamas íwiarnaruitrome nui pachiinkiatin. Kame nújainkia Yus atumin achirmak péñker túrait, nuka páantaiti.

⁶ Núnisan atumin wáitkiarmainia nunasha Yus tímiatrusan wáitkiasartincha nekas péñkeraiti.

⁷ Tura wáitiarmena nusha Yus íjiaisha ayantikramprartin péñkeraiti. Ii Uuntri Jesukristu ji keana ímianisan kakaram suntarijjai nayaimpinmaya tara wantinkiamtai, nu tsawantai Yus ayampratniun suramsartatji.

⁸ Tura nú tsawantai sha Yúsan nékainiatsna núnaka ii Uuntri Jesukristu ti asutiátajtsa tátatui.

⁹ Taa, nincha menkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nui akupeajrume, átum winia umirtukcha asakrumin” nin tiartatui.

¹⁰ Kame Uunt Jesukristu tátin tsawantri jeamtai, ni shuari, ni enentái péñker awajsaru áinia nu, ni náarin shiir pachisartatui. Tura Yúsan umikiaru ásar, ti shiir enentáimsar Jesukristun ísartatui. Ii ujakmajrumna nu antukrum umirka asarum atumsha nui pachiinkiattarme.

¹¹ Nu tuma asamtai ii Yusrin atumin tuke áujtajrume. Yus atumin achirmakuitrome. Nujnkia Yuska atumí enentáin takas Nii wakera nujai métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusrum péñker túratin wakerarme. Tura wakerarmena nu umiktin Yuska ni kakarmarijjai yáintí, tu áujtaji.

¹² Átum péñker wekasa asakrumin chíkich shuarsha ii Uuntri Jesukristu náarin nankaamantu enentáimtusartatui. Nusha auka ii Yusrj tura ii Uuntri Jesukristu waitnentáimturmasar péñker wekasatniun yáinmakui túarme. Túramtai chíkich shuar shiir enentáimturmasartatui.

2

Tuke Tunaarintin wantinkiattana nu

¹ Tura, yatsuru, ii Uuntri Jesukrístu tátatna nuna tura Niijjai inkiunaiktatjinia nunasha ujaktinian wakerajrume.

² Chíkich shuar anaṅkramawar “Uunt Jesukrístu tsawantri jeayi” tu ujatmaktaj tusar wakeruiniawai. “Iimiarmaj nujai nékajai” turamainiakuisha, “chícham étserman antukmaj nujai nékajai” turamainiakuisha, tura “Papru papí áarmari nuna takui nékajai” turamainiakuisha, páchim enentáimprairap. Tura sapijmiakairap tusan seajrume.

³ Penké anaṅnawairap. Nekaatarum. Nu tsawant jeatsain Yúsnumiá kanaktin átatui. Tura nú arant, Tuke Tunaarintin, emesnartatna nu wantinkiattawai.

⁴ Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarain tusa ti nakitrattawai. Nínki ti naṅkaamantu enentáimtumás, Yusa nuke ajas, Uunt Yusa Jeen wayáa pujustatui. “Júiti Yus” shuar turutiarat tusa mash túrittawai.

⁵ Yatsurtiram, wi atumjai pujakun nuna ashí ujakmajrume. ¿Nuka kajinmakniurmek?

⁶ Yámaikikia, ni tsawantri jeatsain, Tuke Tunaarintin wantinkiaín tusa surimia nu nékarme.

⁷ Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin.

⁸ Nuínkia nu Tuke Tunaarintin wantinkiattawai. Tura Uunt Jesus ni wenejai umpuú aun máattawai. Tara ni wincharijjai nuna amuktatui.

⁹ Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa, aentsti túrachminian túrak anaṅkawartatui.

¹⁰ Jinium wémin ainia nú shuaran ashí tunáa ana nujai anaṅkawartatui. Nu shuar Yus-Chichaman nekas ana núnaka nakitraru ásar uwemprachmin ániawai.

¹¹ Iis, nekas ana nuna nakitia ásarmatai, ti anaṅmamawar wait-chichaman umirkarat tusa Yuska tsanatkattawai.

¹² Warí, niisha ni tunaarín wararainiak, nekas ana nuna nakitraru ásarmatai, Yuska “jinium wétatrume” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusri yuminsaji. Átum nekas ana nuka umikiurme. Tuma asakrumin Yusa Wakaní atumí enentáin péñker awajtamsaitrume. Nu tuma asamtai yámankamtaikniumiá Yuska “átum uwempramniaitrume” túramprume.

¹⁴ Nu túrunat tusa Yus wakerutmarme. Krístujai Uwempratin Chicham ii ujakjinia nujai Yus untsurmakmarme. II Uuntri Jesukrístu ti penker pujana nu pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusjai katsuqartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap.

¹⁶ II Uuntri Jesukrístusha tura ii Apari Yussha ti penker ásar incha anenmatsjik. Tura waitnentrama ásar incha shiir enentáimtikramji. Tura nú naṅkaamas ii tuke péñker pujustinian ikiurtamsaitji.

¹⁷ Nu tuma asamtai, péñker chichastarum tusa, tura péñker takastarum tusa Jesukrístuka shiir enentáimtikramar ikiakátmarartí.

3

Papru “áujtursatarum” tímiania nu

¹ Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan ashí nunkanam wakerukartí tusarum Yus seatarum.

² Tura yajauch shuar, péñker ana nuna ti nakitiainia nu, incha yajauch awajtam-sachartí tusarum Yus áujkartustarum. Kame chíkich aents Yúsán umirkacharu ániawai.

³ Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anan̄kramataj takui kíishturmaktatrume.

⁴ Kame Yus atumin yainmaktatrume, taji. Ii tájinya nu yamáí umíarme. Tura tuke umirkattarme. Nusha nekaar shiir enentáimji.

⁵ Uunt Yus yainmakartí ni anen̄krattairin̄ nekaatniun. Kristu itiurchatan katsuntramia núnisan̄ atumniasha katsuntratniun Yus yainmaktí.

Takastiniaitji

⁶ Yatsurtiram, antuktaram. Ii Uuntri Jesukrístu chichamejaj̄ ju taji: “Nuyá Yus-shuar wi jintinramun nakitiak aya wékana nu ikiuktiarum.”

⁷⁻⁸ Ii túrajnia núnisrumek túratin nékarme. Júiti: atumjaj̄ pujusmaj̄ nūi tuke takakmasmiaji. Atumí yurumkar̄i iisha akikmakar yurummiaji. Atumjaj̄ itiurchat áchatí tusar tsawaisha káshisha tuke takakmasmiaji.

⁹ Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamiaji.

¹⁰ Warí, atumjaj̄ pujumiaj̄ nūi “Takastinian nakitiana nuka yurumáshti” tíchamkaj̄i.

¹¹ Iis, atumiiniā weeá, nán̄kamas enentáimiainiak tura nán̄kamas túruiniak pen̄ké takatsuk pujuiniawai, túramainiaji.

¹² Nú shuáran ii Uuntri Jesukrístu chichamejaj̄ “Tákamtak shiir takakmasartí” tajai.

¹³ Yatsurtiram, yawetsuk shiir túratarum.

¹⁴ Ju papinium ii tájinya nuna, shuar umiktinian nakitiakuin̄kia “umichuiti” tákuram, ni natsarat tusarum ikiuktiarum.

¹⁵ Túrasha “Yus-shuara nemasr̄inti” tiip. Áyatik jintintrata, tura Yúsaj̄ enentáimtikrata, ame nekas yatsumēa áitkiasmek.

Papru aujsua ikiuamu

¹⁶ Uunt Yuska, imiatkichu enentái susamniaiti. Jú Yus, itiurchatnum pujarminiñ atumin tuke imiatkichu enentáimtikramsarti. Uunt Yuska atumin pujurtamsarti, tajai.

¹⁷ Jui wi Papru juna aajai. Wi papin akupeaj̄ nūi júnisnak winia náarun áaran apujeajai, wíniaiti tusan.

¹⁸ Ii Uuntri Jesukrístu atumin ashí yainmakarat tusan wakerajrume. Nu atí.

Papru TIMIUTÉUN Emka papin aar akuptukma

¹ Wi Papru Jesukrístu akatramurintjai. In uwentikkiartin Yussha tura ii Uuntri Jesukrístusha winia akuptuku áiniawai. Jesukrístujai métek ti shiir ajastai tusar nákJai.

² Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukrístusha ti anenma ásar waitnentramainiak imiatkinchanum ti shiir pujustinian yainmakarti.

Wait chichamjai anearta

³ Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuĵ wait-chichaman jintin ainia nu suritkiarta.

⁴ Niisha Israer-shuara weatrin áujmatsamunak tura ni weatři naari ti untsurĵ irurtin-niak Yus-Chichamjai nanĵkaamas enentáimtuiniawai. Nunak áujmatsar tuke ántar tuini-awai. Nu túramuka Yus enentáimtusar Nin shiir umirkatniun yáinmatsji. Tuma asantai nusha suritkiatá.

⁵ Yus-shuar tuke enentáijĵai Yúsan shiir enentáimtusar tura tunáa túrutsuk aya péņķera nuna wakerukar anenĵkartin ajastin áiniawai. Núnisaņ péņķer ajasat tusar Yus-Chicham étšereaji.

⁶ Chĵkĵch shuar juĵa iniaisar ántar chichaman áujmatainiawai.

⁷ Yúsnan nékachiat “jintinniuitjai” tuiniawai. Tura unuiniainia nuna nékainiatsui.

⁸ Yus wakeramun nekaatin tura tunaan suritkiatin akupkamuka nekas péņķeraiti. Nu paant nékĵai.

⁹ Kame akupniuka péņķer shuaran itit awajsatniun akupenatsui. Antsu yajauch shuar juĵa túrin ainia nuna itit awajsatniun akupenawai: Tunáa shuarnasha, umichuncha, Yúsnasha tura ashĵ Yúsnancha nakitiainia nunasha, aparĵn máinniasha, nukurĵn máinniasha, kame maņĵkartinniasha,

¹⁰ nuwanĵcha tura áishmaņnasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashĵ nuna itit awajsatniun akupenawai. Kame ashĵ péņķercha nuna iwiaratniun akupenawai.

¹¹ Núnisaņ tawai ti shiir uwempratın chicham Yus suramsamajnia nu. Nu chicham-naka etserkatniun Yus péņķer asa tsanĵkatrukuiti.

Yus waitnenkartin asantai Papru yumınsamiayi

¹² Ii Uuntri Jesukrístu shiir enentáimturu asa Níiniun etserturkat tusa kakarman surusuiti. Túruta asantai yúmiņĵĵai.

¹³ Wi Yúsan imiá yajauch chicharniuyajai. Yus-shuarnasha áintrarmiaĵai. Yusnasha katsekniuyajai. Túrin aĵn Yus winia waitnentrumiayi. Kame Jesuska Yus Anaikiamun nékachu asan wi túramu yajauchiiti tu enentáimĵauyajai.

¹⁴ Tura ii Uuntri Jesukrístu ti nekas waitnentrumiayi. Tura Jesukrístujai tsaniņĵia pujakui Yus nekas enentáimtustinniasha tura anenĵkartin ajastinniasha surusuiti.

¹⁵ Ju chicham ti nekasaiti. Tunáa shuáran uwentikrataĵ tusa Jesukrístu ju nunkanam taramiayi. Nunasha ashĵ shuar nekaatin áiniawai. Tura wikia ashĵ shuarĵai nanĵkaamas tunáan túriniaitjai.

¹⁶ Ti tunáa aĵn Jesukrístu ti anenĵkartin ana nu paant nekanati tusa Yus winia waitnentrumiayi Tuma asantai chĵkĵch shuar, wiĵĵai métek, Yúsan nekas enentáimtusar Niĵĵai tuke iwiaaku pujusartatui.

¹⁷ Yus tuke jacha asa tuke iniaitsuk akupniuiti. Wáinchataitiat imiá nan_{ka}amas nékai_{ti}. imia Ni_nki Yúsaiti. Tuma asamtai imia Ni_nki tuke iniaitsuk ti shiir awajsatniuiti. Núnisan_n tuke atí.

¹⁸ Uchiru, Timiutéu, yáunchuyá Yus-shuar ámin “Ju shuar pé_nkeran tú_rattawai” tú_ramarmia nú_tiksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan tú_rawá_j tusam anearam tú_rata.

¹⁹ Chíkich shuar tunaajá_i anearcharu ásar Yúsán ikiukiarmái.

²⁰ Iminíusha tura Arejántrusha núnisan_n Yúsán ikiukiarmatai uunt iwianchnium su-rukarmajai. Nu_já_i Yúsán ti yajauch chicharsacharat tusan tú_raitjai.

2

Yus áuj_satin

¹ Wátsek, emka seajrume Yus áujeakum Yus yumí_nsam ashí shuar yai_nkiat tusam áuj_tusarta.

² Imiatkinchanum pujusar Yusjaísha tura áentsjaísha shiir tú_ratai tusar tura ashí akupin ainia nusha pé_nker akupkarat tusar Yus áuj_tustiniaitji.

³ Áitkiasar seatin pé_nker asamtai, uwentikramajnia nú Yus wakerawai.

⁴ Ashí shuar nekas chichaman nekaawar uwemprarat tusar wakerawai Yus.

⁵ Aya chikichik Yus awai. Tura Jesukrístu aents ajas Yusjá_i áentsun nawamnaimtikiar-tiniaiti.

⁶ Ashí shuara tunaarín akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi.

⁷ Nuna tú_ratniun Yus winia akatar akuptuku_iti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrutsuk nekas tajai.

⁸ Nu asamtai áishma_nka kajetsuk yajauch tunaitsuk antsu pé_nker enentáijjá_i uweje takuiniar Yúsán áuj_sarti.

⁹⁻¹⁰ Núnisan_n núwáka iwiarmamuk nekasmiancha pé_nker enentáijjá_i entsararti. Chíkich shuar nu nuwá_n iis temashmarmaríncha, sháukríncha, kurimkiamuncha, iwiarmam-pramuríncha núnaka enentáimtutsuk antsu ni pé_nker tú_runamun enentáimtusarti. Núnisan_n áchatniukait nuwá Yús-shuar ainia nu_já_i. Ni pé_nker tú_ramujá_i nekas shiir awajmam-sashtinkiait.

¹¹ Núwáka takamtak pujusar umiiniak unuimiararti.

¹² Nuwá_nka ashí iruntramunam unuiniartinniasha tura ni áishrín akupkatniuncha suritiajai. Antsu takamtak pujustiniaiti.

¹³ Yus emka áishma_nkan Ata_nkan najanamiayi. Nuyá nuwá_n Épan najanamiayi.

¹⁴ Tura Yus timian umirkach Ata_nka ana_nnachmiayi. Antsu Épa ana_nna asa tunaan tú_ramiayi.

¹⁵ Tú_maitiat jurertin asa, emesnartinniumiá uwempraiti. Tura Yúsán nekas enentáimtak anenkartiniaitiuk tura esetar enentáimiuk pé_nker wekasatniuiti.

3

Yus-shuaran wáinin

¹ Shuar Yus-shuaran wáinkiatniun wakerakka pé_nker takatan achikiuiti. Nuka neka-saiti.

² Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Niisha pé_nker esetar enentáimin naka wekasatniuiti. Í_raran ni j_een ti shiir itiaatniuiti. Pé_nker jintinkratin átiniaiti.

³ Nampechusha tura suir enentáimtichusha átiniaiti. Aya kuítian ikiaun^ukatniun enentáimtuschatniuiti. Antsu tsan^{ka} átiniaiti. Kajechusha átiniaiti. Chikichnancha wakerutkashtiniaiti.

⁴ Ni shuarⁱⁿ shiir akupeakui ni uchir^{isha} umin tura shiir awajkartin ártiniaiti.

⁵ Kame ni shuarⁱⁿ akupkachminiaitkiun^{ka} ¿itiurak Yus-shuaran wáinkiat?

⁶ Yus-shuaran wáinniuka yama Yus-shuar ajasu áchatniuiti. Túmaitkiun^{ka} ti nan^{ka}amantu enentáimtumak iwianch^{jai} métek tunaan túrak sumamattawai.

⁷ Yus-shuarchasha nin shiir enentáimtustin ániawai. Núnischaitkiuin^{ka} nin yajauch chicharainiakui íwianch wárik tunaanum ajuartatui.

Yus-shuaran yain

⁸ Núnisan^u Yus-shuaran yaincha péⁿker asamtai ashí shuar nin shiir enentáimtustin ániawai. Nii tana nuna tímatrusan^u umin átiniaiti. Nampechu átiniaiti. Aya kuítian ikiaun^ukatniun enentáimtuschatniuiti.

⁹ Yúsⁿan ti péⁿker nekaatniuiti. Tura esetar enentáimsatniuiti.

¹⁰ Emka péⁿker ístiniaiti nuyá péⁿker wekaakka Yus-shuaran yain átiniaiti.

¹¹ Nuwasha péⁿker asamtai ashí shuarsha nin shiir enentáimtustin ániawai. Tsanumniuchu antsu esetar enentáimiar nii chichaa ímiatrusan^u umin átiniaiti.

¹² Yus-shuaran yainkia nuwan^u apatkachu átiniaiti. Tura ni uchirⁱⁿcha ni shuarⁱⁿcha ashí shiir akupin átiniaiti.

¹³ Yus-shuaran yayak^u nekas péⁿker takaakka shiir enentáimtusmin asa páchitsuk Kristu Jesus enentáimtamun arantsuk etserkamniaiti.

Yusna ana nu imiá nan^{ka}amas péⁿkeraiti

¹⁴⁻¹⁵ Wárik ítniun wakerajme. Túmaitiatnak sétaknasha Yus-shuar^{jai} takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai.

¹⁶ Maa, imiá nekasaiti, Yus iwiainturmakma ashí nan^{ka}amas ti péⁿkeraiti. Tura júiti: Yuska aents ajas jú^u nun^{ka}nam paant wantinkiamiayi.

Yus Wakan^{cha} “ti shiiraiti” Nin tímiayi.

Yusa suntar^{isha} Nin wáinkiar^{miayi}.

Ashí nun^{ka}nam nu etsernak^{miayi}.

Túramtai ashí nun^{ka}namaya^u shuar umirkar^{miayi}.

Tura nayaimpiniam waketkim^{miayi}.

4

Amuukatin tsawantin

¹ Yusa Wakanⁱ ti paant tawai, amuukatin tsawant jeaakui untsurⁱ aents Yus enentáimtustinian iniaisar antsu yajauch wakanin nemarsar íwianch jintíamun anturkartatui.

² Yajauch shuaran anturkartatui. Nu shuar ni enentáⁱ narúa áinin ásar ni tunáa túramun péⁿké enentáimtichu ániawai. Tuma asa shiir chichainiayatan^u wáit^{rin} ániawai.

³ Nu shuar nuatnaikiatniun suritiainiawai. Núnisan^u chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsⁿan yumín^{sar} páchitsuk yuámin ániawai.

⁴ Ashí Yus najanamu péⁿker asamtai nakittsuk antsu Yusⁿan yumín^{sar} yúatniuiti.

⁵ Yus-Chicham tana nú^{ja}isha tura yuiniak Yúsⁿan yumín^{kias} áuj^{samujai} ashí péⁿker ajasu^{iti}.

Jesukristu péⁿker takarⁱⁿ

⁶ Wi tájamna nu chíkich Yus-shuar jintintiakmeka Jesukristu péⁿker takarⁱⁿ átatme. Tura ashí Yus-Chicham péⁿker jintíamu unuimiaru asam nuj^{jai} kakaram ajastatme.

⁷ Ántar chichamsha tura netse chichamsha enentáimtutsuk nekas Yusna ana nu túratin kakaram ajasta.

⁸ Kame ayash kakaram awajsatniusha ishichik péñkeraiti. Antsu Yusna nu túratin kakaram ajastinkia imiá péñkeraiti. Yamái ju nunkanmasha yáinmaji tura ukunmasha Yusjaj pujustin asakrin nankaamas péñkeraiti.

⁹ Nu imiá nekas asamtai ashí shuar nuna enentáimtustiniaiti.

¹⁰ Nekas iwiaaku Yus ashí shuaran uwemtikramniaiti, tura ashí Nin enentáimtuinia nú shuaran nekas uwemtikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

¹¹ Nuka ashí ame jintiakum akupkatniuitme.

¹² Ti úuntchaitkiumnisha nakitramprarañ. Antsu péñker túrakum Yus-shuar unuiniarta. Chichammijiaisha, túramurmijiaisha, aneñkratmarmijiaisha, nekas Yus enentáimtamujiaisha, tura esetra enentáimsam Yusna péñker túramujiaisha niisha túrawarat tusam iniaktusarta.

¹³ Wi jeatsañ Yus-Chicham áujeakum shuar jintintiata. Túram Yus-shuar ikiakárarta.

¹⁴ Yus-shuara uuntri Yúsnan takastin anaitiamak uwejeñ awantramsarmái. Nuna túramainiak “Ju shuar kakarman Yúsnumiñ takustatui” túramarmia nu, kakaram ajasam tímatrusam túratá.

¹⁵ Tuke enentáimjaj wi tájamna nu enentáimtakmin ame péñker túruki wéamun nekaawartatui.

¹⁶ Túramna nusha tura unuiniamna nusha péñker wáinmamkata. Nu túratin pimpikiip. Nu túrakmeka uwemprattame amesha tura ujainiam nusha uwemtikrattame.

5

Yus-shuarjaj itiur túratniuit

¹ Unta nu kakantraip. Antsu nekas ame apa nútiksamek chicharkata. Nátsasha nekas ame yátsumeá nútiksamek shiir awajserta.

² Nuwá úuntchisha nekas ame núkua nútiksamek shiir awajserta. Nuwá nátsasha nekas ame umaimia nútiksam shiir enentáimjaj péñker awajserta.

³ Waje nekas atsumin ainia nusha yáinkiarta.

⁴ Tura waje uchirtiniaitkiuñkia tura tirañkrinniuitkiuñkia, nu shuar wajen wáinkarti. Emka ni shuarñ péñker wáinkiatniun unuimiararti. Ni aparí anemia núnis awantuiniak shiir wáinkarti. Núnaka Yus ti shiir enentáimtawai.

⁵ Nekas waje niñki pujana nu Yúsan enentáimtak tsawaisha káshisha iniaitsuk Yúsan áujeawai.

⁶ Antsu aya wárastiniak wakera nuka iwiaakiat jaka áintsañkete.

⁷ Tura wajenka ni shuarñ wáinkartí. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta.

⁸ Shuar ni jeen pujuinia nuna nekaska wáinkiatniuiti. Tura nuyá chíkich shuárnasha yáintiniaiti. Túrachkuñka Yus tana nuna umíatsui, tura Yus-shuarcha nujaj nankaamas yajauchiiti.

⁹ Yusa kuítrijaj yáinniaiktiniaitkiuñka waje sesenta (60) uwí nankaamas takustiniaiti. Tura chikichik aíshriniak takusu átiniaiti.

¹⁰ Ti paant péñker túrin átiniaiti. Ni uchirñ péñker tsakatmaashit, írran péñker táata tíniuashit, nekasmiancha enentáimtumar Yus-shuaran yáiniaashit, wáitiainia nuna waitnenniuashit, tura chikichnasha péñker túriniaitkiuñka maak.

¹¹ Tura sesenta (60) uwí takakchaka chíkich wajejaj iruraip. Ni ayashj wakeramurj Krístuiya kanamtikiainiawai tura ataksha nuatnaikiatniun wakeruiniawai.

¹² Tura emka enentáimtiarmia nuna iniaisar sumamainiawai.

¹³ Nu arantcha nakimiainiak ántar irauwear chikicha itiurchatrñ áujmatsachminia nunasha áujmatin áiniawai.

14 Nu asamtai waje úchipiak ainia nuka uyurtukar uchin takusarti. Tura nuwa nuatkamu takastinia nuna túrawartí. Tura ni túrunamurijjaj in kajertamainiaj nú shuar yajauch enentáimturmarcharti.

15 Kame nuik chíkich chíkich waje Krístujya kanakiar iwianchin nemarsaru ásarmatai nuna tájai.

16 Áishmansha nuwasha Yus-shuar ainia nu ni shuariin waje ákuinkia Yusa kuítrin seatsuk nii yaintí. Nujaj chíkich wajén nekas atsumainia nuna Yusa kuitri yáintatui.

17 Yus-shuara uuntri Yus-shuaraan pénger wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuiniartinniasha tuke takaaka imiá shiir enentáimtustinaiti.

18 Yus-Papiniumsha núnisan áarmaiti:
Jin_kiaia saepen pakartaj tusa turu takaak nájakui ni nují jin_kiatáshtiniaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

19 Chikichik shuarak Yus-shuara uuntri tunaarín etsertukmatainkia anturkaip. Antsu jímiarsha menaintiusha tsanumtsuk métek tuiniakui anturkata.

20 Chíkich shuasha ni tunaarín ikiuktinian nakitiainia nu, ashí iruntramunam chicharkarta. Chikichcha, nuna ísar, ashamkarti.

21 Yussha ii Uuntri Jesukrístusha tura nayaimpinmaya suntarsha ímiainiamunam “túrata” tájame. Ashí shuarjaj niisháa enentáimtutsuk métekrak túrata.

22 Yus-shuara uuntri atí tusam wárik anaikiaip. Wárik túramka chikicha tunaarín sumamattame. Ashí tunaanum penké pachiinkiaip.

23 Wakemjai jau asam aya éntsak úmutsuk karía ishichik pachimpram umarta.

24 Chíkich shuara tunaari wáitsatin imiá paant áiniawai wáitsatin tsawant jeatsaj. Tura chíkich shuara tunaarinkia paantcha áiniawai antsu ukunam paant nekanawartatui.

25 Núnisan pénger túramusha ti paant áiniawai. Tura yamá páantchaitiat tuke paantcha áchamniaiti. Páchitsuk nekanattawai.

6

1 Takarniutirmesha, atumí uuntri ti shiir umirkatarum. Túrachkumnikia chíkich shuar Yusnasha ii unuiniamuncha yajauch áujmattsartatui.

2 Atumí uuntri Yus-shuar áiniakka aya Yusjaj yatsum asamtai nakiarchatniuitrume. Antsu nuna nankaamas pénger takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuit wakeruktincha

3 Shuar ti shiir naka chichaman ii Uuntri Jesukrístunu ana nuna nakitiak antsu niisháa chichaman étserkunka

4 nu shuar nankaamantu enentáimtumayat ántrai. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjai nupetmaktaj tusar nankaamas áujmatainiak kajernaikiar tura katseknaikiar pénger enentáimtunaitisuk

5 tuke kakannainiawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin áiniawai. “Yusna ana nujaj kuítrintin ajasminiaiti” tuiniawai. Nu shuar pachisaip.

6 Shuar takakna nujaj waraakka Yusna ana nujajsha waraak ju nunkanmasha tura nayaimpinmasha nekas kuítrinniuiti.

7 Iis, ju nunkanam misuk támaji; núnisar misuk jinkittiaji.

8 Tuma asamtai yurumkasha tura entsataisha takakkurkia nujaj warasa pujustini-aitji.

9 Antsu kuítrintin ajastaj tuinia nu, tunaanum awankemkar iniainiawai. Tura antra nuna wakerukar itiurchatan wáiniainiawai. Nujaj emesratniunmasha jeainiawai.

¹⁰ Kame kuit aneatniuka ashí tunáanum útsutmakminiaitji. Chíkich shuar nuna wakerukar Yus enentáimtustinian iniaisar ti itiurchatjaj yajauch awajmamsarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimtsuk Yus péñker umirkata. Aneakum katsuntrata.

¹² Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun untsurí shuar iruntramunam etserkaitme.

¹³ Yuska ashí iwiaaku átinian súwiti. Jesukrístusha Punsu Piratuí nekasa nuna ti paant ujakmiayi. Tuma asamtai Yussa Jesukrístusha írainiamunam nuna tájame.

¹⁴ Ii Uuntri Jesukrístu táatsain wi tájamna nu yapajítsuk tura yajauch chicharnakchamnia péñker umiktá, tájame.

¹⁵ Tsawant jeamtaí Jesukrístu tatí tusa Uunt Yus, imiá péñker asa, akupkattawai. Nínkiti Yus. Akupniuncha Akupniuiti. Uuntjaj nankaamas Úuntaiti.

¹⁶ Iwiaaku átinia nérenniurí Nínkiti. Ti tsáapninnium pujakui nuntumtuachminiaiti. Wáinchataí asamtai shuar péñké wáinkiacharu ániawai. Nínki ashí shiir awajsatniuiti tura Nínki tuke ashí akupin atí. Núnisan atí.

¹⁷ Jú nunkanam kuítrintin ainia nusha nankaamantu enentáimtumascharti. Kuitcha yúpichuch menkakamnia asamtai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti.

¹⁸ “Péñker túratarum” tiarta. Táku min niisha shiir enentáijjaj ni takakman ajamsarti. Nuyá nú péñker túramujaj Yusaj ikiáunkartí.

¹⁹ Nuna túruiniak kuítriniawartatui. Núnisan tuke iwiaaku átinian wáinkiertatui.

Amuak Timiutéun akatramu

²⁰ Timiutéu, ashí ame túratniua nu tuke enentáimturta. Jú nunkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip.

²¹ Chíkich shuar nuna umirkar Yusajya kanakiarai.

Wátsek, Timiutéu, Yus shiir yainmakti.

Nuke atí.

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakui Jesukrístu akatramuri ajasuitjai. Ashí Jesukrístujai tsaniñkiarun “Nekas iwiaaku átinian susattajai” tíniuiti Yus. Tuma asa nuna etserkat tusa akuptukuiti.

² Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentramainiak imiatkinchanum shiir pujustinian yainmakarti.

Krístunu takastiniaitjinia nu

³ Tsawajsha káshisha Yúsan áujeakun ámin tuke enentáimtusan ti shiir Yúsan yúmiñkijai. Winia weatur túrawarmia nútiksanak Yúsan enentáimtakun ti shiir awajeajai.

⁴ Kanakmiaj nuñ eantramiam nuna tuke enentáimtajme. Ataksha wararnaisatai tusan íitniun wakerajme.

⁵ Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiasha emka Yúsan nekas enentáimtin ármiayi. Amesha núnisketme.

⁶ Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujai atak kakaram takasta.

⁷ Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji.

⁸ Ii Uuntri Jesukrístunu etserkatin natsantraip. Níiniun étserkun sepunam pujamusha étserkun natsantruraip. Antsu Yus kakaram awajtankui ame étseream nujai shuar yajauch túramainiakui surimiamtsuk wáitsatin enentáimtumarta.

⁹ Ii péñker túrichu árinñ Yus in anenma asa uwemtikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramiayi. Yaunchu ju nunka atsaisha in tuke waitnentrampramijai.

¹⁰ Turá yamá in Uwemtikkiartin Jesukrístu támatai nu anenmamú paant ajasuiti. Ni-isha jákatniun nupetak emesramiayi. Tura uwempratin chichamjai jáchatai iwiaakman paant awajturmajai.

¹¹ Nuna etserkat tusa Yus anaitiukmiayi. Tura akattur Israer-shuarchanum akuptukmiayi.

¹² Túruta asamtai ti wáitijai. Túrasha Yúsan nekas enentáimta asan natsamatsjai. Imiá kakaram asa amuukatin tsawant jeatsañ ashí wínian susamaj nuna ti péñker waitruktatui.

¹³ Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtaji tura nujai anenkratniuitji. Tuke núnismek túrata.

¹⁴ Yus ámin takasat tusa suramsamu shiir takasta. Tura Yusa Wakanj in pujurtamaj nuna kakarmarjijai túrata.

¹⁵ Asia nunkanmayá shuar mash iniaitiusarmai. Nu nekaachmaashum. Nu shuarnumiá Pijirusha Ermujenessha armái.

¹⁶ Antsu Unisépuru niisháa shuar amai. Ti nukap shiir enentáimtikurmai. Tura wi sepunam pujamuncha natsantrurchamai. Ii Uuntri Kristu ni shuarincha waitnentrarti.

¹⁷ Rúmanam taasha natsantrutsuk eatak wáittsuk iniaitíuschamiayi.

¹⁸ Ipiisu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

2

Kakaram ajasta

¹ Amesha, uchirú, Jesukrístujai tsanin^ñkiu asam nu kakarmajai kakaram ajasta.

² Untsurí ántuiniamunam wi etserkamaj nu, shuar umikmin ainia nu jintintiawaram chikichnasha jintintiawarat tusam akupkarta.

³ Ame ti pen^ñker Jesukrístu suntari^ñ asam wáitsatin katsuntrata.

⁴ Suntarka ni uuntri^ñ tana nunak umiktin asa chíkich takatan pachintiu^ñchatniuiti.

⁵ Núnisan^ñ nakurincha nakurustinia nujai^ñ métek nakurachkun^ñka nekas pen^ñkeran awakmakun súsatniua nuna achikchamniai^ñti.

⁶ Ataksha núnisan^ñ shuar ajan takaana nu, ashí shuara nan^ñkaamas nuy^ñan yúashtinkiait.

⁷ Wats, ju^ñ menaintiu métek-taku chicham ániawai. Pen^ñker enentáimtakmin ii Uuntri^ñ Kristu paant awajturmastatui.

⁸ Jesukrístu jaka nantakmia nu enentáimprata. Tura Uunt akupin Tawit ni we^ñatri^ñ asamtai Jesussha uunt akupin átiniait^ñti. Núiti wi uwempratin chichaman étserea^ñ nu.

⁹ Nuna étserea^ñkun sepunam jirujai^ñ jin^ñkiamu pujakun wáitiajai. Túrasha Yus-Chicham jin^ñkiachminiait^ñti.

¹⁰ Ashí shuar ni shuari^ñ arti tusa Yus achikiarua nuna yáin^ñtajtsan ashí itiurchatan katsunteajai. Nujai^ñ Jesukrístujai tsanin^ñkiaru ásar uwemprar tuke shiir pujusartatui Yusjai.

¹¹ Ju^ñ imiá nekasaiti:

Jesukrístujai jákaitkiurkia Níijia^ñisha tuke iwiaaku pujustatji.

¹² Wáit^ñakrish^ña Nii^ñjia^ñ akupkattaji.

Natsantakrinkia Niisha natsantramprattaji.

¹³ Umichuitkiurniisha Ninkia tuke uminiait^ñti. Warí, Yuska ni enentáim^ñiajain^ñ yapa^ñjniátsuk tuke umiktiniait^ñti.

Yusai natsa^ñaraj^ñ tusam ashi túrata

¹⁴ Shuar jintintiakum ju^ñ enentáimtikrata. Ii Uuntri^ñ Yus íimmianum chichamjai^ñ yajauch tunaiyarain^ñ tusam chicharkarta. Nu tunaitin pen^ñké áantrait^ñ antsu ántuiniana nuna yajauch awajenawai.

¹⁵ Yus-Chicham tuke enentáimjai^ñ pen^ñker unuimiátram shiir jintintiawarta. Túrakum Yus pen^ñker íirsat tusam pen^ñker takarin atá. Túramka Yusai natsa^ñarchattame.

¹⁶ Jú nun^ñkanmayan^ñak ántar áujmatin ainia nujai^ñ kanaktia. Shuar nuna áujmatainiak tunaanum nuna nan^ñkaamas wáiniawai.

¹⁷ Ni jintiniamusha sun^ñkurjai^ñ métek pampaawai. Iminíusha tura Piritiusha nu shuar ániawai.

¹⁸ Niisha nekas chichaman iniaisar tura ashí Yus-shuar nantaktincha nan^ñkaamasai tuíniakui chíkich chíkich shuar Yúsan naka enentáimtuiniatsui yamaikia.

¹⁹ Túrasha Yus ashí nan^ñkaamas enentáimtustinia nuna paant awajsaiti. Júnisaiti: “Uunt Yus ni shuarin^ñ nékainiawai,” tura nuyá “Ashí Kristu shuari^ñ ainia nu tunaanumia^ñ kanakiarti.”

²⁰ Kúitrinniu je^ñen kurijai^ñ najanamusha kuitjai^ñ najanamusha írunui. Nújain^ñkia ti shiira nu takastin ániawai. Tura numijai^ñ najanamusha nuwejai^ñ najanamusha írunui. Antsu nújain^ñkia nekasmiancha ainia nu takastin ániawai.

²¹ Núniskete Yusa takat^ñrjijai^ñ. Ashí tunaanumia^ñ kanakir pen^ñker wekasar shiira nu takasmin átatji. Kame ashí pen^ñkera nu takasmin asakrin ii Uuntri^ñ Jesukrístu wakerak pen^ñker takata nu^ñ apujtamsamniaitji.

²² Natsá wakerutai iniaisam esetram pen^ñker wekasata. Amesha ashí shuar shiir enentáijjai^ñ Yúsan áujena nujai^ñ Yus nekas enentáimtakum aneniakum ti shiir pujustá.

²³ Enentáimtsuk chichainiak aya ántar tunaitinian chichainia nu pachisáirap. Nusha aya némasmanainiawai.

²⁴ Ii uuntri Jesukristu takarniuka chíkich shuarjai nemasmanaikiashtiniaiti, antsu ashí shuarjai péñker nawamnaikiatniuiti. Tura waitnentáimturar péñker jintintiatniuiti.

²⁵ Tura umircha shuarnasha Yus ni enentáin yapajtiakui nekas chichaman shiir enentáimturarat tusa péñker enentáijjai jintintiatniuiti.

²⁶ Nujai íwianch ni wakeramu túrawarat tusa achikmaitiatan uwemprartatui.

3

Amuukatin tsawant jeatemamtai aents ti tunaan túrawartatui

¹ Amuukatin tsawant jeakui ti itiurchat átatui.

² Shuar aya niñki enentáimtumasartatui. Kuítian ti wakeriartatui. Nañkaamantu enentáimtumartatui. Yúsnasha yajauch chicharsartatui. Aparíncha umirkachartatui. Yumínsatniuncha nékachu ártatui. Ashí Yúsnancha enentáimtuschartatui.

³ Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasri ártatui.

⁴ Amikrincha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui.

⁵ Yusa kakarmari “ántrai” tuíniak péñker umirkachartatui. Túrasha Yúsan umirua núnisar túrawartatui.

Nu shuar penké pachisáip.

⁶ Nu shuarsha shiir chichayatan anañkawar jeá wáiniawai. Tura nuwá esetar enentáimchan nekas tunaarinniun anañkainiawai. Nu nuwá ashí yajauch wakeramujai anannainiawai.

⁷ Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai.

⁸ Yaunchu Ejiptu nunkanam Muisais uunt akupniujai chichaakui jimiará iwishin, Jánissha Jámpriissha, Muisaisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiainiachu ásar Yúsnan naka jintiatniun penké tujintiainiawai.

⁹ Túrasha nuna nankaamas kuakchartatui. Shuar ti paant ni netse túruiniamurin nekarawartatui. Núnisan nu jimiará iwishniujai túrunamiayi.

Amúak Papru Timiutéun akatramiania nu

¹⁰⁻¹¹ Tura ámeke wi tímiaj nu umireame. Wi Yusjai shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsan enentáimtakun tura aneñkratkun shiir enentáijjai katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntri uwentikrurmiayi.

¹² Nekasaiti, shuar Jesukristujai shiir túrataj tákuñka ni nemasri áintiam ti wáitsatniuiti.

¹³ Tura ashí anañkartin ainia nusha kame ashí yajauch shuarsha nú yajauch túrukiar wétatui. Iwianchjai anañkamu ásar chikichnasha anañkiar weartatui.

¹⁴ Antsu ámeke unuimiam nu imiá nekasaiti tu enentáimtakum tuke emetata. Jintintra-mawarmia nú shuarsha wáitrichua nu nékame.

¹⁵ Úchichinmayan Yus-Chicham nékame. Yus-Chichamka uwempratniun jintintra-mamniaiti. Nusha “Jesukristu nekas enentáimtakum uwemprattame” tawai.

¹⁶⁻¹⁷ Ni Papirin áarat tusa Yus ni shuarin áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papijjai nekatatniuitji. Tura awajakrincha Yus-Papí núnaka paant jintintra-mamji. Nuyá naka wekasatniun jintintra-mamji.

4

1 Ii Uuntri Jesukristu amuukatin tsawantai Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaattawai. Tuma asantai Niisha tura Yus Apasha íimiainiamunam juna akateajme.

2 Uwempratin chicham etserkata. Yúpichuchia nuisha tura itiurchata nuisha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuinararta.

3 Ukunmanka péñker chichaman nakitrar ii wakeraj núchik nekaatai tusar, shuar teremak péñker pujuschamnia nekapea áintsan, nankaamas unuimiaru atai tusar, nánkamas unukiartinian ti untsurí eakartatui.

4 Nekas shiir chichaman iniaisar ikiuiniak ántar áujmatsamun enentáimtusartatui.

5 Antsu ámeká tuke péñker túratin wakerakum ashí itiurchat katsuntrata. Uwempratin chicham étserkum takatrum péñker umikta.

6 Ishichik ajasai winia iwiaakmar Yusaj surumaktin. Mantamnan nayimpiniam wétin jeatimiai.

7 Shuar kakaram maanainia núnisnak tuke kakaram takasmajai. Tséken péñker tsekea áintsanak yawetsuk takasmajai. Tura Yus-Chichaman nekas akasmatkun péñker wáinkiaitjai.

8 Tuma asantai tawasap nukajai najanam tsékena susamua áintsan wisha péñker túramunam akinkiattajai. Tura aya wíniak akirkashtatui. Antsu ashí ni tátinian shiir enentáijiai nákinia nunasha nekas péñkera nuna akikiartatui.

Timiutéu túratin akatmamturma

9 Wárik iiraitin enentáimturata.

10 Témas aya jú nunkanmayanak wakerak ajapa ikiuruk Tisarúnikia péprunam weyi. Tura Kresentisha Karasea nunkanam weyi. Núnisan Títiusha Tarmasia nunkanam weyi.

11 Túrawarmatai aya Rúkas wijiai pujawai. Márkus eaka wáinkiam ame itiartitia. Jui ti penker yainkiamniaiti.

12 Tura Tíkikiunka Ipisiu péprunam akupkamjai.

13 Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan nuparam papísha tura nekaska penké papí takurtuktia.

14 Arejántruka jirujai takawa nu ti yajauch awajtusuiti. Túrutaitkiuisha ni túramujai métek Yus akikti.

15 Nu amesha péñker wáinkiatá. Ii étstreamun penké nakitiawai.

16 Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak.

17 Tura ii Uuntri Jesukristu ni kakarmarin surus yaintkiamiayi. Nujai uwempratin chichaman ashí nunkanam Israer-shuarcha antukarti tusan etserkamjai. Tura núnisan akupniunmayasha ii Uuntri uwemtikrurmiai.

18 Tura núnisan ashí yajauchia nuyá uwemtikrurmatai Nii akupeana nuí nayaimpiniam jeattajai. Niñki tuke shiir awajnasti. Núnisan atí.

Amikmaamiania nu

19 Piriskanacha ni áishri Akiranacha amikmainiajai. Núnisnak Unisépuru shuarincha amikmainiajai.

20 Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai.

21 Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

22 Ii Uuntri Jesukristu ámijiai tsanin pujustí. Tura Yus ashí péñker waitmakarti.

Nuke atí.

Papru TITIUN papí áatramu

Papru Titiun áatramiania nu

¹ Wikia Pápruitjai Yusa takarniurj. Tura Jesukrístu akatramurjntjai. Yus achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar péñker wekasartatui.

² Tura nú arant, nú shuarsha tuke iwiaaku pujusarat tusan étsereajai. Nú shuarnasha, nunñkan najantsuk, “uwemtikrattajai” Yus tímiayi. Tura Niisha wáitruatniun tujintiawai.

³ Tura yamaikia, tsawant jeamtai, nuna nekaawarat tusa ii Yusrj uwemtikkiartinia nu, winia chichamur ujakarta tusa, winia akatturmiayi.

⁴ Titiu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentrana asa shiir awajtamsati tusan wakerajme. Tura ii Aparj Yussaha, ii Uuntrj Jesukrístusha, Uwemtikkiartin ana nu, enentáimin imiatkincha awajtamsati, tajai.

⁵ Wats, wi iwiarachmajna nu ame iwiarata tusan Kreta nunñkanam ikiukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

Yus-shuaran wáinin

⁶ Yus-shuaran wáinin júnis atí. Niisha makuuchmin ti péñker wekasatí. Tura chikichík nuwentin átiniaiti. Tura ni uchirjsha Yusna ártiniaiti. Tura shuar yajauch chicharsachmin niisha tutupnisan wekain ártiniaiti.

⁷ Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiaua áchatniuiti. Tura ananma kuítrintin ajastaj tusa wakerukchatniuiti.

⁸ Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nunñkanmaya akupeamuncha, núnisan Yús akupeamuncha umirkatniuiti. Tura ninñki ímiastiniaiti.

⁹ Tura nú arantcha, chikich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumia nekas chichaman, nii unuimiátramiania nuyá kanakchatniuiti.

¹⁰ Nekaata. Umichu ti irunui. Niisha ántar chichau ásar ananmau áiniawai. Israer-shuar weenam ti irunui nú shuar.

¹¹ Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurj shuáran, ni írutkamurijjai yajauch enentáimtikianiawai. Tuma asamtai auka, ni wene epetkatniuiti, ántar chichainiakui.

¹² Warí, imia Krétanmaya chichaman etserin juna tíchamka: “Krétanmaya aentska tuke wáittrin áiniawai. Tura nákitiat ti yurumin áiniawai. Yajasma núnisan áiniawai.” Nuna tíchamka.

¹³⁻¹⁴ Maa, niisha nékasan tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurjñ umirkachartí tusam, antsu Yúsan nekas umirkarat tusam, umichu shuar kakaram chicharkarta.

¹⁵ Enentáimprata. Yus-shuarka, ni enentái chamir ajasu ana nuka, ashí ni wainnia nuna péñkernak enentáimtawai. Tura chikich shuar, Yúsan umirkachu asa, ni enentái

wapik asa, péñker ana nuna enentáimtustinian tujintiawai. Achapai enentáimiuk, péñkercha ana nuna “péñkeraiti” tawai.

¹⁶ Tura niisha “Yus-shuaraitjai” tuíniayatan, Yúsan umirtsuk niisháa túruiniawai. Tuma ásar mujjmiaj áiniawai niisha. Umichu ásar péñkeran túratniun penké tujintiainiawai.

2

Péñker jintintiatin

¹ Tura amesha, Titiu, péñker chicham etserkata. Yus-Chicham tátsuna nu etserkaip.

² Antsu áishman katsunt Yusna ainia nu, ju jintintrata. Nampechu, nánkamas enentáimcha, esetas enentáimin arti. Yus tana nuna umirin tura anenain arti. Ni itiurchatrín Yúsan enentáimtusar katsuntin arti.

³ Tura núnismek nuwá katsunt Yusna ainia nusha ju jintintrata. Niisha núnisarañ Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin arti.

⁴ Niisha yama nuatnakua nuna ni áishrín ni uchiríncha nekas aneetniun unuiniarartí.

⁵ Junasha jintintrartí. Esetas enentáimin, péñker wekain ártiniaiti. Ni takatrín péñker takastin áiniawai. Ni áishrín umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkarain tusar túrawartiniaiti. “Tu jintintrarta” titiá.

⁶ Nuyá, Titiu, natsa áinia nu “nánkamsar enentáimsarum wekasairap” titiá.

⁷⁻⁸ Tura amesha, Titiu, ashí tsawant péñker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” tiin tusam, esetsam enentáimsam, Yus-Chicham tana nu ímiatrusmek jintintiata. Nú túrakminkia, Yus-Chichaman nakitiana nu shuar “Titiu nánkamas chichaawai” titiaj tukamá, natsaamak tujinramkattawai.

⁹ Takarin ainia nu, ni takartairín umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá.

¹⁰ “Kasamkairap, tura anañkawairap. Iis, péñker túrakrumka, takarniuitiatrum, shiir tura asarum ii Uwemtikramin Yusrj chichamen shíiraiti, tu enentáimtikrattarme” titiá.

¹¹ Yus in waitnentrama asa ashí áentstin uwemtikramprataj tusa wakerutmaji.

¹² Kame Yus waitnentrama asamtai, tunáa ana nu iniaisatniuitji, nu nékaji. Tura ju nunkanmaya yajauch ana nu wakerukchatniuitji. Tura antsu ju nunkanam pujayatrik esetsar enentáimsar anañma wekatsuk tuke tsawant Yus anear wekasatniuitji.

¹³ Túrar ii Yusrj Jesukrístu, uwemtikramajnia nu, imiá shiir iwiarnar tatí tusar nákastiniaitji.

¹⁴ Jesukrístuka in jarutramkamiaji, ii tunaariniá uwemtikrampratajtsa. Tura, Winia ajasar tuke enentáijiaj péñker túrawarat tusa, ii tunaarín japirtampramiaji.

¹⁵ Titiu, anaikiamu asam arantutsuk nu jintintrata. Yajauch ana nuna túrawarain tusam chicharkarta. Péñkeran túruinia nu ikiakárta. Tura yajauch chichartukarain tusam tuke péñker wekasata.

3

Yus-shuarti túratin

¹ Titiu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. ““Péñkeran túratin ana nuna páchitsuk túratataj” titiniaitrum” titiá.

² “Tsanumprairap, kajernaikiairap, antsu shiir enentáimtunaistarum” titiá. Nañkaamantu enentáimtumatsuk ashí shuar péñker awajsatarum tusam tu jintintrarta.

³ Warí, iisha núnisrik Yus-shuar ajatsuk nánkamsar wekaimji, Yuska umirtsuk. Tura íwianch emetamu pempée wekaimji. Tura ii ayashj wakeramu tuke túruiniuyaji. Tunaasha

túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji.

⁴ Túrasha Yus in uwemtikkiartin ana nu, anenkratin asa, ni anenkrattairin ashí áentsun iniaktus in uwentikrampramijai.

⁵ Yus in waitnentrana asa, iikia júkeshá péñker túrachma aín uwentikrampramijai. ¿Itiurak uwentikrampramijai? Ii tunaarin asakátrampramijai, nijiahtinia áintsan. Tura Yusa Wakanj pujurtamkurin, ii iwiaakmarin yamarman amasmaji.

⁶ Jesukrístu jakamujai Yus in emeenturmatsuk ni Wakanj suramsamijai.

⁷ In anenma asa nuna túramiyai. Nuñkia iisha yamaram awajsamu asar tuke iwiaaku átin, ti wakerimijai nu íniuiti.

⁸ Nuka ti nekasaiti. Tuma asamtai Yúsan umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai.

⁹ Shuar netse áujmatainiakui amēja pachisaip. Tura “aya winia úuntruk péñker áiniawai” tu chichasaip. Tura Israer-shuara akupkamurj iturkit tusa shuar ti áujmatainiakui nusha pachisaip. Ántrai ti nuka. Péñker wekasatniun yayatsui.

¹⁰ Shuar tsanumprur yajauch enentáimtunaimtikiana nu chicharkata. Ántachkuñkia ataksha chicharkata. Tura penké tujinkiamka jjiiki akupkata.

¹¹ Nujai juna nekaamniaitme: nuna tura asa awajiruiti. Tura ni tunaariniñ jakattui.

Papru wakerana nu

¹² Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. Jui Neka-purism yumí nantu asamtai seturan pujuttajai.

¹³ Senas, chichaman ti unuimiaru pujana nu, amikiur Apurusjai jeamtai, nii atsumtsuk shiir weartí tusam, ame túratin jeamna nu yainta.

¹⁴ Iini Yus-shuar ainia nusha péñker túratniun tura atsumainia nunasha yáintinian nekaawartí. Ántar pujusarain tusan nuna tajai.

¹⁵ Ashí wijjai pujuinia nu amikmaatmainiawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

Papru JIRIMIÚNKAN papí áatramu

Papru Jirimiúñkan papin áatramiania nu

¹ Wi Papru ju papin áaran akuptajme ámin, Jirimiunká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame iijjai tsaniñkia takáa asakmin ju papin akuptajme.

² Núnisan ame jeemjin Yus-shuar irunainia nunasha tura ii umaj Apiancha tura Arkipiuncha iijjai ti kakaram takasu asamtai ju papin akuptajrume.

³ Yus ii Apari tura ii Uuntri Jesukrístu shiir enentáimturma ásar yainmakarti imiatkinchanum tuke shiir pujustinian.

Jirimiún penker Yus-shuar ámiayi

⁴⁻⁵ Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúminñkijai.

⁶ Áujeakun chíkich shuarsha ámijjai métek Yúsan nekas enentáimtuiniak ashí penker ana nuna ti paant nekaawarat tusan seajai. Ashí penker ana nuka Jesukrístu shiir awajsamujai takakji.

⁷ Wisha ame anenkratmajai ti shiir enentáimtakun waraajai. Yatsurú, ámijjai ashí Yus-shuarsha shiir enentáimiainiawai.

Papru Unisemun waitnentratiun Jirimiúñkan seamiani nu

⁸ Nu asamtai kakaram tátsujme. Kame wakeraknaka Kristu akatramu asan “Ju túrata” tminiaitjiame.

⁹ Antsu aneakun aya júnisan tájame. Wi Papru úuntach asan tura Krístun takarkun sepunam pujakun

¹⁰ Unisemu waitnentrati tusan seajme. Niisha wi ujakmajai Yus-shuar ajasu asa winia uchirua áintsanñkete. Sepunam pujayatan ni aparíya áintsanak ajasjai.

¹¹ Nuikkia Unisemu ántrauyi antsu yamaikia aminiisha winiisha yáimniuiti.

¹² Ataksha awañtajme. Wi ti penker aneamu asamtai penker itiaata.

¹³ Wi Yus-Chichaman étserkun sepunam pujajai. Túmakun ame yajá pujakun yáintkiatin tujintiakmin nii antsu wijjai pujus yáintkiat tusan wakerimjai.

¹⁴ Túrasha ámin ujatsuk túrachmin enentáimpranjai. Kame ame wakerakun útsukchamujai “pujusti” tákumññkia maak.

¹⁵ Júnissha enentáimpramniati. Unisemu ishichik tsawant menñkakamai tura yamaikia waketki ámijjai tuke pujustatui.

¹⁶ Kame yamaikia emetachma antsu ame aneamu yátsumeá áinis átatui. Nuka ti penkerchakait. Wisha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

¹⁷ Wisha ti penker amikrumchakaitiaj. Tuma asam winia itiaarua nútiksam shiir awayáta.

¹⁸ Yajauch awajtamkaiññkia tura ámijjai tumashitkiuisha wi akiktatjai.

¹⁹ Wi Papru nekas winia uwejrujai juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum.

²⁰ Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikurta.

²¹ Ti penker uminiaitme nuna nékakun júnisan áatjame. Tura wi seajmena nuna nankaamas túrattamna nuna nékajai.

²² Ayu. Átum Yus áujturkurmin Yus winia tsankatrucktatu atumijn iiraitniun. Tuma asamtai wi nuí jean pujustin iwiarturata.

Amikmaamiania nu

²³ Épaprassha niisha Jesukristunu étseruk sepunam wijjai pujus amikmaatmarme.

²⁴ Núnisan Mánkussa Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

²⁵ Ii Untri Jesukristu atumniasha ti shiir yainmakarti.

Nuke atí.

ISRAER-SHUARAN pápí akuptukma

Yus ni Uchiríjaj ni chichamen ujatmakji

¹ Yáunchuka Yúsnan etserniujaj chichas Yus ni enentáimmian ii úuntrin ujakmiayi. Tura untsurí nunkanmasha tura untsurí uwitincha niisháa niisháa chichas ujakmiayi.

² Antsu ju amúamu tsawantaikia ni Uchirí Jesukrístujajin ashí Niiniu ana nuna ujatmakji. Yus Niijaj ashí írúnna nuna najana asa mash Nin súsaiti.

³ Níyaiti Yúsan imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejaj kakarma nujaj ashí írúnna nuna wáiniuk emeta pujurui. Tura ii tunaarín nijiatramak akupin pujutainium, Yusa untsuurini, pujusmiayi.

Nayaimpinmaya suntarjaj Kristu nankaamantuiti

⁴ Yusa Uchirí nayaimpinmaya suntarjaj imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai.

⁵ Wátsek, nayaimpinmaya suntaran chikichkinkesha juna tútsuk Krístun tímiayi: “Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wi ni aparí átatjai, tura Nii winia uchir átatui.”

⁶ Tura jú nunkanam ni Iwiajrin akupeak tímiayi:

“Ashí Yusa suntarí tikishmatrarti.”

⁷ Nayaimpinmaya suntarnan júnis chicharui:

“Nayaimpinmaya suntarin takartursarat tusa nasea áintsan awajsaiti. Ni suntarin chárpia áinis akupeawai.”

⁸ Antsu ni Uchiríniun tímiayi:

“Ame, Yusá, tuke akupniuitme. Ame akuptairmeshia aya péñkeraiti.

⁹ Péñkera nu anenaitme, tura yajauchia nu muíjniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujaj nankaamas uunt awajtamsaiti.”

¹⁰ Nu arantcha tawai:

“Uuntá, yámankamtaik Ame ju nunka najanamiamé. Túram ame uwejmijaj nayaimpisha najanaitme.

¹¹ Nusha mai amuukarmataisha Ame tuke pujuttame. Tarachjaj métek mamurartatui.

¹² Tura ipijram ikiustatme. Pushiya áintsam yapajíattame. Túrasha Ámeka núnismek átatme. Játsuk tuke pujuttame.”

¹³ Ataksha tímiayi:

“Akupin pujutainium, winia untsuuruini, pujusam nákarsatá. Ame nemasrumin nu petkan Ámin umirtamkarti tusan amastatjai.”

Núnisan nayaimpinmaya suntaran penké tíchamiayi.

¹⁴ Antsu Yusa suntarí wakan áiniak ashí shuar uwemprartatna nuna yáinkiarat tusar Yus akupkamu ániawai.

2

Anearta. Uwempratin Chicham nakitrashtiniaiti.

¹ Nuikia Kristu ti uunt asamtai ashí Niiniu antukajnia nujaj kanakchatin ti enentáimtustiniaitji.

² Yaunchu nayaimpinmaya suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi.

³ Antsu ii Uuntri Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakiti-akrikia nuna nankaamas uwemtsuk asutniáttaji.

⁴ Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yús iniakmasmiayi. Núnisaṅ ni Shiir Wakanṅ ni wakerana núnisaṅ niisháa niisháa kakermajaj takamtikeawai. Nujaj Yús-Chichama nu paant nekanamniaiti.

Jesukrístu aents ajasmiania nu

⁵ Ayu. Nuik áujmatkur “jú nunka amuukattawai” taji. Tura yamaram nunkanam nayaimpinmayaṅ suntar akupkachartatui.

⁶ Antsu ii akupkattajnia nu, Yús-Papinium áarmaiti:
“¿Shuarti warimpiaitiaj ame imiá enentáimtitniusha? Kame, ¿shuar warí asamtai pujursat-
taj tamea?”

⁷ Ishichik tsawant nayaimpinmayaṅ suntarjaj péejchach awajsamiame. Túram ti shiir nankaamas uunt awajsattame. Ame najanamun ashí akupkati tusam tsankatkattame.

⁸ Ashí nin umirkarti tusam susattame.” Tu áarmaiti.

Yús “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji.

⁹ Tura wáinjinia nu Krístuítu. Niisha aents ajas ishichik tsawant nayaimpinmayaṅ suntarjaj péejchach ajasmiai. Yús ni shuarṅ ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuiti.

¹⁰ Ashí írúnna nu Yús najanamun ásar ni wakeramun umiktin ainiawai. Tura ashí ni uchirisha ni shíirmarṅ pachiinkiarat tusa wakerawai. Tuma asa Yúska Jesukrístun, nu shuaran Uwemtiknia nuna, ni waitsmujaj nekas Uwemtikkiartin awajsamiayi.

¹¹ Yúsna atí tusa shiir awajsamuncha tura Kristu nin shiir awajea nunasha Yúska mai metek ni Aparínti. Nu asamtai Yusa Uchirṅ nu shuaran “yatsur” títinian natsantatsui.

¹² Yús-Papinium núnisaṅ tawai:
“Ame náarmin winia yatsurun ujakartatjai. Ashí iruntramunam kantampruattajme.”

¹³ Ataksha ni shuarijaj métek enentáimtamun tawai:

“Yúsan ti shiir enentáimtustatjai.”

Tura ataksha:

“Yús surusmia nú uchirjaj Yúsan umirkun pujajaj” tawai.

¹⁴ Tura nu uchi aents ásarmatai núnisaṅ Jesussha aents ajasmiai. Tura aents ajas jaka, iwianchin, jatai nérenniurṅ, ashí emesramiai.

¹⁵ Tura ti untsurṅ shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujaj yamáí ankant ániawai.

¹⁶ Maa, imiá nekasaiti, nayaimpinmayaṅ suntaran yáintaj tusa táchamiayi. Antsu ashí Apraám weean, ashí Yús-shuar ainia nuna yáintajtsa támiayi.

¹⁷ Túratin asa penké métek ni yachía áinis ajasmiai. Nujaj in tuke waitnentrampriam-
naitji. Tuma asa Yúsna pujurniu uuntri ajas Yúsna tuke penker chichartamsamni-
aitji. Núnisaṅ murikiun maa Yús súsatniua áintsanṅ ni jakamujaj ashí shuara tunaarṅ
tsankurniuiti.

¹⁸ Tura imia niniki waitsa asa tura íwianch nekapsamu asa yamaikia iisha wáitiakrincha
tura íwianch nekapramkurnisha yainmakminiaitji.

3

Jesus Muisaisjaisha nankaamantuiti

¹ Tuma asamtai, penker yatsuru, atumniasha Niiniu atí tusa Yús achirmakuitrume. Tuma asarum Kristu Jesus penker enentáimtustarum. Niisha Yús nekas Akatramuyayi. Tura ashí Yús-shuar ajasarua nujaj Yúsna pujurniu uuntria núnisaiti.

² Nu atí tusa Yus anaikiamiayi. Túramtai Kristu nuna ti penker takasuiti. Núnisan Muisais ashí Yusa aentsrín, Israer-shuar armia nuna ti shiir wainkiamiayi.

³ Túrasha Muisaisjají nankaamas Kristu ti shiir awajnasuiti. Jeajají nankaamas jea jeamniuka nekas péñkerchakait. Núnisan Kristu Muisaisjají nankaamas péñkeraiti.

⁴ Kame ashí jean shuar jeamtsuk. Tura Yus ashí írúnna nuna najanaiti.

⁵ Wats. Muisais Israer-shuaran wáiniuk Yusa Jeen takastinia áintsan péñker takarniuyayi. Tura ni takaak ukunam Yus títiatna nuna etserkatniuyayi.

⁶ Túrasha Kristu Yusa Jeen takarniuchu asa antsu Yusa Uchirí asa nuí ashí akupeawai. Nu jeasha iitji. Tura tuke iniaitsuk kakaram ajasar Yus suramsattaj nu wararsar nákastiniatji.

Yusa shuari shiir pujustin

⁷ Nu asamtai, Yusa Shiir Wakaní Yus-Papinium tawai:

“Yamaikia, Yus tana nu ántakrumka

⁸ nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsan nekapsar akajkarmiaayi.

⁹ Túramtai Yus tímiayi “Nuí atumí uuntri nekaprutar akajtukarmiaayi. Kuarenta (40) uwitin wi kakaram túramun ísarsha nakitrurarmiaayi.

¹⁰ Tuma ásarmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiajai.

¹¹ Tura kajerkan nekas takun “Wijjají shiir pujustinian penké tsan̄katkachartatjai” tímiajai” tímiayi Yús.”

Tu áarmaiti.

¹² Anearta, yatsuru. Yajauch enentáimsarum tuke iwiaaku Yus enentáimtutsuk kanakirap.

¹³ Kame kashinkia tunaajají anañnam enentáimin Yúsna nakitrashtapash. Tuma asamtai yamaik tura ashí tsawant ikiakánairatarum.

¹⁴ Yámankamtaik Kristu shiir enentáimtusmaj núnisrik tuke iniaitsuk émeteakrikia Krístujají shiir tsan̄kiar pujustatji.

¹⁵ Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

¹⁶ Muisais Ejiptu nun̄kanmaya j̄iikmia nú shuar Yusa chichamen anturkariat naki-trarmiaayi.

¹⁷ Tura umiiniachkui kuarenta uwí kajerkarmiaayi. Tunaan túrawaru ásar untsurí shuar aents atsamunam kajiñkiarmiaayi.

¹⁸ Kame umirkacharunka Yus “Wijjají shiir pujustinian penké tsan̄katkachartatjai” tímiayi.

¹⁹ Iis, Yúsan enentáimtachu ásar Nijjají shiir pujustinnium wayatniun tujinkiarmiaayi.

4

¹ Nu asamtai, ii wayatin tsan̄katkamu áyatar Yusjají shiir pujustinnium páchitkiachu aij tusar aneartiniatji.

² Yaunchu nu shuaran ujakarmia núnisan incha Uwempratin Chichaman ujatmakuitji. Nu shuar Yúsan enentáimtutsuk antukaru ásarmatai nu chicham yáincharmiaayi.

³ Antsu iikia ni chichame enentáimta asar Yusjají shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijjají shiir pujustinian penké tsan̄katkachartatjai” tímiajai” tímiayi. Kame Yus jú nun̄kan najana umik nuyá shiir pujus ayampramiayi.

⁴ Yus-Chichamnum ayampramun júnis tawai.

“Yus sais tsawant takakmas nuyá tsawantaj̄ ayampramiayi.”

⁵ Tura ataksha tawai:

“Wij̄aj̄ shiir pujustinnium wayá ayamprashtatui.”

⁶ Shuar nūi wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi.

⁷ Nu asamtai ataksha Yus wayat̄in tsawantan áant̄urmaid̄ji. Nusha yamáí tsawantaiti. Wats, Israer-shuar ni nun̄ké Yus susamunam wayáwarmiayi. Tura nuna ukunam Uunt Tawit timiaj̄aj̄ Yus ni chichamen ujatmaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

⁸ Kame ni kapitán̄tr̄i Jusué Israer-shuaran ni nun̄kēen awayá ayamtikraitkiuin̄kia Yus ukunam ataksha tsawantan áant̄urmach̄aj̄ji.

⁹ Nuj̄aj̄ páantaiti, ashí Yus-shuar Yusj̄aj̄ shiir pujusar ayampratin tuke awai.

¹⁰ Yusj̄aj̄ ayampra nu, ni kakarmar̄ij̄aj̄ takastinian ayampraiti Yus ni takatr̄ij̄aj̄ ayampramia núnisan̄.

¹¹ Nu asamtai iisha Yusj̄aj̄ shiir pujustinnium pachiinkiach̄aj̄j̄ tusar Yus shiir enentáimt̄usar kakaram ajastiniait̄ji. Israer-shuar yaunchu Yus taman nakitrarua núnis ajaschatniuit̄ji.

¹² Yusa chichame iwiaaku chichamaiti, imiá kakarmaiti. Puniá mai érea núniniaiti. Tuma asa shuara enentáin̄ in̄it wayá ashí ni enentáimmian tura wakeramur̄in̄ ti paant awaj̄tawai.

¹³ Yus najanamuka pen̄ké Nin umprukchamniaiti. Ashí ír̄unna nu Yus íimmianum misúa áintsan̄ paant áiniawai. Tura ii túramu ashí paant ujakartat̄ji.

Jesus nekas Yúsnan pujurniu úun̄tr̄inti

¹⁴ Jesus Yusa Uchir̄i nekas Yúsnan pujurniu uun̄tr̄i ajas Yusaj̄ wayá iiniun chichartam̄ji. Nu asamtai iniaitsuk tuke nekas enentáimt̄ustiniait̄ji.

¹⁵ Niisha iij̄aj̄ métek ashí tunaanum nekapsamuiti. Túrasha tunaan túrachmiayi. Tuma asa ii tuj̄intiaj̄ nuna paant nékak ii itiurchatr̄in̄ waitnentr̄amniuit̄ji. Tura Yúsnan pujurniu uun̄tr̄i asamtai

¹⁶ Yús-akuptainium shiir enentáij̄aj̄ sapij̄miatsuk jeamniait̄ji. Tura Yus in anenma asa waitnentr̄amak itiurchat pujaj̄nia nūi yainmaktat̄ji.

5

¹ Tura Yúsnan pujurniu úun̄tr̄ikia shuar anaikiamuiti tura ni takatr̄i j̄imiaraiti. Yusaj̄ shuárnan chicharsatniuiti. Nuyasha Yus súniamun súsatniuiti tura núnisan̄ namañken maa Yúsán súsatniuiti shuara tunaar̄in̄ asakátrat̄niun.

² Tura Yúsnan pujurniu uun̄tr̄i niisha shuar asa ni tuj̄intiamun nékak shuar nékachuncha tura waak yuj̄ainia nunasha waitnentr̄amniaiti.

³ Tura niisha tuj̄intia asa ni tunaar̄in̄cha ch̄íkichnaj̄aj̄ métek tsan̄kurnarat namañken maa Yúsán súsatniuiti.

⁴ Shuar ni enentáij̄aj̄in̄kia Yúsnan pujurniu uun̄tr̄i ajaschamniaiti. Antsu Yus nu shuaran anaikiatniuiti. Núnisan̄ Arun̄kan anaikiamiai.

⁵ Núniskete Kr̄ístuj̄aj̄. Niisha ni enentáij̄aj̄ Yúsnan pujurniu uun̄tr̄i ajaschamiayi. Antsu Yus Nin anaik nuj̄aj̄ shiir awajsamiayi. Tura tímiayi:

“Ame winia Uchiruitme. Túmaitkui yamaikia winia kakarmarun átakeaj̄me.”

⁶ Tura ataksha Yus-Papinium j̄únis tawai:

“Mirkisetékka Yúsnan pujurin amia núnismek Amesha tuke Yúsnan pujurin átatme.”

⁷ Kristu j̄ú nun̄kanam pujak kakantar úutuk Yúsán ti seamiai. Nin jákatniunmaya uwemtikramnia asamtai seamiai. Tura Yusa wakeramur̄in̄ tuke enentáij̄aj̄ in̄it enentáim̄takui Yus anturak ti yáin̄miayi.

⁸ Nujai Kristu Yusa Uchirintiat ni wáitsatniujai umirkatniun unuimiarmiayi.

⁹ Nujai ti nekas Uwemtikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsnantikrarminiaiti.

¹⁰ Túramtai Yus Nin Yúsnan pujurniu uuntri Mirkisetékjai métek awajsamiayi.

Anearta. Yusjai kanakchatniuiti.

¹¹ Ju ti nukap áujmatsatin awai. Túrasha ántichu asakrumin mashi ujakchamni-aitjiarme.

¹² Átumka yaunchu mash nekaamaintrume. Túmaitiatrum ataksha yaitiás Yúsnan jintintruat tusarum atsumarme. Warí, kuirchia núniniaitrum. Kátsuram yútsuk muntsu muntsúatniuitrum.

¹³ Kuírchikia Uwempratin Chichaman áujenak péñker unuimiainiatsui. Tin_kiamnumia ásar tujintiainiawai.

¹⁴ Apatuk kátsurman aya uunt yuámniaiti. Uunt ainia nuka péñkernasha tura yajauch-incha apatkar paant nékainiawai.

6

¹ Uunt ajastai. Krístunu ana nuyá aya yúpichuchia nuke enentáimtutsuk nu arantcha unuimiartai. Kame emka unuimiartinia nu ju ániawai: shuar ni tunaarín jákatniunam júana nuna kúntuts enentáimtur Yúsan shiir enentáimtustincha,

² imiantinnium nekaatniuswai:

“Mirkisetékka Yúsnanha, Yus-shuar yainmanum uweje awantsatniussha, jakamunmaya nantaktincha, tura sumamtikiatin tsawanta nu nekaatniussha.

³ Tura Yus yáinmakrin nuna nan_kaamas nekaattaji.

⁴ Shuar Yusna nuna nekaa_nka tura Yus susamun takakku_nka tura Yusa Shiir Wakaní kakarmarín nekapsaitkiun_ka

⁵ tura Yusa chichamencha péñkeraiti nekaa_nka tura Yusa kakarmari ukunam nu_nka yamarmanum takastatna nuna yamá nekapeakka,

⁶ nu shuar nuna nakitiak kanakniaka atak ni tunaarín enentáimtak ikiuktinian wakerachuk tujinkiattawai. Warí, ní enentáijjai Yusa Uchirín krúsnum máiniaiti túrak ashí íimiainiaj natsanmain awajeawai.

⁷ Nu shuar yajauch nu_nka áintsan ániawai. Yumi yútakui péñker nu_nka arakan péñker tsapatmakka arakmaun yayawai. Túramtai Yus shiir enentáimiui.

⁸ Antsu jan_kí nupan tsapatmakka nu nu_nka yajauchiiti. Yus áeseak emesrattawai.

Yus tsan_katramkattajnia nu enentáimtakur kakaram ajaji

⁹ Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péñker túrattarme.

¹⁰ Yus ti péñker asa átum takasmancha tura ni aneakrum Yus-shuar yainmancha kajinmatkishtatui. Tura yamaisha tuke túrarme.

¹¹ Tura nuik túrarmena núnisrumek tuke iniaitsuk kakaram takasrum ashí Yus tsan_katramkatta nu wainkiattarme. Núnisan atí tusar wakeraji.

¹² Nakimtsuk kakaram ajastarum. Niiniua nuna Yus ni shuarín susattawai. Tura shuar Yúsan enentáimtak shiir enentáijjai nákakka nuna wainkiattawai. Tu takastarum tusar wakeraji.

¹³⁻¹⁴ Yus yaunchu Apraámjai chichaak “Ti nekas shiir awajsattajme tura ti nukap pampamtikrattajme” tímiayi. Nuna taku imiá nekas tajai tusa tura chíkich Niijjai nan_kaamas uunt atsakui imia Ni_nki pachiimias tumammiayi.

¹⁵ Tutai Apraám yáitmataik nákas Yus timia nuna wainkiamiayi.

¹⁶ Shuar “nekas tajai Yus írui” táku_nka chíkich niijjai nan_kaamas úuntan páchiawai. Tura tu chichasmatain_kia nuyán_ka imiá nekas tana nu nekaamniaiti.

¹⁷ Tuma asamtai Yuska “ti nekas an yapájítsuk túrattajai” tusa imia Niñki pachiimias tumammiayi. Nujai ni tsankatkamun júkiartatna nu shuar Yus ti nekas umiktatna nuna nékainiawai.

¹⁸ Yus penké wáitruachmin asa áyatik ni tamajai nekasaiti. Nuna arant nuikia imia Niñki pachiimias ti ikiakátmaji in. Nujai iisha uwempratai tusar Niini weamkatikia tsankatramkattajnia nu ti shiir enentáimsar wáinkiatin nákaji.

¹⁹ Nu enentáimsar kakaram ajaji. Yusaiya in umuchtiakamnia penké atsawai. Yusai áchitkia asakrin ti kakaram emettamji.

²⁰ Jesussha emka Yusai wayá mash iwiarturmaji. Tura Mirkiseték amia núnisan Niisha yamá tuke amuukashtinian Yúsnan pujurniu uuntri ajasuiti.

7

Mirkiseték amia núnisan Jesussha Yúsnan pujurniu uuntri ajasuiti

¹ Nu Mirkisetéksha Sarem nunkanam akupniuyayi. Tura ashí nanamas kakaram Yúsnan pujurniuyayi. Apraám chíkich akupniun mesetjai awakak támatai Mirkiseték jiintiuki inkiun ti shiir awájsamiayi.

² Túramtai Apraám nupetmakar kuit jukimiun tias (10) akantuk susamiayi. Mirkisetéka naari tana júka “ti penker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniuri asa “ti shiir imiatkinchanum akupín” tawai.

³ Nukurisha aparisha Yus-Chichamnum atsawai. Núnisan ni uuntrisha atsawai. Ni akiiniamuríncha ni jakamuríncha ujaatsui. Tuma asamtai Yusa Uchiría áintsan tuke inianakchatniun Yúsnan pujurniu uuntri ajasuiti.

⁴ Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi.

⁵ Tuma asamtai Apraám nankaamas úuntaiti. Muisais akupkamujai Riwi weeáka Yúsnan pujurin ániawai. Niisha ashí Israer-shuarjai métek Apraám weeá ániawai. Túmaitiat penké Israer-shuar ni waririn tias akantuk Riwi shuaran suu ármiayi. Muisais tu akupkamiayi.

⁶ Túrasha Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsankatkamuitiat Mirkisetékan niijai uunt asamtai susamiayi. Túram Mirkiseték Apraáman shiir awajsamiai.

⁷ Imiá nekas Mirkiseték Apraáma nankaamas páantin asa Apraáman shiir awajsamiai.

⁸ Israer-shuarti tias akankamun súajnia nú shuar aya aents ásar tuke pujuschamin ániawai. Antsu Mirkiseték jakamun Yus-Chicham penké ujaatsui.

⁹ Yamái Riwi weeá shuar kuit akankamun achiktin ániawai. Túrasha Apraám Mirkisetékan súakui Riwi weeá nujai susa ániawai.

¹⁰ Apraám weeá ániak ni ayashía áinis enentáimtusmin ániawai.

¹¹ Muisais akupkamunam Riwi-shuarnumiá aya Arun weeá shuar Yúsnan pujurin ármiayi. Niisha Muisais akupkamu timia nujai métek penké shuarjai takasarmiayi. Tura Riwi-shuarnumiá Yúsnan pujurniu takatrijiai tunáa nekas asakárminiaitkiuinikia Yúsnan pujurin yamarmak, Arun weechu, anaikiashtin ainti. Túrasha Yus Jesusan, Mirkiseték amia áinis, Yúsnan pujurniun anaikiaiti. Nusha Arun weeachuiti.

¹² Tura Yúsnan pujurin yapajniámtai Muisais akupkamusha yapajniátniuiti.

¹³⁻¹⁴ Nu arantcha, ii Uuntri Jesukristu Riwi-shuarcha antsu Jutá-shuarauyayi. Tura Muisais akupkamujai Jutá-shuarnumiá Yúsnan pujurin atsutniuiti. Antsu nuna takatrin penké túrashtiniuyi. Tuma asamtai nújaisha Muisais akupkamu yapajniátniuiti.

¹⁵ Nú páantcha awajsamniaiti. Wats, Yúsnan pujurin yamma nuka Mirkisetékjai métekte.

16 Niñkia Riwi shuar asa Yúsnan pujurin ajaschamiayi, antsu jákashtin asa nu kakar-majaj Yúsnan pujurin ajasmiayi.

17 Tuma asamtai juna Yus Jesusan áujmatui:

“Mirkisetékka Yúsnan pujurin amia núnismek Amesha iniannatsuk Yúsnan tuke pujurin átatme.”

18 Nujaj yaunchu akupkamu péñkercha ajasmatai japirmaiti.

19 Muisais akupkamuka shuáran péñker awajsachminiuyayi. Antsu Yus in ti shiir awajtamsattajnia nu nákJai. Nujaj Yusaj ti shiir jeeáitji.

20 Nunasha Yus “nekas tajai” tusa Niñki pachimias tumammiai.

21 Riwi-shuarnumia Yúsnan pujurin Yusa naari pachitsuk anaikiamu ármiayi. Antsu jú Yúsnan pujurniunka Yus imia Niñki pachimias anaikiamiayi. Tura Nin júnis tímiayi:

“Uuntka imia Niñki pachimias tiniu asa penké yapajjáshatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

22 Tuma asamtai Jesuska nekas uwentikrattajai tusa yaunchu amia nujaj nankaamas péñker Chichaman iwiarturuiti.

23 Yaunchu Yúsnan pujurin untsurí ármiayi. Chíkich jakamtai chíkich tuke takaarmiai.

24 Antsu Jesus tuke jákashtin asa chikichan ikiurkishtatui.

25 Tuma asa tuke iwiaaku pujak ni shuarin tuke Yúsan áujtusminiaiti. Tuma asa shuar Nin enentáimtusar Yusaj weankarun tuke uwentikramniaiti.

26 Tuma asa Jesus Yúsnan péñker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaariniunmaya kanakniuiti. Tura Yusjaj métek Uunt ajasuiti.

27 Niisha yaunchu Yúsnan pujurniu uuntri armia núnikchaiti. Yaunchua nuka murik-iun máawar ashí tsawant Yúsan suu ármiayi. Nujaj emka ni tunaarin nuyá ashí shuara tunaarin asakátin ármiayi. Tura Jesuska jákatniunam chikichkí surumak ashí shuara tunaarin asakátramiayi.

28 Muisais akupkamuka penké shuarnak tuke péñkercha aijn Yúsnan pujurniu úuntrin anaikiaiti. Tura nu ukunmanka Yus, nekas niñki pachimias, ni Uchirin, tuke péñkera nuna, Yúsnan pujurniu úuntrin anaikiaiti.

8

Nankaamas péñker Chichaman Jesus takartamji

1 Nekas juna tájame: Yúsnan pujurniu uuntri Jesus in ti shiir yainma asa akupin pujutainium Yusa untsuurinj nayaimpiniam pujusuiti.

2 Nekas Yusa Jee nayaimpinma nu aents najanachma antsu Yus najanamuiti. Nui Jesus Yúsnan pujurui.

3 Ashí Yúsnan pujurniu uuntri ainia nu, shuar Yúsnan susamuncha tura naman maar Yus sútaincha Yúsan ashí súsatin áiniawai. Núnisan Jesukrístusha Yúsan súsatniuiti.

4 Juyá Yúsnan pujurin Muisais timia nuna Yúsan yamaisha susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai.

5 Yus yaunchu Muisaisan nayaimpiniam írrunna nuna iniaktus tímiayi “Ame wáinkiamna nujaj métek ashí najanata.” Túramu asamtai ashí yaunchu Yúsnan pujurin Muisais najanamujaj takainia nu aya nayaimpiniam ana nuna nakumkamujaj takainiawai.

6 Antsu Jesus ti nekasa nujaj nayaimpiniam takaawai. Muisais akupkamuka shuáran péñker awajsachminiaiti. Antsu Yus in ti péñker awajtamsattaji. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti péñker áiniawai. Tuma asamtai nankaamas péñker Chichaman Jesus takartamji.

7 Kame Emka Chicham, Yus Muisaisjaj yaunchu najanamia nu, nekas péñkeraitkiuinikia Yamaram Chichaman najanachaayi.

8 Antsu péñkercha ániakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjaj Yamaram Chichaman najanattajai.

⁹ Yaunchu ju shuara uuntrin Ejiptunmaya yaruakmiaj nu Emka Chichaman najanam-jai. Tura Yamaram Chichaman najanattaj nu núnischa átatui. Emka nuna uminiachkui ajapan iniaisarmajai.” Núnis tawai Uunt Yus.

¹⁰ Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrartatjai. Nuyá ni Yusri ártatjai tura niisha Wíi shuar ártatui.

¹¹ Nuisha Yúsan nekaat tusa jintinnaiyachartatui. Kame ni aisha ni yachisha kame ashí shuar, uchisha uuntcha, ashí nekarawartatui.

¹² Tura ashí ni tunaaríncha tsankuraran ni yajauchirín atak penké enentáimtuschartatjai” tímiayi.” Tu áarmaiti.

¹³ Wats, Emka Chicham yajauch ajakui Yus Yamaram Chichaman nájaneak pujurui. Tura yajauch ajasua nuka wárik ajapnattawai.

9

Yusa Jee nayaimpinmasha tura ju nunkanmasha

¹ Ayu. Yus shiir awajsatniuka Emka Chicham timia nujaj métek túratniuyayi. Tura ju nunkanmaya Yusa Jee weriar Yús shiir awajsatniuyayi.

² Nu Jee sha júnis tesakmauyayi. Nékatka Shiir Tesaamu tutainti. Nu asutin ekeemakar tsáapín awajtaisha tura misasha Yus iniaktusma tantajaj pujuyayi.

³ Nuyá-tesaamuka Imiá Shiir Tesaamu tutainti.

⁴ Nu kunkuin ekeemataisha kurijaj kuerma tura Chicham Aarma Chumpitiaisha pujuyayi. Nusha ashí kurijaj kuérmauyayi. Tura init kurijaj najanamu ichinkian maná yurumak enkemniuyayi. Nuyá Yúsnan pujurniu uuntri Arunka ushukrutairi yaunchu tsapaak janukukmia nusha enkemniuyayi. Nuyá Yus najanamu Chicham Muisais kayanam aarmasha enkemniuyayi.

⁵ Nuna úkurin Kirupín, nayaimpinmaya suntara nu, kurijaj nakumkamu wajarmiayi. Nusha Yusa shiir marín nakumkarmiayi. Tura ni nanapéjaj shuara tunaarín ayamprutain nukúakuyayi. Nuna arantka yamá etserkatin atsumatsji.

⁶ Núnis aa asamtai Shiir Tesaamunam ashí Yúsnan pujurin tuke wáiniak Yúsnan takasarmiayi.

⁷ Tura Imiá Shiir Tesaamunmanka aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaarisha tura ashí shuara tunaari tsankurnarat tusa Yus súsatniu namanke numpen juu ámiayi.

⁸ Yusa Wakaní núnis atí tusa nuna mash iwiaramiayi. Tura asa juna paant awajtur-maji. Jú nunkanmaya Yusa Jee pujakui tura aya nuin Yus shiir awajsamniatkiuinikia nekas Imiá Shiira nu Yus pujamunam wayatin tuke iturchat ainti.

⁹ Nusha yamá pujuiniaj nuna enentáimtikrampratniuitji. Shuar Yus shiir enentáimtikratniun namanken maa suíniaksha nu shuar ni tunaarijaj tuke itit enentáimtumainiawai.

¹⁰ Warí, aya yurumátniusha umartincha nijartintcha tura ashí núnisan túratniujaj aya pátatek asamtai enentáiniam ana nuna iwiarachmin áiniawai. Antsu Yus nú túratniunka yapajiatniuyayi. Tuma asamtai yapajniátsain túratin áiniawai.

¹¹ Tura yamaikia Kristu táwiti tura Yúsnan pujurniu uuntri ajas Yamaram Chicham-num Yus ti penkeran túrutmatniua nuna pujurturmaji. Niisha ti shiir Yus Jee aents najanachmanum takaawai. Nu Jee ju nunkanmayanchuiti.

¹² Tura Kristu Imiá Shiir Tesaamunam namanke numpéjaj wayachuiti antsu ni numpejaink' wayaiti. Tura aya chikichki wayá ii tunaarín asakturmar tuke uwentikrampramijai.

¹³ Nekas namanke numpesha tura aisamu yunkunmirisha tunaa shuarnum patatek ukatkamu aya patatek shiir awajsamniuyi.

¹⁴ Turasha Kristu numpé ii tunaarin penké asakaruityi. Turamtai yamaikia tunaa jakatniunam juana nujai itit enentaimtumatsuk nekas iwaaku Yus shiir umirkamniaitji. Kristu penké tunaarinya asa tuke jakashtin Wakaní kakarmarijiai jakatniunam Yusai surumakmiayi.

¹⁵ Nu asantai Jesukristu Yamaram Chichaman shiir takarniuiti. Yaunchu Chichamjai tunaa nekas tsankurachma asantai Kristu jaka nu tunaan cha tsankurarmiayi. Nujai ashí Yus-shuarty Yus achikma asar Yus tsankatramajnia nu wainkiar tuke wararsattaji.

¹⁶⁻¹⁷ Shuar ni kuitrin akantrattak chichaman najanatniuiti. Tura jaatsain nu kuit akantrastiniaiti. Aya nii jakamtai nu chicham najanamum uminkiatniuiti.

¹⁸ Nu asantai Emka Chicham Muisaisjai najanamusha maamu numpé ukatramujai akupkamuyayi. Nujaisha naman maatniuyayi.

¹⁹ Muisais nu akupkamun ashí shuáran ujakarmiayi. Nuyá ure kapaakujai tura nupajaisa namanke numpé entsajai pachimpramujai ayak akupkamu papincha ashí shuarnasha ukatkarmiayi.

²⁰ Tura tiarmiayi "Ju numpajai "Chicham Yus akupturmarmena nu nekas umiktiniaiti" tawai."

²¹ Nuyá nu numpajai Yusa Jeencha ashí nu takastin irunmia nunasha ukatkarmiayi.

²² Nu akupkamujai penké ishichik numpajainchu shiir awajsamniaiti. Turasha numpajainchu tunaa penké asakarchamniaiti.

Kristu jakamujai tunaa asakarminiaiti

²³ Tuma asantai Muisais najanamum nayaimpiniam ana nuna aya nakumkamu ásar namanke numpejai shiir awajsamum ármiai. Antsu nayaimpiniam nekas írunna nu, nankaamas kakaram numpajai shiir awajsatin ániawai.

²⁴ Kristuka yaunchu Yusa Jeen aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmaji.

²⁵ Yaunchu Yúsnan pujurniu uuntri ni numpejainchu ashí uwitin Imiá Shiir Tesaamunam wain ármiai. Tura Kristuka untsurí wayachuiti.

²⁶ Kame untsurí wayatniuitkiuinikia ni numpejaink' wayá asa yamankamtaiknumia untsurí jakaayi. Antsu yamaikia ju nunka amúamunam Kristu chikichki jakatniunam surumak tunaan ashí asakaruityi.

²⁷ Ashí shuar chikichki jakar nuyá ni turamun Yusai nekatniun nantaktin ániawai.

²⁸ Núnisan Kristu chikichki jakatniunam surumak shuara tunaarin asakaruityi. Tura atakka tunaan asakartinian wantinkiashtatui. Antsu ni tátinrin nákania nuna uwentikkratsa wantinkiattawai.

10

¹ Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin naman maar Yus sútajiaisha shuara tunaarin asakatrachminiaiti.

² Kame asakatraka shuar nekas shiir awajsamniaitkiuinikia Yus naman maar súsatniun atsumachuk iniaisaraayi. Iis, mash tsankuramuitkiunika ni tunaarijiai itit enentaimtumascharainti. Turawar naman maar Yus súsatniun iniaisarainti.

³ Antsu namanken maar ashí uwitin tuke suiniak nujai ni tunaarin tuke enentaimtuiniawai.

⁴ Warí, namanke numpejai ii tunaari penké asakarchamniaiti.

⁵ Nu asantai Kristu jú nunkanam taa Yúsan chicharuk tímiayi:

"Naman maar sútai sha penké nakitráme. Antsu ayash iwiam surusuitme.

⁶ Naman áesamusha tura tunaan asakartin naman susamusha wakeratsme.

⁷ Tuma asamtai “Yusrú, tímiakai. Winia áatrurma núnisnak ame wakeramurmin umiktajt-san táwitjai” tímiakai” tímiayi.

⁸ Emka, Muisais akupkamu aïn, namañ susamuncha, tunaan asakarat tusa namañ maar susamuncha, namañ áesamuncha Yus ashí nakitraitit tawai Kristu.

⁹ Nuyá “Yusrú, ame wakeramurmin umiktajt-san táwitjai” tawai. Nuna taku namañ maar sútain “Asakáiniaiti” tawai. Tura chikichan ikiuawai.

¹⁰ Jesukristu Yúsan umiruk jákatniun chikichkí surumakmatai Yus in tunaaríncha shiir awajtamsaitji.

¹¹ Tura Israer-shuarnumiá Yúsnan pujurin ashí tsawantai nú namañnak máawar tunaan asakáchunak Yúsan ti suu áiniawai.

¹² Antsu Jesukristuka jákatniunam chikichkí surumak ashí shuara tunaarín asakár atakka penké jákashtiniaiti. Nuna tura Yusa untsuuriní nekas akupin pujutainium pujusuiti.

¹³ Tura Yus ni nemasrín nupetak nin umirkarti tusa súsartatna nuna nákwai.

¹⁴ Chikichkí jakamujai ni shuarín tuke tunaaríncha awajsaruiti.

¹⁵ Yusa Wakanísha núnisañ tawai. Emka tímiayi:

¹⁶ “Yamaram Chichaman najanattaj nuka júnisañ átatui: Wi akupeaj nuna ni enentáin paant enentáimtikrartatjai.”

¹⁷ Nuyásha tawai: “Ni yajauch tunáa túramurín penké enentáimtuschatatjai.”

¹⁸ Tuma asamtai, ii tunaari tsañkuramu asamtai atak in jarutramkatin atsumatsji.

Yus tuke shiir enentáimtusar Yusai jeartai

¹⁹ Tuma asamtai, yatsurú, Jesukristu numpejai péñker awajsamu asar sapijmiatsuk shiir enentáijiai Imiá Shiira nui, nekas Yus pujamunam wayamniaitji.

²⁰ Nui wayatniuka Kristu jaka Yusa Jeen tesaamun júsatniua áintsañ ánturmamiaji. Yamaisha tura tuke wayamnia átatui.

²¹ Jesus Yúsnan pujurniu uuntri asa ashí Yus-shuartin wáitmak pujurtamji.

²² Tuma asamtai, tuke enentáijiai Yus imiá nekas enentáimtusar Yusai jeartai. Ii enentái Kristu numpejai niijarma asamtai nekas enentáimtakur ii tunaarijai itit enentáimtusachatniuitji. Tura ii ayashísha péñker entsajai imianniuitji.

²³ Yus tsañkatramkattajnia nu shiir enentáimtamú iniaitsuk kakaram ajarar tuke emetatniuitji. Yus tsañkatramkaitji nuna umiktatui.

²⁴ Péñker anenain tura péñker túrin ajasartai tusar mai yainiaikiartiniaitji.

²⁵ Yusa Jeen Yus-shuarjai tuke iruntratin iniaishatiniaitji. Chikich iniainiakuiisha iikia tuke iruntratniuitji. Nui irunkurkia ikiakánairtiniaitji. Tura Kristu tátin tsawantri ishichik ajasu asamtai nú nukap túratniuitji.

Anearta. Ti tsúumainti iwiaaku Yusa kakarmarijai asutniátin.

²⁶ Túrasha shuar nekas chichaman nékayat wakeramurijjain tunaanum wekaakka Kristu jakamun nakitia asamtai chikich atsawai ni tunaarín asakátratniun.

²⁷ Áyatik ashamak ti tsuumai sumamatin tsawantan nákasminiaiti. Nu tsawantai Yus ni nemasrín ti kajerak asutíak mash emesrattawai.

²⁸ Shuar Muisais akupkamun umikchamtai tura jímiar shuar menaintiusha etserkarmatai waitnentsuk máatniuyayi.

²⁹ Núnisaitkiuiníka shuar Yusa Uchirín wishikiainiakka ni numpencha nakitiainiakka tura Yus nin anea nuna Wakaníncha katsekainiakka nuna nankaamas asutniáchartatuak. Warí, nii nakitiana nu numpajai Yamaram Chicham nekas umirkatin awajsamuyayi. Tura nújajisha nii ti péñker awajnastiniuyayi.

³⁰ Ii Uuntri Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wí shuara tunaarín ti paant nekarattajai.”

³¹ Ti tsúumainti iwiaaku Yusa kakarmarijai asutniátin.

³² Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiurchat katsuntramarme.

³³ Chíkichtirmeka katseknakmarme tura ashí íimiainiamunam yajauch awajnasmarme. Chikichcha nu shuarum pachitkia asarum itit awajnasmarme.

³⁴ Atumsha sepunam pujuinia nusha waitnentramarme. Tura shiir warasrum kuítrumin atantramainiakuisa katsuntramarme. Nayaimpiniam tuke amuukashtin kuit pachiktin asarum túramarme.

³⁵ Tuma asarum yawetsuk Yus tuke enentáimtusrum kakaram ajastarum. Túrakrum nankaamas akinkiattarme.

³⁶ Atumsha esetra enentáimsarum Yus wakera nu túrakrum Yus atumin amastinia nu wainkiattarme.

³⁷ Kame Yus-Chichamnum áarmaiti:
“Tátinia nu ishichik ajasai. Wárik tátatui.

³⁸ Shuar Yúsan nekas enentáimtak péñker wekaak uwemprattawai. Tura iniaiyakuñkia nin wararsashtatjai.”

³⁹ Tura iikia iniaisar mesena nú shuarchaitji. Antsu Yus shiir enentáimtusar uwempraitji.

11

Yus nekas enentáimtustin

¹ Yus nekas enentáimtakur “nákajnia nuna, Yus nekas suramsattaji” taji. Tura wáinchaitiatar “nekas wainkiattaji” taji.

² Yaunchu ii uuntri Yúsan nekas enentáimtuiniakui Yus “péñkeraitme” tiarmiayi.

³ Aya Yus enentáimtakur ju nékaji: Yus aya ni chichamejaiñ ashí nunkan najanamiayi. Túramtai ashí wáiniainiaj nu wáinchataijjai najanamu áiniawai.

⁴ Apir Yúsan nekas enentáimtak Kaínjai nankaamas péñkera nuna Yúsan susamiayi. Túramtai Yus “péñkeraitme” taku shiir yuminsamiayi. Tuma asamtai Apir jákaitiat tuke enentáimtikramji.

⁵ Euksha Yúsan nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Euk júnatsuk Yúsan ti shiir enentáimtikniuyayi” tawai.

⁶ Tura Yus nekas enentáimtachkumka çitiurak Nii shiir enentáimtiksatham? Nekas enentáimjai Yúsan weantuktaj tusam wakerakmekka, emka, Yus iwiaaku pujawai, tu enentáimpratniuitme. Nuyásha, Wi Yúsan eakuñkia Yuska winia yáintkiattawai, tu enentáimsatniuitme.

⁷ Yus, ‘amaarkatniun akupkattajai’ tiniu asamtai, Nuasha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajai métek uunt kanun najana ni shuarincha uwemtikramiayi. Tura Yúsan nekas enentáimta asamtai Yus “péñkeraitme” tímiayi. Tura ni umirkamujai chíkich shuar Yúsan enentáimtachun súmamtikiawarmiayi.

⁸ Tura Apraámsha Yúsan nekas enentáimtak Yus “núñkem ikiukim wetá” tutai shiir umikmiayi. Yus tuke nin súsatniua nú nunkanam wémiayi. Turasha ni nunken ikiuak ni jeatniun nékatsuk jiinkimiayi.

⁹ Yúsan shiir enentáimtak nú nunkanam Yus nin tsankatkamuitiat írara áinis pujusmiayi. Nuap jeanam pujuyayi. Núnisan ni uchirí Isaksha tura ni tirankí Jakupsha nuñ tsankatkamuitiatan írara núnisar pujuarmiayi.

¹⁰ Kame Apraámka nayaimpinmaya ashirchamin péprunam pujustinian nákasmiayi. Yus nu pepru péñker iwiar jeamka asamtai umuchkiachminiaiti.

¹¹ Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi.

12 Tura nujaj Apraám ti úuntchitiat ti pampanmiayi. Nii chikichkitiat ni pampanmari ti untsurj ajasar yaajaj métek tura náikmijjaj métek nekapmarchamnia ajasarmiayi.

13 Ashí nu shuar Yus tsankatkamun wáintsuk jákarmiayi. Túrasha Yúsan nekas enentáimtuiniak arantiq wáinkiar warasar shiir enentáimtiarmiayi. Túrawar “ju nunkanam nekas aya íraraitji” tiarmiayi.

14 ‘Íraraitji’ tu chichainiak chíkich nunka eamun páant awajainiawai.

15 Niisha matsatu winíarmia nuj atak waketkitniun wakeruiniakka páchitsuk waketkiaraayi.

16 Tura antsu niisha nuna nankaamas péñker nunkan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ni Yusrintjai” títinian natsantatsui.

17 Ataksha Apraám Yúsan nekas enentáimtak “chikichik uchi amasmaj nu, namankea áitkiasmek maam surusta” takui Apraám Isakan ni uchirín Yus susatniun penké suritki-achmiayi.

18 Kame Yus “Isakjaj ti pampanatme” tau asamtai

19 Apraám “máamtaisha Yus iniantkittiawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsan wáinkiamiayi.

20 Isaksha Yúsan nekas enentáimtak ni uchirín Jakupnasha Esauncha ukunam ni túrunattana nuna ujakarmiayi.

21 Núnisan Jakup Yúsan nekas enentáimtak jatsuk ni tiranqin, Jusé uchirín, shiir túrunattana nuna ujakarmiayi. Tura ti uuntach asa máshtunqrín ushukruma Yúsan shiir awajsamiayi.

22 Tura Jusesha jákatniurj ishichik ajatesmatai Yúsan nekas enentáimtak Yus ukunam Israer-shuaran Ejiptu nunkanmaya júkiartatna nuna ujakarmiayi. Tura jíiniainiak ni ukunchin júkiar Yus tsankatkamu nunkanam iwiarsarat tusa akupkamiayi.

23 Muisaisa aparisha nukurisha Yúsan nekas enentáimtuiniak Muisais ti shíirmach asamtai suntar máawarain tusa akiiniamunmaya menaintiu nantu úukarmiayi. Tura uunt akupin akupkamun ashamkacharmiayi.

24 Muisaissha Yúsan shiir enentáimtak uunt ajas Ejiptunmaya uunt akupniu nawantrí uchirj ajastinian nakitramiayi.

25 Antsu Ejiptu nunkanam ishichkisha tunaan warartsuk Yusa shuarijjaj métek wáitsatniun nankaamas wakerukmiayi.

26 Nujaj Krístun yajauch awajsarmia núnisan niisha wáitsatniuuuyi. Túrasha ashí Ejiptu nunkanam péñker irunmia nuna nankaamas Yus nin ukunam tsankatkatta nuna shiir enentáimtusmiayi.

27 Niisha Yúsan shiir enentáimtak uunt akupin kajeramu ainq ashamtsuk Ejiptu nunkanmaya jíinki wémiayi. Yúsan wáinchiat shiir enentáimtamujaj wainiua áinis kakaram ajas ashí katsuntramiayi.

28 Muisais Yúsan shiir enentáimtak yámankamtaik paskua namperan najaneak ashí Israer-shuaran numpajaj ni wáitirín kuérat tusa akupkarmiayi. Nujaj Yus timia núnisan nayaimpinmaya suntar nuna iis nu jeanam iwiairín máatsuk nankaikit tusa tímiayi.

29 Israer-shuarsha Yúsan shiir enentáimtuinia ásar Kapaantin Entsa nakaakamtai ajapén ti penker kukarnum katiñkiarmiayi. Ejiptunmaya suntarsha núnisan katiñtai tukamá jakerarmiayi.

30 Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish sánakmiayi. Nujaj ti yúpichuch nupetkarmiayi.

31 Raapsha nu péprunam pujak, Yúsan nekas enentáimtak tsanirmataj áyat Israera suntarín mamikmak wekaan ti penker itiáa asa chíkich shuar Jerikiúnam matsatua nujaj jákachmiayi.

³² Nu arantcha Yúsan shiir enentáimtin ti írunui. Jeteúnsha, Paraksha, Saṅsunsha, Jiptísha, Tawitcha, Samuersha, Yúsnan etserniusha nu shuar ármiai. Mash ujaktinian jeatsjai.

³³ Niisha ashí Yúsan nekas enentáimtuinia ásar Yusa kakarmarín niisháa niisháa iniak-tusarmiai. Nuna túruiniak chíkich chíkich nuṅkanmaya aentsun nupetkarmiai, nuṅsha péṅker akupkarmiai, tura Yussha ni timia núnisaṅ yaṅkiarmiai. Uunt yawancha kajeche awajarmiai,

³⁴ uunt jiniasha ikiajniakarmiai, puniajai mantamnatniuncha uwemprarmiai. Kakarmachusha kakaram ajarar mesetnumsha ni nemasríncha nupetkarmiai.

³⁵ Nuwasha ni uchirí jakan iniantkimiun wáinkarmiai.

Chikichcha wáitias mantamnewarmiai. Ti shiir pujustinnium nantaktiai tusar nú tsawantai uwempratniun nakitrarmiai.

³⁶ Chikichcha katseknakarmiai, asutniáwarmiai, jirujai jin̄kiawar sepunam en̄kenawarmiai.

³⁷ Kayajai tukú mantamnewarmiai, jímiapetek tsupinkarmiai, Yúsan iniaisarar tusa nekapnasarmiai, puniajai mantamnewarmiai. Aya wékainiarmiai, kuítríncha ásar nuapen entsararmiai, shuar nincha áintrar wáitnenmai awajarmiai.

³⁸ Atsamunmasha, naincha, waṅmasha, ashí nuṅkanam wekain ármiai. Nu shuarjain̄kia ju nuṅkanmaya shuar imiá yajauch ásar niijjai pujumainchu ániawai.

³⁹ Nu shuar Yúsan shiir enentáimtuiniakui Yus “péṅkeraitrume” tiarmiai. Túmaitiat ni tsan̄katkamun wáinkiacharmiai.

⁴⁰ Yuska nuna naṅkaamas péṅkeran iwiarturaru asa tura in yamá pujajnia juna enentáimturma asa niisha iisha mai metek tsan̄kiar ti péṅker ajararti tu enentáimsamiai.

12

Jesus tuke enentáimtusar tsékeṅtiai

¹ Ashí ju nuṅkanam túrajnia nuka shuar nakuruiniak tsékena nujai nakumkamniati. Ashí shuar yaunchu Yúsan shiir enentáimtusaruka téntakar írmainiaji. Tuma asamtai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tsékenkir jeatai.

² Túmakur Jesus tuke enentáimtusar tsékeṅtiai. Ashí shuarjai naṅkaamas Jesus Yúsan ti nekas enentáimtak aya péṅkernak túramiai. Tuke nekas awakmakmiayi. Imiá tunáa shuáran krusnum máatin aṅnú núnisaṅ natsanmainium jákatniun surimiakchamiai. Antsu ukunam ti shiir warastin átatna nuna enentáimtak nuna ashí katsuntramiai tura nuyá Yusa untsuurin̄i akupin pujutainium pujusuiti.

³ Tunáa shuar Jesusan wáitkiasarmia nu enentáimpratarum. Túrarum pimpitsuk katsuntratarum.

⁴ Átum tunaajai máaniakrum Jesus túramia áintsarum numpemsha puárchaitrume tura jákachuitrume. Nuṅsha katsuntrarum jeatniuitrume.

⁵⁻⁶ Yus nekas ni uchirín chicharkatniua áinis túramprum nu kajinmatkichmashuram. Júnis tawai:

“Uchirú, wi jintinramajmena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintintiawai. Tura ni uchirí ajasat tusa achána nuna asutiawai.”

⁷ Tuma asamtai Yus ni uchiría áinis asutiámkuisha katsuntratarum. Warí, ashí apa ni uchirín chicharkashtatuak.

⁸ Tura ashí uchin chicharkatniua núnis Yus atumin chichartamchakrumniṅkia nekas ni uchirínchuitrume. Antsu chikichnaitrume.

⁹ Nu arantcha ii aparī uchich árinī chichartamkurin umirniuyaji. Nu arant nuikia nekas ii Aparī nayaimpiniam pujana nu shiir umirkar tuke shiir pujustin wakerish-tatjik.

¹⁰ Ii aparī ishichik ni enentáijjaj wakeramu chichartamniuyaji. Antsu Yuska ti penker awajtamsataj tusa nekas atsumajnia nujaj métek chichartamji.

¹¹ Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujaj unuimij nuka péñker túratniun tura shiir pujustinian yáinmaji.

Anearta. Yus tana nu nekas antuktiniaiti.

¹² Nujaj pimpirarusha tura kakarmachu ainia nusha ikiakártarum.

¹³ Túrarum péñker esettsa enentáimsarum wekasatarum. Túrarum tujintiainia nusha shiir wekasatin yañtarum.

¹⁴ Ashí péñker túrakrum ashí shuarjaj nawamnaikiarum péñker wekasatarum. Tunaan túrinkia Yusaj penké jeashtatui.

¹⁵ Aneartarum. Shuar nakitiakuñkia Yus nu shuáran shiir yáñtinian tujinkiattawai. Nu shuar yajauch enentáimiuk chíkich shuárnasha itit awajas tunaanum útsukartatui.

¹⁶ Tsanirmawairap.

Yusna nusha nakitrairap. Isaka uchirī Esau péñkera nuna nakitramiayi. Yus “iwiairīn núkap súsatniuiti” timia nuna enentáimtuschiayi. Tura asa aya ishichik yurumkajaj yapajíamiayi.

¹⁷ Tura nuyá ni aparī ukunam túrunattana nuna takui Esau ti penkeran wakerimiayi. Tura ti útkuisha ni aparī nin nakitramiayi tura ni chichasman yapajíatniun tujinkiami-ayi.

¹⁸ Atumjajñkia Yusna enentáimtusminia nuka yaunchu Israer-shuarjaj ashammain amia núnischaiti. Yáunchuka Yus ni akupkamurīn Israer-shuaran súakui Senai muranam jeeármiai. Muranam uunt jisha kiritniusha teesha nasesha ajamiayi.

¹⁹ Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi.

²⁰ Kame Yus chichaak “Shuarsha tan_kusha ishichkisha nú muranam najarmatai nuka kayajaj tukurar tura nan_kijjajsha máatniuiti” tímiayi. Nu akupkamu ti ashammai asamtai “chichaschati” tiarmiayi.

²¹ Wáinkiarminia nu ti tsuunmai asamtai imia Muisaissha “Ashamakun kuraajaj” tímiayi.

²² Antsu atumjajñkia Yusna enentáimtustin nujaj nan_kaamas péñkeraiti. Átumka nayaimpinmaya Seun náinnium, Jerusarén iwiaaku Yus pujutai péprun nakumeana nu jeeáitrum. Nuisha ti untsurī nayaimpinmaya suntarsha

²³ ashí Yus-shuarsha shiir iruntrarū ániawai. Yus-shuarka ashí nayaimpiniam ni naari anujtukma ásar ni uchirī ániawai. Nuisha Yus, ashí shuaran ti nékana nu, pujawai. Niisha shuáran ti penker awajsamtai nu shuar jákar ni wakaní nu shiir pujuiniawai.

²⁴ Nuisha Yamaram Chichaman in takartamajnia nu, Jesus, pujawai. Nuna numpe ukatramujaj ashí shiir awajsaiti. Nu numpasha Apira numpejaj nan_kaamas péñkeraiti. Kame Apir ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran péñker awajsartaj tusa jakamiayi.

²⁵ Nuka ti penker asamtai Yus chichartamprumna nu nekas anturkatniuitrum. Yaunchu Yus jú nunkanam murá chichaamun anturkachar asutniátniunam uwem-pracharmiayi. Nuikia Yus nayaimpinmaya chichartamkurin ántachkurkia ishichkisha uwemprashtatji.

²⁶ Yaunchu Yus chichamejaj nunkan úrmamtikiarmiayi. Tura yamaisha tawai “Ataksha aya núnkankechu antsu nayaimpinmasha úrmamtikiattajaj.”

²⁷ “Ataksha” tana nujaj “ashí muchitrámnia nu amuukartatui” tawai. Tura muchitra-chminia nu juakartatui.

²⁸ Yus in akupkatniun tsankatramaj nuka umuchnakchattawai. Tuma asamtai Yus yuminsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji.

²⁹ Maa, ii Yúsriṅkia kajerkāṅka uunt jía nuke áesaa mash emesramniaiti.

13

Yus shiir enentáimtiksatin

¹ Nuamtak yachḡa núnisrum tuke mai anenai ajatarum.

² Tuke írar shiir itiaatarum. Nuna túruiniak shuar nékachminiak nayaimpinmaya suntaran itiaawaruiti.

³ Sepunam pujuinia nusha atumsha niijjaj pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

⁴ Nuatnaikiatin péṅkeraiti. Shuar ni nuwejaj tsaniṅ pujustin péṅkeraiti. Tura nuatkamu ainia nusha chikichan eakchatniuiti. Tsanirmanana núnaka Yus asutiáttawai.

⁵ Aya kuítiak enentáimtusam pujusaip. Yuska “Kanakchattajai tura penké ikiukchattajme” túramui. Tuma asamtai ame takakmena nujaj shiir enentáimsam “maakete” titiá.

⁶ Tiniu asamtai arantutsuk ju tíminiaitji: “Winia yainnia nuka Uunt Yúsaiti. Nu asamtai shuar túrutamnia nuna ashamkashtatjai.”

⁷ Atumin Yus-Chichaman jintinramawarmia nu enentáimtustarum. Yúsan shiir enentáimtuiniak péṅker wekasarmia núnisrumek atumsha túratarum.

⁸ Jesukrístuka tuke yapajítsuk nuikiya núnisaṅ yamaisha tura ukunmasha tuke núnisaṅ átatui.

⁹ Chíkich chicham niisháa írunna nu anturkairap. Yus in anenma asakrin kakaram ajasartai. Shuar niisháa yurumkajaj enentáiruḡ kakaram ajastaj táyat penké yáinḡchaiti. Yurumeaj nújainchu antsu Yusa anenkrattairijjaj ii enentáin kakaram ajasminiaitji.

¹⁰ Yáunchu Yúsnan pujurin namaṅ maar Yus susamunmayan yuu ármiayi. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnan pujurin nuḡ pachiinkiachmin áiniawai.

¹¹ Israer-shuarnumiá Yúsnan pujurniu uuntri tunaan asakártaj tusa namaṅké numpen júkiar Imiá Shiir Tesaamunam wain ármiayi. Tura nu namaṅ arant áesatniuyayi.

¹² Núnisaṅ Jesussha péprunam arant wáitkianas mantamnamiayi. Nujaj ashí shuara tunaarin ni numpejaj nijiatkaiti.

¹³ Núnisrik iisha péprunmaya arant wétinia núnisrik Jesusaj weri Nijjaj métek wishikmain katsuntutai.

¹⁴ Kame ju nunḡkanam amuukachmin pepru atsawai. Antsu ukunam ti shiir pepru átatna nu nákaḡ.

¹⁵ Tuma asar namaṅ maar Yus sútsuk antsu shiir chicham súakur tuke Yus shiir yúminkiaḡ. Tuke núnisar túratai.

¹⁶ Péṅker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

¹⁷ Yus-shuaran akupin ainia nu umirkarum shiir enentáimtikratarum. Ni takatrḡn Yúsan ujaktin ásar atumí wakanḡn shiir wainiainiawai. Niisha itiurchatcha antsu wakerumainian túrawarat tusarum shiir yáinḡtarum. Nu túrachkumka ḡitiurak yainmakarat?

¹⁸ Incha Yus áujstatarum. Iisha ashí péṅker túratin wakeraji. Túraḡ enentáimji.

¹⁹ Tura Yus áujkuram Yus ataksha atumjaj wainniaikiatniun wari tsankatrukut tusarum seatritiarum.

Amúak shiir chichaawai

²⁰⁻²¹ Imiatkinchanum apujkartinia nú Yus, Jesukrístun jakamunmaya iniantkimia nuka, ni numpé kakarmarijaj ashí péṅker ana nuna suramsarti. Nujaj ni wakeramu túrattarme. Tura Jesukrístu kakarmarijaj ashí ni wakeramun in pujurtamas takasti. Ii

Uuntri Jesukrístu ashí Yus-shuaran ti penker Wáinniuiti. Tura ni numpejai Yamaram Chichaman kakaram awajsamiayi. Nu Chichamsha tuke menkakashatui. Aya Kristu tuke shiir awajnasti. Núnisañ atí.

²² Yaturú, kakaram chicharkajrumna ju shiir enentáimjai anturkatarum. Kame ti wárik áatrajrume.

²³ Yamaikia ii yachi Timiutéu sepunmaya jiinki ankant ajasai. Nuna ujaajrume. Wárik támatainkia atumin íitiaj tusan winiakun niijjai winittiajai.

²⁴ Atumí úuntri sha tura ashí Yus-shuarsha amikmaatarum. Itiaria nunkanmaya shuarsha amikmatmainiawai.

²⁵ Ashí Yus ti shiir yainmakarti. Nuke atí.

SÁNTIAK papin árar akuptukma

Sántiak aarmiania nu

¹ Wi Sántiak Uunt Yúsan tura núnisan ii Uuntri Jesukrístun umirin asan ju papin aajai. Ashí Yus-shuartermin ashí nunkanam tsakinmakarum matsatrumna nuna amikmaajrume.

Nekatainkia Yúsnumigiti

² Yatsuru, ashí itiurchat wáinkiumesha tuke warastarum.

³ Iis, itiurchatnum pujakrum nekas Yus enentáimtaitkiurmeka katsuntratin unuimiaratrum.

⁴ Tura tuke páchiachkuram, tuke katsunteakrum, nuikia Yúsjaí ti penker kat-suartatrum. Penké atsumashtatrum.

⁵ Átum nánkamsarmek nekaatin tujintiakrumka Yusa nekatairi seata. Shuar seakuí Yuska kajetsuk tura ementutsuk antsu patatas súawai. Tuma asantai seakminkia suramsattawai.

⁶ Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ánttram seame. Nayaantsa tsukaturi juní taa, atúu waketki ajatsuk. Amesha áintsamek túmame.

⁷ Enentáimjin núnisketkuinkia, seamna nuna Yus penké suramsashtatui.

⁸ Shuar jimiara enentáimna nuka shiir wekasatniun tujintiawai.

⁹ Yus-shuar, ju nunkanam kuítríncha ainia nu, Yus shiir awajsamu nujai warasti.

¹⁰⁻¹¹ Tura Yus-shuar kuítrinniuitkuisha péejchach enentáimtikramsha warasti. Iis, nupa kuánkam tura nantu ti sukuam kaar miniatsuk. Kuítrinniuka ántska ánttram seame. Nayaantsa tsukaturi juní taa, atúu waketki ajatsuk. Amesha áintsamek tánkete. Tuke súrutnak pujurkusha itiurchat wáiniuk wárik amuukattawai.

Ii itiurchatri ana nu

¹² Shíiraiti shuar ni itiurchatriin nekas katsunteana nuka. Nekapsam jíinkiuñka akinkiatniun wáinkiattawai. Iwiaaku átinian, tawasap achiktinia núnisan, wáinkiattawai Yus ni aneam tsankatka nuna.

¹³ Shuar tunáa túramnia nekapeakka “Yus nuna útsutrutui” tu enentáimprashtiniaiti. Yuska yajauch túramnia enentáimtsui túrasha Niisha penké chikichkinkesha tunaanum útsuchuiti.

¹⁴ Antsu ni wakeramurijjain aents tunaan niniki ikiatmamkaiti yajauch túratniun. Nujainkia tunaanum útsukmaiti.

¹⁵ Nu yajauch wakeramunmayá tunáa akiiniui. Tura nu tunáa mash amuukamtai jákatin akiiniui.

¹⁶ Yatsuru, aneakun tájarme, ananmamawairap.

¹⁷ Ashí penker ana nu, ashí shiir ana nusha nayaimpinmayá Yusak amasuiti. Yus ashí tsáapnia nuna najanaiti. Tura Niin kiritin atsain yapajítsuk tuke tsáapniiti.

¹⁸ Nii wakera asa ni nekas chichamea nujai ni uchiri najatmamji. Tura ashí ukunam átatna nujai ii émkaitji.

Yus nekas shiir awajatin

¹⁹ Tuma asantai aneamu yatsuru, wárik chichastin enentáimprairap antsu antuktin emka enentáimprata. Núnisan wárik kajekaip.

²⁰ Kajena nuka Yus penker wakeramun túratsui.

21 Nu asamtai, ashí pé_nkercha nu tura ashí yajauch ír_unna nusha iniaisata. Tura tuke enentáij_{ij}ai Yus-Chicham ame enentáimin araamu anturkata. Tura nu Chicham kakarmaiti uwentikrampratniun.

22 Yus-Chicham umikta. Aya ántukaip. Aya ántakmeka amek ana_nmamattame.

23-24 Shuar íspikia íimiak ni yap_{in} wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nuj_{ai} métekete.

25 Yus tana nuj_{ai} an_kant ajasminiaiti. Shuar íspikia iimia áintsan_n nekas Yus pé_nker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

26 “Nekas Yúsan shiir umirjai” tana nu tura eseer chichaachku_nka imia ni_nki ana_nmamui tura “Yúsan shiir umirjai” tana nuna ántar tawai.

27 Nekas Yus Apa awajitsuk shiir umirkatin júiti: mitiaikiasha waj_esha itiurchatnum pujuiniakuisha yáin_tiniaiti tura ju_n n_unkanam ashí tunáa ana núj_{ai}sha máatrashtiniaiti.

2

Shuar antra akantrashtin

1 Yatsuru, ii Uuntri Jesukrístu ti shiir na_nkaamantua nu enentaimtatirmeka shuar akantratin enentáimsairap. Shuara enentáij_{ij}ai enentáimtsuk antsu aya pátatke wáinmena nuj_{ai} aents akantram niisháa enentáimturairap.

2 Iis, iruntrumna nu_i shuar kuítrintin kurí aniyu aweera tura pé_nker iwiarmampra wayashtimpiash. Tura núnisa_n chíkich kuítrincha aruta entsaru wayashtimpiash.

3 Tura kuítrinnua nu “Pé_nker_a ju_i pujusta” tíchatameash. Tura kuítrincha “Atu wajauta, túrachkumsha ju_i nu_nka_nsha pujusta” tíchatameash.

4 Nu tákumka yajauch enentáimpram jimiará enentáij_{ij}ai aents enentáimtame.

5 Aneamu yatsuru, antuktarum. Ju_n nu_nkanam kuítrincha ainia nuna Yus achikiuiti Ní shuar ajar Nin nekas enentaimtin ajasartinian. Tura ashí nayaimpiniam ír_unna nunasha Yus nin tsan_katkattawai. Ashí shuar Yúsan aneena nuna anajmatra asa nin tsan_katkattawai.

6 Átum antsu kuítrincha natsant awajearme. Iista, kuítrinnua nuka timiá itiurchat awajtamainiatsuk. ¿Nuikia níchuk ainia achirmak kapitiánnium japiki júramprumna nu?

7 ¿Ní_nkichuk ainia Kristu naari_i shiira nuna ántar pachikiar pen_{ké} yajauch áujmatania nu? Tura átumka nuna naari_i tuke shiir awajkurmin, ashí shuar “Kristu shuari_i” túramainiawai.

8 Yus-Chichamnum ju_n akupeamu nekas pé_nkeraiti:

“Ame ayashim aneamna núnismek ame ír_utramuram aneeta.”

Nu nekas umirniuitkiurmeka maak.

9 Nú enentáij_{ij}ai kuítrinnuj_{ai} chichasminiaiti. Tura nuyá kuítrin_{ch}aj_{ai} shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurij_{ij}ai amek sumamame.

10 Chíkich akupkamu ír_unna nu ashí umikiam tura aya chikichik akupkamu umikchamka nuikia ashí akupkamu umircha ajasume.

11 Iis, Ni_nki Yúsak chichaak tíchamka “tsanirmawaip.” Tura chikichnasha “ma_nkartuawaip” tímiayi. Nu asamtai, shuar tsanirmatsuk túrasha ma_nkartakka ni wakeramun umirtsui.

12 Kristu an_kant awajtamsantai ii yamá ni akupeamuri_i yúpichuch umirkamniaitji. Nu asamtai nu akupkamuj_{ai} métek wekakurni_nkia Yus “pé_nker túraitme” turamtatji. Tura umikchakri_nkia “pé_nker umikchaitme” turamtatji. Tura nu enentáimsar pé_nker chichasar takasar wekasatniuitji.

13 Chikichan waitnentachku_nka waitnennatsuk asutniáttawai. Tura waitnen_kratniuitkiurni_nkia tsawant jeamtai Yus in waitnentramprattaji.

Yus enentáimtustin tura umirkatniusha

¹⁴ Yatsuru, shuar “Yusan shiir enentáimtajai” táyat tura péñker túrachkuñkia péñkerashit. Nujai uwemprattawak.

¹⁵ Wátskea, Yus-shuar, áishmansha nuwasha, entsátairin tura yurumken atsumashtimpiash.

¹⁶ Tura ame nékayatmek ayashj atsumana nu sútsuk tíchatapash “Péñker wetá, entsatai entsaram túram péñker yurumáta.” ¿Nu sútsuk tákum péñkerkait?

¹⁷ Núnisan takatsuk Yus enentáimtustin ántraiiti.

¹⁸ Tura shuar tíchanpiash, “Chíkich takaawai tura chikichcha Yúsan shiir enentáimtawai. Mai péñkerchakait” tichanpiash. Wats, ame Yus enentáimtamun takatsuk paant inaktusminiashitiam. Tura wi antsu péñker takatrujai Yus enentáimtamun paant inaktustatjai.

¹⁹ Nekas Yus chikichkiiti tu enentáimtame. Nuka péñker túrame. Túrasha iwianchcha nunasha nékainiawai. Tura umircha ásar ashamainiawai.

²⁰ Netse enentáimpraip. Ashí Yus wakera nu takaachkumka, Yus enentáimtustin ántraiiti. ¿Nu nekaatin wakeramek? Iista.

²¹ Apraáman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Péñkeraitme” tímiayi Apraáman.

²² Páantchakait. Apraám Yusa shiir enentáimtak umirkamiayi. Umirtsuk Yúsan enentáimtakka nuikia ántar enentáimtiaayi. Tura umirak Yus enentáimtamun umikmiayi.

²³ Nujai Yus-Chicham aarma nu uminkiamiayi. Juiti: Apraám Yúsan shiir enentáimtusmiayi tura Yus chicharuk tímiayi “Máakete. Nújainkia tuke péñker túraitme Wijjai” tímiayi. Apraámsha nekas “Yusa Amikri” tu náamkamiayi.

²⁴ Páantchakait. Shuar aya Yúsan shiir enentáimtamujainchuk tura péñker takas-majajasha Yus nin shiir enentáimtawai.

²⁵ Núnisan Raap tsanirmataiyayi. Túmaitiat Israeran suntarin mamikmauta tusar akupkamun ni jeen itiaawar tura úukar chíkich jintianam akupak uwentikrarmiayi. Nuna túramtai Yus “péñkeraitme” tímiayi nincha.

²⁶ Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka áintsan ántraiiti.

3*Ii iniaj*

¹ Atum untsurí jintin kiartin ajastin wakerukairap. Yus in, jintin kiartin ájinia núnaka, nan kaamas neka asar, awajiakrin nan kaamas Yus asutiámattaji.

² Iis, ashí mash ti awajiatsjik. Tura shuar chichaak, aya péñkernak chichaakka, nu shuar tuke eseer enentáimniuiti. Tura ayashjisha tuke péñker ana nuna túriniaiti.

³ Kawaisha enentáimpratai. Jiru wenuchiniam ikiursam ni ayashj ashí ayantaatsuk.

⁴ Kanusha ti úuntaitiat tura kakaram wéayat ishitiapach wiantaijjai shuar wakera nui ayantarminiaiti.

⁵ Núniskete ii iniaj. Timiá ishitiapchitiat awakmaktinia tímianu chichaatsuk. Ji ishichik kapaajai ashí numi tsaruaku ekeemakchamniakait.

⁶ Ii iniaisha jijjai métekete. Ashí tunáa piákuiti. Tura ii ayashjin tunáa túratniun útsutmajai. Túnkuruanmaya jijjai ikiapármaiti tura ashí ii wekajnia nui émesewai.

⁷ Shuar ashí yajasman nawamkamin áiniawai. Ashí kajen írruna nunasha, nanamtincha, napincha, tura entsayancha ashí nawamkaruiti.

⁸ Tura iniaikia penké nawamkachminiaiti. Ti yajauch asa penké nupetkachminiaiti. Iniaikia ti taráa tseasaiti.

⁹ Nu iniaijjai Yus Apa shiir awajeaji tura nu iniaijjain aentsti yajauch chichárnaiyaji. Áentsun Yus Nijjai métek-taku najanamaitiatar yajauch chicharnaiyaji.

¹⁰ Nu iniaijjain pēnkersha tura yajauchisha chichajai. Yatsuru, nuka penké atsutniuiti.

¹¹ ¿Púkuninmaya entsa sáawijjai kusuku jíinkimniakait?

¹² Yatsuru, ¿Kushin̄kiap shuinian nereawak. Munchisha kushin̄kiapen nerektatuak? Núnisan̄ púkuninmaya entsa sáawijjai kusuku jíinkichminiaiti. Ii iniaijjai núnisan̄ aya pēnkerā nu chichastiniaitji.

Yusa nekatairi

¹³ Shuar ti neka enentái takakna nu, pēnker túrattawai. Nekas nékaitkiun̄ka péejchachia núnis tuke pēnker ana nuna túrattawai.

¹⁴ Antsu atumí enentáijjai penké yajauch enentáimtunairum tura atumek pēnker pujustin enentáimtumarum, nékaitiatam pēnker túrachiatam “pēnkeraitjai” tiip. Nuka wáitrame. Nekaska núchaiti.

¹⁵ Nú enentaikia Yúsaiyanchuiti. Antsu ju nun̄kanmayaiti, shuara enentáiyaiti, núnisan̄ iwianchnumiaiti nú enentaikia.

¹⁶ Shuarsha yajauch enentáimtunairar tura nin̄ki enentáimtumainiakui, nujai ashí meseawai tura ashí yajauch ti awai.

¹⁷ Antsu Yusaiya enentái takakua nu júnisaiti: ashí nan̄kaamas emka eseeratin, nuyá nawamkartin, shiir ajá, pēnker anturnain, waitnen̄kratin, ashí pēnker takáa tura anañtsuk naka chichamtin.

¹⁸ Eeera enentáimsatniusha shiir takawai ashí shuar pēnker ana nuna túrawarti tusa.

4

Ju nun̄kanam írunna nu aneashtin

¹ ¿Urukamtaituk tuke kajernaikiarum ti máanaisrum pujarum. Mesetnumsha urukamtai wéarum? Júnisaiti: Atumin yajauch enentái katsuntrachmin útsutmakrumin tuke máaniarme.

² Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujai itit enentáimtuniarme tura ataitin tujinkiam máanaitrume. Wakerarmena nusha Yus seachu asarum wáintsurme.

³ Tura seakrumsha yajauch searme. Atumí pēnkerijjai warastin enentáimiu asarum searmena nusha wáintsurme.

⁴ Jú nun̄kanmaya wakerakum Yusa nemasrijjai tsanirma áintsan̄ketrume. Nékatrumek atumsha. Ju nun̄kanmayan̄ wakerakrikiā Yusa nemasrintji. Shuar ju nun̄kanmayan̄ wakerakka Yusa nemasri ajawai.

⁵ Yus-Chicham juna tawai:

Yus ni Wakan̄i ii enentáin apujturmasuitji. Nu Wakan in anenma asa ti akasmatramaji, táwai.

Tura nuna ¿ántran̄keash ta?

⁶ Tura anenma asa ti yáinmaji. Tuma asamtai Yus-Chicham tawai:

Kajemtinian Yus ístatui tura péejchachin Yus nin aneak ti shiir yáintatui, tawai.

⁷ Yusai ikiumastarum, tura íwianch taritatarum. Túrakrumin íwianch ikiurmaktiatui.

⁸ Yúsaini weamkata tura Nii atumin wearmaktatrume. Tunáa shuartiram Kristu numpejai nijiamartarum. Tura átum, Yussha tura ju nun̄kanmayasha mai métek wakerarmena nu, atumí enentái naka eseeratarum.

⁹ Atumí tunaari enentáimsarum kúntuts enentáimpratarum. Nu kúntutsjai ti úttiarum. Nuik shiir enentáimprarum wishikmiarumna nuka iniaisarum kúntuts enentáimprarum úttiarum.

¹⁰ Yusjai péejchach ajasta, túrakmin shiir awajtamsattawai.

“Yajauchiitme” tunaichatin

¹¹ Yatsuru, yajauch áujmatnaisairap. Yus-shuar ni yachin yajauch áujmatas tura yachí tunaari tuke áujmatuk Yus “aneniatarum” tana nuna umichuiti. Antsu umichu asa “nu akupkamu ántrai, umirkashtiniaiti” tawai nu shuar. Nujaj nu shuar umirtsuk Yus akupkamu nankaamas enentáimtumawai.

¹² Yus Niñki akupkamu najana asa Niñki nu akupkamu umirkamun nekas nekaamniaiti tunaashit tusa. Niñkiti uwentikratniun tura emesratniunam akupkatin jea nu. Amesha yáitiam chikicha tunaari ístincha.

Kashin átatna nuna Yusak nékawai

¹³ Watsek, átum áujmateakrum “Arumsha kashincha nu péprunam weri nuñ chikichik uwí takasar kuit achiktatji” tíchattarpash.

¹⁴ Ishichkisha penké nékatsrume kashin átatna nu. Ju nunkanam ii iwiaakmarí wárik amúatsuk. Yurañkim utsanar tura nantu sukuam mash wárik menkaatsuk. Núnisketji.

¹⁵ Antsu júnis tíminiaitrume: “Yus wakerakuñkia iwiaaku pujakrikia nusha túrattaji” titiarum.

¹⁶ Túrachkurmeka átumka Yusjai nankaamantu enentáimprume. Tura ashí nu enentáikia yajauchiiti.

¹⁷ Shuar péñker túratniun nékayat, túrachkuñkia, nuka tunaiti.

5

Kuítrintin enentáimpratniua nu

¹ Kuítrinniutiram ju antukturum. Ti úuttiarum. Ti wáitsatin asarum ti kakantra úuttiarum.

² Kuítrum mash mamukarai tura iwiarmampramurmesha mash tinkishap yúkayi.

³ Kurirmesha tura kuítrumsha ashí ijiakmamkarai. Ijiakmampramurisha ame péñkercha túram nuna paant iniakmawai. Tura jinium áesamua áintsan ame kuítrum yajauch awajtamsattawai ayashmiin. Amuukatin tsawant jeamunam anearchamame antsu ame kuítrum ikiaunkamame.

⁴ Ame takat iniararam ementushim akirarmamna nu “akirkati” turamainiawai. Anearta. Yakiyá Yus, nayaimpinmaya suntara uuntri, nu takartamniu chichamen antukai.

⁵ Ashí ju nunkanam íranna nu wararsaruitrume. Tuma asarum kapunka nuke machararme tura yamaikia máatin tsawant jeayi.

⁶ “Nu shuar tunaiti” tírum tunaachu tsanumprurum máamarme, tura niñkia surimi-akcharmai.

Yawetsuk takastin tura Yus áujsatin

⁷ Nu asantai, yatsuru, nu páchitsuk ii Uuntri Kristu tatin nákastarum. Arakmausha ni arakri péñker tsapaiti tusa yumi yutuktinian shiir enentaijjai nákatsuk. Yútasua umirmatai esatrurmatai júuktatjai tusa nákatsuk. Tura júurmaksha ti waraatsuk.

⁸ Núnisan atumsha katsuntsatarum tura yawekiirap. Kristu tatin yuntumtemayi.

⁹ Yatsuru, nuámtak “ju yajauch túrutui” tunainirap. Tákurminkia Yus írmastatrume. Niñkichukait nuna ístin tura anearta nu Yúsak tíjiuch wajatramui.

¹⁰ Yatsuru, yaunchu Yúsnan etserin enentáimpratarum. Tuke ii Uuntri Yus timia nuna shiir etserkarmiayi. Túmaitiat wáitsarmiayi túrasha pachischarmiayi. Núnisrumek enentáimsatarum.

¹¹ Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi, ni naari Jup. Tura ni itiurchatri nankaasmatai Yus ti núkap kuítrin susamiayi. Nu nékatsrumek. Ii Uuntri Yus ti waitneñkratchakait.

¹² Ju ashí nankaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumniñkia Yus írmastatui. Nu asantai nayaimsha nunkaasha ashí íranna nusha páchitsuk, aya támena nu tuke nekas atí.

¹³ Wáitakmeká Yus áujsata. Waraakmeká, warasam kantamám Yus shiir awajsata.

¹⁴ Yus-shuartiram, shuar jáakka, Yus-shuara úuntrin untsukti. Tura niisha taarti. Tura Jesusa naari pachikiar asuitijiai jaa shuaran ishichik kuerarti. Túrawar Yúsan áujtusarti nu shuaran.

¹⁵ Tura “Yus nuna nekas anturtamkattaji” tu enentáimsar áujsarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuinkia Yus nu tunaan tsankurattawai.

¹⁶ Nu asamtai, atumí tunaari paant etsertunaiktarum. Túrarum Yus áujtunaistarum atumí tunaari tsankurnarat tusarum. Péñker shuar Yúsan tuke enentáijiai áujeamurinkia ti kakarmaiti.

¹⁷ Yaunchu Yus-Chichaman etserin ámiayi, ni naari Erías. Niisha iijiai méteketiat yumi yutukai tusa Yusa áujsamtai menaintiu uwí nuyá nankaamas yutukchamiayi.

¹⁸ Ataksha yutukti tu áujsamtai ataksha yutukmiayi tura araksha ataksha tsapainiarmiayi.

¹⁹ Yatsuru, shuar eseera wekatinmaya kanaakuinkia chikich nin waketkitniun yainti.

²⁰ Shuar tunaa shuaran yajauch wekaan awakeakka jákatniunmaya uwentikrattawai tura ti untsuri tunaari tsankurnartatui.

PÍTIUR Emka papin aar akupkamu

Pítiur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chíkich chíkich nunkanam matsatrumna nuna áatjarme. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarme.

² Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanijai akantamkamiarme. Umirtukat tusa nuna túramiayi. Tura Jesukrístu numpejaisha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntri Jesukrístu Apari ana nuna naari shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmaya nantakin asamtai, iikia atak akiiniar tuke iwiaaku pujustiniaitiajnia nu arutramji.

⁴ Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiati. Tura nusha yajauchichuiti.

⁵ Yus nekas enentáimta asakrumin ni kakarmarijai wearmarme. Tura tuke uwemtikrampratniun, nuka amuuamunam paant iniakmastatna nu achikmintrum tusa tuke tsawant ni kakarmarijai wáitmarme.

⁶ Nu enentáimsarum wararme. Kame ju nunkanam pujakrum itiurchat wáinkiashtarmeash. Tura ju nunkanam pujustin ishichkichukait. Ukunam pénger pujustaj tu enentáimsarum wararme.

⁷ Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia aijn túruiniawai. Atumsha, itiurchat wáinkiarmana nujai, Yusan nekas enentáimtusartimpiash tusa nekapsamuitrume. Nu enentáimtamur kurijai nankaamas péngeraiti. Ukunam, Jesukrístu támatai, Yuska atumin “pénger túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asamtai ju nunkanam nekapsamuitrume, itiurchat wáintrumna nujai.

⁸ Jesukrístu wáinchaiatrum anearme. Tura yamá wáinchiatrumek nekas enentáimtarume. Tuma asarum ti wararme. Nu warastin nayaimpiniam warastatjnia núniskete; nuka paant titin jeatsji.

⁹ Iimiatarum. Uwemtikrurat tusarum Yus umirkachurmek. Nu uwempratniun wainiu asarum waraarme.

Krístujai ii uwempratniun yaunchu etserkarmiayi

¹⁰⁻¹¹ Yus áentsun waitnenta asa, uwemtikrataj tusa tuke wakerimiayi. Núnaka Yúsnan etserin etseriarmiayi. Kristu Wakani ni enentáin pujuriarmia nu, túruntsain Kristu wáitsatniurin jintiarmiayi. Tura ukunam ni ti shiir pujustintrincha etseriarmiayi. Túrasha “tuu áishmankait Kristu tutai, tura urutiák túrunat” tusar nu etserin émamkesar anin-trusarmiayi.

¹² Tura nii pujuiniajnkia túrunashtinian, antsu ti ukunam, ii pujajnia juí túrunatniun Yus nekaamtikiarmiayi. Núnaka Yusa shiir chichamen ujamakarmia nú shuar nekaprutmarme. Nú shuar Yusa Wakani, nayaimpinmaya akupkamu ana nuna nekatairijai

ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiainiawai.

Pénker wekasatin

¹³ Tuma asamtai, pé_nker enentáimsarum tura pé_nker ímiasrum wekasatarum. Tura Jesukrístu ukunam wantiniak waitnentramprattana nu yawetsuk nákastarum.

¹⁴ Umin uchi áintsarmek yaunchu nékachu asarum wakerimiarmena nu iniaisarum Yus umirin atarum.

¹⁵ Ashí túramurmijjají timiá penker wekasatarum. Yus, untsurmakuana nu, pé_nker asamtai, átumka ni shuarí asarum pé_nker wekasatarum.

¹⁶ “Wi pé_nker asamtai atumsha pé_nker wekasatarum” Yus tana nu ni Papiriin áarchamukait.

¹⁷ “Yus winia Aparuiti” tárugna nu aneartarum. Ashí aentsu túrutairin métek Yus nekaattawai. Nu neka asarum, ju nunkanam pujarmena juí Yus ashamkatarum.

¹⁸ Warí, ánta wekasatniun atumí uuntri jintintramarmena nuyá Yus uwentikramprarme. Túrasha kurisha kuitcha amuukamnia ainia nujají uwentikrachmaitrume.

¹⁹ Antsu Kristu numpe ti shiira nujají uwentikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarin tsankurattajai” tñiuyayi. Núnisan Kristu in jarutramka asa ii tunaaríniá uwentikrampraitji.

²⁰ Nunkan nájantsuk áentsun jaruktinian Krístun anaikiamiayi Yus. Tura wárik akupkachmiayi. Antsu yamá tsawantin, átum pujarmin, pé_nker pujusúk tusa wakerak, atumin jarutramkat tusa Krístun akupkamiayi.

²¹ Nijjají átumka Yus umiirume. Yuska Krístun jakamunmayan iniantki nankaamantu awajsamiayi. Yus nekas enentáimtakrum, aya pé_nkernak túrawai titiarum tusa túraiti.

²² Yus nekas tana nuna, Yusa Wakaní yainmakui, umirka asarum atumí wakaníin pé_nker ajasuitrume. Yus-shuarjají yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum.

²³ Nekaatarum. Yusa chichame umirka asarum atak akiiniaitrum nuka ju nunkanmayanchuiti. Antsu Yusa chichame iwiaaku tuke amuukachmin ana nú chichamjají tuke iwiaaku átiniaitrum.

²⁴ Ju ayash tuke pujuschamniaiti. Yusa Papiriin junis áarmaiti: Ashí aentsti nupáa áaniuitji. Ii pé_nkerisha kukujjia áaniuiti. Nupa wárik kaawai. Kukujsa núnisan wárik iniaawai.

²⁵ Tura Yusa chichame sha tuke amuukachminiaiti. Nu Chichamjají uwemprannia asamtai atumin etsernakuiti.

2

¹ Tuma asamtai, ashí yajauch ana nu iniaisatarum. Anankatin, ántar-chichamtin átin, chikichna wakeruktin, ashí tsanumpratniusha iniaisatarum.

²⁻³ Antsu, Uunt Jesukrístu waitnenkartutairí nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu ti wakeruktarum. Yusa chichamejají tuke tsawant tsakakrum tuke uwemprami tusarum túratarum.

Iwiaaku kaya

⁴ Ii Uuntri Kristu kayáa áantsankete. Tura shuar kayan yajauchin nakitiainia núnisan Jesukrístun nakitrarmiayi. Tura kayan ti penkeran wakeruinia núnisan, Yuska, “winia Uchir ti penkeraiti” tusa Jesukrístun achikmiayi. Atumsha Jesukrístu weantuktarum. Nii iwiaaku kayaiti.

⁵ Atumsha iwiaaku kaya áantsanketrume. Tuma asarum Yus wijjají ni jeen jeanti tusarum tsankamaktarum. Tura nútiksarmek Jesukrístui atumí iwiaakmarí

tsaṅkamaktarum, Yus wakera nuna túrutati tusarum. Jesukrístujai tura asarum Yus shiir enentáimtikrume.

⁶ Jesukrístunun Yusa Papiriin júnis áarmaiti:

“Iistarum. Kayan ti penkeran achikjai” Yus tímiayi. Jeṅan emka apujtuamurij atí tusan Seunnum apujeajai.

Nin enentáimtana nu ántar enentáimtatsui. Aarma ana nu penké kayan chichaatsui. Antsu Jesukrístun tawai.

⁷ Yus umirkaitrumna nu, “kaya ti penkeraiti” tarume. Tura Yúsan umirainiatsna nuka Yusa Papiriin tana nujai métek áiniawai. Ju áarmaiti:

Jeṅan jeamin nakitrarmia nú kaya jeṅan emka apujtuamurij atí tusa apujamuiti.

⁸ Tura júsha aarma awai:

Tukumak iniaartin kayaiti.

Kame shuar Jesukrístunun etserkamun nakitiakka, ¿enentáinium itiur péñker wekasat? Wats, nú shuar, Krístun umirainiachu ásar, tuke túrunatin asamtai tukumainiawai.

Yusna ajasaru ainia nu

⁹ Tura átumka Yus achikmaitrume. Tura, wínian pujurtursarat tusa yajauchinmaya Uunt Yus akantamkaitrume. Yusna asarum péñker enentáimin ajasurme. Tura Yus sumakmaitrume. Niisha winia péñkerun etserturkarat tusa túraití. Kame kiritniunmaya jíinkirum ní tsáapnintrin wekasatniun achirmakurme.

¹⁰ Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumniṅ, ¿ya waitnentrampramia? Antsu yamaikia Yus waitnentramuitrume.

“Yúsnaitjai” tu enentáimsatin

¹¹ Yatsurtirmin tájarme, Yusna ajasrum, ju nuṅkanam írar matsatu asarum, atumí ayashij wakerana nu tsaṅkatkairap. Ayashim wakerana nu túrakmiṅkia ame enentáim nujai yajauch ajastatui.

¹² Yus-shuarchanum péñker wekasatarum. Túrakrumniṅkia niisha yamáí “Yus-shuar yajauch túruiniawai” ántar tuíniayatan, ukunmaṅka, Yusjai inkiunaiktin tsawant jeamtai, péñker wekarmena nuna enentáimturmasar, nú shuarsha Yúsan shiir awajsartatui.

¹³ Kristu atumí Uuntri asamtai, ju nuṅkanam akupin áiniana nusha umirkatniuitrume. Uunt akupin ashí akupin asamtai umirkatarum.

¹⁴ Tura ni akupeamurij ainia nusha tunaan túruinia núnaka asutiáti tura péñkeran túruinia núnaka shiir awajsati tusa uunt akupin akupkamu ásarmatai umirkatarum.

¹⁵ Nekas penker wekaamurmijijai enentáimcha ainia nu netse chichaamurij itiatmamtikiatarum tusa Yus wakerawai.

¹⁶ Tunaanumiá ankant ajasu asarum péñker wekasatarum. Túrasha wi ankant ajaschajak tusarum náṅkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum.

¹⁷ Chikichcha shiir enentáimtustarum. Yus-shuar ainia nusha aneetarum. Yus péñker asamtai ashamkatarum. Uunt akupin shiir awajsatarum.

Yus-shuarti katsuntratin

¹⁸ Takarniutirmesha ame úuntrum péñker shiir enentáimturmakui sha tura yajauchiitkuisha umirkatarum.

¹⁹ Nekaatarum. Ántar wáitkiarmainia nuj, “Yus iirui” tu enentáimsa katsunteakrumka, ti penkeraiti.

²⁰ Yajauch túrawakmin asutiámamtai katsunteakmeká nuisha warin ati. Antsu péñker túrawakmin asutiámamtai katsunteakmeká júka ti penker túrame Yusaj.

²¹ Núnisan túrunatin achikmaitrume. Kristu waitrutmasmiarme nuj, Wi túraj núnisan túrawarmi tusar wáitsamiayi.

²² Krístuka tunaan penké túrachmiayi. Tura chikichkinkesha penké ananachmiayi.

²³ Kátsekeamsha Niñkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iisti’ tímiayi, Yus péñker túrin asamtai.

²⁴ Kristu Niñki ni ayashíin ii tunaarín entsaki krúsnum jarutramkamiaji. Tunáa enentáimtusairum tusa, antsu Yusaj péñker wekasamniuram tusa jarutramkamiaji. Atumí enentáin tsuártaj tusa Kristu asutniámiayi.

²⁵ Murik ni pujutairíin waketkitniun nékatsna ántsarmek atumsha menkaka wekaimiarme. Tura yamaikia atumí wáitmauríin waketkintrume. Atumí wáitmau Krístuiti, atumí enentáin wáinnia nu.

3

Nuatnaikiaru itiur túratniuit

¹⁻² Tuma asamtai, nuwätiram atumí áishri umirkatarum. Amesha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámeke chichaatsminín, niisha Yus-shuar ajastinian wakerittiwai.

³ Nu asamtai aya pátatek iwiarmampratniusha ti enentáimtusairap. Intiash ti péñker iwiaratniusha, kurijjai iwiarmampratniusha, pushí ti kuitjai entsartincha ti enentáimtusairap.

⁴ Antsu, “nekas shíirmach ajastaj” tákumka, enentáimin “shiiir kajechu átajai” tu enentáimsatarum. Nuka sakarchattawai. Tura nuka Yúsnumka ti péñkeraiti.

⁵ Yaunchu núnisarañ nuwä Yúsan enentáimtusarmia nu, tura Yúsan shiiir enentáimtikratniun wakeriarmia nu, ni áishrin umirkar nujai ni enentáin shíirmach ajasar pujuarmiayi.

⁶ Atumí weatri Sara ni áishrin Apraáman umirmiayi. Umirin asa, “winia uuntru” tíniuyayi nin. Atumsha péñker túrakumka tura sapijmiatsuk wekaakrumka, Sarajai métek átatrume.

⁷ Tura áishmanñirmesha Yus wakerana nu nekaarum atumí nuwe shiiir enentáimtusurum tsaniñtarum. Nuwemsha, nuwä asa, áishmanñajai métek katsuntrachminiaiiti. Tura niisha, ámijjai métek Yusa waitnenkartutairijjai tuke iwiaaku átinian takusminiaiiti. Tu enentáimta asam ame núwem shiiir enentáimtustá. Yus áujukuram itiurchat atsuti tusarum túratarum.

Yúsnum péñker wekasatin

⁸ Nuyasha ashí Yús-shuartermin tájarme, aya chikichík enentaik atí. Waitnen-nairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáñtaj tu enentáimsatarum.

⁹ Yajauch turamainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shiiir awajtusuiti” tu enentáimsarum, yajauch turamainiana nu péñker awajsatarum.

¹⁰⁻¹² Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiiir pujustaj tákumka tura tuke tsawant warastinian wakerana nu, péñker ímiastí, yajauch chichakajj tusa tura wáitruawajj tusa. Tunaanumiä kanaki péñkeran túratí. Tuke enentáijjai shiiir átinian eakti.

Tu áarmaiti.

Itiurchat aijn péñker túratin

¹³ ¿Yaki yajauch túrutmat péñker turamnisha?

¹⁴ Túrasha péñker túrayatmek wáitiakminkia Yus shiiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume.

15 Tura “Kristu winia Úntruiti” tu enentáimtustarum. Tura “¿urukamtia Yus-shuar ajasuitiam?” turamainiakuisa, péñker áimkiamnium iwiarnarum pujustarum. Waantu enentáimtumatsuk, nin péñker enentáimtikrataj tusam túrata.

16 “Yúsjaí péñker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsaararat tusarum Yusjaí péñker wekasatarum.

17 Yajauch túrakur wáitsatniujainkia nankaamas, Yus wakerakuinkia péñker túrakur wáitsatniuka ti penkeraiti.

18 Kristu ii tunaarín asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuitiat, ii tunáa asakrin wáitrutmasmiaji, Yúsnum ejetamtai tusa. Ayashiinkia jakayat ni wakaníjiaí ni ayashí ataksha iwiaaku ajasmiaji.

19 Ni wakaníjiaí jakáa wakanín emetamu armia nuna etserkataj tusa wémiyai.

20 Nusha yaunchu Nuai uunt kanun nájanuk siantu painti (120) uwi pujurmia nuí Yuska umirtukarat tusa ti nákamaitiat Nuai étserman umikcharmiyai. Nú kanunmasha ishichik, uchu, aents kanunam pujuinian yumijiaí uwemtikrarmiaji.

21 Nu yumi Yus-shuarti imiantinian nakumui. Ii ayashí chamir awajsatai tusar imiantsuji. Antsu ii enentái péñker atí tusar Yus sear imianji. Nujai iisha uwemji. Jesukrístu nantakin asamtai, nujai uwempraitji.

22 Tura Niisha nayaimpiniam we akupin pujutainium Yusa untsuuríni apujsamuiti. Túramtai nayaimpinmaya suntarsha, tura ashí kakaram akupin ániana nusha Jesukrístun umirainiawai.

4

Ju nunkanam wáitsatin

1 Kristu ni ayashíin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashíin wáitiana nú shuar yajauchín páchiatsui.

2 Antsu “iwiaakjana nuíkie Yusa wakeramurín tuke umirkatjai” tu enentáimiui. Ni ayashí wakerana nuna yamaikia páchiatsui.

3 Warí, Yúsán nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekum ti yurumárum, enentáincha ajasrum charaatum ajatniusha, ántar-yusa namperiin yajauch ana nu najanatniusha nusha ashí wakerimiarme.

4 Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukamtai iniaisara?” tusar yajauch áujmatramprume.

5 Túrasha ukunam nu aents ni túramurín etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui.

6 Túrasha jaka armia nu Yusa shiir chichame ujankarmiaji. Ni ayashíin ashí shuarjai métek jakamniaitiatan Yus iwiaaku pujana núnisan ni wakaníi iwiaaku pujusarat tusa ujankarmiaji.

Shuar yáintiniaitji

7 Ashí amuukatin jeatemayi. Tuma asamtai péñker enentáimsatarum; túrarum anearum Yus auju pujutarum.

8 Aneniamujai untsurí tunaasha tsankuratin awai. Tuma asamtai ashí nankaamas nuamtak anenaistarum.

9 Kajé-kajejainchu atumí jeen itiaaniátarum.

10 In ankant ankant shiir awajtamstaniun Yus ti núkap takakui. Tura in shiir awajtamsumujai chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujai ame írutramuram yaintá.

¹¹ Etserkatniun Yus amasuitkiuñkia ame tamena nu, Yus tana nujaj métek atí. Chíkich shuar yáñtiniaitkiunka Yus amaana nú kakarmajaj túrata. Ashí túramna nu Yusa naari shiir atí tusam Jesukrístu náarijjaj túrata. Jesukrístun ashí aents shiir enentáimtusartí. Tura ashí áentsnum ni kakarmarj tuke atí. Nuna tajaj.

Yus-shuarti wáitsatin

¹² Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukamtai waitsa pujaj?” tu enentáimsairap. Kame túrunamniaiti.

¹³ Tuma aijn shiir enentáimsatarum. “Kristu wáitsamurin métek-taku wáitiakun péñkeraiti” tu enentáimsatarum. Ukunam Kristu wincharj wáinkiarum timiá warasmi tusarum túratarum.

¹⁴ Krístunu asakrumin katsekkramkachartimpiash. Túmaitkiuisha Yusa Wakanj shiir ana nu atumijn pujurtamkui shiir awajsamuitrume. Katsekkramainia nú shuar imia Yusa Wakanin yajauch áujmatainiawai. Tura átumka Yusa Wakanj shiir awajearme.

¹⁵ Túra atumsha yajauch túrawairum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurinkete. Atumjainkia nu wáitsatniuka atsutí.

¹⁶ Tura antsu Krístunuiti tusar wishikramuk wáitkiarmainiakui natsaarairap. Krístunu asam wáitiyatmek, natsamtsuk Kristu naari shiir awajsata.

¹⁷ Yuska ni shuarin nekapsatajtsa nan̄kamatiuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartin. Ti asutniáwartatui.

¹⁸ Imia Yus umirjinia nu uwempratniurj iturchataitkiuisha tunaan túruiniana nusha urukawartin.

¹⁹ Tuma asamtai Yus wakeramujaj wáitiainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

5

Yus-shuara uuntri túratin

¹ Yamaikia Yus-shuara úuntritiram, jintintjiarme. Wisha núnisnak Yus-shuara úuntrin̄tjai. Kristu wáitsamurin wáinkiaitjai wisha. Tura ukunam ti shiir átatna nuj chíkich Yus-shuara uuntria núnisnak wisha pachiinkiattajaj.

² Yus-shuar ame ístiniaitmena nu, péñker iistá, murikiu wáinin ni murikrin wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túrattajaj” tútsuk tura nujaj kuítrintin ajastin enentáimtsuk nekas wakeritia, Yusa takatrij asamtai.

³ Turasha, “Yús-shuara uuntri ajasan, Yus-shuaran akuptiaj” tu enentáimsaip. Antsu shiir túramurmijaj Yusa murikri jintintiata.

⁴ Nuñkia murikiu wainniu Uuntri taa wantiniak iwiarmamtai tawasap ti shíirmachia núninian suramsattawai. Aents súana nú shíirmach wari mamurtiniaiti. Tura Úuntrum ámin suramsattana nuka pen̄ké mamurchattawai.

Yus-shuarti umirnaikiatin

⁵ Tura natsatirmesha atumí uuntri umirkatarum. Kame yaunchu Yús-Papinium aarma asamtai ashí Yus-shuartiram nan̄kaamantu enentáimtumatsuk umirnaikiatarum. Waantu enentáimtuma núnaka Yus nakittiawai. Antsu nan̄kaamantuchu enentáimtuma nuna Yus waitnentak yayawai. Tu aarmaiti.

⁶ Wats, Yus timiá kakaram asamtai, amek nekamam, péejchach enentáijjaj enentáimtumasta. Nuñkia tsawant jeamtai ni wakerak Yus ámin pen̄keri awajtamsattawai.

⁷ Yus ámin ti enentáimturmakui ame iturchatrum ainia nu Yus ashí iiktusta.

⁸ Aneartarum tura ímiastarum. Íwianch atumí nemasrĭ ana nu, uunt yāwáa nuke, yanak emesraintiaj tusa eāak tentaa wekaawai.

⁹ Tura tuke Yus nekas enentáimtusum surimiaktarum. Ashí nunĕkanam Yusnum atumí yachĭ ainia nu átum wáitiarmena núnisaraĭ wáitiainiawai. Nusha kajinmakchat-niuitrume.

¹⁰ Wats, ishichik tsawant wáitsarmena nu nanĕkaasmatai Yus ataksha péĭker awaj-tamsattarme. Tura numi wewe wajana núnisaĭ ikiakátmartatrume. Tura Yus ikiakárma asarum ni jintĭin tuke péĭker wekasattarme. Ju Yus tuke in waitnentramtsujik. Tura iisha Jesukrĭstunu asakrin Niiĭjai métek Yus ni shiir pujutainium tuke shiir pujus-mintrum tusa achirmakuitji.

¹¹ Nú Yúsnasha ashí aents shiir enentáimtusartí. Tura ashí áentsnum ni kakarmari tuke atí. Nuke ati.

Amiak áujmamsamu

¹² Serpanujai ju papin ishichik áarmaj nuna akupeajai. Serpanu Yusjai péĭker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papĭĭjai. Tura tuke ni waitnenkartutairĭin wekasatarum tájarme.

¹³ Papirúnianmaya atumjai métek Yus achikma áinia nu amikmaatmarme. Winia uchir Markus núnisaĭ amikmaatmawai.

¹⁴ Yusai yachĭ ajasu asarum anenaisrum shiir awajnaisatarum. Jesukrĭstunu ajasuit-rumna nuna Yus imiatkinchanum pujustinian suramsarat tusan wakerajai.

Nu atí.

PÍTIUR Ataksha papin áarar akupkamu

Pitiur Yus-shuaran áatramiania nu

¹ Wikia ju papin aajna ju Semuñ Pítruitjai. Jesukrístu akatramu asan ni takarniurintjai. Ii Yusri tura in Uwemtikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijiai métek Niiniu ajasurme. Nuka ti penkeraiti.

² Yus, tura ii Uuntri Jesussha nékarmena nú núkap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajrume.

Yusai páchitkia atin

³ Yus uunt asa tura ashí túramnia asa, umirtukat tusa achirmakuitji. Nii neka asar atumajnia nu wáinkiaitji. Yus-shuarti wekasatniusha, tura Nin aneatniusha ii atumajnia nuna Yuska kakaram asa suramsaitji.

⁴ Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashi yajauch wakerana nuyá uwemprarum, Yusai páchitkia átinian suramsaitrume.

⁵ Yus umirkarme. Yamaikia juna túrataj tusarum kakartiniaitrum. Ti penker wekasatniuitrum. Nuyá Yusna nekaatniuitrum.

⁶ Nuyá yajauch túrashtin ímiastiniaitrum. Nuyá katsuntratniuitrum. Nuyá Yus shiir enentáimtusrum wekasatniuitrum.

⁷ Tura nuyá ashí shuar shiir enentáimtustiniaitrum. Tura nu nankaamas ashí shuar aneatniuitrum.

⁸ Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesrum takastatrum. Tura ii Uuntri Jesukrístu nekas nekaattarme.

⁹ Tura nuna túruiniatsna nuka, kusurua áanin áiniawai. Jesukrístu wakeramurin enentáimtuiniatsui. Ni tunaariya uwemprarmia nuna kajinmatainiawai.

¹⁰ Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme.

¹¹ Tura ii Uuntri Jesukrístu uwemtikramprajnia nu, Nii tuke akupeana nui, nakittsuk shiir awaintiamattarme.

¹² Tuma asamtai nékarminiñ tura Yusna nekas ana nuyá kanaatsrumniñ tuke enentáimtikratjarme.

¹³⁻¹⁴ Nekaatarum. Winia jákatniurun jeatema nuna ii Uuntri Jesukrístu ujatkeyi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai.

¹⁵ Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

Kristu waantu ajasun wáinkiarmania nu

¹⁶ Ii Uuntri Jesukrístu kakarmari tura ni táratniuri etserkamajnia nu, aya áentsnumia ántar chichamchaui. Antsu imia ii iijiai Uunt Jesukrístu waantu ajasu wáinkia asar ujakmajrume.

¹⁷ Tura Apa Yus Jesukrístun shiir waantu awajsamia nui, ni imiá shiir pujutairiya chichaak tímiayi, “Juka winia ti aneamur Uchiruiti. Nin ti wararjai.”

¹⁸ Iisha naint “Yusna” tájinia nui Nijiai pujá asar nu nayaimpinmaya chichaamu paant antukmaji.

¹⁹ Tura nuna nan̄kaamas ti nekasa nu, Yúsnan etserin yaunchu etserkarmia nusha nékaji. Ju étserma ju_{sha}, tsawant tsawa_{qtsain} kiritniunam ji keak tsáapin awajeana áintsan̄ asamtai, pé_{ñker} enentáimta asarum pé_{ñker} túrarme. Tura Kristu taa, yán_{kuam} etsantea núnisan̄ atumí enentáin ashí paant awajsattawai. Tura nu tsawant jeats_{ain} nu étserma tuke pé_{ñker} enentáimtustarum.

²⁰ Tura ju emka nekaatarum. Shuar aya ni enentáimmiari_{jia}in, Yusa Wakan_{jia}inchu, Yus-Chicham urukamtai tu chicháa nuna nekaatniun jeatsui.

²¹ Warí, Yúsnan etserin yaunchu etserkarmia nu, aya ni wakeramuri_{jia}in tícharmiayi. Nu áishman̄kan enentáin Yus pujursarmiayi. Tuma asa ni tiarmia nuna Yusa Wakan_{jia}in̄ jintintiam tiarmiayi.

2

Wait chichaman unuiniainia nu (Jútas 4-13)

¹ Tura Israer-shuarnum wait chichaman etserniusha páchitkiarmiayi. Atum_jincha wait chichaman unuiniau páchitkia ártatui. Niisha awajimtikrampratniun wakeruiniak wáitian ti yajauchin u_{kar} unuiniarartatui. Tura “Uunt Jesus uwentikrurmia nusha ántrai_{ti}” tiartatui. Nuna takui ni amuukatniurisha wárik jeartiatui.

² Tura untsurí shuar ni yajauch túruiniamurin írsar métek túrawartatui. Iis, “Yus-Chichaman unuiniaitjai” tuíniayatan̄ imiá yajauch túruiniakui untsurí aents “Yus-Chicham ántrai_{ti}” tiartatui.

³ Kuítian ti wakeruinia ásar, wait chichaman unuiniamprar akíam kuítriniawartatui. Tura nú shuar yaunchu Yus jákatniunam sumantikiawarma ásar, ni amuukatin tsawantri jeatemayi.

⁴ ¿Warí? Yuska ni suntari nayaimpiniam pujuarmia nunasha penké tsan̄kurachmiayi. Antsu nayaimpinmaya_u jinium akupkarmiayi. Tura nekapsatin tsawant jeats_{ain} kiritniunam jinkiamu emetamu pujuiniawai.

⁵ Yáunchuya_u shuarnasha Yus tsan̄kurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusjai wekasatniun etserin asamtai ni shuari siati armia nujai uwentikramiayi.

⁶ Enentáimpratarum. Sutuma pépruncha tura Kumura pépruncha nayaimpinmaya_u jin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúumainian nekaawarat tusa túramiayi.

⁷ Tura Yus Ráutan uwentikramiayi. Pé_{ñker} shuar asa, Sutumanmaya_u shuar imiá yajauch ásar tunáa túruiniakui, Raut kúntuts enentáimsamiayi.

⁸ Pé_{ñker} áishman̄ asa, nuyá shuara yajauchirin wáitiainiak, ni enentáin pé_{ñker} asamtai tuke tsawant kúntuts enentáimiuk wáitmiayi.

⁹ Tura incha tunaan iniakturmakrin, nu tunaanum nupetnakchati tusa Uunt Yus uwentikrampramniaitji, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

¹⁰ Tura Yus akupeana nuna umirkatniun nakitrar ni yajauch wakeramurin túruinia nunasha Yuska nekas asutiáttawai. Enentáimcha áiniawai. Tura ni wakeramuriniak wakeruiniawai. Niijiain̄ nan̄kaamas akupin ainia nuna yajauch áujmatainiawai.

¹¹ Warí, imia Yusa suntari Yusai matsatainia nu, nuna túratniun tsúumainiawai. Nan̄kaamas kakaram tura nan̄kaamas uunt áiniayat nu akupniun katsekainiatsui.

¹² Nu áishman̄sha enentáincha yajasma núnin áiniawai. Achikiar mantamnatniuk akiinia áiniawai. Enentáimtsuk nán̄kamsar yajauchin chichainiawai. Tuma ásar yajasma núnisan̄ jákartatui.

¹³ Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjai irunar yurumáiniayatan atumin anankramawar warainiawai. Nuka natsantaiti.

¹⁴ Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinniasha ti nékainiawai. Jákatniunam sumamawaru áiniawai.

¹⁵ Yúsnumaanj naka wétsuk awajirarai. Peura uchirj Paraam Yúsnan etserniuitiat yaunchu awajimia núnisaran awajiniawai ju shuar. Paraamka tunaan tura, kuítian achiktinian ti wakerukmiayi.

¹⁶ Tura niisha tunáa túratajtsa weaj Yuska umpuurun chichachun aents chichaana nujaj métek chichamtikiamiayi. Nuñkia umpuuru timia nujaj Yúsnan etserin ni netse túratniurjn enentáimiar iniaisamiayi.

¹⁷ Nu áishmansha yumirmat kuyua núnis áiniawai. Tura núnisan yuranmisha kíariat nase umpuim menkaana nu, yumi ajuarcha ásar, penké ántar áiniawai. Warí, Yus-Chichamjaj áentsun yainiainiatsui. Niisha imiá kirit ámanum tuke pujustin áiniawai.

¹⁸ Niisha ti chichainiyat ántar chichainiawai. Yajauch túratniujaj tura ayash wakera nújajsha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai.

¹⁹ “Iiya núnis túrakrumka ankant átrume” tu wénawai. Túrasha imia niñki ni tunaarijn emetamu áiniawai. Páantchakait. Shuar warí tunaajajm nupetnaka, nuna emetamurinti.

²⁰ Kame shuar, uunt Jesukrístu uwemtikiartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nújajnia nankaamas yamá imiá yajauch pujuiniawai.

²¹ Yusa akupkamurjn imiá péñkera nuna Yus nú shuarnasha súsarmiayi. Túrasha nékainiyat tunaanum waketkiaru ásar ti asutniáwartatui. Tuma asantai, nekas jintia nekaachuitkiunka maak árainti.

²² Tíchamukait, “yawá iyak ataksha yúawai,” tura, “kuchisha imiaimiuitiat ataksha tsakusnum maajkimiui.” Nu áishmansha núnisan yajauchiniam ataksha wáketainiawai.

3

Uunta tátintri

¹ Aneamu yatsurtiram ju papin jimiará áatjarme. Mai papinium winia jintintiamurjaj atumí chamir enentájn enentáimtikratjarum tusan wakerajrume.

² Yúsnan etserin, péñker wekain armia nuna etserkamurj enentáimturjarum. Tura ii Uuntri akupkamurjn ni akatramurijjaj ujatmakarmia nusha enentáimpratarum. Jesukrístu uwemtikrampramaj nuna chichamen tajai.

³ Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurjn túrusar wekasartatui.

⁴ Tura juna tiartatui. “¿Kóstuka “wi atak tátatjai” timia nusha urukuit? Warí, ii uuntri yaunchu kajinikarmia nuyá yapajjáchmaiti. Yus yaunchu ju nunkan najanamia nuyá yamaisha tuke núniskete” tiartatui.

⁵ Túrasha nunkancha nayaimpincha Yus yaunchu najanamia nuna nekaatniun nakitiainiawai. Yusa chichamejaj nunka entsaya jiinkimiayi tura nunkasha entsá nana-trawai, Yus timia nujaj métek.

⁶ Tura ukunam nu nunkan amaarkamujaj Yus emesramiayi. Ashí nuna nekaatniun nakitiainiawai.

⁷ Tura Yus tiniu asantai nayaimpisha nunkasha yamáiya nuka jijjaj emesnarat tusa ikiusma áiniawai. Yus áentsun nekapsattana nu tsawantaj yajauch aents emesnartatui; tura jisha nu tsawantaj nunkancha nayaimpincha áesattawai.

⁸ Tura jusha, aneamu yatsurtiram, enentáimsatarum. Uunt Krístujajnia chikichík tsawant mir uwiya núniskete; mir uwisha chikichík tsawanta núniskete.

⁹ Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukamtai wau taatsua? In áentstin nákmaji. Shuar chikichkísha menkakain tusa nakitiawai. Antsu ashí shuar enentáin yapajiáwarat tusa wakerawai.

¹⁰ Túrasha Uunta tsawantri aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timiatai menkakattawai. Tura nu ashí írúnna núurtiuk esaawartatui. Tura nun_kasha tura ashí írúnna nusha esaawartatui.

¹¹ Ashí nu emesnartin neka asarum atumsha imiá nekas Yus tuke enentáimtusurum, takamtsuk umirkarum wekasatniuitrume.

¹² Yusa tsawantri wárik tati tusar, jintiá ímprusar nákastiniatji. Nu tsawantaj nayaimpisha esáa emesnartatui, tura ashí írúnna núurtiuk ti tsuer ajas entsamnattawai.

¹³ Tura iikia yamaram nayaimpisha, yamaram nun_kasha ati tusar nákmaji. Nu átatui, tímiayi Yus. Tura nu_isha aya pé_nkerak átatui.

¹⁴ Nu tuma asamtai, aneamu yatsurtiram, ju túrunati tusarum nákmarena nu, imiatkinchanum wekasam chamir enentáimjai makuuchmin Yus wáitkiati tusarum wekasatarum.

¹⁵ Ju nekaatarum. In uwentikramprataj tusa Yus ti nákmaji. Ii aneamu yachi Páprusha núnisan Yus ni nekatairin susamia tímiatrusan áatramprarmame.

¹⁶ Ashí papí aarmia nu Pápruka wi tajana nuna chichaawai. Kame ni áarmari chikichka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajiáwar nusháa jintintiainiawai. Tura chikich chichamsha Yus-Chichamnumiá ana nuna núnisan túruiniawai. Túmainiakka nin_ki emesmamainiawai.

¹⁷ Wátsek, aneamu yatsurtiram, túruntsain ujakjarmena nu neka asarum, yajauch shuar anankramattsá wakerutmainiak awajimtikrurain tusarum, tura Yusai tariarurmena nuyá iniaraj tusarum anearum wekasatarum.

¹⁸ Tura ii Uuntri Jesukristu in Uwentikkiartin ana nu, yamá nékmarena nú nan_kaamas nekaatarum. Tura enentáimin nú nan_kaamas tariarum wetarum. Yamaisha tura tuke, ii Uuntri Jesukristu náarin uunt awájsartí. Nu atí.

JUAN

Emka papin áarar akupkamu

Tuke iwaaku átinia nérentin Chicham ana nu

¹ Ashí nankamamia nú yaunchu Yusa Uchiri tuke pujuuyayi. Nusha iisha anturkaitji. Nekas ii jiiijai wáinkiaitji. Wáinkiarsha ii uwejejaisha antinkiuítji. Niisha Yúsan ti paant awajeaku, Chícham tíminiati. Tura tuke iwiaaku átinia nérennuiti. Nuna áateajrume.

² Iwiaaku átinia nérenniusha paant nekanamiayi, nusha Jesukristuiti. Iisha Nii wáinkia asar nu étsereaji. Tura tuke iwiaaku átinia nérenniuri asa tuke Yus Apajai pujuyayi. Tura yamaikia iini paant ajatramsakrin atumniasha ujaajrume.

³ Ii Yus Apajaisha ni Uchiri Jesukristujaisha tsaninkiar nekas chikichík ajaji. Tura atumsha núnisrumek iijiai chikichík ajasuk tusar wáinkiamajnia nuna anturkamajnia nunasha ujaajrume.

⁴ Ti shiir warastarum tusan juna áatjarne.

Yus tsáapniniaiti

⁵ Yus imiá tsáapnin asamtai kiritin Niinkia penké atsawai. Nu chichaman Jesukristu in unuitiamprakrin nuna atumniasha ujaajrume.

⁶ “Niijiai tsaninkia pujaji” táyatar kiritniunam pujustinia áintsar tunaanum pujakrikia wáitraji tura nekas penker ana nu túratsji.

⁷ Yuska tuke tsáapninium pujuwiti. Iisha núnisrik tuke tsáapninium pujakrikia nuámtak nawamnaikiar pujuiniaji. Túrakrin Yus ni Uchiri Jesukristu numpéjai ashí ii tunaari japirtamji.

⁸ “Wi tunaan túrichuitjai” tákurkia ímia iik anañmamaji. Nekas ana nu nékatsji.

⁹ Antsu ii tunáari Yus paant ujakrinkia Yuska tsankurtamprattaji. Tura ii tunaarín asakátramprattaji. Yuska ti penker asa Nii tana nuna tímiatrusan umikmin asa túrattawai.

¹⁰ Kame “Tunaan túrichuitjai” tákurkia nujai “Yus wáitriniaiti” taji. Ni chichamesha ii enentáin pujurtamtsuji.

2

Jesukristu in Yúsan áujturmaidji

¹ Yus-shuartiram, tunaanum iniaarairum tusan ju papí áateajrume. Túrasha Yus-shuar tunáa túramtainkia Apa Yusan ii áujturmau awai. Nuka Jesukristuiti. Niisha ti penkeraiti. Niisha Yúsan áujturmakui Yusjai ataksha iwiaarar pujustatji.

² Jesukristu ii tunaarín asakártaj tusa jarutramkamiaji. Túrasha aya íiniunkechu antsu ashí shuara tunaarín asakártaj tusa jarukmiayi.

³ Yus tana nu umirkurkia nuikia Yus nekas nékaitji.

⁴ Tura shuar “Yúsan nékaitjai” tayat Yus tana nuna umirchakka wáitrawai. Nekasa nuka ni enentáin atsawai.

⁵ Antsu shuar Yus tana nuna umireakka Yúsan ti shiir aneawai. Túrakur Niijiai tsaninkiar pujamu nékaji.

⁶ “Yusjai tsaninkia wekaajai” tana nú shuar Jesukristu wekasamia núnisan wekasatniuiti.

Yamaram akupkamu

⁷ Yatsuru, yamaram akupkamun áattsujrume. Áyatik yámankamtaiknumia antukmiarum nunak tájarne. Ashí atumin jintintiamu yaunchu akupkamuiti.

⁸ Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumiiincha nu akupkamu nekas paant awajsamuiti. Nujai kiritin

menkaatemka asamtai tura nekas tsaapniñkia paant tsaapnirtasa pujakui nu akupkamun ataksháa aateajrume.

⁹ Shuar “tsáapninium pujajai” táyat chíkich Yus-shuaran nakitiakka tuke kiritniunam wekaawai.

¹⁰ Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniaiti.

¹¹ Tura shuar chíkich Yus-shuaran nakitiakka kiritniunam tuke wekaawai. Tura kiritniunam iimiu asa itiuraani wea nuna nékatsui.

¹² Uchitirmincha, Jesukrístu jakamujai atumí tunaari tsankurnaru asakrumin juna áateajrume.

¹³ Úntirmincha yámankamtaiknumiá tuke pujuuya nu nekáa asakrumin juna áateajrume. Únmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume.

¹⁴ Úntirmincha yámankamtaiknumiá tuke pujuuya nu nekáa asakrumin juna áatjarne. Únmarutirmincha atumí enentájjiai Yus-Chicham umirkarum kakaram asarum íwianch nupetka asakrumin juna áatjarne.

¹⁵⁻¹⁷ Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nankaamantu ajastin. Nuka ju nunkanmaya ániawai. Shuar aya nunak wakerak Yúsnaka aneatsui. Kame ju nunkasha amuukattawai. Ashí nu wakeruktincha ti nekas amuukattawai. Túrasha shuar Yusa wakeramurin umiana nu tuke iwiaaku pujustatui Yusjai. Nu asamtai atumsha ju nunkanam ana nu pachikiairap. Tura aya juyá ana nu aya tákustin enentáimsáip.

Nekas chicham tura wait chicham

¹⁸ Uchirú, amuukatin tsawant jeatemayi. Atumsha Kristu nemasri tátin antukuitrume. Yamaikia untsurí Kristu nemasri wantinkirmatai amuukatin tsawant jeatemayi.

¹⁹ Nusha ii week ármayi. Túmaitiat nekas Yus-shuar ácharmayi. Nekas Yus-shuar ániakka tuke ijjiai irunar pujuaraayi. Tura jínkirmatai nekas Yus-shuarcha ainia nu paant nekanamniaiti.

²⁰ Antsu atumniaka Yusa Shiir Wakanin Kristu suramsamta ashí paant nékarme.

²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarne. Wáit-chichamsha nekas-chichamsha penké nushaachuk ainia.

²² Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasri. Yus Apancha ni Uchirincha nakitia asa Kristu nemasrinti.

²³ Yusa Uchirin nakitiainia nu Yus Apajaisha tsanin pujatsui. Tura Yusa Uchirin shiir awajea nu, Yus Apajaisha tsanin pujawai.

²⁴ Yámankamtaiknumiá antukmiarum nu atumí enentáin pujurtamsati. Nu túrakrum atumsha Yusa Uchirjjiaisha Yus Apajaisha tuke tsaninkrum pujustatrume.

²⁵ Jesukristusha Niijjiai tuke iwiaaku pujustinian tsankatramkaitji.

²⁶ Anankartin írunkui juna áatjarne.

²⁷ Atumniasha Jesukrístu Yusa Shiir Wakanin suramsakrumin, nu Wakan tuke pujurtamkurmin shuar jintintramatin atsumatsrume. Antsu Yusa Wakan ashí jintintramprume. Ni jintintrammasha imiá nekas asa wáitchaiti. Tuma asamtai Nii jintintramna áintsarum Krístujai tuke tsaninkrum pujustarum.

²⁸ Yamaikia, uchiru, Krístujai tuke tsaninkrum wekasatarum. Nu túrakrikia Nii támatai natsamtsuk ti shiir inkiunaiktatji.

²⁹ Atumsha Jesukrístu ti penkera nu nékarme. Núnisan ashí shuar penkeran túruinia nuka Yusa uchiri ániawai. Nusha nekaatarum.

3

Yusa uchiri áiniana nu

¹ Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin jú nunkanmaya Yús-shuarcha nekarmainiatsji. Kame Yusnasha nékainiatsui.

² Aneamu yatsurtirmea, júna tájarme: nekas Yusa uchiri ajasuitji. Kame ukunam urukuk átaji nusha nékatsji. Túrasha jú paant nékaji: Jesukrístu támatai imia Nii paant wáinkiar Niijjai métek ajastatji.

³ Tura shuar shiir enentájjai nuna náakka imia nin̄ki shiir awajmamui Jesukrístujai métek shiir atajai tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin.

⁵ Jesukrístu ii tunaari asakártaj tusa jú nunkanam támia nu nékarme. Tura Nin̄kia tunaan túrichuyayi.

⁶ Tuma asamtai shuar Niijjai tsaniñ wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisañ nékachuiti.

⁷ Uchiru, shuar anañkramawairap. Péñker túrinkia Krístu ti péñker asamtai niisha péñkeraiti.

⁸ Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchiri jú nunkanam táwiti ashí íwianch túramun emesrataj tusa.

⁹ Shuar nekas Yusjai akiinia nu tunaanum wekaatsui. Yusa uchiri asa Yusa iwiaakmarijjai wekaawai. Tuma asa tunaanum tuke wekaatsui.

¹⁰ Shuar péñker túratsna nuka tura Yus-shuaran kajera nuka Yus-shuarhaiti. Nujai Yusa uchiri ainia nusha tura iwianchi uchiri ainia nusha paant nekaamniaiti.

Mai anenai ajatin

¹¹ Atumsha yámankamtaikniumiã chicham antukmiarum nu júiti: mai anenai ajatin.

¹² Iisha Kaíñkia áanin áchatniuitji. Íwianch-shuar asa ni yachin máamiayi. Tura ¿urukamtai maamia? Enentaimprata. Nii yajauch asa tura ni yachi péñker asamtai máamiayi.

¹³ Yatsurtiram, jú nunkanmaya shuar nakitramainiakui ti enentáimsairap.

¹⁴ Iikia jákatniunmaya uwempra asarⁱ nekas iwiaaku pujaji. Túmakur Yus-shuar ainia nu aneaji. Nujai yamaram iwiaakma takakjinia nu imiá páantaiti. Shuar Yus-shuaran aneachkun̄ka tuke jákatniunam wekaawai.

¹⁵ Shuar Yus-shuaran nakitiakka man̄kartinia núnisaiti. Tura man̄kartinkia tuke amuicha iwiaakmanum pujuiniatsui. Nuka nékaji.

¹⁶ Jesukrístu in jarutramka asakrin nujai nekas in anenmaj nu nékaji. Iisha núnisrik Yus-shuar ainia nu ti aneakur ni yaiñtai tusar jarukmin átiniaitji.

¹⁷ Túrasha shuar chíkich Yus-shuar atsumana nuna takakiat waitnentachkun̄ka nekas ni enentájjai Yúsan aneawash.

¹⁸ Uchiru, aya chíchamjain̄ anenain áchatniuitji antsu nekas aneniakur péñker túrar yáiniaiktiniaitji.

Yusai natsqmtsuk jeamniaitji

¹⁹ Jujai ii Yúsai sapijmiatsuk jeatniusha tura nekas Yus-shuaraitji nu nekaatniusha nekapmampramniaitji.

²⁰ Í enentái yajauch túramun enentáimtikramkurnisha Yus iijjai nan̄kaamas ashí mash nékatsuk.

²¹ Tura, aneamu yatsurtiram, ii enentái yajauch túramun enentáimtikramchakrinkia Yúsai sapijmiatsuk jeamniaitji.

²² Tura ni wakeramu túrakrikia tura ni chichamesha umiru asakrin ashí ii sej nuna suramsattaji.

²³ Júiiti Yus akupkamu: ni Uchiri Jesukrístu nekas enentáimtustin tura Kristu timia áintsarik shuartisha mai anenai ajartin.

²⁴ Shuar ni chichamen umía nuka Yusjaj tsaniñ wekaawai tura Yus niijjaj tsaniñ wekaawai. Mai chikichik ajasu áiniawai. Tura Yusa Wakanj ii enentáin pujá asamtai nujaj Yus iijjaj tsaniñ wekaana nu nékaji.

4

Yusa Wakanisha tura Kristu nemasri wakancha

¹ Aneamu yatsuru, untsurj shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin takakkun chichaajai” tuinia nu penker nekapsuk enentáimtusairap. Antsu ísrum nekas Yusa Wakanimpiashit tura chikich wakanishit nu nekaatarum.

² Jujaj nekapsarum ya nekas Yusa Wakanin takaka nu nekaattarme: Shuar “Jesus Yusa Uchiri Krístitiat nekas aents ajas ayashimkiamiayi” tana nu Yusa Wakanin nekas takakui.

³ Tura Jesusan tu enentáimtatsna nuka Yusa Wakanin takaktsui antsu Kristu nemasri wakanin takakui. Kame Kristu nemasri wakan tatin tama ántichukaitrum. Nu wakan yamaikia ju nunkanam táwiti.

⁴ Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumijn pujana nuka niijjaj nankaamas kakaram asamtai wáitrin ainia nu nupetkaitrume.

⁵ Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai.

⁶ Antsu iikia Yúsnaitji. Tuma asakrin Yúsan nékainia nu anturtamainiaji. Tura Yúsnachu ainia nu anturtamainiatsji. Nujaj nekas Wakanin takakusha tura wáitrin wakanin takakusha nekaamniaiti.

Yus tuke anenkratniuiti

⁷ Aneamu yatsuru, anenaitin Yúsnumiá asamtai mai anenai ajartai. Shuar anenkratniua nuka Yusa uchiri asa Yúsnancha nékawai.

⁸ Shuar anenkratcha nuka Yúsnanka nékatsui. Kame Yuska tuke anenkratniuiti.

⁹ Tuma asa ni Uchiri chikichkiniak ju nunkanam akupturmakmiaji. Iisha ni túrunamujaj nekas iwiaaku pujaji. Nujaj Yus in yáinmak ni anenkrattain paant iniaktur-masmiaji.

¹⁰ Jujaj nekas anenkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitiatan Yuska ti anenma asa ni Uchirin ii tunaarin asakarat tusa akupturmakmiaj nujaj nekas nekanamniaiti.

¹¹ Aneamu yatsuru, Yus núnis anenma asakrin iisha núnisrik mai anenai ajartai.

¹² Chikichkisha Yúsan wáinkiachuiti. Túmaitiat mai anenai ajakrikia Yus ii enentáin pujurtamkui Niiijjaj métek anenkratin ajaji.

¹³ Yus ni Wakanin suramsa asakrin Yus iijjaj tsaniñ wekaana nusha tura ii Niiijjaj tsaniñkia wekaajnia nusha, nujaj nékaji.

¹⁴ Yus Apa ni Uchirin ashí shuaran uwentikrarat tusa ju nunkanam akupkamia nu wáinkia asarⁱ étsereaji.

¹⁵ “Jesus Yusa Uchirinti” tana nu shuarjaj Yus tsaniñ wekaawai tura niisha Yusjaj tsaniñ wekaawai. Mai chikichik ajasu áiniawai.

¹⁶ Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjaj tsaniñ wekaawai tura Yussha niijjaj tsaniñ wekaawai. Mai chikichik ajasu áiniawai.

¹⁷ Núnisar ti penker anenkartin ajaji. Túrarⁱ súmamtikiatin tsawantaj natsamtsuk wajastatji. Kame ju nunkanam pujayatrik Jesukrístujaj méteketji.

18 Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sapijmiaktinaiti. Tuma asamtai ántar sapijmiana nu nekas anenkratchaiti.

19 Yus emka in anenma asakrin iisha Nii aneaji.

20 Tura shuar “wi Yúsan aneajai” táyat chíkich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkunka žitiurak Yusan wáinchasha aneat?

21 Yus incha juna turammiaji: Yúsan anea nu shuar chíkich Yus-shuarnasha aneat-niuiti.

5

Ju nunkanmaya írunna nu núpeteaji

1 Ashí “Jesus Yusa Uchirí Krístuiti” tu enentáimtana nú shuar Yusa uchirínti. Tura aparí anekrikia ni uchirísha aneattaji.

2 Yus Apa anekur tura Nii wakera nu umirkur Yusa uchirísha ashí aneattaji.

3-4 Yus anekur Nii tana nu umiktatji. Ashí Yusa uchiríya nu Yúsan nekas enentáimta asa, ashí ju nunkanmaya írunna nuna núpeteawai. Nu asamtai Yus tana nu umirkatin itiurchatchaiti.

5 Aya “Jesus Yusa Uchirínti” tu enentáimtana nú shuar ju nunkanmaya ana nuna awakkamniaiti.

Jesukrístu “Yusa Uchirínti” tu etserainia nu

6 Jesukristu jú nunkanam taa entsajai imiankui Yus nayaimpinmaya chichaak “Juka winia aneamu Uchiruiti” tímiayi. Tura nuyá Jesus jakamtai ni numpé puarmiayi. Entsajai imianin ni takatrín nankamamiayi túrasha in jarutramak ni takatrín amukmiayi ju nunkanam. Chikichkinkia túrutsuk mai metek túra asamtai Yusa Uchiríya nu paant nekanamniaiti. Yusa Wakanísha tuke nekas tiniua nu métek tawai.

7-8 Nu asamtai menaint “Yusa Uchirínti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai.

9 Aents étserainiakui ántureaji. Nuna nankaamas Yus ni Uchirín tana nu nekas anturkatniuitji.

10 Yusa Uchirín enentáimtana nú shuar ni enentáincha nékawai. Antsu Yus ni Uchirín timian enentáimtatsna nú shuar Yúsan enentáimtachu asa Yúsan “wáitriniaiti” tawai.

11 Yus ni Uchirín timia júiti: Tuke iwiaaku pujutai nérenniuiti tura nu iwiaakmancha in suramsaitji.

12 Yusa Uchiríjjai tsaniñ wekaana nú shuar, nu iwiaakmajai iwiaaku pujuiniawai. Tura Yusa Uchiríjjai tsaniñ wekaatsna nú shuar, nu iwiaaku átinnium pujatsui.

Amuak Yus nekas enentáimtustinian áarmiania nu

13 Yusa Uchirí nekas enentáimtakrum tuke amuicha iwiaakmajai iwiaaku pujarme. Nu nekaatarum tusan juna áatjarne.

14-15 Yus wakeramujai métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtaji.

16 Tunáa awai jákatniunam júana nu. Shuar nu tunaan túramtaínkia Yus áujtustin ántrai. Tura shuar chíkich tunaan túrakuínkia nuka nekas Yus áujtustiniaiti. Nekas jákatniunam júatsna nú tunaan túraitkiuínkia iwiaaku átinian Yus susattawai.

17 Ashí yajauchⁱ ana nuka tunaiti. Tura jákatniunam júatsna nú tunaasha awai.

18 Nekas Yusjai akiinia nú shuar tunaanum tuke wekaatsui. Antsu Yusa Uchirí nin ti penker wainkiui íwianch antiñkiachminiaiti.

19 Iikia nekas Yúsnaítji tura ashí ju nunkanmaya shuar iwianchnia áiniawai.

²⁰ Yusa Uchiri ju nunkanam taa nekas-Yus aa nuna paant jintinramji. Yusa Uchiri Jesukristujai tsaninkia wekaakur nekas-Yusajai nujajsha tsaninkiar wekaaji. Nekas-Yus asa tuke iwiaaku átinia nuna nérenniuiti.

²¹ Uchirú, ántar-yus írunna nuí pachiinkiarap. Antsu nujai aneartarum. Nuke atí.

JUAN

Ataksha papin aar akupkamu

Nekasa nunasha tura anenaitniuncha ujaawai

¹ Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wikichu antsu ashí Yus-shuar ainia nusha nekas chichaman nekaawaru ásar atumin anenmarme.

² Nekas-chicham tuke amuutsuk ii enentáin pujá asamtai aneajrume.

³ Yus ii Aparisha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaittarme.

⁴ Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai.

⁵ Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukmiaj nunak tájame.

⁶ Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yámankamtaiknumiá antukuitrume.

Anankartincha írunui

⁷ Ju nunkanam anankartincha ti írunui. Jesukristu nekas aents ajas akiiniamia nuna enentáimtuiniatsui. Nu shuar anankartin ásar Kristu nemasri áiniawai.

⁸ Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹ Ashí shuar Kristu jintíamun iniais “nankaamas nékajai” tana nu, Yúsnachuiti. Antsu Kristu jintíamun umiana nu shuar Yus Apajaisha tura ni Uchirijaisha mai tsanin pujawai.

¹⁰ Shuar Kristu chichamen jintíachu atumí jeen írmástaj tusa jeakui awayáwairap tura “shiir taume” tiirap.

¹¹ Kame nu shuar “shiir taume” tákumka nu shuar yajauch jintíamu jímiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtatjarme. Antsu imia wiki atumin iyakun jeátjai. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai.

Nuke atí.

JUAN

Nuyá Ukunam papin aar akupkamu

Kayu ti penker shuaraiti

¹ Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme.

² Aneamu yatsurú, Yusjai penker wekaakum ame wakanim penker pujana núnisan ame ayashmisha penker atí tusan Yúsan áujtajme.

³ Ame nekas chicham umirman shuar ju taar ujatarmayi. Tura nuna antukan ti warasmajai.

⁴ Yus-shuar nekas chichaman umiiniakui imiá shiir enentáimtuiniajai.

⁵ Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu penkeraiti.

⁶ Nu shuar ame nekas anenamun ju taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Penker wáinkiumka Yus shiir enentáimtikrattame.

⁷ Nu shuar Jesukrístun takarsatai tusar wekainiawai. Túrawar Yus-shuarcha ainia nuna kuítrijjai yurumátniun nakitrarmatai

⁸ ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

Tiútrepes yajauch túriniaiti

⁹ Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai.

¹⁰ Nu asantai nu jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjai iruntratniun surimiawai.

¹¹ Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

Timitriu penker túriniaiti

¹² Imiá nekas penker shuar asantai ashí shuar Timitriun penker áujmatainiawai. Iisha núnisrik penker shuaraiti tákurin nekas tájinia nusha nékarme.

Umíamu chicham

¹³ Wi ti nukap títinian wakerajme. Túrasha ju papinium mashi áatrashtatjame

¹⁴ wárik ítin asan. Nu jean chichasmi.

¹⁵ Shiir pujustá. Juyá amikrum amikmaatmainiawai. Ii amikrisha chikichik chikichik amikmaatruata.

JÚTAS papin áarar akuptukma

Jútas Yus-shuaran papin áateawai

¹ Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaniñkiaru ásarmatai Yus nin wainiainiawai niijjai kanakchatniun.

² Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

Ti tunáa shuar írunui (2 Pítiur 2.1-17)

³⁻⁴ Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anan̄kramawar atum̄in pachi-inkiarmai. Niisha “Yus ti anen̄kartin asamtai páchitsuk tunáa túramniaitji” tuiniawai. Nu arantcha Yus in Akuptamniuncha tura ii Uuntr̄i Jesukrístuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yapajiáshtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

⁵ Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nun̄kanmaya júkiar Nin umirkacharua nuna máawarmiayi.

⁶ Nayaimpinmaya suntarsha ni pujutair̄in ajapa ikiukiar Yus susamun umitsuk iniaisarmiayi. Túrawarmatai Yus kiritniunam jirujai tuke jin̄kiá sepunam apujas pujurainiawai. Tura Uunt Tsawant jeamtai súmamtikiawartatui.

⁷ Núnisan̄ Sutuma péprusha Kumura péprusha tura tíjiuch péprusha áishmanjaisha nuwajaisha ti yajauch nuamtak tsanirmanainiakui ti tunaan pen̄ké túrachmin ana nunasha túrin ármiai. Túmainiakui ashí shuar ashamkarat tusa Yus amuicha jinium asutiáwarmiai.

⁸ Ayu. Atum̄in yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai.

⁹ Antsu Mikiar, nayaimpinmaya sutara kapitántr̄intiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi.

¹⁰ Túrasha ju shuarka nékainiatsna nuna nán̄kamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújaisha imia niñki yajauch emesmamainiawai.

¹¹ Maa, anearartí. Kaiñ yajauchin túramia núnis tura ásar jákartatui. Tura Parama áinis kuítian ti wakeruiniak imia niñki tunaanum tsan̄kamakaru áiniawai. Tura Kurea áinis ashí akupniun nakitin áiniak kajin̄kiartatui.

¹² Átum nuamtak anenaitiai-jisat nájankurmin nu shuar chikichan enentáimtutsuk Yusnasha ashamtsuk imia niñki enentáimtumainiawai. Pen̄ké ántar áiniak yumi kiār tee ajasua núnin áiniawai. Tura nase umpuim yútutsuk nan̄kamainiawai. Árak nerektin nantutin nerechua áanin áiniawai. Tuma ásar uwemu pen̄ké jaka áanin áiniawai.

¹³ Entsa nujan̄krak saur̄in ajekeawai. Nu shuarsha núnisar ni natsantr̄in natsamtsuk ajekenawai. Tura yaa waakua áanin áiniawai. Tuma ásar nekas kiritniunam tuke men̄kakat̄in áiniawai.

¹⁴ Atañka tiran̄kiyayi Eruk. Ti pen̄ker Yúsnan etserin asa juna tímiayi “Uunt Yus ti untsur̄i ni shuarijiai winittiawai.

¹⁵ Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nujaj tura Yúsan yajauch áujmatsarua nújajsha súmamtikiawartatui” tímiayi Eruk.

¹⁶ Nu shuarka péñkera nujaj waratsuk “yajauchiiti” tuiniawai. Aya ni ayashí wakera-munak wakeruiniawai. Nan̄kaamantu enentáimtumainiak chichainiawai. Tura chikich shuaran shiir chicharainiaksha aya nii wakera nuna túrutati tusa péñker chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntri Jesukrístu akatramurj yáunchu “an-eartarum” tiarmiania nusha enentáimtustarum.

¹⁸ “Amúamu tsawant ishichik ajatesmatai shuar Yúsnan wishikrar nakitrartatui. Tura ni yajauch wakeramuriniak umí pujuartatui” tiarmiayi.

¹⁹ Nu yajauch shuar atumín akantamenawai. Ju nun̄kanmayanak páchiniak Yusa Wakanj takakainiatsui.

²⁰ Tura átumka, aneamu yatsurú, tuke Yus nekas enentáimtusrum kakaram ajastarum. Yusa Wakanj kakarmarijjaj ashí Yus seatarum.

²¹ Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntri Jesukrístu in waitnentrana asa tuke shiir Nijjaj pujustinian amastatji. Nu tsawant naká pujutarum.

²² Mai yapajj ajá ainia nu naka enentáimtikratarum.

²³ Chikich shuarsha jiniumia júsatniua áitkiasrum uwemtikratarum. Tura chikichcha ti yajauch ásarmatai anearum waitnentratarum. Tura ni pushirisha ni tunaarjjaj maatra asantai mujkiatniuiti.

Yúsan shiir awajeawai

²⁴⁻²⁵ Yus chikichkiiti. Ti nekaiti. In uwemtikkiartin asa ni kakarmarijjaj yain-makminiaiiti tunaanum iniarchatniun. Tuma asa tunaajaj máatrachu awajtamas ni ti shiirmarin ejetamtatrume. Túrutma ti waramtikramsattarme. Ii Uuntri Jesukrístu túrunamujaj Yuska Niñki shiir awajsatniuiti tura nan̄kaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

APUKARÍPSIS

Jesukrístu Juánkan paant iniaktusma

Jesukristu paant awajsamu

¹ Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukrístu ni suntarin akupak ashí winia paant awajtursamai. Wisha Juánkaitjai.

² Yus timia nunasha tura Jesukrístu ujakamia nunasha tura wi íismaj nunasha ti paant aya nekasa nuna tájai. Penké wáitratsjai.

³ Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áateawai

⁴ Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakanj siati naka pujurainia nusha shiir yainmakarti.

⁵ Núnisan Jesukrístu shiir yainmakarti. Nii tana nu imiá nekasaiti. Niisha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji.

⁶ Túrutma akupin awajtamsaitji. Tura ni Apari Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

⁷ Wats, Krístuka yuranmijai winittiwai. Tura íjiuarmia nusha tura ashí shuarsha nuna wáinkiaratui. Túrawar ashí sapijmiainiak útiartatui. Maa, nekas nunis átatui.

⁸ Krístuka “yámankamtaiknumia amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

Kristu ti shiir wincha ajasun Juan wainkiamiania nu

⁹ Wi Juan atumjai métek waitia asan atumí yachintjai. Núnisan nayaimpiniam, Yus akupeana nu, métek jeattaji. Tura katsuntrar nákastinian Jesukrístu mái métek súramji. Yus-Chichamnasha tura Jesukrístu timiancha étsereakun nayaantsa ajapén atentramunam Pátmus nunkanam sepunam apujsamua núnisan pujumjai.

¹⁰ Tumai tumin tsawantai Yusa Wakanj pujurtakui winia úkuruiní kakantar untsuman antukmajai. Kachu umpúamua núnis ti kakarmauyayi.

¹¹ Tura turutmiai “Wiitjai. Yámankamtaiknumia amúamunam ashí nérenniuitjai. Wisha A rétranmaya Y rétranam ashí retra áintsaitjai, tímiai. Tuma asamtai wainmena ju, papinium áaram Asia nunkanam siati péprunam Yus-shuar írunna nu akuptukarta. Ju peprunam akupkarta: Ipisiusha, Ismirnasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiai.

¹² Túrutkui yaki túruta tusan apajasan íkman siati shirikip ikiutain kurijai najanamun wainkiamjai.

¹³ Tura nu ajapén Aents Ajasua núninan wajan wainkiamjai. Tura pushirísha nawea timiai nuntuaru entsaruyi. Emenmamkesha kúrinia netsepnum emenmamauyi.

¹⁴ Tura ni muuke intiashísha murikiu uré nijiamua núnisan tura micha núnisan ti puju chírauyi. Tura ni jishá jiya núniskeyi.

¹⁵ Ni nawesha ti wincha asa jiru yanikutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi.

¹⁶ Ni untsuurin_i siati yaan takakuyi. Tura ni weneniasha puniá áinis tsakatskat mai ere awajsamu jínmiái. Ni yapisha etsa ti etsantuk íschamnia núnisauyi.

¹⁷ Nuna wáinkian jaka áintsanak naweēn iniaarmajai. Túrasha ni untsuurí uwejen awaantrus turutmiayi, “Ashamkaip. Wiitjai. Yámankamtaiknumiá amúamunmasha tuke pujuwitjai, timiai.

¹⁸ Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirin takakkun nérenniuitjai, timiai.

¹⁹ Tuma asamtai wáinkiamna júsha, yamáí wáinmena nusha, tura ukunam átatna nusha aartá, timiai.

²⁰ Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuurin_i siati yaa wainkiam nu, siati péprunmayá Yus-shuaran wáinniun nakumenawai, turutmiái.

2

Ipisiunam chícham áatramu

¹ Nuyá turutmiái ‘Ipisiunmayá Yus-shuaran wáinin jú áatratá: Siati yaan untsuurnum takakna nu tura núnisan_i siati shirikip-ikiutai kúrinman ajapén atenta wekáa nu, tawai:

² “Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme.

³ Ti wáitiatmek katsuntram yawetsuk Winia ti takartusuitme.

⁴ Túrin áminin_i júna títiatjame. Yus aneakum yámankamtaik ti penker wekainiuyam núnisam túratsme.

⁵ Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shiripkirmin wari jurustatjame.

⁶ Tura jú péñker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitiajai.

⁷ Kuíshtinia nu shuar Yusa Wakan_i ashí Yus-shuaran timian antukti: Nupetmakunka tuke iwiaaku pujutai numi nerēn yúatniun tsankatkattajai. Nu numi Yus pujana nu_i wajaawai.” Tu áartá’ turutmiái.

Ismirnanam chícham áatramu

⁸ Nuyá turutmiái ‘Ismirnanmayá Yus-shuaran wáinin jú áatratá: Yámankamtaiknumiá amúamunam tuke pujuwa nu tura núnisan_i jaka nantakmia nu, tawai:

⁹ “Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusainkia ti kuítrinnuitme. Tura shuar uunt iwianch Satanása shuari áiniayat “Israer-shuaraitjai” tuíniak yajauch áujmatramena nuna nékajai.

¹⁰ Ti wáitsattamna nu ashamkaip. Íwianch ashí nekapramsataj tusa atumijnian sepunam enkeattawai. Nu_i tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai.

¹¹ Kuíshtinia nu shuar Yusa Wakan_i ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiái.

Pírkamunam chícham áatramu

¹² Nuyá turutmiái ‘Pírkamunmayá Yus-shuaran wáinin jú áatratá: Puniá áinis tsakatskat mai ere awajsamun takakna nu, tawai:

¹³ “Ashí ame túram nuna nékajai. Uunt iwianch Satanás akupea nu_i pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame. Nusha íwianch pujutainium pujakrumin túrunamai.

¹⁴ Túrin áminin juna títiatjame. Atumjiniá shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapi-tián Parakan unuiniarmiayi. Nuyá Parak Yus-sutai namañken maar yúatniun Israer-shuaran jintintiamiayi. Núnisan ti tsanirmatniun jintintiamiayi.

¹⁵ Atumjiniá shuarsha Nikiurás jintíamuncha, Wi nakitiaj nuna, iniaisatniun nakiti-ainiawai.

¹⁶ Wats, enentáimpram iniaisata. Túrachakminkia Wi wari winin winia wenurujiya puniá jiinia nujai máaniaktajai.

¹⁷ Kuíshtinia nu shuar Yusa Wakanj ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naari aarma átatui. Nunasha chíkich shuarka penké nékatsain aya achía nuke nekaattawai.” Tu aartá’ turutmiai.

Tiatiranam chícham áatramu

¹⁸ Nuyá turutmiai ‘Tiatiranmaya Yus-shuaran wáinin ju áatratá: Yusa Uchirí jii jijiai métek keena nu tura núnisan nawe jiru yanikutaku jiamua núnis néwar ajawa nu, tawai:

¹⁹ “Ashí ame túram nuna nékajai. Yus shiir enentáimtakum aneam nuna nékajai. Tura katsuntram penker takaamna nuna nékajai. Yáunchujai nankaamas penker túrame yamaikia.

²⁰ Túrin áminin juna títiatjame. Nu nuwa Jesapír awematsme. “Yúsnan unuiniyajai” tinia Wí shuaran ti anañkenawai. Tura ti tsanirmatniuncha tura ántar-yus-sutai namañken maar yúatniun jintintiainiawai.

²¹ Niisha ni tunaarín enentáimiar iniaisat tusan nákasuitjai. Tura nakitiawai.

²² Wátsek, sunkurmatkiakan peaknum áepsattajai. Tura chíkichcha niijiai tsanirma ainia nunasha niijiai métek ti wáitkiastajai. Ni tunaarín enentáimiar iniaisachar-matañkia túrattajai.

²³ Ni uchiríncha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akiktatjarme.

²⁴ Tura chíkich shuar Tiatiranmayatiram, nú chicham enentáimtuscharmena nu, “nekas iwianchnia uukma” tútaja nu nékachu asakrumin atakka túratniun patatkashtatjarme.

²⁵ Tura Wi jeatsain takakrum nu emetatarum.

²⁶ Nupetmakunka Wi wakeraj nunak tuke initsuk túrana nuna untsurí nunkanam akupkatniun tsanatkattajai.

²⁷ Winia Apar tsankatrukmiá núnisnak akupkatniun tsanatkattajai. Tura nuwe najanamu jirujai awati ijiakratniua áinis ti kakarmajai akupkattawai.

²⁸ Yánkuam káshik jiinia nuna susattajai.

²⁹ Kuíshtinia nu shuar Yusa Wakanj ashí Yus-shuaran timian antukti.” Tu aartá’ turutmiai.

3

Sártisnum chícham áatramu

¹ Nuyá turutmiai ‘Sártisnumia Yus-shuaran wáinin ju áatratá: Siatí Yusa Wakanj takakna nu tura núnisan siati yaan takakna nu, tawai: “Ashí ame túram nuna nékajai. Iwiaakua áintsan wekayatmek Wijainkia jákaitme.

² Shintiarta. Kajinia nu umpuím ekeemakta. Kame Yusjai ísam penker túrichuitme.

³ Yus-Chicham ti shiir enentáijjai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumñkia kasa núnisnak nékatsmin jeartiatjame.

⁴ Tura Sártisnum shuar ishichik pushirí wapik máacharu pujuiniawai. Nusha ti penker áiniak pushí pújun entsarar Wijai wekasartatui.

⁵ Nupetmakuka pushí pújun entsartatui. Tura iwiaaku átinia nu papiniumiã ni naari áarman japirashtatjai. Antsu winia Apar tura ashí nayaimpinmaya suntar ímmianum shiir áujmattsattajai.

⁶ Kuíshtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

Piratírpianam chícham áatramu

⁷ Nuyá turutmiai ‘Piratírpianmaya Yus-shuaran wáinin ju áatratá: Ti shiir túrin tuke nekas tana nu, uunt akupin Tawitia yawirj takaku asa uraimtai chíkich penké epenchamniaiti. Tura epenmiatai chíkich penké uraichminiaiti. Juna tawai:

⁸ “Ashí ame túram nuna nékajai. Kakarmachuitmek winia chichamur shiir enentáimtakum Winia initiuschaitme. Tuma asakmin wáitin uratjame. Nuna chíkich penké epenchamniaiti.

⁹ Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar áiniawai. Nu shuáran, nekas ámin aneajna nuna nekaawarat tusan amjini tikishmatkiarartajai.

¹⁰ Katsuntrata tímiaj nu, shiir umirka asakmin Wisha ti wáitsatin ashí nunkanam átatna nuyá uwemtikrattajme. Nu wáitsatniujaj ashí nunkanmaya shuar nekapnasartatui.

¹¹ Wárik winittiajai. Takakmena nu emetata. Akinkiatniuitmena nuna chíkich shuar atantramkiaraj.

¹² Nupetmakunka winia Yusru jee tankirin awajsattajai. Tura nuyá penké jinkichartatui. Tura njin winia Yusru náarin áatrattajai. Tura winia Yusru péprurj náarincha áatrattajai. Nu pépruka nayaimpinmaya yamaram Jerusarénka Yúsnumiã tára núiti. Núnisan winia yamaram náarun njin áatrattajai.

¹³ Kuíshtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴ Nuyá turutmiai ‘Rautiséanamaya Yus-shuaran wáinin ju áatratá: Wáitruksuk nekasa nunak tiniua nu tura núnisan ashí Yus najanamun Úntriya nu, tawai:

¹⁵ “Ashí ame túram nuna nékajai. Tura michaash míchachuitme. Núnisan tsuërsha tsuërchaitme. Míchaitkiumsha tura tsuéraitkiumsha maak.

¹⁶ Kame míchachu tsuërcha antsu aya tsuésuetak asakmin imiutkattajme.

¹⁷ Iis, “Kuítrinnuitjai, ti irumpraitjai, warinkisha atsumatsjai” tame. Túrasha ashí yajauch, wáitnenmai, kuítrincha, kusuru, tura misú iyajme.

¹⁸ Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Pénker ímprataj tusam jiniium enketai enkeeta.

¹⁹ Aneajna nuna chichareajai. Nu asamtai kakaram ajasam tunaarum enentáimpram iniaisata.

²⁰ Enentáimprata. Shuar wáitiniam wajas untsumna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan ámijaj yurumáttajai. Tura amesha Wijaj yurumáttame.

²¹ Nupetmakuka akupin pujutainium Wijaj pujustatui. Wisha núnisnak nupetmaku asan winia Aparaj akupin pujutainium pujusuitjai.

²² Kuíshtinia nu shuar Yusa Wakanj ashí Yus-shuaran timian antukti.” Tu áartá,” turutmiai.

4

Nayaimpiniam Yúsán shiir awajenawai

¹ Nu nan̄kaasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujai métek kakaram chichartukma nu turutmiai “Juí yakí wakatá. Ukunam átatna nuna iniaktustatjame” turutmiai.

² Nu chichamaik Yusa Wakan̄i akantukmiais. Túrutamtai nayaimpiniam akupin pujutainium pujan wainkiamjai.

³ Niisha jaspi kayasha tura kurnarínia kayasha nujai métek ti wínchauyi. Akupin pujutain tuntiak téntakuyi. Nusha ismirarta kayajai métekeyi.

⁴ Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju entsarainian tura kurin etsenkrakainian, nuí pujuinian wainkiamjai.

⁵ Akuptainiumiá peemsha ipiamtasha untsummasha jíiniarmai. Tura nu pujutainium naka siati shirikip kearmai. Nusha siati Yusa Wakan̄inti.

⁶ Núnisan̄ nu pujutainium naka nayaantsa áanin ti saar amai.

Nu pujutainium wakenmaan̄isha niisháa tañku kuatru téntakar ármiai. Ukur̄in̄isha tura eemsha jíi irunmiais.

⁷ Emka tañku úunt yawáa áanniuyi. Chíkichka turu uchichia áanniuyi. Tura chikichcha shuara yapia áanniuyi. Tura chíkichka churuwia nanamua áanniuyi.

⁸ Nusha sais nanamtin ármiai. Tura jíisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nan̄kaamas kakarmaiti. Tuke yaunchu pujuyayi.

Núnisan̄ yamaisha pujawai. Tura ataksha juke winittiawai” tiniu armai.

⁹ Tura uunt pujutainium pujana nu tuke iwiaaku pujú asamtai nu tanku ti shiir awajsar yúmin̄kiak pujuriarmai.

¹⁰ Túruiniakui paintikuatru uunt tuke iwiaaku pujun tikishmatainiak ni etsenkrutair̄in naka áepuiniak tuiniawai:

¹¹ “Úuntá, ii Yús̄rinme. Tuke shiir awajmainme. Ashí nankaamas kakarmaitme.

Amek ashí írunna nu najanaitme. Tura aya wakerakum najanamame. Ame wakerakmin irunainiawai” tuiniawai.

5

Murikkia papin urakminiaiti

¹ Nuyá akupin pujutainium pujuya nuna untsuur̄in papí penuarma áanniun wainkiamjai. Nu papisha initiaan̄isha tura pátatkesha áarmauyi. Tura urakchamnia atí tusa siati anujtukmajai kaki peekmauyi.

² Tura nayaimpinmayá suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun jaak urakminiait?”

³ Tura nayaimpinmayásha nun̄kanmayásha tura jakamunmayásha chikichkisha nu papin urakmin atsumiayi. Áujtsuk ístinniasha tujinkiarmai. Tímianu akupin atsumai.

⁴ Nu papin uraktincha tura áujtsatniusha, kame ístincha atsakui ti úutmiajai.

⁵ Nuyá chikichik uunt turutmiai “Ti úutíp. Israer-shuarnumiá Úunt-yawá, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

⁶ Nuyá uunt pujutaiya nuí tura kuatru tañkunam ajapén tura úuntnum ajapén Murik wajan wainkiamjai. Maamua áintsan̄ketiat iwiaakuyi. Kachur̄isha siátiyi. Ni jíisha siátiyi. Nusha Yusa Wakan̄i siati ashí nun̄kanam akupramua nuuyi.

⁷ Nu Murik we nekas uunt Akupniun untsuur̄inian nu papin achikmiayi.

⁸ Tura papin achikmatai kuatru tañkusha tura paintikuatru uunt arma nusha Murik-iun tikishmatrarmiayi. Ashí uunt arpa tuntuítain takaku armai. Tura ashí kun̄kuin en̄ketain kuri najanamun takaku armai. Nu kun̄kuin Yus-shuar áujsamuiti.

⁹ Ju yamaram kantancha kantampriarmai:

“Amek imiá nankaamas akupniuitme. Amek papí achikiam anujtukmari jáakminiaitme. Yus-sutai namañkea áinis mantamna asam túramniaitme. Ashí nunkanmaya shuarnumiasha Yusna árat tusam ame numpemjai in sumakmiame.

¹⁰ Turam akupin awajkartusuitme tura núnisañ ii Yúsriniun pujurin awajkartusuitme. Tuma asakmin akupin ajarar ju nunkanam akupkattaji.” Tu kantamainiawai.

¹¹ Tura untsurí nayaimpinmaya suntar uunt pujutaincha tañkuncha tura úuntnasha éñkekawarun wainkiamjai. Nusha nekapmarchamnia ti untsurí armia nu

¹² kakantar tiarmai:

“Murik mantamnamia nu akupin ajar ashí kakarmancha, kuítniasha, nekaatniuncha Niñki achikminiaiti. Tura nupetmaku asamtai yuminsar Nin ti shiir awajsatin áiniawai.” Tu tiarmai.

¹³ Núnisañ ashí Yus najanamu, nayaimpiniam írrunna nusha, nunkanam írrunna nusha, nunká inít írrunna nusha, nayaantsanam írrunna nusha, tuíñian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

¹⁴ Tura kuaru tañkusha “Tuke núnisañ atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

6

Murikkia siati anujtukman jaakmai

¹ Wi iyakui Murikkia chikichík anujtukman jaakmai. Túramtai chikichík tañku ipiamtajai métek kakantar untsurun antukmajai. “Winim iitiá” turutmiai.

² Túrutkui kaway pújun wainkiamjai. Nuñ ekeemia nu tíshimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

³ Nuyá Murik anujtukma jímiaran jáakmatai tañku jímiara nu “Winim iitiá” turutmiai.

⁴ Túrutkui chíkich kawai kapaakun wainkiamjai. Nuñ ekeemia nuna puniá úuntan susamuyi. Nusha shiir pujuscharat tusa ashí jú nunkanmaya shuaran máanaimtikiatniun akupkamuyi.

⁵ Nuyá Murik anujtukma menaintiun jáakmatai tañku menaintiua nu “Winim íitiá” turutmiai. Túrutkui kaway mukusan wainkiamjai. Nuñ ekeemia nusha kijin nekapmatain takakuyi.

⁶ Tura kuaru tañku ajapeniá chichaamun antukmajai. “Tsawant takamtsuk takaakmesha apatkuka penké ishichik sumakmin átatme. Tura núnisañ machasha nijiamchisha amuukacharat tusam penker wáinkiaata.” Tu timiai.

⁷ Nuyá Murik anujtukma kuátrun jáakmatai tañku kuarua nu “Winim iitiá” turutmiai.

⁸ Túrutkui kaway yanñkun wainkiamjai. Nuñ ekeemia nusha Jákatín náartiniuyi. Tura nuna úkurin Jatai nemark winimiai. Nusha ashí nunkanmaya shuar kuaru akankamunmaya chikichkin máatniun akupkarmauyi. Nusha mesetjaisha tsukajajisha sunñkurjaisha tura yajasmajai máawarmai.

⁹ Nuyá Murik anujtukma sénkun jáakmatai Yus-sutai kuñkuin ekemtai wakenmaani íismajai. Túran Yus-Chichaman etserainiakui máawarma wakanin wainkiamjai.

¹⁰ Nusha kakantar untsuriniak tiarmai “Uuntá, ti penker asam támena nu umiátsmek. ¿Urutiak nunká pujuinia nú shuar ii mantamnamunam yapajmiátruktam?” tiarmai.

¹¹ Tuíniakui pushí pújun susar tiarmai “Chikichcha Krístunun etserainiakui mantamnatín áiniawai. Nu náakrum ishichik ayampratarum” tiarmai.

¹² Nuyásha Murik anujtukma sáisan jáakmatai ti úurun wainkiamjai. Tsawai-nantusha iturchat ajarua áintsan mukusa ajarumai. Kashí-nantusha numpá áintsan ajarumai.

¹³ Tura yaasha wampú nere nase umpuim ti majúwa áintsan kákekarmai.

¹⁴ Nayaimpisha papí penuara júamua áintsan menkakamai. Tura naintcha yajá apujnasarmai. Tura nun_kasha nayaantsanam ajapén atentrainia nusha yajá apujnasarmai.

¹⁵ Tura jú nun_kanam akupin ainia nusha náinnium wear kayá wáanam uumkarmai. Niiijaisha ashí shuar, uuntcha, kuítriniusha, suntara kapitiántrisha, ashí kakaram ainia nusha, tura takarniusha an_kant ainia nujai náinnium wearmai.

¹⁶⁻¹⁷ Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

7

Israer-shuarnumiq anujturma armia nu

¹ Nu nan_kaasmatai kuaru nayaimpinmaya_suntar, nun_kaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunni-unmasha nasenkacharat tusar wajatiarmai.

² Kame kukarsha tura nayaantsanmasha yajauch awajsatniun akupkamu armai. Tura chíkich_suntarnasha nantu tátainmaania_winian wainkiamjai. Tuke iwiaaku Yusa anujtutairin takakauyi. Nusha kuaru_suntaran kakantar untsuak tímiai,

³ “Ii Yusrí takarín ainia nu nijiaínium áarar anujtatsriniñ kukarsha, nayaantsasha, tura kampunniusha nasejai yajauch awajsaírap” timiai.

⁴ Tura tímiajni untsurí_aara anujtukman antukmajai. Ashí Israer-shuar tuse (12) shuar weeá ainia nuyá chikichik_sian_tu kuarenta kuaru mir (144.000) armai.

⁵ Jutá weeanmaya_tuse mir (12.000) anujtukma armai. Rupin weeanmayasha_tuse mir anujtukma armai. Kat weeanmayasha_tuse mir anujtukma armai.

⁶ Aser weeanmayasha_tuse mir anujtukma armai. Niptarí weeanmayasha_tuse mir anujtukma armai. Manasés weeanmayasha_tuse mir anujtukma armai.

⁷ Semeun weeanmayasha_tuse mir anujtukma armai. Riwí weeanmayasha_tuse mir anujtukma armai. Ísakar weeanmayasha_tuse mir anujtukma armai.

⁸ Sapurún weeanmayasha_tuse mir anujtukma armai. Jusé weeanmayasha_tuse mir anujtukma armai. Pinjamín weeanmayasha_tuse mir anujtukma armai.

Ti untsurí shuar pújun entsararu

⁹ Nuyá ti untsurí shuaran wainkiamjai. Ashí nun_kanmaya_nusháa shuaraim iruntraru ásar nekapmarchamnia armai. Tura nusha uunt akupin_pujutainium tura Muriknium naka wajaarmai. Tintiuki_nukea áaniun takaku armai. Tura ashí_pújun entsaru armai.

¹⁰ Ashí kakantar untsumainiak tiarmai: “Ii Yusrí uunt akupin_pujutainium eketna au tura Muriksha imia Niñki Uwemtikin áiniawai” tiarmai.

¹¹ Tura nayaimpinmaya_suntarsha uunt akupin_pujutaincha, kuaru tan_kuncha, tura úuntnasha téntatkar armia nu piniakum nun_ká tepersar Yúsan shiir awajsar

¹² tiarmai

“Nekasaiti. Tuke iniaitsuk ii Yusrí ti shiir awajsatniuiti. Niñki ti neka, ti kakaram, ti akupin, tura ti penker asamtai_tuke yumínsatniuiti. Núnisan atí.”

¹³ Nuyá chikichik uunt inintsamai “Pújun entsaru ainia_jusha ¿ya ainia tura tuyá ainia?”

¹⁴ Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjai ni pushiri nijiamawar_puju awajsaru áiniawai.

¹⁵ Nuna túrawaru ásar yamaikia Yusaj_naka pujusar tsawaisha káshisha Yúsnan ni Jeen takainiawai. Tura akupin_pujutainium eketna au_tuke wainkiartatui.

¹⁶ Yamaikia tsukajaisha kitiakjaisha wáitsachartatui. Tura etsasha sukuiniak yajauch awajsachartatui.

¹⁷ Murik, akupin pujutainium naka wajana au, ni murikrín wáiniuk áyureak ti penker púkuni entsa waana nuí apuj Sartatui. Tura Yus ni neajkincha ukuítiurartatui.” Tu túrutmiai.

8

Anujtukma siatia nu jaakma tura kunkuin ekeemataijai túrunamu

¹ Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai.

² Nuyá siati suntar Yusaj naka wajainia nuna wainkiamjai. Nusha siati kachun susamu armai.

³ Nuyá chíkich suntar kunkuin enketain kurijjai najanamun itiamai. Tura Yus-sútainium ayamas wajasmatai núkap kunkuin sunasmai. Nu kunkuin ashí Yus-shuar áuj samujai métek kunkuin ekeematainimum ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai.

⁴ Tura suntar ekeemakmatai kunkuinia mukuintiuri Yus-shuar áuj samujai métek Yúsan amainkiamjai.

⁵ Nuyá nu kunkuin enketain suntar achik ekeematainmaya ji kapaan káirin áimiak ju nunkanam ukaamai. Túramtai ipiamtasha unsummasha, peemsha, tura uúsha armai.

Kachu umpuarma

⁶ Nuyá siati suntar kachun takakainia nu umpuarmatai tusar iwiarnararmai.

⁷ Emka suntar kachun umpuarmatai micha kákekamai. Nunasha ji numpajai pachim-pramuncha nunkanam ajapawarmai. Túmakui menaintiu nakakma jeeán numincha tura ashí íranna nuí ekeemakmai. Tura ashí nunkanam chírichrin takamtsuk ekeemakmai.

⁸ Nuyá suntar jímiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai.

⁹ Núnisan menaint jeeá nayaantsanam matsatainia jákarmai. Tura menaint jeeá uunt kanua nu emesnararmai.

¹⁰ Nuyá suntar menaintiua nu kachun umpuarmatai ti uunt yaa nayaimpinmaya kapaa kákekamai. Tura etsasha tura púkununmasha menaint nakakam jeeánnum kákekamai.

¹¹ Nu yaasha Yapá-numi náartiniuyi. Tura menaintiu nakakam jeeá entsa yapá ajararmai. Túrunamtai ti untsurí shuar nu entsa yapá ajasmájai jákarmai.

¹² Nuyá suntar kuatrua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnarar ajapén tee ajararmai. Túrunawar tsawaiisha káshisha menaintiu nakakam jeeánnum tsáapnircharmai.

¹³ Nuyá chíkich suntar nayaimpiniam nanamun wainkiamjai. Nusha kakantar unsumuk timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

9

¹ Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan tunáa shuar jákaru matsamtai yawirín susamuyi.

² Tura uraimtai nu nánkatkachu wáanmaya ti mukuint jinmiai uunt jiniumiá áintsan. Tura etsanacha tee awajsamai, yuranmincha tee awajsamai.

³ Nuyá nu mukuintiummaya manchi jíintrar nunká ti yujaarmai. Tura ju nunkanmaya titinkia áinis najamin ajastinian susamu armai.

⁴ Chíríchrincha ashí arakmancha ashí numincha yajauch awajsatin suritkiamuyi. Antsu áyatik shuar nijiaínium Yusa naari árar anujtukchamunak yajauch awajsatin armai.

⁵ Túrasha ajaktsuk senku (5) nántutin wáitkiastin susamu armai. Kame titin, shuaran ijiú, najaweá núnis najaweatin susamu armai.

⁶ Nui shuar wari jakataj tuíniayatan jákachartatui. Ti wakeruiniayatan jákatniun tujinkartatui.

⁷ Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapisha shuarna áinis armai.

⁸ Intiashísha nuwanua núnis armai. Naisha úunt yawá najiya núnis armai.

⁹ Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisan téter ajarmai.

¹⁰ Ujukésha titinki ujukea áinis asa janke ajakin armai. Nujai tuke senku nantu yujarsar shuaran íjuar wáitkiastin armai.

¹¹ Ni uuntrisha nánkatkachu waá uraimia nuyaiti. Nusha Israer-chichamjai Apatún tutainti. Tura Kriaku-chichamjainkia Apuriún tutainti. Nuka Yajauch Awajkartin tawai.

¹² Jujai emka wáitsatin nankaamasai. Túrasha tuke jímiar taasai.

¹³ Nuyá suntar saisa nu kachun umpuarmatai chichaman antukmajai. Yusai naka kunkuin ekeemaka Yus-sutai kurimpramu amai. Tura ni kuaru yantame kachu jiniamai. Tura nuyá chichaak

¹⁴ suntar kachu takakun saisa nuna timiai “Kuaru suntar Eupratis kanusá pujuinia nu atiram akupkarta.”

¹⁵ Túramtai nu kuaru suntar wear maintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atiatin ikiusma armai.

¹⁶ Tura suntarnasha kawainium eketainian wainkiamjai. Tura timiá untsurí nekapmarchamnia asamtai aya númirurin antukmajai. Nusha jimiara siantu miyun (200.000.000) armai.

¹⁷ Tura ímiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaku winkia tura yanjú armai. Tura kawaisha úunt yawáa muuke áinin armai. Tura ni weneyasha jisha, mukuintiusha, asuprisha ti tsuer keá nu jiniarmai.

¹⁸ Nu maintiu ti yajauch wáitsamujai maintiu nakakam shuar untsurí jákarmai. Jijiaisha, mukuintiujai, asuprijaisha jákarmai.

¹⁹ Nujai nu kaway ni wenejai shuáran wáitkiasarmai. Tura ni ujuké napí múukeya áinin armai. Nújai shuaran wáitkiasarmai.

²⁰ Tura nujai shuar jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun iniaisacharmai. Nu ántar-yus kurijai, kuítjai, jiru yanikutakujai, kayajai, numijai najanamu ásar wainmaktinniasha, antuktinniasha, tura wekasatniuncha tujintiniawai.

²¹ Núnisan mankartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

10

Papichin suntar takusmia nu

¹ Nuyá chíkich kakaram suntar nayaimpinmaya táarun wainkiamjai. Nusha yurañkim amúamu tura múuknum tuntíak téntakmauyi. Yapisha etsajai métek winchaui. Tura kujapésha ji keá áintsankeyi.

² Nusha papin urak takakauyi. Tura imiá uunt asamtai ni nawé untsuurnumaní nayaantsanam tura menarini kukar tarimias wajasmai.

³ Tura úunt yawá kakar shiniak chicháa áinis ti kakaram untsumkamai. Nujai siati (7) ipiamtasha chichasarmai.

⁴ Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uweje untsuurin nayaimpinmaan takuimiai.

⁶⁻⁷ Tura timiai “Penké ishichik ajasai. Suntar siatia nu umpúakuinkia Yus ashí yaunchu enentáimpramia nu uminkiattawai. Emka ujatsuk ukunam ni shuarin Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nunkancha, nayaantsanacha, tura ashí nuí írunna nunasha najanaiti” timiai.

⁸ Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuurin papin urak takakna nu achiktá” turutmiai.

⁹ Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakeminkia yapamprattame” túrutmiai.

¹⁰ Nuyá papichin suntarnumia jukin yuamjai. Tura nii turutmia núnisan wenuruinkia ti yumin nekapramjai. Tura antsu yuan wakeruinkia yapampramjai.

¹¹ Tura nuyá turutiarmai “Waketkim ataksha ashí nunkanmaya shuaran tura ni kapitiántrinchá Yus tana nu ujakartiniaitme.” Tu túrutmiai.

11

Jimiará shuar Yusaiya akupkamu

¹ Nuyá karisun nekapmatia áaniun surus turutiarmai “Weme Yusa Uunt Jee nekapmartá. Turam namañ-maa-Yus-sutaisha nekapmartá. Tura nuí Yúsán shiir awajeena nusha nekapmartá.

² Antsu jea áarinckia yajaya shuar susamu asamtai nekapmatsuk ikiuktiá. Nu shuar ti shiir péprun Jerusarenkan kuarentitús (42) nantu nuí akupeenak mash yajauch awajsartatui.

³ Túruiniakui Wikia Wii-shuaran jímiaran akatran akupkattajai. Nusha chikichik mir jimiará sianu sesenta (1.260) tsawant pujasar Winian etserkartatui. Nuka menaintiu uwí nankaamasaiti. Útkur-entsatai pushin entsaru átatui.” Tu turutiarmai.

⁴ Nu jímiar shuarsha nayaimpiniam nakumkamu áiniawai. Uriwiu numisha jímiar tura shirikip ekeemataisha jímiar nayaimpiniam awai. Nusha ju nunká Uuntrí Yusai wajainiak, jímiar akatramua nú shuaran nakumainiawai.

⁵ Shuar nin yajauch awajsataj tutai ni weneniá jinia jiki nemasri ashí áesatniuiti. Núnisan nin yajauch awajsatniun wakera nuka jákartatui.

⁶ Nu aentska Yúsán áujmatainiak yumi yutukaip titinian kakarman takakainiawai. Núnisan entsanacha numpa awajsatniun kakarman takakainiawai. Tura ashí yajauchia nujai aentsun wáitkiastinian takakainiawai. Nuna ashí ni wakeruinia nuí páchitsuk túramin áiniawai.

⁷ Tura ni takatrín umikiarmatai Ti Kajen Yajasma nánkatkachu waanmaya jinia nu mesetan najata nupetak máawartatui.

⁸ Tura iwiarnatsuk ni ayashi uunt pepru jintiin ajapén tepeartatui. Nu péprunmasha ii Uuntrí Jesukristuncha máawarmiayi. Nu péprunmaya shuar tuke tunaan túrin áarmatai Ejiptu tuíniak tura núnisan Sutuma tuíniak nu péprun páchiiniawai.

⁹ Tura menaintiu tsawant nuyá nankaamas ashí nunkanmaya shuar jaka tepan ísar iwiarnascharti tiártatui.

¹⁰ Nu jákarmatai ashí nun_{kan}am pujuinia nú shuar ni jakamun ti wararainiak mai sunai ajartatui. Kame nu jimiará aents Yús_{nan} áujmatenak ashí shuaran wáitkiasaru á_{sarm}atai ti warasarmai.

¹¹ Nuyá menaintiú tsawant nuyá nan_{ka}amas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

¹² Nuyá nu nantakiaru nayaimpinmaya kakaram un_{tsum}man antukarmai: “Jui yakí wakatarum.” Tu un_{tsum}miai. Tutai ashí ni nemasri íimiainia_n yura_{nkim} am_{uam} nayaimpiniam wá_{karm}ai.

¹³ Túmainia_i ti ú_{ur}kam_{tai} tias nakakam jeeá pepru saanakmiai. Tura siati mir (7.000) shuar jákarmai nu u_{uj}a_i. Chíkichkia sapijmiainiak Yus nayaimpiniam pujana nuna shiir awajsarmai.

¹⁴ Jímiar wáitsatin nan_{ka}amasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵ Nuyá suntar siatia nu, kachun umpuarmatai chí_{cham} kakaram chichainian nayaimpinmayan antunkamai. Juna tí_{mi}ayi:

“Yamaikia ii Uun_{tr}i Yus tura ni Anaikiamu Kristu ashí shuaran akupin ajasarai. Niisha tuke amutsuk akupkartatui.”

¹⁶ Nuyá paintikuatru uuntka akupin pujutainium Yus_ai naka pujuarmia nu piniakum tepersar Yús_{an} shiir awajenak tiarmai:

¹⁷ “Uunt Yusá, ti kakaram asam Á_{mij}a_i tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmija_i nekas akupkatin juarme yamaikia. Tuma asakmin yum_{in}sajme, tiarmai.

¹⁸ Ashí shuar kajertamkaru a_{in} yamaikia amesha kakerkatin tsawant jeayi. Jákarusha iniantkim ni túramur_i íisartatme. Turam amée shuarka shiir etserturmakua nusha, tura Aminiak enentáimturmasarua nusha, tura Á_{min} shiir awajtamsarua nusha ashí mash ti shiira nuna súakum akiktatme. Antsu ju nun_{kan} emesniuka ashí emesratniunam akupkattame.” Tu tiarmai.

¹⁹ Tuíniakui Yusa Uunt Jee nayaimpiniam ana nu uranmiatai wakenmaan_i Chí_{cham} Aarma Chumpitiai paant amai. Túrunam_{tai} peemsha, ipiamtasha, cháarpisha, u_usha amai tura michasha ti kakekamai.

12

Nuwasha tura Ti Kajen Yajasmasha

¹ Nuyá nakumkamu ti enentáimprannia nayaimpiniam wantinkiamai. Nuwá etsaja_i penuarma wantinkiamai. Nawesha nantunam ekeemai. Tura múuknum tuse yaan etsen_{krak}uyi.

² Nu nuwá ajam_{tin} asa jurertaj tusa wáitiak ti kakantar uutmiai.

³ Tumai ataksha ti enentáimprannia nayaimpiniam wantinkiamai. Ti Kajen Yajasma kapa_{aku} wantinkiamai. Muuk_{esha} siati asa siati akuptai tawaspan etsen_{krak}u á_{rmai}. Tura kachur_{isha} tiásauyi.

⁴ Menaintiu nakakam jeeán yaan ni ujuké_{jai} japiki akakermai. Tura nun_{ká} utsamai. Nu Ti Kajen Yajasma nu nuwá jatema nu_i wajasmai. Jú_{er}mataik yuruataj tusa w_{at}tsamai.

⁵ Tura nuwasha áishman_{kan} jurermai. Nu uchi uunt ajas ashí nun_{kan}am ti kakaram akupkatin asa, nu uchi akupin pujutainium Yus pujana nu_i junakmiai.

⁶ Tura núwaka atsamunam pisarmai. Nu_i pujustinian Yus iwiarturmai. Tura chikichik mir jimiará sian_{tu} sesenta (1.260) tsawant ayurnat tusa akupkamai. Nuka menaintiu uwí nan_{ka}amasaiti.

⁷ Nuyá nayaimpiniam meset amai. Nayaimpinmaya suntara kapitiántri Mikiar ni suntarijijai Ti Kajen Yajasmajai máanaikiarmai. Ti Kajen Yajasmasha ni suntarijijai ti máanaikiarsha

⁸ nupetmakcharmai. Túramtai nayaimpinmaya jiiiki akupkamuyi.

⁹ Núnisan Ti Kajen Yajasma ashí ni suntarijijai nunká akupnakmai. Nu Yajasmasha iwianchi kapitiántri Satanás tutainti. Yáunchuya-napiiti niisha. Ashí nunkanmaya shuáran anañniuiti.

¹⁰ Nuyá nayaimpinmaya kakaram untsunnan antukmajai. Tura timiai:

“Uunt iwianch ii yachin yajauch áujmatin jiiiki akupkamu asamtai yamaikia ii Yusri uwentikratniusha tura ni kakarmarin iniakmastincha tura akupkatniusha jeayi. Anaikiamu Krístusha ashí akupin ajastincha jeayi. Tura uunt iwianch ii yachin tsawaisha káshisha iniaitsuk Yusaj yajauch áujmatniua nuna

¹¹ íksan ii yachi nupetmakarai. Yus-susamu murikiu numpea áinis Jesukrístu numpejai nupetmakarai. Niisha jákatniuitkiusha surimiatsuk nekas-chichaman páchitsuk etserkarmai. Nujajisha uunt iwianchin nupetkarmai.

¹² Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.” Tu timiai.

¹³ Nuyá Ti Kajen Yajasma nunká ajapna nuwa áishmankan jurerma nuna áintraimai.

¹⁴ Turakui nuwan uunt nanapen churuwia nanapea áinis sunasmai. Nujaj nanamuk yáunchuya-napiya pizar atsamunam wemai. Tura ni ayuratniunam menaintiu uwí nuyá sais nantu pujusmai.

¹⁵ Nuyá nu napi ni weneya entsá jiiiki nujan_krumamai nuwan ajekrataj tusa.

¹⁶ Túrasha nunka nuwan yayak nakaak nu entsan mash ukuyámai.

¹⁷⁻¹⁸ Túramtai nuwan ti kajerak ni weeá chikich írunna nujaj máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niijjai máaniaktaj tawai.

13

Nuyá Yajasma jímiara nu

¹ Nuyá nayaantsa káanmatkarin wajasan nayaantsanmaya Yajasma jiniun wainkiamjai. Muukeshá siátitiat kachuri tias tura akuptai tawaspasha tias armai. Ashí muuken Yúsan yajauch chicharin tu áarmauyi.

² Nuí wáinkiamaj nu Yajasma nekas uunt yawáa áinniuitiat nawenka chaj nawea áinniuyi. Wenésha nekas kajen yawáa áinniuyi. Tura Ti Kajen Yajasma Entsayá Yajasma ni kakarmarincha tura ni akupkatniurinchá susamai nujaj ti kakaram akupkati tusa.

³ Entsayá Yajasma muuké chikichkin jakamnia awatmian wainkiamjai. Túrasha péñker awajnasmai. Túramtai ashí nunkanmaya shuar nuna ísar ti enentáimturar nemarsarmai.

⁴ Túrawar nin tikishmatrar shiir awajsar “¿Yaki jujajisha jeá. Imiá kakaram asamtai yaki niijjai máanaikminiait?” tiarmai. Tura Ti Kajen Yajasma ni kakarmarin Entsayá Yajasma susa asamtai ashí shuar nincha tikishmatrarmai.

⁵ Núnisan nu Entsayá Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai.

⁶ Núnisan túrak Yúsan yajauch áujmatuk ni náarincha ni Jéenchá tura ashí ni shuari nayaimpiniam pujuinia nunasha katsekkarmai.

⁷ Tura Yusna ainia nujaj mesetan najana nupetkatniun tsankatnakmai. Tura ashí nunkanmaya shuaran akupkatniun tsankatnakmai.

⁸ Túramtai ashí shuar tuke iwiaaku átinia nu papinium ni naari yámankamtaiknumia anujkamu atsúarma nuka nu Yajasma tikishmatrarmai. Nu papincha Murik jaka nantakmia nu takakui.

⁹ Shuar juna ántakka enentáimprati:

¹⁰ “Shuaran emetá juinia nusha emetnattawai.

Núnisañ shuaran nan̄kijiai mainia nusha nan̄kijiai mantamnattawai.”

Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin áiniawai.

¹¹ Nuyá chíkich Yajasma kukaria wáakun wainkiamjai. Nusha murikiu áanin jimiara kachurtiniuyi. Tura Ti Kajen Yajasma áinis kakaram chichaakuyi.

¹² Niisha Entsayá Yajasma kakarmarín súam akupniuyi. Tura ashí nun̄kanmaya shuaran “Entsayá Yajasma pen̄ké jaa tsuarma nu, shiir awajnasti” tímiai.

¹³ Núnisañ shuarti túrachminian ti turin asa ashí shuar íimiainaiñ nayaimpinmaya jinia nun̄ká ajuarmai.

¹⁴ Tura Entsayá Yajasma súam aents túrachminian ti turak ashí nun̄kanmaya shuaran anañkawarmai. Túrak Entsayá Yajasma nakumkamurín najanawarat tusa akupkamai. Túramtai puniajai pen̄ké jakamnia awatmia péñker ajasma nuna nakumkamurín najanawarmai.

¹⁵ Kukaria Yajasma kakaram sunasmai. Nujai Entsayá Yajasma najanamun iwiaaku awajsatniua ántsañ ichachkiamai. Túram ashí níniak shiir awajeacham máatniun susamai.

¹⁶ Nu arantcha ashí shuar anujmamprarat tusa akupkamai. Uuntcha uchisha kuítrinniusha kuítrinchasha an̄kantcha an̄kantchasha ashí ni nijiañcha tura wakerakka untsuurincha anujtuktiniuyi.

¹⁷ Entsayá Yajasma náarín tura wakerakka ni náari númerurín anujtuktiniuyi. Túrachuka sumatnasha sumakchamniuyi, surutnasha surukchamniuyi.

¹⁸ Wats, wi tájana ju nekaatniuka ti nekas enentáimtustiniaiti: Entsayá Yajasma númerurí áishmañka númerurí asa sais sian̄tu seséntisáisaiti (666). Ashí ti neka ainia nú shuar Entsayá Yajasma númerurín nekapmar nin nekaati.

14

144.000 shuar Yúsan kantampruawarma

¹ Nuyá Murikiun Seun náinnium wajan wainkiamjai. Níjiañsha sian̄tu kuaréntikuátru mir (144.000) shuar wajaarmai. Nusha nijiaí Murikiu náaríncha tura ni Aparí náaríncha anujtukma aarmai.

² Ti untsurí árpan nayaimpiniam túntuiniak teer awajenak kanusa uuntri nujan̄krak téter ajá núnisañ antukmajai. Ti kakaram ipiamta núnis amai.

³ Nu tuntuiyamujai sian̄tu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuaru tan̄kunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu sian̄tu kuaréntikuátru mir shuarka ju nun̄kanmaya shuarnumiá uwempraru ásar nu kántan kantamiarmai.

⁴ Nu shuarsha nuwajai yajauch ajascharu ásar ti shiir áiniawai. Túrawar Murik weana nuñ nemarainiawai. Ju nun̄kanmaya shuarnumiá uwempraru ásarmatai Yussa tura Muriksha ti shiir enentáimtiarmai. Niisha emka juukma ti shiira núnisañ armai.

⁵ Nu shuar pen̄ké wáitruachu ásar Yúsañsha ti shiir tunáa máatrachu armai.

Menaintiu suntar chichaman etserainiawai

⁶ Nuyá nayaimpiniam suntar nanamun wainkiamjai. Nusha uwempratín chicham tuke amuukashtinia nuna ashí nun̄kanam pujuinia nú shuaran ujakartiniuyi.

⁷ Nusha ti kakantar untsukum timiai: “Yus ashamkatarum. Niñki shiir awajsatarum. Yamaikia ashí shuaran súmamtikiawartin tsawant jeayi. Nayaimpincha nunñkancha nayaantsan cha ashí entsan cha najana asamtai shiir awajsatarum.”

⁸ Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisan ashí shuaran anampratniua núnisan utsuurmai. Tuma asa niisha nú shuarjaj nupetnak tuke emesnarai.”

⁹ Nuyá chíkich suntar, menaintiua nu, taa timiai: “Shuar Entsayá Yajasmancha tura ni nakumkamuríncha shiir awajeakuñkia tura nijaiñiumsha uwejunumsha ni naari anujtukmaitkuñkia

¹⁰ Yus nin kakerak ti asutiáttawai. Yapá pachimprachman áartinia áintsan ti kakerkat-tawai. Túramtai asupri ti tsúer keá nujaj jinium wáitsartatui. Yusa suntari tura Murik íimmianum apenáwar jinium wáitsartatui.

¹¹ Ni wáitsatniuri ji esaak kajintsuk tuke mukuñtia nuniskete. Entsayá yajasman tura ni nakumkamurin shiir awajeenak ni naari anujmamañia nuka tsawajsha káshisha ayamtsuk wáitsartatui.

¹² Nu asamtai ni chichamen umirainiak Yusna ainia nuka Krístun ti shiir nemarkainia ásar nu tsawantaj iturchatnum pujuñiak katsuntratín áiniawai.”

¹³ Nuyá nayaimpinmayá chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

“Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkiertatui” tawai” turutmiai.

Jú nunñkanam arakma juukma

¹⁴ Nuyá yuranñim puñun wainkiamjai. Tura yuranñimiam Aents Ajasua nuna eketun wainkiamjai. Akuptai tawaspan kurijijaj najanam etsenkrakuyi. Tura machitian éren takakuyi.

¹⁵ Tura chíkich suntar Yusa Uunt Jeeñia jiinki yuranñimiam eketun kakantar chicharuk tímiyai “Árak júuktin tsawant jeayi. Machitrumjaj tsupiram juuktá.”

¹⁶ Tutai yuranñimiam eketu ni machitrijijaj nunñka arakman tsupir juukmai.

¹⁷ Nuyá chíkich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi.

¹⁸ Tura chíkich suntar namañ maar Yus-sútainmayá jíinkimiai. Niisha jinia wáinniuyi. Tura máchit ti éren takakun kakantar chicharuk timiai “Machitrum ti érea nujaj uwa nunñka arakma nu tsupiram juuktá. Mash tsamakarai.”

¹⁹ Tutai suntar ni machitrijijaj ashí nunñkanmayá uwa nerén tsupir juukmai. Tura neketainiam chumpiamai. Nu neketai Yus ti kakerak shuáran ti asutiáttá nuna nakumeawai.

²⁰ Tura uunt péprunmayá arantach ijiurarmai. Tura neketainmayá numpa jíinkimiai. Nu numpa tres sianñtu (300) kirumitrua nuñ pajamar kawayu nuññijaj métek ajasmai.

15

Nayaimpinmayá suntar amúamunam wáitkiastinia nuna pininñumian ukainiawai

¹ Nuyá ashammian ti enentáimpramñian nayaimpiniam wainkiamjai. Siati suntar amúamunam wáitkiastinia nuna takusarmai. Nujaj ju nunñkanam yajauch shuáran ti wáitkiasar Yus kajeamun umirtatui.

² Nuyá antumianka áiv 20 Tura uunt péprunmayá aranñsan ti saar jijaj pachimpramun wainkiamjai. Ni káanmatkaríncha Entsayá Yajasman tura ni nakumkamuríncha nupetkarma nu nuñ wajaarmai. Tura nin arpa tuntuitiain Yus súarmai.

³ Túramtai kantamáwarmai. Yusa yaintri Muisaisa kantaríncha tura Murikiu kantaríncha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha péñkera nu túriniaitme.

⁴ Uuntá, ¿yaki ashampramkachat? Tura yaki ti shiir awajtamsachat? Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

⁵ Nuyá atak Yusa Uunt Jeen ísan, Ti Shiir Tesaamun uranniun wainkiamjai.

⁶ Tura Ti Shiir Tesaamunmaya siati suntar siati wáitkiastinjai jíinkiarmai. Niisha ti shiir pújun entsaru armai. Netsepnunsha kurin emenmama armai.

⁷ Nuyá kuatru tañkunmaya chikichik kurí piniñkian súsarmai. Nu piniñ tuke iwiaaku Yusa kajetairijiai piaku armai.

⁸ Tura Yusa kakarmari ti ashammai Ti Shiir Tesaamunam mukuintiua núnis piakmai. Túramtai nu siati suntar wáitkiastinian ukarar amuniatsain Yusa Jeen wayachminiuyi.

16

Wáitkiastin piniñ ukararma

¹ Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nunká werum Yusa kajetairi siati piniñnum ana nu ashí ukartarum.”

² Tutai emka suntar we, piniñnumiá kukar ukarmai. Túramtai ashí shuar Entsaya Yajasma náarin anujmamprar ni nakumkamurin shiir awajiarma nuna ti najamin kuchap jiintiurarmai.

³ Nuyá chikich suntar jímiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nuí pujuinia nu kajinjiarmai.

⁴ Nuyá suntar menaintiua nu, entsanam tura púkununmasha ukarmai. Túramtai ashí numpa ajasarmai.

⁵ Nuyá suntar entsá wáinnia nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíiraitme.

⁶ Iis, nu shuar amée shuárumincha tura ame chichammin etserniuncha máawar ni numpen ukatraru áarmatai Amesha núnismek numpa áarume. Maa, páchitsuk áitkianatin áiniawai.”

⁷ Tutai naman-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸ Nuyá suntar kuatrua nu, tsawaj nantunam ukarmai. Túramtai jijiai shuáran esaa-mujai wáitkiastin kakaram sunasmai.

⁹ Tura shuar ti sukuám wáitarmia nu, nu wáitkiastinian nérenniun Yusan yajauch chicharkarmai. Tura ni tunaarin enentáimtsuk Nin shiir awajsatniuncha penké naki-trarmai.

¹⁰ Nuyá suntar senkua nu, Entsaya Yajasma akupin pujutairin ukarmai. Túramtai ni nunkeen ashí kashi ajasmai. Tura shuar ti najaimiainiak iniaincha esamiarmai.

¹¹ Tura nújaisha yajauch túratniuncha iniaisacharmai. Antsu kuchaprijjaisha tura ti najaimiainiak wáitiainiak nayaimpinmaya Yusan ti yajauch chicharkarmai.

¹² Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniá akupin taarti tusa jintiamnamai.

¹³ Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukariá Yajasma ántar yúsnan etserniua nuna weneyasha puachia núnin yajauch wakan menaint jíiniarmai.

¹⁴ Íwianch áiniak aents tujintiamun túruiniak ashí nunkanmaya akupniun irurarmai. Ti Tujincha-Yusai ni uunt tsawantri jeamtai mesetan najanatai tusar weriarmai.

¹⁵ (Yamáí Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairín péñker wáinia nú shuar ti shiir átatui. Misuchu asa natsaarchattawai.” Tu tawai.)

¹⁶ Tura yajauch wakan uunt akupin áinian Armajetún nuñkanam irurarmai. Israerchichamnum nu nuñka tu anaikiamuiti.

¹⁷ Nuyá suntar siatia nu, nasenam ukarmai. Túramtai nayaimpinmaya Yusa Uunt Jeenia ti kakaram chicham Yus akupin pujutainmaya chichaak “Mash uminkiai” timiai.

¹⁸ Tura nuyanka peemsha, chárpisha, ipiamtasha ajamai. Tura nuñkasha ti kakaram úurkamai. Maa, aents jú nuñkanam yámankamtaik pujuarmia nuyá júnis úurkamuka atsuwiti.

¹⁹ Ti Uunt Péprusha menaint nakantramai. Ashí nuñkanmaya péprusha saanakiarmai. Nuñsha Yus ti kajerak Papirúnia pépruncha kajinmattsuk ni kajetairín yapá umutaia áintsan aarmai.

²⁰ Entsa ajapén atentrasha tura murasha menkaramai.

²¹ Núnisan nayaimpinmaya uunt kaya núnisan micha kákeramai. Ti uunt áiniak kintiarjai métek kijin armái. Shuarsha nujai ti wáitiainiyatan áyatik Yúsan yajauch chicharkarmai.

17

Tsanirmatai nuwa asutiámu

¹ Nuyá siati suntarnumiá chikichik taruti turutmiai “Winitia. Tsanirmatai nuwa ti asutiátniun iniaktustajame. Nu nuwa nayaantsanam uku eketui.

² Ashí ju nuñkanmaya akupin niijjai tsanirmawaru áiniawai. Núnisan ashí ju nuñkanmaya shuar, nu nuwa tsanirmatniun tsankateam, nijiamanch umartinia áintsar niijjai ti yajauch túrawar nampekarmai.” Nuna taku Yusnumiá kanaktinian nakumkamai.

³ Nuyá mesekranam kampuntin atsamunam jurukmiai. Tura nuñ Yajasma kapaakunam nuwa eketun wainkiamjai. Nu Yajasma nasha ashí Yúsan yajauch chichareamu áatramuyi. Muuke siátitiat kachurí tiásauyi.

⁴ Nu nuwasha tarachin yamakai kapaakujajisha ti shiir iwiarmamar entsaruyi. Kurijajisha, shírmach kayajajisha, ti shiir sháukjajisha iwiarmamprauyi. Kurí piniñkian muñmiainnisha tura ashí ni tsanirmatairí imiá yajauch armia nunasha piakun ajaa-mak takakauyi.

⁵ Nijiainiunsha ni naarja áintsan yúpichuch nekaachminia nu júnis áarmauyi: UUNT PA-PIRÚNIA, Ashí Tsanirmauncha tura Ashí Ju Nuñkanam Muñmiainian Túrinia Nunasha Nukurinti.

⁶ Nu nuwasha Yus-shuar Krístunun etserkar máawarma ainia nuna numpen nampekuyi.

Nuna wáinkian ti enentáimturmajai.

⁷ Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktajame. Núnisan yajasma ekenak júana nunasha paant ujaktajame. Muukasha siátichukait tura kachurísha tiáschak áinia.

⁸ Nu yajasma wáinkiam nuka yaunchu pujuwiti tura yamaikia juñ pujachiat amúamunam tuke játsuk nánkatkachu wáanmaya jíinkíttiawai. Shuar nuna wáinkiar ni naarí tuke iwiaaku pujutai papiniun yámankamtaiknumiá anujtukchamua nuka nu yajasma ashamkartatui. Nu yajasma yaunchu pujú yamaikia atsayat atak wantinkiatawai’ turutmiai.

⁹ ‘Nekas neka ainia nu júna enentáimturarti: Siati muukenka siati náintian nakumui. Nu nuwa nuñ eketui.

¹⁰ Núnisan̄ ni siati muuke siati akupniun nakumui. Kame senku akupniuka nan̄kaamasaru ainiawai. Chikichik tuke akupniuiti tura chíkichka tuke taatsui. Nii taasha núkap tsawant akupkashtatui.

¹¹ Nuyá ashí ukunmaṅka yaunchu amia nú yajasma wantiniak nujai uchu akupin ajastatui. Túmaitiat chíkich siati akupniujai iruram métek enentáimpramniaiti. Tura nu yajasma yamaikia atsayat wantiniak akupak umik tuke emesnartinnium wétatui' turutmiai.

¹² 'Tias kachurj wáinkiam nuka tias akupin tuke akupeenatsna núiti. Niisha nu yajasmajai métek penké ishichik tsawant akupin ajasartatui.

¹³ Ju tias akupniusha métekrak enentáimiainiak ni kakarmarj̄n yajasman súsartatui nújajisha akupkat tusar.

¹⁴ Murikjajisha mesetan najanawartatui. Túrasha Murik nupetkartatui. Niisha uuntjai nan̄kaamas Uunt asa tura núnisan̄ akupniujai nan̄kaamas Akupin asa nupetmaktatui. Tura Nijijai írutraa nu, Yus Winia atí tusa achikma ásar tura Nin tuke umirj̄n ásar Nijijai nupetmakartatui.'

¹⁵ Suntar tuke chichartak turutmiai 'Tsanirmatai nuwá nayaantsanam uku eketu wáinkiachumek. Nu nayaantsaka ashí nun̄kanmaya shuáran nakumeawai.

¹⁶ Tura tias káchuka yajasmanum wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha yuawartatui tura áesawartatui.

¹⁷ Nu akupniu enentáin Yuska ni wakeramurj̄n apujsaiti. Nii timia nu umintsaj̄n akupniusha métekrak enentáimprar ni kakarmarj̄n takamtsuk yajasman súsatniun enentáimtikramai.

¹⁸ Nuwá wáinkiam nuka ashí nun̄kanmaya akupniun akupeana nu pépruiti."

18

Papirúnia emesramuiti

¹ Nuyá nayaimpinmaya suntar táarun wainkiamjai. Ti kakaram akupin asa nun̄kancha tsáapin awajsamai.

² Tura ti kakantar chichaak timiai "Pai, Uunt Papirúnia penké meserai. Tura yamaikia íwianch matsamtaisha ashí yajauch wakanj̄ pujutairj̄sha ajasai. Mujjmiai nanamtincha tura ashí yajauch nanamtin ainia nusha nuj̄ pasun̄mainiawai.

³ Nu péprunmaya shuar tuke tsanirmawua núnisan̄ ashí nun̄kanmaya shuaran anampratniua núnisan̄ ni ti yajauch turamujai utsuurmai. Núnisan̄ ashí jú nun̄kanmaya akupin Yúsan iniaisar nijijai tsanirmawarua áinis áiniawai. Tura shuarsha ni yajauch wararmajai ti kuítrintin ajasaruiti." Tu timiai.

⁴ Nuyá nayaimpinmaya ti kakantar chichaman antukmajai. "Wíi shuaraitrumna nuka nú peprunmaya jíinkitiarum. Túrachkurmeka ni tunaarj̄ jumamkirum ni wáitsatniurj̄ncha pachiínkiattarme.

⁵ Ni tunaarj̄sha ti piak nayaimpiniam jeastatuk ajasai. Tuma asamtai Yus ni tunaarj̄n kajinmatkichuiti.

⁶ Ni tunáa túramujai métek akikiam ataksha nuna nan̄kaamas métek patattsata. Ni yajauch túramu nijiamchin ashí áararma núnisan̄ nuna nan̄kaamas ti wáitsatin nijiamanch pachimpruram susata.

⁷ Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaitiat ni enentáinkia enentáimias "Uunt Akupniuitjai. Wajechu asan penké wáitsashtiniaitjai" tu enentáimtumawai.

⁸ Tuma asamtai ti wárik chikichik tsawantaj̄ ni wáitsatniurj̄ tarittiiawai. Jákatniusha ti wáitsatniusha tura tsukasha tarí ashí jijijai ekeemankattawai. Uunt Yus ashí Tujincha nu kajerkamú asa nujai asutniáttawai." Tu timiai.

⁹ Ashí nun_{kan}maya akupin niij_{ai} tsanirmawaru ainia nu ashí yajauchin niij_{ai} wararsaru ásar nu pepru esaak múkuint ajakui e_{ar}armai.

¹⁰ Ti esaak wáitiakui nu_i pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniur_i tarini.”

¹¹ Núnisa_n ashí nun_{kan}nam súrin ainia nusha nu péprun ti kuntuts enentáimturar e_{ar}artatui. Ni surutain itiamun ζ yaki sumarkat?

¹² Kame juna itiaru áiniawai: kurincha, kuítniasha, kaya shíirmachincha, ti shiir sháuknasha, ti pé_nker tarachniasha, akupin entsatai shiirmachin yamakaincha kapa_{an}niuncha, sétancha, itiaru áiniawai. Núnisa_n ashí kun_{ku}in numincha, ti shiir awara najanamuncha, ti shíiram numincha, yan_{kú} jiruncha, pe_nké jiruncha, mármur kayancha itiaru áiniawai.

¹³ Núnisa_n ishpi_nnasha, nusháa kun_{ku}inniasha, mira kun_{ku}inniasha, umutaincha, asuitincha, trikiu ner_encha, tura trikiu ti pé_nker neke_nmancha itiaru áiniawai. Núnisa_n áintstai ta_nkuncha, murikniasha, kawaincha ni káru_{ri}j_{ai}, tura nú arantka shuárnasha suruktinian itiaru áiniawai.

¹⁴ Tura nu péprun tiarmai “Numí ner_en ti wakeruk súmauya nu yamaikia nu_i atsawai. Ashí ni kuítr_isha tura ashí ni pé_nker_isha tuke pe_nké amuukayi.” Tu tiarmai.

¹⁵ Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar e_{ar}artatui.

¹⁶ Túrawar tiartatui “Maa, uunt pépruitiat ti wáitnenmai ajakai. Nuwa ti pe_nker iwiar-mampra áinis nuyá shuar akuptai tarachin yamakaij_{ai} kapa_{aku} entsarmai. Kurij_{ai}isha kaya ti shíirmachij_{ai}isha tura ti pe_nker sháukj_{ai}isha ti shiir iwiarmampraruyi.

¹⁷ Ti wárik ashí ju kuit amukaiti.” Tu tiarmai.

Ashí uunt kanú kapit_{ián}tr_isha, ashí nayaantsanam katiinia nusha, ashí kanú wiánniusha, tura ashí kanú nérennur_isha árantak wajasarmai.

¹⁸ Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.”

¹⁹ Tiar ti kuntuts pujuiniak awatmamar kakantar úutainiak tiarmai “Maa, ti uunt pépruitiat ti wáitnenmai ajakai. Ashí uunt kanu nérentin nayaantsanam niij_{ai} takasar kuítrintin ajasarmai. Tura ti wárik mash emesnarai.” Tu tiarmai.

²⁰ Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamuj_{ai} warastarum. Nu wáitsamuj_{ai} atumin yajauch awajtamsamarmena nuna yapajtiurmakurme.

²¹ Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisa_n uunt pepru Papirúnia emesnar atakka wainniakchatin tuke men_{ka}kattawai.

²² Tura atakka jantsemma pi_nkiuisha tampursha shakapsha antunkashtatui. Nu arantcha nu_nkia shuar pe_nké takakmaschartatui. Túramtai nekeamusha antunkashtatui. Ashí mitia átatui.

²³ Shiripkincha ekeemakchartatui. Nuatma nampersha antunkashtatui. Nuikkia ni shuar_i súrin arma nu ashí nun_{kan}nam na_nkaamantu armai. Tura ashí nun_{kan}maya shuaran waweatniua ántsa_n níiya núnis ajasarat tusa ana_nkawarmai. Túrashá núnisa_n ti kakarmaitiat ju mash túrunayi.” Tu timiai.

²⁴ Kame ni akupkamuj_{ai} pé_nker shuar ti mantamnawaru asamtai nu péprunam ashí yaunchu Yusna etserniu numpesha, ashí Yus-shuara numpesha tura pé_nker shuar ashí nun_{kan}nam maamu ainia nuna numpesha nu_i paant wáinkiamniaiti.

19

¹ Nuyá nayaimpinmaya ti untsur_i aents kakantar untsuainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nan̄kaamaku átinniasha, tura ashí kakarmancha nekas nérenniuiti.

² Niisha aya nekas péñker túratniua nuna túrin asa ti nukap tsanirmaun ashí shuaran tsanirijjaj̄ utsuun ti asutiáyi. Nin ti wáitkias ashí ni shuar̄j máawarman yapájmiátkaiti” tiarmai.

³ Ataksha kakantar untsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴ Tuíniakui paintikuatru uunta nu tura kuatru tañkusha nun̄ká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai.

⁵ Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitánitkiurmesha péejchachitkiurmesha, ii Yusri tuke shiir awajsatarum.” Tu timiai.

Murik nuatnaikiatin namperi

⁶ Nuyá ti untsurí aents chichainiak kanusa uuntri nujan̄krak téter ajá núnisan̄ antukmajai. Ti kakaram ipiamta núnis amai.

“Tí shíiraiti, tiarmai. Ii Uuntri Yus ashí tujincha asa ashí akupkatniun nan̄kaamayi.

⁷ Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantri jeayi. Tuma asamtai ti shiir warasar nincha shiir awajsatai.

⁸ Murikiu anajmarmarin̄kia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar péñker túramun nakumeawai.

⁹ Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Juka Yus timia asa imiá nekasaiti.”

¹⁰ Takui nu suntaran shiir awajsataj tusan tikishmatramjai. Túramtai turutmiai “Peñke áinkiaip. Wisha Yusa yáintriñtjai ámijjaj̄ métek tura yatsumjaj̄ métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

Kaway pújunam eketna nu

¹¹ Nuyá nayaimp uranniun wainkiamjai. Nuñ kaway puju wantinkiamai. Nu kawaynium ekeema nuna naar̄j Ti Peñker Umin tutajyi. Núnisan̄ Ti Nekas Turin tutajyi. Ti peñker Akupin asa aya nekas péñker túrak mesetan najanaiti.

¹²⁻¹³ Ni jíisha jijjaj̄ métek keeármiai. Múuknumsha akuptai tawaspan untsurí et-sen̄krakuyi. Nuñ ni naar̄j Yus Chicham áarmauyi. Túrasha tana nuna Niñki takamtsuk nekaamai. Numpajaj̄ en̄kerman entsaruyi.

¹⁴ Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmai.

¹⁵ Nu suntara Uuntri weneeya, ashí nun̄kanmaya yajauch shuaran máatin, puniá mai ere tsakatskatin jíinmiai. Tura jirujaj̄ asutiátniua áintsan̄ ti kakaram akupkattawai. Túrak Ashí Tujincha Yusa kajetair̄j ti kakarma nujaj̄ shuáran asutiáttawai. Uwa neken̄kar ijiuratniua áitkiasan̄ wáitkiasartatui.

¹⁶ Ni pushir̄incha makuin̄cha ni naar̄j áarmauyi: Ashí Akupniun Akupin tura Ashí Uunta Uuntri.

¹⁷ Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin̄ yurumáitarum.

¹⁸ Akupniu namankésha yuítiarum. Suntara kapitántri namankésha, kakaram suntara namankésha, kaway namankésha tura eketainia nuna namankésha, kame ashí shuara

namañkés̄ha nañkaamantu ainia núnasha tura penké shuar ainia núnasha yuítiarum.” Tu untsukmai.

¹⁹ Tura nuyá Entsaya Yajasmacha tura jú nunkanam akupin ainia nunasha ashí ni suntarijjai wainkiamjai. Niisha kawainium eketka nujai tura nuna suntarijjai mesetan najanatai tusar iruntrarmai.

²⁰ Tura nu mesetnum Yajasmasha tura Kukaria Yajasmasha, penké ántar yúsna etserniua nu, mai achinkiarmai. Nuikkia Entsaya Yajasma ni kakarmarin súam nu Kukaria Yajasmaka aents tujintiamun ti turak shuáran anañkawarmai. Túramtai nu shuar Entsaya Yajasma náarin apujmamsar ni nakumkamurin shiir awajsarmai. Tuma asantai Entsaya Yajasmacha tura Kukaria Yajasmacha íwiakuk asuprijjai ti kea nu jiantumiannum apeáwarmai.

²¹ Chíkichka kawainium eketkanumiá puniá tsakatskatin weneyá jiinmia nujai mantamawarmai. Túramtai nanamtin ni ayashin yuawar ejemakarmai.

20

Kristu mir uwí jú nunkanam akupkattawai

¹ Nuyá nayaimpinmaya suntar táarun wainkiamjai. Nusha nánkatkachu waa yawirin tura jin kiatai jirun kampurman takakuyi.

² Nu suntarsha Ti Kajen Yajasma jiru kampurmajai jin kiamai. Nu Yajasma iwianchi kapitiantri Satanas tutainti. Yáunchuya-napiti niisha. Tura nu iwianchin jin kiá mir uwí pujusat tusa

³ nánkatkachu waanam epenmiai. Tura waiti uraichminian anujtukmai. Mir uwí nañkaamatsain ashí nunkanmaya shuáran anañkawarain tusa túramai. Antsu mir uwí nañkaamasmatai ishichik tsawant ankant akupnaktiniati.

⁴⁻⁵ Nuyá akupin pujutainium pujuinian wainkiamjai. Tura shuara túramurin írsarat tusa kakaram sunasarmai. Tura núnisan muuke tsupirka maamu wakanincha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmacha ni nakumkamurincha tikishmatracharu armai. Núnisan náarincha nijainiumsha tura uwejunumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krístujai métek mir uwí akupeamun wainkiamjai. Antsu chíkich jákaruka mir uwí nañkaamatsain nantakcharmai.

⁶ Antsu emka nantaktin tsawantnum pachiinkiarua nú shuar, ti penker áimak, ti shiir warasmin áiniawai. Nu shuarka jimiará jákatniunam pachiintsuk Yusna tuke takarin tura núnisan Krístunu tuke takarin ártatui. Tura Krístujai métek mir uwí akupkartatui.

⁷ Tura mir uwí nañkaamasmatai uunt iwianch urani akupnaktatui.

⁸ Túram ashí nunkanmaya shuáran anañkawartaj tusa jínkittiawai. Kuk nunkanmasha tura Makuk nunkanmasha ashí pujuinia nuna anañkawartatui. Tura mesetan najanataj tusa ni suntarin nekapmarchamnia ti untsurí irurtatui.

⁹ Tura ashí nunkan enetak Yus-shuar matsamtaincha tura Yus ti aneamu pépruncha mash éñkekarmai. Túramtai Yus nayaimpinmaya jinia akuptuk mash áesawarmai.

¹⁰ Tura iwianchi kapitiantri, nin anañkawarmia nu, asuprijjai keá jiantumiannum apenámai. Nu yaunchusha Entsaya Yajasmasha tura Kukaria Yajasmasha, penké ántar yusna etserniua nu, nu apenáwarmai. Nuisha tsawaisha káshisha inianatsuk ti wáitsartatui.

Ashí amúamunam súmamtikiatin tsawant

¹¹ Nuyá akupin pujutain úntan tura ti pújun wainkiamjai. Tura nu pujanha wainkiamjai. Niisha ti kakaram asantai nunkasha nayaimpisha aya menkarar tuke atsúarmai.

12-13 Tura túrunatsain nayaantsanam jákarua nusha jíinkiarmai. Núnisan iwiarsamunam jaka pujuinia nusha jíinkiarmai. Tura jákaruncha, nankaamantu arma nunasha tura penké shuar arma nunasha, ashí wainkiamjai. Tura Yusaj naka wajaarmai. Nuyá ashí shuar túramu aakma papí urantrarmai. Tura nu papinium aarma nujaj métek ashí ni turamurj paant nékaneakui súmamtiknawarmai. Tura chíkich papisha tuke iwiaaku pujustin papí urankamai.

14 Nuyá jákatin amuukati tusa ji-antumiañnum apenámai. Nu ji-antumiañnum wétin jimiará jákatin tútainti.

15 Tura ashí shuar ni naarij tuke iwiaaku pujustin papinium atsúarma nusha nuj apenáwarmai.

21

Nayaim yamaram tura yamá nunka

1 Nuyá nayaimpisha tura nunkasha menkaramtai nayaim yamarman tura yamá nunkancha wainkiamjai. Tura nayaantsasha atsumai.

2 Wi, Juan, ti shiir péprun, Yusnumiá yamaram Jerusaréñkan nayaimpinmaya táarun, wainkiamjai. Anajmarma ni áishrin inkiuntaj tusa ti shiir iwiarmampra áintsan ti penker iwiaramuyi.

3 Nayaimpinmaya ti kakantar chichaamun antukmajai. “Iisiá, Yus yamaikia aentsjai pujawai. Tuke niijiai pujakui ashí ni shuari ártatui. Tura niijiai tuke pujak nekas tuke ni Yusri ártatui.

4 Yus ni neajkin ujurturartatui. Tura nuik amia nuka ashí amuukarmatai jákatniusha, úuttincha, wáitsatniusha, tura najaimiatniusha atsuttawai.”

5 Tura akupin pujutainium ekema nu “Iistá, Wi ashí penké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.”

6 Ataksha turutmiai “Yamaikia mash uminkiyai. Wiitjai. Yámankamtaiknumiá amúanmasha tuke pujuwitjai. Wisha A rétranmaya Y rétranam ashí retra áintsaitjai. Ashí kitiama núnaka tuke iwiaaku pujutai entsan penké kuitchajai áartatjai.

7 Nupetmakunka ashí yamarma juna mash susattajai. Wisha ni Yusri ártatjai. Núnisan niisha winia uchir ártatui.

8 Antsu sápijka, Yúsan enentáimtichusha, yajauchin máatrasha, mankartincha, tsanir-matan pujurniusha, wawekratniusha, ántar-yusan tikishmatniusha, tura ashí wáitrincha asupriijai keá ji-antumiañnum apenáwartatui. Nuka jimiará jákatin tútainti.”

Yamaram Jerusaréñ

9 Nuyá siati suntar piniñ amúamunam wáitkiastinjai piakun takakua nuyá chikichik taruti túrutmiai “Winitá. Murikiu anajmarmarin iniaktustatjame.”

10 Taku mesekranam naint yakí juruki Yusnumiá ti shiir Jerusaréñ pepru nayaimpinmaya táarun iniaktursamai.

11 Nu péprusha Yusa wincharijjai tsáapniniuyi. Nu tsáapnincha kaya ti shíirmachia núnis jaspí kaya nuní saar asa ti tsáapniniuyi.

12 Pepru yantamesha ti yakí penkramuyi tura wáitirij tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naarij áarmauyi.

13 Nantu tátainmaanij menaintiu waiti amai. Nantu akatainmaanisha menaintiu waiti amai. Nunkaanisha menaintiu waiti amai. Arakaanisha menaintiu waiti amai.

14 Ti uunt kaya tuse apujsamu armai. Tura nuj ekenir penkramuyi. Nu tuse kayanam Murikiu akatramurij tuse armia nuna naarij áarmauyi.

15 Suntar wijijai chichaua nu, nekapmatain kurin takakuyi. Nujai pépruncha, wáitirincha, tura penkramurincha nekapmartiniuyi.

16 Pepru esant_isha wan_kant_isha yakir_isha mash métekrak armai. Suntarsha péprun nekapmataij_i nekapmaram esant_isha wan_kant_isha tura núnisan_n jeamkam_u yakir_isha jimiará mir jimiará sia_ntu (2.200) kirúmitru amai.

17 Nuyá pé_nkrincha nekapmarm_ai. Suntar aents nekapmataij_i nekapmaram sesen-tikuatru (64) mitru amai.

18 Nu pé_nkramusha jaspi kayaj_i najanamuyi. Péprusha aya kúrikiyi. Nu kuri ti pe_nker sáarauyi.

19 Pe_n apujtukma kayasha ti shiir kaya ainia nuj_ai najanamu asa ti shiir iwiamuyi. Emka nu jaspi káyauyi. Jímiara nusha sapiru káyauyi. Menaintiua nusha ákata káyauyi. Kuatrua nusha ismirártauyi.

20 Sen_kua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatísta káyauyi. Ti kayaim apujsamu asamtai ti shíirmachi_iy_i.

21 Pepru wáitir_i tuse ainia nu, ti shiir nayaantsanmay_a shaukj_ai chikichik najanamu armai. Pepru jint_isha aya kúriki_iy_i. Nu kuri ti pe_nker sáarauyi.

22 Yusa Uunt Je_encha wainkiachmaj_ai. Antsu nu peprunam Uunt Yus ashí tujincha nu tura núnisan_n Muriksha nu péprun pímiutkui takamtsuk Níiniuyi.

23 Nu péprunmasha tsawai₋nantusha kashí₋nantusha atsumchamai. Antsu Yusa winchar_i tsáapin awajm_ai. Núnisan_n Muriksha tsáapin awajm_ai.

24 Nu tsáapnijia_isha ashí nun_kanmay_a shuar wekasartatui. Tura ashí nun_kanam akupin ainia nusha nu_j yujainiak ni pé_nkerij_i nuna shiir awajtuiniawai.

25 Tura kashi atsá asamtai tuke tsawaiti. Tuma asamtai wáitir_i tuke epenchamu ártatui.

26 Tura ashí nun_kanam pé_nker ana nuna nu_j itiaartatui.

27 Tura yajauchikia pe_nké wayashat_atui. Mu_jmiainian túrincha tura ana_nkartincha pe_nké wayachartatui. Antsu áyatik shuar tuke iwiaaku pujutai papinium naar_i aarma ainia nuke wayawartatui. Nu papincha Murik takakui.

22

1 Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmay_a ti saawi jiinm_ai. Nu pujutaisha Yusna tura Muriknauyi.

2 Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nuk_esha ashí nun_kanmay_a shuar tsuámatainti.

3-4 Ashí yajauchia nuka atsuttawai. Uunt akupin pujutai, Yúsnasha Murikniasha, nu_jn aa asamtai ni shuar_i ti paant wainiainiak tikishmatrartatui. Tura nijia_incha ni naar_i anujmankartatui.

5 Tura káshisha atsuttawai. Nu_j pujuinia nuka shiripkincha etsan_a atsumchartatui. Uunt Yúsak tuke tsáapin awajtiatui. Tura ni shuar_i tuke iniannatsuk akupkartatui.

Jesukrístu tátintri pe_nké nuntumsai

6 Nuyá suntar turutm_ai “Ju chicham ti nekas asa nekas enentáimtusminiaiti. Uunt Yus yaunchu níiniun etserniun ni chicham_en enentáimtikramia núnisan_n yamaikia ni suntar_in akuptuk wárik túrunatta nuna ashí ni shuar_in ujaku_iti.”

7 “Ti wárik winittiaj_ai” tawai Murikkia.

Shuar ju papinium Yusa Chichame áarman umirna nuka shiir warasminiaiti.

8 Wi, Juan, ju_na mash ísan mash antukmaj_ai. Tura mash ísan antukan nayaimpin-may_a suntar iniaktursama nuna shiir awajsataj tusan tikishmatramj_ai.

9 Túram turutm_ai “Pe_nke áinkiaip. Wisha Yusa yáintrintj_ai ámij_i métek tura yat-sumj_i métek. Yúsnan etserin ásar tura ju papinium áarma nuna umirainiak Yusa yáintr_i áiniawai niisha. Yúsak shiir awajsatniuiti.”

¹⁰ Nuyá ataksha turutmiai “Ju papínium aarma Yusna asantai úukam ikiusaip. Ashí túrunatin tsawant ishichik ajatesai.

¹¹ Nu jeatsainkia yajauch shuarka tuke yajauch túruki wetí. Núnisan muíjmiainian túraka tuke túruki wetí. Antsu péñkeran túraka péñkeran túruki wetí. Núnisan esetar enentáimniusha tuke esetar Yusjai wekasati.”

¹² Muriksha tawai “Eta, ti wárik winittiajai. Túran ti shíirmachin ashí péñker túramujai métek súsatniua nuna takukin winittiajai.

¹³ Wiitjai. Yámankamtaiknumia amúanmasha tuke pjuwitjai. Wisha A rétranmaya Y rétranam ashí retra áintsaitjai.” Tu tawai.

¹⁴ Ni pushiri péñker nijiamatniua núnisan péñker túrinia nú shuar shiir warasminiaiti. Nu shuar nu pepru wáitirincha wayamniaiti. Túrar tuke iwiaaku pujutai numinmaya yuamniaiti.

¹⁵ Tura antsu Yúsan enentáimtachuka, wawekratniuka, tsanirmatan pujurainia nuka, mañkartinkia, ántar-yus tikishmatniuka, tura ashí shuar wáitian wararainiak tuke túrin ainia nuka aa matsatainiak penké wayachmin áiniawai.

¹⁶ “Wi, Jesus, ashí Yus-shuaran ujakarat tusan winia suntarun akupkajai. Wikia Tawit Weeitjai. Túrasha Tawitia Úuntriñtjai. Wikia ti tsáapin yaa, yáñkuamia áintsañketjai.” Tu tawai.

¹⁷ Yusa Shiir Wakanisha tura Murik anajmarmasha “Winitiarum” tuiniawai.

Tura juna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan penké kuítchajai umartí.

¹⁸ Ashí shuar ju papinium Yus-Chicham aarma nuna antukarun juna ujaajai: Shuar jui áarman chikichan pataakka Yus nin ti wáitsatin jui aarma nuna patattsattawai.

¹⁹ Núnisan shuar jui áarman emeneakuinkia Yus ni naarin iwiaaku pujutai papiniu-mia japirattawai. Tura ti shiir péprunam wayatniun suritkiattawai. Nu péprusha tura nu papisha jui paant ujakma áiniawai.

²⁰ Jú papí áantratniun ujakua nu tawai “Eta, ti wari winittiajai.” Pai, núnisan atí. Wari winitiá, Uunt Jesusá.

²¹ Ii Uuntri Jesukrístu atumniasha shiir yainmakarti.

Nuke atí.